

宿雨清幾句

朝陽晨帝城

望奔人樂業

瓊上踏歌行



全唐詩

十七

中华古典精华文库

全 唐 诗

(第十七部)

第六百二十一卷

卷 621_1 【置酒行】

陆龟蒙

落尘花片排香痕，阑珊醉露栖愁魂。洞庭波色惜不得，
东风领入黄金尊。千筠擢毫春谱大，碧舞红啼相倡和。
安知寂寞西海头，青蘂未垂孤凤饿。

卷 621_2 【江湖散人歌】

陆龟蒙

江湖散人天骨奇，短发搔来蓬半垂。手提孤篁曳寒茧，
口诵太古沧浪词。词云太古万万古，民性甚野无风期。
夜栖止与禽兽杂，独自构架纵横枝。因而称曰有巢氏，
民共敬贵如君师。当时只效乌鹊辈，岂是有意陈尊卑。
无端后圣穿凿破，一派前导千流随。多方恼乱元气死，
日使文字生奸欺。圣人事业转销耗，尚有渔者存熙熙。
风波不独困一士，凡百器具皆能施。罟疏沪腐鲈鳔脱，
止失检驭无谗疵。人间所谓好男子，我见妇女留须眉。

奴颜婢膝真乞丐，反以正直为狂痴。所以头欲散，
不散弁峨巍。所以腰欲散，不散珮陆离。行散任之适，
坐散从倾欹；语散空谷应，笑散春云披；衣散单复便，
食散酸咸宜；书散浑真草，酒散甘醇醅；屋散势斜直，
树散行参差；客散忘簪履，禽散虚笼池。物外一以散，
中心散何疑？不共诸侯分邑里，不与天子专隍陴。
静则守桑柘，乱则逃妻儿。金镳贝带未尝识，
白刃杀我穷生为。或闻蕃将负恩泽，号令铁马如风驰。
大君年小丞相少，当轴自请都旌旗。神锋悉出羽林仗，
绩画日月蟠龙螭。太宗基业甚牢固，小丑背叛当歼夷。
禁军近自肃宗置，抑遏辅国争雄雌。必然大段剪凶逆，
须召劲勇持军麾。四方贼垒犹占地，死者暴骨生寒饥。
归来辄拟荷锄笠，诟吏已责租钱迟。兴师十万一日费，
不啻千金何以支。只今利口且箕敛，何暇俯首哀惸嫠。
均荒补败岂无术，布在方册撑颓隤。冰霜襦袴易反掌。
白面诸郎殊不知。江湖散人悲古道，悠悠幸寄羲皇傲。
官家未议活苍生，拜赐江湖散人号。

卷 621_3 【五歌·放牛】

陆龟蒙

江草秋穷似秋半，十角吴牛放江岸。邻肩抵尾乍依隈，
横去斜奔忽分散。荒陂断堑无端入，背上时时孤鸟立。
日暮相将带雨归，田家烟火微茫湿。

卷 621_4 【五歌·水鸟】

陆龟蒙

水鸟山禽虽异名，天工各与双翅翎。雏巢吞啄即一例，游处高卑殊不停。则有觜铍爪戟劲立直视者，击搏挽裂图膾腥。如此等色恣豪横，耸身往往凌青冥。为人罗绊取材力，韦鞬彩绶悬金铃。三驱不以鸟捕鸟，矢下先得闻诸经。超然可继义勇后，恰似有志行天刑。鸥闲鹤散两自遂，意思不受人丁宁。今朝棹倚寒江汀，春鉏翡翠参鸿鶩。孤翘侧睨瞥灭没，未是即肯驯檐楹。妇女衣襟便佞舌，始得金笼日提挈。精神卓犖背人飞，冷抱蒹葭宿烟月。我与时情大乖刺，只是江禽有毛发。殷勤谢汝莫相猜，归来长短同群活。

卷 621_5 【五歌·刈获】

陆龟蒙

自春徂秋天弗雨，廉廉早稻才遮亩。芒粒稀疏熟更轻，地与禾头不相拄。我来愁筑心如堵，更听农夫夜深语。凶年是物即为灾，百阵野鳧千穴鼠。平明抱杖入田中，十穗萧条九穗空。敢言一岁困仓实，不了如今朝暮春。天职谁司下民籍，苟有区区宜析析。本作耕耘意若何，虫豸兼教食人食。古者为邦须蓄积，鲁饥尚责如齐余。

今之为政异当时，一任流离恣征索。平生幸遇华阳客，
向日餐霞转肥白。欲卖耕牛弃水田，移家且傍三茅宅。

卷 621_6 【五歌·雨夜】

陆龟蒙

屋小茅干雨声大，自疑身著蓑衣卧。兼似孤舟小泊时，
风吹折苇来相佐。我有愁襟无可那，才成好梦刚惊破。
背壁残灯不及萤，重挑却向灯前坐。

卷 621_7 【五歌·食鱼】

陆龟蒙

江南春旱鱼无泽，岁晏未曾腥鼎鬲。今朝有客卖鲈鲂，
手提见我长于尺。呼儿舂取红莲米，轻重相当加十倍。
且作吴羹助早餐，饱卧晴檐曝寒背。横戈负羽正纷纷，
只用骁雄不用文。争如晓夕讴吟样，好伴沧洲白鸟群。

卷 621_8 【丁隐君歌】

陆龟蒙

华阳道士南游归，手中半卷青萝衣。自言逋客持赠我，

乃是钱塘丁翰之。连江大抵多奇岫，独话君家最奇秀。
盘烧天竺春笋肥，琴倚洞庭秋石瘦。草堂暗引龙泓溜，
老树根株若蹲兽。霜浓果熟未容收，往往儿童杂猿狖。
去岁猖狂有黄寇，官军解散无人斗。满城奔迸翰之闲，
只把枯松塞圭窦。前度相逢正卖文，一钱不直虚云云。
今来利作采樵客，可以抛身麋鹿群。丁隐君，丁隐君，
叩头且莫变名氏，即日更寻丁隐君。

卷 621_9 【紫溪翁歌】

陆龟蒙

一丘之木，其栖深也屋，吾容不辱；一溪之石，
其居平也席，吾劳以息；一窦之泉，其音清也弦，
吾方在悬。得乎人，得乎天，吾不知所以然而然。

卷 621_10 【麋歌】

陆龟蒙

采江之鱼兮，朝船有鲈。采江之蔬兮，暮筐有蒲。
左图且书，右琴与壶。寿欤夭欤，贵欤贱欤。

卷 621_11 【鹤媒歌】

陆龟蒙

偶系渔舟汀树枝，因看射鸟令人悲。盘空野鹤忽然下，
背翳见媒心不疑。媒闲静立如无事，清唳时时入遥吹。
裴回未忍过南塘，且应同声就同类。梳翎宛若相逢喜，
只怕才来又惊起。窥鳞啄藻乍低昂，立定当胸流一矢。
媒欢舞跃势离披，似谄功能邀弩儿。云飞水宿各自物，
妒侣害群犹尔为。而况世间有名利，外头笑语中猜忌。
君不见荒陂野鹤陷良媒，同类同声真可畏。

卷 621_12 【庆封宅古井行】

陆龟蒙

古甃团团藓花碧，鼎渫寒泉深百尺。江南戴白尽能言，
此地曾为庆封宅。庆封嗜酒荒齐政，齐人剪族封奔迸。
虽过鲁国羞鲁儒，欲弄吴民窃吴柄。吴分岩邑号朱方，
子家负固心强梁。泽车豪马驰似水，锦凤玉龙森若墙。
一朝云梦围兵至，胸陷锋铓脑涂地。因知富德不富财，
颜氏箴瓢有深意。宣父尝违盗泉水，懦夫立事贪夫止。
今歌此井示吴人，断绠沉瓶自兹始。

卷 621_13 【小鸡山樵人歌】

陆龟蒙

长其船兮利其斧，输予薪兮勿予侮。田予登兮穀予庾，
突晨烟兮蓬缕缕。窗有明兮编有古，饱而安兮惟编是伍，
时不用兮吾无汝抚。

卷 621_14 【吴俞儿舞歌·剑俞】

陆龟蒙

枝月喉，棹霜脊，北斗离离在寒碧。龙魂清，虎尾白，
秋照海心同一色。熏影吒沙千影侧，神豪发直。
四睨之人股佶栗，欲定不定定不得。舂牍残，儿且止。
狄胡有胆大如山，怖亦死。

卷 621_15 【吴俞儿舞歌·矛俞】

陆龟蒙

手盘风，头背分，电光战扇，欲刺敲心留半线。
缠肩绕脰，濛合眩旋，卓植赴列，夺避中节。
前冲函礼穴，上指孛彗灭，与君一用来有截。

卷 621_16 【弩俞】

陆龟蒙

牛来开弦，人为置镞。捩机关，迸山谷，鹿骇涩，隼击迟。
析毫中睫，洞腋分龟。达坚垒，残雄师，可以冠猛乐壮曲。
抑扬蹈厉，有裂犀兕之气者，非公与？

卷 621_17 【句曲山朝真词二首·迎真】

陆龟蒙

九华磬答寒泉急，十绝幡摇翠微湿。司命旂旌未下来，
焚香抱简凝神立。残星下照霓襟冷，缺月才分鹤轮影。
空洞灵章发一声，春来万壑烟花醒。

卷 621_18 【句曲山朝真词二首·送真】

陆龟蒙

紫云凤髻飘然解，玉钺玄干俨先迈。朝真弟子悄无言，
再拜碧杯添沆瀣。火铄跳跃龙毛盖，脑发青青赳赳碎。
万象销沉一瞬间，空余月外闻残佩。

卷 621_19 【战秋辞】

陆龟蒙

八月空堂，前临隙荒。抽关散扇，晨乌未光。左右物态，
森疏强梁。天随子爽，駮恟栗，恍军庸之我当。濠然而沟，
垒然而墙。麝然而桂，队然而篁。杉巖攢矛，蕉标建常。
檣艾矢束，矫蔓弦张。蛙合助吹，鸟分启行。
若革进而金止，固违阴而就阳。无何，云颜师，风旨伯。
苍茫惨澹，隳危撼划。烟蒙上焚，雨阵下棘。如濠者注，
如垒者辟；如麝者亚，如队者析；如矛者折，如常者拆；
如矢者仆，如弦者磔；如吹者暗，如行者惕。
石有发兮尽累，木有耳兮咸馘。云风雨烟，乘胜之势骄；
杉篁蕉蔓，败北之气撼。天随子曰：吁，秋无神则已，
如其有神，吾为尔羞之。南北畿圻，盗兴五期。方州大都，
虎节龙旗。瓦解冰碎，瓜分豆离。斧抵耄老，干穿乳儿。
昨宇今烬，朝人暮尸。万犊一啖，千仓一炊。扰践边朔，
殄伤蜚夷。制质守帅，披攘城池。弓弩不刃，甲缀不离。
凶渠歌笑，裂地无疑。天有四序，秋为司刑。少昊负宸，
亲朝百灵。蓐收相臣，太白将星。可霾可电，可风可霆。
可埴溺颠陷，可夭札迷冥。曾忘麀剪，自意澄宁。
苟蜡礼之云责，触天怒而谁丁，奈何欺荒庭？凌坏砌，
搬崇茝，批宿蕙，揭编茅而逞力，断纬萧而作势，
不过约弱欹垂，戕残废替。可谓弃其本而趋其末，
舍其大而从其细也。辞犹未已，色若愧耻，于是堕者止，
偃者起。

卷 621_20 【祝牛宫辞】

陆龟蒙

四牯三牯，中一去乳。天霜降寒，纳此室处。
老农拘拘，度地不亩。东西几何，七举其武。
南北几何，丈二加五。偶楹当闲，载尺入土。
太岁在亥，余不足数。上缔蓬茅，下远官府。
耕耨以时，饮食得所。或寝或卧，免风免雨。
宜尔子孙，实我仓庾。

卷 621_21 【迎潮送潮辞·迎潮】

陆龟蒙

江霜严兮枫叶丹，潮声高兮墟落寒。鸥巢卑兮渔箔短，
远岸没兮光烂烂。潮之德兮无际，既充其大兮又充其细。
密幽人兮款柴门，寂寞流连兮依稀旧痕。
濡腴泽槁兮潮之恩，不尸其功兮归于混元。

卷 621_22 【迎潮送潮辞·送潮】

陆龟蒙

潮西来兮又东下，日染中流兮红洒洒。汀葭苍兮屿蓼枯，

风骚牢兮愁烟孤。大几望兮微将晦翳，睨瀛溶兮敛然而退。
爰长波兮数数，一幅巾兮无纓可濯。帆生尘兮楫有衣，
怅潮之还兮吾犹未归。

卷 621_23 【问吴宫辞】

陆龟蒙

彼吴之宫兮江之那涯，复道盘兮当高且斜。
波摇疏兮雾濛箔，菡萏国兮鸳鸯家。鸾之箫兮蛟之瑟，
骈筠参差兮界丝密。宴曲房兮上初日，
月落星稀兮歌酣未毕。越山丛丛兮越溪疾，
美人雄剑兮相先后出。火姑苏兮沼长洲，
此宫之丽人兮留乎不留。霜氛重兮孤榜晓，
远树扶苏兮愁烟悄眇。欲摭愁烟兮问故基，
又恐愁烟兮推白鸟。

第六百二十二卷

卷 622_1 【萤诗】

陆龟蒙

肖翘虽振羽，戚促尽疑冰。风助流还急，烟遮点渐凝。
不须轻列宿，才可拟孤灯。莫倚隋家事，曾烦下诏征。

卷 622_2 【蝉】

陆龟蒙

只凭风作使，全仰柳为都。一腹清何甚，双翎薄更无。
伴貂金换酒，并雀画成图。恐是千年恨，偏令落日呼。

卷 622_3 【秋热】

陆龟蒙

自惜秋捐扇，今来意未衰。殷勤付柔握，淅沥待清吹。

午气朱崖近，宵声白羽随。总如南国候，无复婕妤悲。

卷 622_4 【村中晚望】

陆龟蒙

抱杖柴门立，江村日易斜。雁寒犹忆侣，人病更离家。
短鬓看成雪，双眸旧有花。何须万里外，即此是天涯。

卷 622_5 【四明山诗·石窗】

陆龟蒙

石窗何处见，万仞倚晴虚。积霭迷青琐，残霞动绮疏。
山应列圆峤，宫便接方诸。只有三奔客，时来教隐书。

卷 622_6 【四明山诗·过云】

陆龟蒙

相访一程云，云深路仅分。啸台随日辨，樵斧带风闻。
晓著衣全湿，寒冲酒不醺。几回归思静，仿佛见苏君。

卷 622_7 【四明山诗·云南】

陆龟蒙

云南更有溪，丹砾尽无泥。药有巴賸卖，枝多越鸟啼。
夜清先月午，秋近少岚迷。若得山颜住，芝差手自携。

卷 622_39 【四明山诗·云北】

陆龟蒙

云北是阳川，人家洞壑连。坛当星斗下，楼拶翠微边。
一半遥峰雨，三条古井烟。金庭如有路，应到左神天。

卷 622_40 【四明山诗·鹿亭】

陆龟蒙

鹿亭岩下置，时领白麕过。草细眠应久，泉香饮自多。
认声来月坞，寻迹到烟萝。早晚吞金液，骑将上绛河。

卷 622_41 【四明山诗·樊榭】

陆龟蒙

樊榭何年筑，人应白日飞。至今山客说，时驾玉麟归。
乳蒂缘松嫩，芝台出石微。凭栏虚目断，不见羽华衣。

卷 622_42 【四明山诗·潺湲洞】

陆龟蒙

石浅洞门深，潺潺万古音。似吹双羽管，如奏落霞琴。
倒穴漂龙沫，穿松溅鹤襟。何人乘月弄，应作上清吟。

卷 622_43 【四明山诗·青棣子】

陆龟蒙

山实号青棣，环冈次第生。外形坚绿壳，中味敌璚英。
堕石樵儿拾，敲林宿鸟惊。亦应仙吏守，时取荐层城。

卷 622_44 【四明山诗·鞠侯】

陆龟蒙

何事鞠侯名，先封在四明。但为连臂饮，不作断肠声。
野蔓垂缨细，寒泉佩玉清。满林游宦子，谁为作君卿。

卷 622_45 【奉和袭美赠魏处士五贶诗·五泻舟】

陆龟蒙

样自桐川得，词因隐地成。好渔翁亦喜，新白鸟还惊。
沙际拥江沫，渡头横雨声。尚应嫌越相，遗祸不遗名。

卷 622_46 【奉和袭美赠魏处士五贶诗·华顶杖】

陆龟蒙

万古阴崖雪，灵根不为枯。瘦于霜鹤胫，奇似黑龙须。
拄访谭玄客，持看泼墨图。湖云如有路，兼可到仙都。

卷 622_47 【奉和袭美赠魏处士五贶诗·太湖砚】

陆龟蒙

谁截小秋滩，闲窥四绪宽。绕为千嶂远，深置一潭寒。
坐久云应出，诗成墨未干。不知新博物，何处拟重刊。

卷 622_48 【奉和袭美赠魏处士五贶诗·乌龙养和】

陆龟蒙

养和名字好，偏寄道情深。所以亲逋客，兼能助五禽。
倚肩沧海望，钩膝白云吟。不是逍遥侣，谁知世外心。

卷 622_49 【奉和袭美赠魏处士五贶诗·诃陵尊】

陆龟蒙

鱼骼匠成尊，犹残海浪痕。外堪欺玳瑁，中可酌昆仑。
水绕苔矶曲，山当草阁门。此中醒复醉，何必问乾坤。

卷 622_50 【奉酬袭美早春病中书事】

陆龟蒙

只贪诗调苦，不计病容生。我亦休文瘦，君能叔宝清。
药须勤一服，春莫累多情。欲入毗耶问，无人敌净名。

卷 622_51 【又酬次韵】

陆龟蒙

从来多远思，尤向静中生。所以令心苦，还应是骨清。
酒香偏入梦，花落又关情。积此风流事，争无后世名。

卷 622_52 【奉酬袭美秋晚见题二首】

陆龟蒙

为爱晚窗明，门前亦懒行。图书看得熟，邻里见还生。
鸟啄琴材响，僧传药味精。缘君多古思，携手上空城。

何事乐渔樵，巾车或倚桡。和诗盈古箧，赊酒半寒瓢。
失雨园蔬赤，无风蛭叶凋。清言一相遗，吾道未全消。

卷 622_53 【奉和袭美初冬章上人院】

陆龟蒙

每伴来方丈，还如到四禅。菊承荒砌露，茶待远山泉。
画古全无迹，林寒却有烟。相看吟未竟，金磬已泠然。

卷 622_54 【袭美见题郊居十首，因次韵酬之以伸荣谢】

陆龟蒙

近来唯乐静，移傍故城居。闲打修琴料，时封谢药书。
夜停江上鸟，晴晒箬中鱼。出亦图何事，无劳置栈车。

倩人医病树，看仆补衡茅。散发还同阮，无心敢慕巢。
简便书露竹，尊待破霜匏。日好林间坐，烟萝近欲交。

倭僧留海纸，山匠制云床。懒外应无敌，贫中直是王。
池平鸥思喜，花尽蝶情忙。欲问新秋计，菱丝一亩强。

故山空自掷，当路竟谁知。只有经时策，全无养拙资。
病深怜灸客，炊晚信樵儿。谩欲陈风俗，周官未采诗。

福地能容辔，玄关讵有扉。静思琼版字，闲洗铁筇衣。
鸟破凉烟下，人冲暮雨归。故园秋草梦，犹记绿微微。

水影沉鱼器，邻声动纬车。燕轻捎坠叶，蜂懒卧焦花。
说史评诸例，论兵到百家。明时如不用，归去种桑麻。

禹穴奇编缺，雷平异境残。静吟封篆检，归兴削帆竿。
白石堪为饭，青萝好作冠。几时当斗柄，同上步罡坛。

强起披衣坐，徐行处暑天。上阶来斗雀，移树去惊蝉。
莫问盐车骏，谁看酱瓿玄。黄金如可化，相近买云泉。

野入青芜巷，陂侵白竹门。风高开栗刺，沙浅露芹根。
迸鼠缘藤桁，饥乌立石盆。东吴虽不改，谁是武王孙。

疏慵真有素，时势尽无能。风月虽为敌，林泉幸未憎。
酒材经夏阙，诗债待秋征。只有君同癖，闲来对曲肱。

卷 622_55 【和张广文贲旅泊吴门次韵】

陆龟蒙

高秋能叩触，天籁忽成文。苦调虽潜倚，灵音自绝群。
茅峰曾醺斗，笠泽久眠云。许伴山中躅，三年任一醺。

卷 622_56 【又次前韵酬广文】

陆龟蒙

独倚秋光岸，风漪学簟文。玄堪教凤集，书好换鹅群。

叶堕平台月，香消古径云。强歌非白纻，聊以送余醺。

卷 622_57 【送延陵张宰】

陆龟蒙

春尽未离关，之官亦似闲。不嫌请薄俸，为喜带名山。
默祷三真后，高吟十字还。只应江上鸟，时下讼庭间。

卷 622_58 【送人罢官归茅山】

陆龟蒙

呼僮晓拂鞍，归上大茅端。薄俸虽休入，明霞自足餐。
暗霜松粒赤，疏雨草堂寒。又凿中峰石，重修醮月坛。

卷 622_59 【立春日】

陆龟蒙

去年花落时，题作送春诗。自为重相见，应无今日悲。
道孤逢识寡，身病买名迟。一夜东风起，开帘不敢窥。

卷 622_60 【中秋夜寄友生】

陆龟蒙

秋来一度满，重见色难齐。独坐犹过午，同吟不到西。
疏芒唯斗在，残白合河迷。更忆前年望，孤舟泊大溪。

第六百二十三卷

卷 623_1 【奉和袭美古杉三十韵】

陆龟蒙

众木尽相遗，孤芳独任奇。锺天形磈兀，当殿势頽危。
恐是夸娥怒，教临截薛衰。节穿开耳目，根瘦坐熊羆。
世只论荣落，人谁问等衰？有巔从日上，无叶与秋欺。
虎搏应难动，雕蹲不敢迟。战锋新缺鬣，烧岸黑滋鬣。
斗死龙骸杂，争奔鹿角差。肢销洪水脑，棱耸梵天眉。
磔索珊瑚涌，森严獬豸窥。向空分荦指，冲浪出鲸髻。
杨仆船撞在，蚩尤阵纛隳。下连金粟固，高用铁菱披。
挺若苻坚槊，浮于祖纳椎。峥嵘惊露鹤，趑趄閤云螭。
傍宇将支压，撑霄欲抵巇。背交虫臂掎，相向鹖拳追。
格笔差犹立，阶干卓未麾。鬼神应暗画，风雨恐潜移。
已觉寒松伏，偏宜后土疲。好邀清啸傲，堪映古茅茨。
材大应容蝎，年深必孕夔。后雕依佛氏，初植必僧弥。
拥肿烦庄辩，槎牙费庾词。咏多灵府困，搜苦化权卑。
类既区中寡，朋当物外推。蟠桃标日域，珠草侍仙墀。
真宰诚求梦，春工幸可医。若能嘘嶰竹，犹足动华滋。

卷 623_2 【奉和袭美新秋言怀三十韵次韵】

陆龟蒙

身闲唯爱静，篱外是荒郊。地僻怜同巷，庭喧厌累巢。
岸声摇舴艋，窗影辨蟪蛄。径只溪禽下，关唯野客敲。
竹冈从古凸，池缘本来幽。早藕擎霜节，凉花束紫梢。
渔情随锤网，猎兴起鸣髑。好梦经年说，名方著处抄。
才疏惟自补，技痒欲谁抓？窗静常悬杂，鞭闲不正鞘。
山衣轻斧藻，天籁逸弦匏。蕙转风前带，桃烘雨后胶。
藓干黏晚砌，烟湿动晨庖。沉约便图籍，扬雄重酒肴。
目曾窥绝洞，耳不犯征铙。历外穷飞朔，蓍中记伏爻。
石林空寂历，云肆肯哓哓？松桂何妨蠹，龟龙亦任嘲。
未能丹作髓，谁相紫为胞。莫把荣枯异，但和大小包。
由弓猿不捷，梁圈虎忘虬。旧友怀三益，关山阻二嶠。
道随书簏古，时共钓轮抛。好作忘机士，须为莫逆交。
看君驰谏草，怜我卧衡茅。出处虽冥默，薰莸肯溷殽。
岸沙从鹤印，崖蜜劝人搯。白菌盈枯枿，黄精满绿筓。
仙因隐居信，禅是净名教。勿谓江湖永，终浮一大猱。

卷 623_3 【和袭美江南书情二十韵寄秘阁韦校书贻之商洛...次韵】

陆龟蒙

我志如鱼乐，君词称凤衔。暂来从露冕，何事买云岩。

水石应容病，松篁未听谗。罐香松蠹腻，山信药苗缄。
爱鹭欹危立，思猿矍铄獫。谢才偏许朶，阮放最怜咸。
大乐宁忘缶，奇工肯顾瑱。客愁迷旧隐，鹰健想秋鸢。
砚缺犹慵琢，文繁却要芟。雨余幽沼净，霞散远峰巉。
洗笔烟成段，培花土作杓。访僧还觅伴，医鹤自须监。
荒庙犹怀季，清滩几梦严。背风开蠹简，冲浪试新帆。
闷忆年支酒，闲裁古样衫。钓家随野舫，仙蕴逐雕函。
度岁赊羸马，先春买小蟊。共疏泉入竹，同坐月过杉。
染翰穷高致，怀贤发至诚。不堪潘子鬓，愁促易髟髟。

卷 623_4 【忆袭美洞庭观步奉和次韵】

陆龟蒙

闻君游静境，雅具更摐摐。竹伞遮云径，藤鞋踏藓缸。
杖斑花不一，尊大瘿成双。水鸟行沙屿，山僧礼石幢。
已甘三秀味，谁念百牢腔。远棹投何处，残阳到几窗。
仙谣珠树曲，村饷白醅缸。地里方吴会，人风似冉厖。
探幽非遁世，寻胜肯迷邦。为读江南传，何贤过二庞。

卷 623_5 【江墅言怀】

陆龟蒙

病身兼稚子，田舍劣相容。迹共公卿绝，贫须稼穡供。

月方行到闰，霜始近言浓。树少栖禽杂，村孤守犬重。
汀洲藏晚弋，篱落露寒春。野弁欹还整，家书拆又封。
杉篁宜夕照，窗户倚疏钟。南北唯闻战，纵横未胜农。
大春虽苦学，叔夜本多慵。直使貂裘弊，犹堪过一冬。

卷 623_6 【自和次前韵】

陆龟蒙

命既时相背，才非世所容。著书粮易绝，多病药难供。
梦为怀山数，愁因戒酒浓。鸟媒呈不一，鱼寨下仍重。
晚桁蓑兼褐，晴檐织带春。著签分水味，标石认田封。
此地家三户，何人禄万钟。草堂聊当贵，金穴任轻农。
把钓竿初冷，题诗笔未慵。莫忧寒事晚，江上少严冬。

卷 623_7 【秋日遣怀十六韵寄道侣】

陆龟蒙

尽日临风坐，雄词妙略兼。共知时世薄，宁恨岁华淹。
且把灵方试，休凭吉梦占。夜然烧汞火，朝炼洗金盐。
有路求真隐，无媒举孝廉。自然成啸傲，不是学沉潜。
水恨同心隔，霜愁两鬓沾。鹤屏怜掩扇，乌帽爱垂檐。
雅调宜观乐，清才称典签。冠纓玄发少，书健紫毫尖。
故疾因秋召，尘容畏日黔。壮图须行行，儒服谩襜襜。

片石聊当枕，横烟欲代帘。蠹根延穴蚁，疏叶漏庭蟾。
药鼎高低铸，云庵早晚苫。胡麻如重寄，从谓我无厌。

卷 623_8 【京口与友生话别】

陆龟蒙

共是悲秋客，相逢恨不堪。雁频辞蓟北，人尚在江南。
名利机初发，樵渔事先谙。松门穿戴寺，荷径绕秦潭。
绳检真难束，疏慵却易耽。枕当高树稳，茶试远泉甘。
架上经唯一，尊前雅只三。风云劳梦想，天地人醺酣。
历自尧阶数，书因禹穴探。御龙虽世禄，下马亦清谭。
国计徒盈策，家储不满甔。断帘从燕出，嬾弁请人簪。
木坠凉来叶，山横霁后岚。竹窗深窈窕，苔洞绿龖龖。
积行依颜子，和光则老聃。杖诚为虎节，披信作蛟函。
养鹭看窥沼，寻僧助结庵。功名思马援，歌唱咽羊昙。
乞食羞孤凤，无衣羨八蚕。系帆留宿客，吟句任羸骖。
宠鹤空无卫，占乌未见覃。香还须是桂，青会出于蓝。
蜀酒时倾甌，吴虾遍发坩。玉封千挺藕，霜闭一筒柑。
惜佩终邀祸，辞环好激贪。宗溟虽畎浍，成厦必榱桷。
碧玉雕琴荐，黄金饰剑鐔。烟缘莎砌引，水为药畦担。
博物君能继，多才我尚惭。别离犹得在，秋鬓未鬖鬖。

卷 623_9 【丹阳道中寄友生】

陆龟蒙

烟树绿微微，春流浸竹扉。短蓑携稚去，孤艇载鱼归。
海俗芦编室，村娃练束衣。旧栽奴橘老，新刈女桑肥。
锦鲤冲风掷，丝禽掠浪飞。短亭幽径入，陈庙数峰围。
地废金牛暗，陵荒石兽稀。思君同一望，帆上怨余晖。

卷 623_10 【寄茅山何道士】

陆龟蒙

终身持玉舄，丹诀未应传。况是曾同宿，相违便隔年。
问颜知更少，听话想逾玄。古篆文垂露，新金汞绝烟。
蜂供和饵蜜，人寄买溪钱。紫燕长巢硿，青龟忽上莲。
筐藏征隐诏，囊佩摄生篇。圃暖芝台秀，岩春乳管圆。
池栖子孙鹤，堂宿弟兄仙。幸阅灵书次，心期赐一编。

卷 623_11 【江南秋怀寄华阳山人】

陆龟蒙

栟发凉天曙，含毫故国情。归心一夜极，病体九秋轻。

忽起檐楸咏，因悲络纬鸣。逢山即堪隐，何路可图荣。
揲策空占命，持竿不钓名。忘忧如有待，纵懒似无营。
小径才分草，斜扉劣辨荆。冷荷承露药，疏菊卧烟茎。
谱为听琴阅，图缘看海幘。鹭毛浮岛白，鱼尾撇波赭。
庭橘低攀嗅，园葵旋折烹。饿乌窥食案，斗鼠落书棚。
种豆悲杨恽，投瓜忆卫旌。东林谁处士，南郭自先生。
分野星多蹇，连山卦少亨。衣裾徒博大，文籍漫纵横。
兰叶骚人佩，莼丝内史羹。鸛冠难适越，羊酪未饶伧。
倚啸微抽恨，论玄好析醒。栖迟劳鼓篋，豪侠爱金籝。
炼药传丹鼎，尝茶试石甕。沼连枯苇暗，窗对脱梧明。
未达讥张翰，非才嫉祢衡。远怀魂易黯，幽愤骨堪惊。
砺缺知矛利，磨瑕见璧瑛。道源疏滴沥，儒肆售精诚。
敢叹良时掷，犹胜乱世撄。相秦犹几死，王汉尚当黥。
饮啄期应定，穷通势莫争。髡钳为皂隶，谭笑得公卿。
浴日安知量，追风不计程。尘埃张耳分，肝胆季心倾。
谕蜀专操檄，通瓯独请缨。匹夫能曲踊，万骑可横行。
许国轻妻子，防边重战耕。俄分上尊酒，骤厌五侯鯖。
静默供三语，从容等一枰。弘深司马法，雄杰贰师兵。
朔雪埋烽燧，寒笳裂旆旌。乘时收句注，即日扫欃枪。
武昔威殊俗，文今被八弦。琮璜陈始毕，韶夏教初成。
芽孽群妖灭，松筠百度贞。郎官青琐拜，使者绣衣迎。
帝道将云辟，尧波渐砥平。学徒羞说霸，佳士耻为跽。
负杖歌栖亩，操觚赋北征。才当曹斗怯，书比惠车盈。
谢氏怜儿女，郗家贵舅甥。唯荒稚珪宅，莫赠景山枪。
贤彦风流远，江湖思绪萦。讴哑摇舴艋，出没漾鸂鶒。
晚树参差碧，奇峰迢递晴。水喧揔紫芡，村响□香粳。
荷笠渔翁古，穿篱守犬狞。公衫白纈卷，田饷绿笥擎。

地与膏腴错，人多富寿并。相欢时帖泰，独坐岁峥嵘。
唧唧蛩吟壁，连轩鹤舞楹。戍风飘叠鼓，邻月动哀箏。
未得文章力，何由俸禄请。和铅还搢搢，持斧自丁丁。
惊惧疑凋朽，功勤过屑琼。凝神披夕秀，尽力取朝英。
蠹简开尘篋，寒灯立晓檠。静翻词客系，闲难史官评。
天地宁舒惨，山川自变更。只能分跼惠，谁解等殇彭？
项岂重瞳圣，夔犹一足^{轻足}。阮高酣麹蘖，庄达谢牺牲。
醋舌无劳话，宽心岂可盛？但从垆冶锻，莫受罽罗婴。
砚拨萍根洗，舟冲蓼穗撑。短床编翠竹，低机凭红桎。
霜信催杨柳，烟容裊杜蘅。桁排巢燕燕，屏画醉猩猩。
懒桧推岚影，飞泉撼玉琤。舳舻寻远近，握槊斗输赢。
枝压离披瓠，檐垂礧磊橙。忘情及宗炳，抱疾过刘桢。
野馈夸菰饭，江商贾蔗饴。送神抱瓦釜，留客上瓷觥。
举楫挥青剑，鸣榔扣远钲。鸟行沉莽碧，鱼队破泓澄。
手戟非吾事，腰镰且发硎。谅难求漂漂，聊欲取铮铮。
几叹虫甘蓼，还思鹿美苹。愁长难自剪，歌断有谁赓？
未去师黄石，空能说白珩。性湍休激浪，言莠罢抽萌。
地僻琴尊独，溪寒杖屨清。物齐消臆对，戈倒共心盟。
丝曳灵妃瑟，金涵太子笙。幽栖胶竹坞，仙虑驿蓬瀛。
想像珠襦凤，追飞翠蕊莺。雾帘深杳悄，云磬冷敲铿。
策字多阶品，华阳足弟兄。焚香凝一室，尽日思层城。
匿景崦嵫色，呀空渤澥声。吾当营巨黍，东去射长鲸。

卷 623_12 【送宣武从事越中按狱】

陆龟蒙

晓看呈使范，知欲敕星轺。水国难驱传，山城便倚桡。
秉筹先独立，持法称高标。旌旆临危堞，金丝发丽谯。
别愁当翠巘，冤望隔风潮。木落孤帆迥，江寒叠鼓飘。
客鸿吴岛尽，残雪剡汀消。坐想休秦狱，春应到柳条。

卷 623_13 【江南冬至和人怀洛下】

陆龟蒙

昔居清洛涯，长恨苦寒迟。自作江南客，稀迟下雪时。
有烟栖菊梗，无冻落杉枝。背日能寻径，临风尚覆棋。
鸟声浑欲转，草色固应知。与看平湖上，东流或片瀌。

卷 623_14 【谨和谏议罢郡叙怀六韵】

陆龟蒙

已报东吴政，初捐左契归。天应酬苦节，人不犯寒威。
江上思重借，朝端望载饥。紫泥封夜诏，金殿赐春衣。
对酒情何远，裁诗思极微。待升熔造日，江海问渔扉。

第六百二十四卷

卷 624_1 【二遗诗】

陆龟蒙

谁从毫末见参天，又到苍苍化石年。万古清风吹作籁，
一条寒溜滴成穿。闲追金带徒劳恨，静格朱丝更可怜。
幸与野人俱散诞，不烦良匠更雕镌。

卷 624_2 【鸂鶒】

陆龟蒙

词赋曾夸鸂鶒流，果为名误别沧洲。虽蒙静置疏笼晚，
不似闲栖折苇秋。自昔稻粱高鸟畏，至今珪组野人仇。
防徽避缴无穷事，好与裁书谢白鸥。

卷 624_3 【新秋月夕，客有自远相寻者，作吴体二首以赠】

陆龟蒙

风初寥寥月乍满，杉篁左右供余清。因君一话故山事，

忆鹤互应深溪声。云门老僧定未起，白阁道士遥相迎。
日闻羽檄日夜急，掉臂欲归岩下行。

惊闻远客访良夜，扶病起坐纶巾欹。清谈白紵思悄悄，
玉绳银汉光离离。三吴烟雾且如此，百越琛赆来何时。
林端片月落未落，强慰别情言后期。

卷 624_4 【闲书】

陆龟蒙

病学高僧置一床，披衣才暇即焚香。闲阶雨过苔花润，
小簟风来薜叶凉。南国羽书催部曲，东山毛褐傲羲皇。
升平闻道无时节，试问中林亦不妨。

卷 624_5 【独夜】

陆龟蒙

新秋霁夜有清境，穷檐病客无佳期。生公把经向石说，
而我对月须人为。独行独坐亦独酌，独玩独吟还独悲。
古称独坐与独立，若比群居终校奇。

卷 624_6 【寄吴融】

陆龟蒙

一夜秋声入井桐，数枝危绿怕西风。霏霏晚砌烟华上，
淅淅疏帘雨气通。君整轮蹄名未了，我依琴鹤病相攻。
到头江畔从渔事，织作中流万尺笭。

卷 624_7 【中秋待月】

陆龟蒙

转缺霜轮上转迟，好风偏似送佳期。帘斜树隔情无限，
烛暗香残坐不辞。最爱笙调闻北里，渐看星澹失南箕。
何人为校清凉力，未似初圆欲午时。

卷 624_8 【重忆白菊（一本作二绝句）】

陆龟蒙

我怜贞白重寒芳，前后丛生夹小堂。月朵暮开无绝艳，
风茎时动有奇香。何惭谢雪清才咏，不羨刘梅贵主妆。
更忆幽窗凝一梦，夜来村落有微霜。

卷 624_9 【别墅怀归】

陆龟蒙

水国初冬和暖天，南荣方好背阳眠。题诗朝忆复暮忆，
见月上弦还下弦。遥为晚花吟白菊，近炊香稻识红莲。
何人授我黄金百，买取苏君负郭田。

卷 624_10 【寄淮南郑宝书记】

陆龟蒙

记室千年翰墨孤，唯君才学似应徐。五丁驱得神功尽，
二酉搜来秘检疏。炀帝帆樯留泽国，淮王笺奏入班书。
清词醉草无因见，但钓寒江半尺鲈。

卷 624_11 【小雪后书事】

陆龟蒙

时候频过小雪天，江南寒色未曾偏。枫汀尚忆逢人别，
麦陇唯应欠雉眠。更拟结茅临水次，偶因行药到村前。
邻翁意绪相安慰，多说明年是稔年。

卷 624_12 【寒夜同裘美访北禅院寂上人】

陆龟蒙

月楼风殿静沉沉，披拂霜华访道林。鸟在寒枝栖影动，
人依古堞坐禅深。明时尚阻青云步，半夜犹追白石吟。
自是海边鸥伴侣，不劳金偈更降心。

卷 624_13 【和裘美江南道中怀茅山广文南阳博士三首次韵】

陆龟蒙

一片轻帆背夕阳，望三峰拜七真堂。天寒夜漱云牙净，
雪坏晴梳石发香。自拂烟霞安笔格，独开封检试砂床。
莫言洞府能招隐，会辗飙轮见玉皇。

壶中行坐可携天，何况林间息万缘。组绶任垂三品石，
佩环从落四公泉。丹台已运阴阳火，碧简须雕次第仙。
想得雷平春色动，五芝烟甲又芊眠。

良常应不动移文，金醴从酸亦自醺。桂父旧歌飞绛雪，
桐孙新韵倚玄云。春临柳谷莺先觉，曙醺芜香鹤共闻。
珍重双双玉条脱，尽凭三岛寄羊君。

卷 624_14 【早春雪中作吴体寄裘美】

陆龟蒙

迎春避腊不肯下，欺花冻草还飘然。光填马窟盖塞外，
势压鹤巢偏殿巅。山炉瘦节万状火，墨突乾衰孤穗烟。
君披鹤氅独自立，何人解道真神仙。

卷 624_15 【奉和裘美吴中言情见寄次韵】

陆龟蒙

菰烟芦雪是侬乡，钓线随身好坐忘。徒爱右军遗点画，
闲披左氏得膏肓。无因月殿闻移屐，只有风汀去采香。
莫问江边渔艇子，玉皇看赐羽衣裳。

卷 624_16 【和裘美扬州看辛夷花次韵】

陆龟蒙

柳疏梅堕少春丛，天遣花神别致功。高处朵稀难避日，
动时枝弱易为风。堪将乱蕊添云肆，若得千株便雪宫。
不待群芳应有意，等闲桃杏即争红。

卷 624_17 【奉和袭美行次野梅次韵】

陆龟蒙

飞棹参差拂早梅，强欺寒色尚低徊。风怜薄媚留香与，
月会深情借艳开。梁殿得非萧帝瑞，齐宫应是玉儿媒。
不知谢客离肠醒，临水应添万恨来。

卷 624_18 【奉和袭美暇日独处见寄】

陆龟蒙

谢府殷楼少暇时，又抛清宴入书帷。三千余岁上下古，
八十一家文字奇。冷梦汉皋怀鹿隐，静怜烟岛觉鸿离。
知君满箧前朝事，凤诺龙奴借与窥。

卷 624_19 【奉和袭美见访不遇】

陆龟蒙

为愁烟岸老尘嚣，扶病呼儿鬪翠苕。只道府中持简牍，
不知林下访渔樵。花盘小墢晴初压，叶拥疏篱冻未烧。
倚仗遍吟春照午，一池冰段几多消。

卷 624_20 【酬袭美见寄海蟹】

陆龟蒙

药杯应阻蟹螯香，却乞江边采捕郎。自是扬雄知郭索，
且非何胤敢餽餽。骨清犹似含春霭，沫白还疑带海霜。
强作南朝风雅客，夜来偷醉早梅傍。

卷 624_21 【奉和袭美开元寺客省早景即事次韵】

陆龟蒙

日上罽毼叠影红，一声清楚万缘空。褰褊满地贝多雪，
料峭入楼于阆风。水榭初抽寥泺思，作窗犹挂梦魂中。
灵香散尽禅家接，谁共殷源小品同。

卷 624_22 【独夜有怀因作吴体寄袭美】

陆龟蒙

人吟侧景抱冻竹，鹤梦缺月沈枯梧。清涧无波鹿无魄，
白云有根虬有须。云虬涧鹿真逸调，刀名锥利非良图。
不然快作燕市饮，笑抚肉枘眠酒垆。

卷 624_23 【闾阎城北有卖花翁，讨春之士往往造焉，因招袭美】

陆龟蒙

故城边有卖花翁，水曲舟轻去尽通。十亩芳菲为旧业，
一家烟雨是元功。闲添药品年年别，笑指生涯树树红。
若要见春归处所，不过携手问东风。

卷 624_24 【奉和袭美病中庭际海石榴花盛发见寄次韵】

陆龟蒙

紫府真人饷露囊，猗兰灯烛未荧煌。丹华乞曙先侵日，
金焰欺寒却照霜。谁与佳名从海曲，只应芳裔出河阳。
那堪谢氏庭前见，一段清香染郢郎。

卷 624_25 【袭美以春橘见惠兼之雅篇，因次韵酬谢】

陆龟蒙

到春犹作九秋鲜，应是亲封白帝烟。良玉有浆须让味，
明珠无颣亦羞圆。堪居汉苑霜梨上，合在仙家火枣前。
珍重更过三十子，不堪分付野人边。

卷 624_26 【奉和袭美病中书情寄上崔谏议次韵】

陆龟蒙

或偃虚斋或在公，蔼然林下昔贤风。庭前有蝶争烟蕊，
帘外无人报水筒。行药不离深幌底，寄书多向远山中。
西园夜烛偏堪忆，曾为题诗刻半红。

卷 624_27 【奉酬袭美病中见寄】

陆龟蒙

逢花逢月便相招，忽卧云航隔野桥。春恨与谁同酩酊，
玄言何处问逍遥。题诗石上空回笔，拾蕙汀边独倚桡。
早晚却还岩下电，共寻芳径结烟条。

卷 624_28 【奉和袭美病孔雀】

陆龟蒙

懒移金翠傍檐楹，斜倚芳丛旧态生。唯奈瘴烟笼饮啄，
可堪春雨滞飞鸣。鸳鸯水畔回头羡，豆蔻图前举眼惊。
争得鹧鸪来伴著，不妨还校有心情。

卷 624_29 【上元日道室焚修寄袭美】

陆龟蒙

三清今日聚灵官，玉刺齐抽谒广寒。执盖冒花香寂历，
侍晨交佩响阑珊。将排凤节分阶易，欲校龙书下笔难。
唯有世尘中小兆，夜来心拜七星坛。

卷 624_30 【正月十五惜春寄袭美】

陆龟蒙

六分春色一分休，满眼东波尽是愁。花匠凝寒应束手，
酒龙多病尚垂头。无穷懒惰齐中散，有底机谋敌右侯。
见织短篷裁小楫，拏烟闲弄个渔舟。

卷 624_31 【袭美病中闻余游颜家园见寄，次韵酬之】

陆龟蒙

日华风蕙正交光，羯末相携藉草塘。佳酒旋倾醺醑嫩，
短船闲弄木兰香。烟丝鸟拂来萦带，蕊榼人收去约簧。
今日好为联句会，不成刚为欠檀郎。

卷 624_32 【春雨即事寄裘美】

陆龟蒙

小谢轻埃日日飞，城边江上阻春晖。虽愁野岸花房冻，
还得山家药笋肥。双屐著频看齿折，败裘披苦见毛稀。
比邻钓叟无尘事，洒笠鸣蓑夜半归。

卷 624_33 【奉和裘美抱疾杜门见寄次韵】

陆龟蒙

虽失春城醉上期，下帷裁遍未裁诗。因吟郢岸百亩蕙，
欲采商崖三秀枝。栖野鹤笼宽使织，施山僧饭别教炊。
但医沈约重瞳健，不怕江花不满枝。

卷 624_34 【偶掇野蔬寄裘美有作】

陆龟蒙

野园烟里自幽寻，嫩甲香蕤引渐深。行歇每依鸦舅影，
挑频时见鼠姑心。凌风蕙彩初携笼，带露虚疏或贮襟。
欲助春盘还爱否，不妨萧洒似家林。

卷 624_35 【奉和袭美卧疾感春见寄次韵】

陆龟蒙

共寻花思极飞腾，疾带春寒去未能。烟径水涯多好鸟，
竹床蒲椅但高僧。须知日富为神授，只有家贫免盗憎。
除却数函图籍外，更将何事结良朋。

卷 624_36 【徐方平后闻赦因寄袭美】

陆龟蒙

新春旒宸御翠轩，海内初传涣汗恩。秦狱已收为厉气，
瘴江初返未招魂。英材尽作龙蛇蛰，战地多成虎豹村。
除却数般伤痛外，不知何事及王孙。

卷 624_37 【袭美以鱼笺见寄，因谢成篇】

陆龟蒙

捣成霜粒细鳞鳞，知作愁吟喜见分。向日乍惊新茧色，
临风时辨白萍文。好将花下承金粉，堪送天边咏碧云。
见倚小窗亲襞染，尽图春色寄夫君。

卷 624_38 【次和袭美病后春思】

陆龟蒙

气和灵府渐氤氲，酒有贤人药有君。七字篇章看月得，
百劳言语傍花闻。闲寻古寺消晴日，最忆深溪枕夜云。
早晚共摇孤艇去，紫屏风外碧波文。

卷 624_39 【袭美以公斋小宴见招，因代书寄之】

陆龟蒙

早云才破漏春阳，野客晨兴喜又忙。自与酌量煎药水，
别教安置晒书床。依方酿酒愁迟去，借样裁巾怕索将。
唯待数般幽事了，不妨还入少年场。

卷 624_40 【京口】

陆龟蒙

江干古渡伤离情，断山零落春潮平。东风料峭客帆远，
落叶夕阳天际明。战舸昔浮千骑去，钓舟今载一翁轻。
可怜宋帝筹帷处，苍翠无烟草自生。

卷 624_41 【润州送人往长洲】

陆龟蒙

秋来频上向吴亭，每上思归意剩生。废苑池台烟里色，
夜村蓑笠雨中声。汀洲月下菱船疾，杨柳风高酒旆轻。
君住松江多少日，为尝鲈鲙与莼羹。

卷 624_42 【润州江口送人谒池阳卫郎中】

陆龟蒙

山翁曾约旧交欢，须拂侯门侧注冠。月在石头摇戍角，
风生江口亚帆竿。闲随野醉溪声闹，独伴清谭晓色残。
待取新秋归更好，九华苍翠入楼寒。

第六百二十五卷

卷 625_1 【袭美以纱巾见惠继以雅音，因次韵酬谢】

陆龟蒙

薄如蝉翅背斜阳，不称春前赠鬻郎。初觉顶寒生远吹，
预忧头白透新霜。堪窥水槛澄波影，好拂花墙亚蕊香。
知有芙蓉留自戴，欲峨烟雾访黄房。

卷 625_2 【闻袭美有亲迎之期因以寄贺】

陆龟蒙

梁鸿夫妇欲双飞，细雨轻寒拂雉衣。初下雪窗因眷恋，
次乘烟幃奈光辉。参差扇影分华月，断续箫声落翠微。
见说春风偏有贺，露花千朵照庭闱。

卷 625_3 【袭美以巨鱼之半见分因以酬谢】

陆龟蒙

谁与春江上信鱼，可怜霜刃截来初。鳞隳似撤骚人屋，

腹断疑伤远客书。避网几跳山影破，逆风曾蹙浪花虚。
今朝最是家童喜，免泥荒畦掇野蔬。

卷 625_4 【奉和袭美馆娃宫怀古次韵】

陆龟蒙

镂楣消落濯春雨，苍翠无言空断崖。草碧未能忘帝女，
燕轻犹自识宫钗。江山只有愁容在，剑珮应和愧色埋。
赖在伍员骚思少，吴王才免似荆怀。

卷 625_5 【同袭美游北禅院（院即司勋陆郎中旧宅）】

陆龟蒙

连延花蔓映风廊，岸帻披襟到竹房。居士只今开梵处，
先生曾是草玄堂。清尊林下看香印，远岫窗中挂钵囊。
今日有情消未得，欲将名理问思光。

卷 625_6 【袭美以紫石砚见赠以诗迎之】

陆龟蒙

霞骨坚来玉自愁，琢成飞燕古钗头。澄沙脆弱闻应伏，

青铁沈埋见亦羞。最称风亭批碧简，好将云窦渍寒流。
君能把赠闲吟客，遍写江南物象酬。

卷 625_7 【和袭美送孙发百篇游天台】

陆龟蒙

直应天授与诗情，百咏唯消一日成。去把彩毫挥下国，
归参黄绶别春卿。闲窥碧落怀烟雾，暂向金庭隐姓名。
珍重兴公徒有赋，石梁深处是君行。

卷 625_8 【奉和袭美闻开元寺开笋园寄章上人】

陆龟蒙

春龙争地养檀栾，况是双林雨后看。进出似毫当垆土，
孤生如恨倚栏干。凌虚势欲齐金刹，折赠光宜照玉盘。
更得锦苞零落后，粉环高下揭烟寒。

卷 625_9 【蔷薇】

陆龟蒙

倚墙当户自横陈，致得贫家似不贫。外布芳菲虽笑日，

中含芒刺欲伤人。清香往往生遥吹，狂蔓看看及四邻。
遇有客来堪玩处，一端晴绮照烟新。

卷 625_10 【奉和袭美开元寺佛钵诗】

陆龟蒙

空王初受逞神功，四钵须臾现一重。持次想添香积饭，
覆时应带步罗钟。光寒好照金毛鹿，响静堪降白耳龙。
从此宝函香里见，不须西去诣灵峰。

卷 625_11 【酬袭美夏首病愈见招次韵】

陆龟蒙

雨多青合是垣衣，一幅蛮笺夜款扉。蕙带又闻宽沈约，
茅斋犹自忆王微。方灵只在君臣正，篆古须抛点画肥。
除却伴谈秋水外，野鸥何处更忘机。

卷 625_12 【新夏东郊闲泛有怀袭美】

陆龟蒙

迟于春日好于秋，野客相携上钓舟。经略有时冠暂亚，

佩苓簪后带频搗。蒹葭鹭起波摇笠，村落蚕眠树挂钩。
料得祇君能爱此，不争烟水似封侯。

卷 625_13 【四月十五日道室书事寄袭美】

陆龟蒙

乌饭新炊芼臠香，道家斋日以为常。月苗杯举存三洞，
云蕊函开叩九章。一掬阳泉堪作雨，数铢秋石欲成霜。
可中值著雷平信，为觅闲眠苦竹床。

卷 625_14 【看压新醅寄怀袭美】

陆龟蒙

晓压糟床渐有声，旋如荒涧野泉清。身前古态熏应出，
世上愁痕滴合平。饮啄断年同鹤俭，风波终日看人争。
尊中若使常能渌，两绶通侯总强名。

卷 625_15 【奉和袭美登初阳楼寄怀北平郎中】

陆龟蒙

远窗浮槛亦成年，几伴杨公白昼筵。日暖烟花曾扑地，

气浮星象却归天。闲将水石侵军垒，醉引笙歌上钓船。
无限恩波犹在目，东风吹起细漪涟。

卷 625_16 【奉和夏初袭美见访题小斋次韵】

陆龟蒙

四邻多是老农家，百树鸡桑半顷麻。尽趁晴明修网架，
每和烟雨掉缲车。啼鸾偶坐身藏叶，饷妇归来鬓有花。
不是对君吟复醉，更将何事送年华。

卷 625_17 【奉和袭美所居首夏水木尤清，适然有作次韵】

陆龟蒙

柿阴成列药花空，却忆桐江下钓筒。亦以鱼虾供熟鹭，
近缘樱笋识邻翁。闲分酒剂多还少，自记书签白间红。
更爱夜来风月好，转思玄度对支公。

卷 625_18 【奉和袭美题达上人药圃二首】

陆龟蒙

药味多从远客贳，旋添花圃旋成畦。三桠旧种根应异，

九节初移叶尚低。山茱便和幽涧石，水芝须带本池泥。
从今直到清秋日，又有香苗几番齐。

净名无语示清羸，药草搜来喻更微。一雨一风皆遂性，
花开花落尽忘机。教疏免镂金弦乱，自拥龙刍紫汞肥。
莫怪独亲幽圃坐，病容销尽欲依归。

卷 625_19 【奉和袭美怀华阳润卿博士三首】

陆龟蒙

几降真官授隐书，洛公曾到梦中无。眉间入静三辰影，
肘后通灵五岳图。北洞树形如曲盖，东凹山色入薰炉。
金墟福地能容否，愿作冈前蒋负刍。

火景应难到洞宫，萧闲堂冷任天风。谈玄麈尾抛云底，
服散龙胎在酒中。有路还将赤城接，无泉不共紫河通。
奇编早晚教传授，免以神仙问葛洪。

终日焚香礼洞云，更思琪树转劳神。曾寻下泊常经月，
不到中峰又累春。仙道最高黄玉篆，暑天偏称白纶巾。
清斋若见茅司命，乞取朱儿十二斤。

卷 625_20 【以竹夹膝寄赠袭美】

陆龟蒙

截得筭筍冷似龙，翠光横在暑天中。堪临薜簟闲凭月，
好向松窗卧跂风。持赠敢齐青玉案，醉吟偏称碧荷筒。
添君雅具教多著，为著西斋谱一通。

卷 625_21 【奉和袭美夏景无事因怀章来二上人次韵】

陆龟蒙

檐外青阳有二梅，折来堪下冻醪杯。高杉自欲生龙脑，
小弁谁能寄鹿胎。丽事肯教饶沈谢，谈微何必减宗雷。
还闻拟结东林社，争奈渊明醉不来。

忽忆高僧坐夏堂，厌泉声闹笑云忙。山重海澹怀中印，
月冷风微宿上方。病后书求嵩少药，定回衣染贝多香。
何时更问道遥义，五粒松阴半石床。

卷 625_22 【顷自桐江得一钓车以袭美乐烟波之思因出以为玩...酬答】

陆龟蒙

旋屈金钩劈翠筠，手中盘作钓鱼轮。忘情不效孤醒客，

有意闲窥百丈鳞。雨似轻埃时一起，云如高盖强相亲。
任他华毂低头笑，此地终无覆败人。

曾招渔侣下清浔，独茧初随一锤深。细辗烟华无辙迹，
静含风力有车音。相呼野饭依芳草，迭和山歌逗远林。
得失任渠但取乐，不曾生个是非心。

病来悬著脆缁丝，独喜高情为我持。数幅尚凝烟雨态，
三篇能赋蕙兰词。云深石静闲眠稳，月上江平放溜迟。
第一莫教谙此境，倚天功业待君为。

卷 625_23 【奉和袭美吴中书事寄汉南裴尚书】

陆龟蒙

风清地古带前朝，遗事纷纷未寂寥。三泖凉波鱼蕝动，
五茸春草雉媒娇。云藏野寺分金刹，月在江楼倚玉箫。
不用怀归忘此景，吴王看即奉弓招。

卷 625_24 【奉和袭美夏景冲澹偶作次韵二首】

陆龟蒙

蝉雀参差在扇纱，竹襟轻利箨冠斜。垆中有酒文园会，
琴上无弦靖节家。芝畹烟霞全覆穗，橘洲风浪半浮花。

闲思两地忘名者，不信人间发解华。

只于池曲象山幽，便是潇湘浸石楼。斜拂茱盘轻鹜下，
细穿菱线小鲋游。闲开茗焙尝须遍，醉拨书帷卧始休。
莫道仙家无好爵，方诸还拜碧琳侯。

卷 625_25 【奉和袭美送李明府之任南海】

陆龟蒙

春尽之官直到秋，岭云深处凭泂楼。居人爱近沈珠浦，
候吏多来拾翠洲。賸税尽应输紫贝，蛮童多学佩金钩。
之君不恋南枝久，抛却经冬白罽裘。

卷 625_26 【奉和袭美寄题罗浮轩辕先生所居】

陆龟蒙

鼎成仙驭入崆峒，百世犹传至道风。暂应青词为穴凤，
却思丹徼伴冥鸿。金公的的生炉际，琼刃时时到梦中。
预恐浮山归有日，载将云室十洲东。

卷 625_27 【奉和袭美寄琼州杨舍人】

陆龟蒙

明时非罪谪何偏，鵬鸟巢南更数千。酒满椰杯消毒雾，
风随蕉叶下泷船。人多药户生狂蛊，吏有珠官出俸钱。
只以直诚天自信，不劳诗句咏贪泉。

卷 625_28 【奉和袭美宿报恩寺水阁】

陆龟蒙

峰抱池光曲岸平，月临虚槛夜何清。僧穿小桧才分影，
鱼掷高荷渐有声。因忆故山吟易苦，各横秋簟梦难成。
周顒不用裁书劝，自得凉天证道情。

卷 625_29 【奉和袭美醉中偶作见寄次韵】

陆龟蒙

海鹤飘飘韵莫齐，在公犹与俗情乖。初呈酒务求专判，
合祷山祠请自差。永夜谭玄侵罔象，一生交态忘形骸。
怜君醉墨风流甚，几度题诗小谢斋。

卷 625_30 【奉和袭美寄滑州李副使员外】

陆龟蒙

洛生闲咏正抽毫，忽傍旌旗著战袍。檄下连营皆破胆，
剑离孤匣欲吹毛。清秋月色临军垒，半夜淮声入贼壕。
除却征南为上将，平徐功业更谁高。

卷 625_31 【奉和袭美吴中言怀寄南海二同年】

陆龟蒙

曾见凌风上赤霄，尽将华藻赴嘉招。城连虎踞山图丽，
路入龙编海舶遥。江客渔歌冲白苒，野禽人语映红蕉。
庭中必有君迁树，莫向空台望汉朝。

卷 625_32 【奉和袭美伤史拱山人】

陆龟蒙

曾说山栖欲去寻，岂知霜骨葬寒林。常依净住师冥目，
兼事容成学算心。逋客预斋还梵唱，老猿窥祭亦悲吟。
唯君独在江云外，谁谏孤贞置岷岑。

卷 625_33 【白鸥诗】

陆龟蒙

惯向溪头漾浅沙，薄烟微雨是生涯。时时失伴沈山影，
往往争飞杂浪花。晚树清凉还鷺鸕，旧巢零落寄蒹葭。
池塘信美应难恋，针在鱼唇剑在虾。

卷 625_34 【怀杨台文杨鼎文（一作台鼎）二秀才】

陆龟蒙

秋早相逢待得春，崇兰清露小山云。寒花独自愁中见，
曙角多同醒后闻。钓具每随轻舸去，诗题闲上小楼分。
重思醉墨纵横甚，书破羊欣白练裙。

卷 625_35 【奉和袭美谢友人惠人参】

陆龟蒙

五叶初成椶树阴，紫团峰外即鸡林。名参鬼盖须难见，
材似人形不可寻。品第已闻升碧简，携持应合重黄金。
殷勤润取相如肺，封禅书成动帝心。

卷 625_36 【严子重以诗游于名胜间旧矣余晚于江南相遇甚乐...之和】

陆龟蒙

每值江南日落春，十年诗酒爱逢君。芙蓉湖上吟船倚，
翡翠岩前醉马分。只有汀洲连旧业，岂无章疏动遗文。
犹怜未卜佳城处，更拟要离冢畔云。

卷 625_37 【算山】

陆龟蒙

水绕苍山固护来，当时盘踞实雄才。周郎计策清宵定，
曹氏楼船白昼灰。五十八年争虎视，三千余骑骋龙媒。
何如今日家天下，阊阖门临万国开。

卷 625_38 【寄茅山何威仪二首】

陆龟蒙

大小三峰次九华，灵踪今尽属何家。汉时仙上云巅鹤，
蜀地春开洞底花。闲傍积岚寻瀑眼，便凌残雪探芝芽。
年来已奉黄庭教，夕炼腥魂晓吸霞。

· 全唐诗 ·

曾向人间拜节旄，乍疑因梦到仙曹。身轻曳羽霞襟狭，
髻耸峨烟鹿帔高。山暖不羣峰上薤，水寒仍落洞中桃。
从闻此日搜奇话，转觉魂飞夜夜劳。

第六百二十六卷

卷 626_1 【早秋吴体寄袭美】

陆龟蒙

荒庭古村只独倚，败蝉残蛩苦相仍。虽然诗胆大如斗，
争奈愁肠牵似绳。短烛初添蕙幌影，微风渐折蕉衣棱。
安得弯弓似明月，快箭拂下西飞鹏。

卷 626_2 【病中秋怀寄袭美】

陆龟蒙

病容愁思苦相兼，清镜无形未我嫌。贪广异蔬行径窄。
故求偏药出钱添。同人散后休赊酒，双燕辞来始下帘。
更有是非齐未得，重凭詹尹拂龟占。

卷 626_3 【秋赋有期因寄袭美】

陆龟蒙

云似无心水似闲，忽思名在贡书间。烟霞鹿弁聊悬著，

邻里渔舫暂解还。文草病来犹满筐，药苗衰后即离山。
广寒宫树枝多少，风送高低便可攀。

卷 626_4 【和袭美新秋即事次韵三首】

陆龟蒙

心似孤云任所之，世尘中更有谁知。愁寻冷落惊双鬓，
病得清凉减四支。怀旧药溪终独往，宿枯杉寺已频期。
兼须为月求高处，即是霜轮杀满时。

帆楫衣裳尽钓徒，往来踪迹遍三吴。闲中展卷兴亡小，
醉后题诗点画粗。松岛伴谭多道气，竹窗孤梦岂良图。
还须待致升平了，即往扁舟放五湖。

声利从来解破除，秋滩唯忆下桐庐。鸬鹚阵合残阳少，
蜩螗吟高冷雨疏。辩伏南华论指指，才非玄晏借书书。
当时任使真堪笑，波上三年学炙鱼。

卷 626_5 【和袭美赠南阳润卿将归雷平】

陆龟蒙

朝市山林隐一般，却归那减卧云欢。堕阶红叶谁收得，
半盃清醪客酹干。玉笈诗成吟处晓，金沙泉落梦中寒。

真仙若降如相问，曾步星罡绕醮坛。

卷 626_6 【顾道士亡，弟子奉束帛乞铭于裘美，因赋戏赠】

陆龟蒙

童初真府召为郎，君与抽毫刻便房。亦谓神仙同许郭，
不妨才力似班扬。比于黄绢词尤妙，酬以霜缣价未当。
唯我有文无卖处，笔锋销尽墨池荒。

卷 626_7 【和访寂上人不遇】

陆龟蒙

芭蕉霜后石栏荒，林下无人闭竹房。经抄未成抛素几，
锡环应撼过寒塘。蒲团为拂浮埃散，茶器空怀碧饽香。
早晚却还宗炳社，夜深风雪对禅床。

卷 626_8 【秋夕文宴（得成字）】

陆龟蒙

笔阵初临夜正清，击铜遥认小金钲。飞觥壮若游燕市，
觅句难于下赵城。隔岭故人因会忆，傍檐栖鸟带吟惊。

梁王座上多词客，五韵甘心第七成。

卷 626_9 【南阳广文欲于荆襄卜居，袭美有赠，代酬次韵】

陆龟蒙

不知天隐在何乡，且欲烟霞迹暂双。鹤庙未能齐月驭，
鹿门聊拟并云窗。藓街荒磴移桑屐，花浸春醪挹石缸。
莫惜查头容钓伴，也应东印有余江。

卷 626_10 【和袭美寄毗陵魏处士朴】

陆龟蒙

经苑初成墨沼开，何人林下肯寻来。若非宗测图山后，
即是韩康卖药回。溪籟自吟朱鹭曲，沙云还作白鸥媒。
唯应地主公田熟，时送君家麴蘖材。

卷 626_11 【和袭美初冬偶作寄南阳润卿次韵】

陆龟蒙

逐日生涯敢计冬，可嗟寒事落然空。窗怜返照缘书小，
庭喜新霜为橘红。衰柳尚能和月动，败兰犹拟倩烟笼。

不知海上今清浅，试与飞书问洛公。

卷 626_12 【和袭美冬晓章上人院】

陆龟蒙

山寒偏是晓来多，况值禅窗雪气和。病客功夫经未演，
故人书信纳新磨。闲临静案修茶品，独旁深溪记药科。
从此逍遥知有地，更乘清月伴君过。

卷 626_13 【和袭美寄题镜岩周尊师所居】

陆龟蒙

见说身轻鹤不如，石房无侣共云居。清晨自削灵香柿，
独夜空吟碧落书。十洞飞精应遍吸，一簪秋发未曾梳。
知君便入悬珠会，早晚东骑白鲤鱼。

卷 626_14 【寒夜文宴得惊字】

陆龟蒙

各将寒调触诗情，旋见微渐入砚生。霜月满庭人暂起，
汀洲半夜雁初惊。三秋每为仙题想，一日多因累句倾。

千里建康衰草外，含毫谁是忆昭明？

卷 626_15 【送润卿还华阳】

陆龟蒙

何事轻舟近腊回，茅家兄弟欲归来。封题玉洞虚无奏，
点检霜坛沆漈杯。云肆先生分气调，山图公子爱词才。
殷勤为向东乡荐，洒扫含真雪后台。

卷 626_16 【和袭美为新罗弘惠上人撰灵鹫山周禅师碑送归诗】

陆龟蒙

一函迢递过东瀛，只为先生处乞铭。已得雄词封静检，
却怀孤影在禅庭。春过异国人应写，夜读沧洲怪亦听。
遥想勒成新塔下，尽望空碧礼文星。

卷 626_17 【和袭美寒日书斋即事三首，每篇各用一韵】

陆龟蒙

不必探幽上郁冈，公斋吟啸亦何妨。唯求蕙苾供僧食，
别著氍毹待客床。春近带烟分短蕙，晓来冲雪撼疏篁。

余杭山酒犹封在，遥嘱高人未肯尝。

已上星津八月槎，文通犹自学丹砂。仙经写得空三洞，
隐士招来别九华。静对真图呼绿齿，偶开神室问黄芽。
方诸更是怜才子，锡賚于君合有差。

名价皆酬百万余，尚怜方丈讲玄虚。西都宾问曾成赋，
东海人求近著书。茅洞烟霞侵寤寐，檀溪风月挂樵渔。
清朝还要廷臣在，两地宁容便结庐。

卷 626_18 【和袭美腊后送内大德从勔游天台】

陆龟蒙

应缘南国尽南宗，欲访灵溪路暗通。归思不离双阙下，
去程犹在四明东。铜瓶净贮桃花雨，金策闲摇麦穗风。
若恋吾君先拜疏，为论台岳未封公。

卷 626_19 【和袭美寄题玉霄峰叶涵象尊师所居】

陆龟蒙

天台一万八千丈，师在浮云端掩扉。永夜只知星斗大，
深秋犹见海山微。风前几降青毛节，雪后应披白羽衣。
南望烟霞空再拜，欲将飞魄问灵威。

卷 626_20 【南阳广文博士还雷平后寄】

陆龟蒙

微微春色染林塘，亲拨烟霞坐涧房。阴洞雪胶知未入，
浊醪风破的偷尝。芝台晓用金铛煮，星度闲将玉铉量。
几遍侍晨官欲降，曙坛先起独焚香。

卷 626_21 【和袭美题支山南峰僧次韵】

陆龟蒙

眉毫霜细欲垂肩，自说初栖海岳年。万壑烟霞秋后到，
一林风雨夜深禅。时翻贝叶添新藏，闲插松枝护小泉。
好是清冬无外事，匡林斋罢向阳眠。

卷 626_22 【送董少卿游茅山】

陆龟蒙

威辇高悬度世名，至今仙裔作公卿。将随羽节朝珠阙，
曾佩鱼符管赤城。云冻尚含孤石色，雪干犹堕古松声。
应知四扇灵方在，待取归时绿发生。

卷 626_23 【和袭美寄怀南阳润卿】

陆龟蒙

高抱相逢各绝尘，水经山疏不离身。才情未拟汤从事，
玄解犹嫌竺道人。霞染洞泉浑变紫，雪披江树半和春。
谁怜故国无生计，唯种南塘二亩芹。

卷 626_24 【袭美将以绿罽为赠因成四韵】

陆龟蒙

三径风霜利若刀，檐楹吹断胃蓬蒿。病中只自悲龙具，
世上何人识羽袍。狐貉近怀珠履贵，薜萝遥羨白巾高。
陈王轻暖如相遗，免致衰荷效广骚。

卷 626_25 【和过张祜处士丹阳故居】

陆龟蒙

胜华通子共悲辛，荒径今为旧宅邻。一代交游非不贵，
五湖风月合教贫。魂应绝地为才鬼，名与遗编在史臣。
闻道平生多爱石，至今犹泣洞庭人。

卷 626_26 【和袭美寄广文先生】

陆龟蒙

忽辞明主事真君，直取姜巴路入云。龙篆拜时轻诰命，
霓襟披后小玄纁。峰前北帝三元会，石上东卿九锡文。
应笑世间名利火，等闲灵府剩先焚。

卷 626_27 【和袭美先辈悼鹤】

陆龟蒙

一夜圆吭绝不鸣，八公虚道得千龄。方添上客云眠思，
忽伴中仙剑解形。但掩丛毛穿古堞，永留寒影在空屏。
君才幸自清如水，更向芝田为刻铭。

卷 626_28 【幽居有白菊一丛因而成咏呈知己】

陆龟蒙

还是延年一种材，即将瑶朵冒霜开。不如红艳临歌扇，
欲伴黄英入酒杯。陶令接_离堪岸著，梁王高屋好欹来。
月中若有闲田地，为劝嫦娥作意栽。

卷 626_23 【和裴美伤开元观顾道士】

陆龟蒙

何事神超入杳冥，不骑孤鹤上三清。多应白简迎将去，
即是朱陵炼更生。药奠肯同椒醑味，云谣空替薤歌声。
武皇徒有飘飘思，谁问山中宰相名。

卷 626_24 【和裴美醉中即席赠润卿博士次韵】

陆龟蒙

共是虚皇简上仙，清词如羽欲飘然。登山凡著几緌屐，
破浪欲乘千里船。远梦只留丹井畔，闲吟多在酒旗前。
谁知海上无名者，只记渔歌不记年。

卷 626_25 【送浙东德师侍御罢府西归】

陆龟蒙

王谢遗踪玉籍仙，三年闲上鄂君船。诗怀白阁僧吟苦，
俸买青田鹤价偏。行次野枫临远水，醉中衰菊卧凉烟。
芙蓉散尽西归去，唯有山阴九万笺。

卷 626_26 【送羊振文先辈往桂阳归觐】

陆龟蒙

风雅先生去一麾，过庭才子趣归期。让王门外开帆叶，
义帝城中望戟支。郢路渐寒飘雪远，湘波初暖涨云迟。
灵均精魄如能问，又得千年贾傅词。

卷 626_27 【袭美留振文宴龟蒙抱病不赴猥示倡和因次韵酬谢】

陆龟蒙

绮席风开照露晴，只将茶荈代云觥。繁弦似玉纷纷碎，
佳妓如鸿一一惊。毫健几多飞藻客，羽寒寥落映花莺，
幽人独自西窗晚，闲凭香桯反照明。

卷 626_28 【和袭美重送圆载上人归日本国】

陆龟蒙

老思东极旧岩扉，却待秋风泛舶归。晓梵阳乌当石磬，
夜禅阴火照田衣。见翻经论多盈篋，亲植杉松大几围。
遥想到时思魏阙，只应遥拜望斜晖。

卷 626_29 【和裴美褚家林亭】

陆龟蒙

一阵西风起浪花，绕栏杆下散瑶华。高窗曲槛仙侯府，
卧苇荒芹白鸟家。孤岛待寒凝片月，远山终日送余霞。
若知方外还如此，不要秋乘上海槎。

卷 626_30 【归雁】

陆龟蒙

北走南征象我曹，天涯迢递翼应劳。似悲边雪音犹苦，
初背岳云行未高。月岛聚栖防暗缴，风滩斜起避惊涛。
时人不问随阳意，空拾栏边翡翠毛。

卷 626_31 【王先辈草堂】

陆龟蒙

松径隈云到静堂，杏花临涧水流香。身从乱后全家隐，
日校人间一倍长。金篆渐加新品秩，玉皇偏赐羽衣裳。
何如圣代弹冠出，方朔曾为汉侍郎。

卷 626_32 【伤越】

陆龟蒙

越溪自古好风烟，盗束兵缠已半年。访戴客愁随水远，
浣纱人泣共埃捐。临焦赖洒王师雨，欲堕重登刺史天。
早晚山川尽如故，清吟闲上鄂君船。

卷 626_33 【新定陪太守一百五夜南馆玩月】

陆龟蒙

风雨教春处处伤，一宵云尽见沧浪。全无片烛侵光彩，
只有清滩助雪霜。烟蔽棹歌归浦淑，露将花影到衣裳。
却嫌殷浩南楼夕，一带秋声入恨长。

卷 626_34 【中元夜寄道侣二首】

陆龟蒙

学饵霜茸骨未轻，每逢真夕梦还清。丁宁独受金妃约，
许与亲题玉篆名。月苦撼残临水珮，风微飘断系云缨。
须臾枕上桐窗晓，露压千枝滴滴声。

橘斋风露已清余，东郭先生病未除。孤枕易为蛩破梦，
短檐难得燕传书。广云披日君应近，倒影裁花我尚疏。
唯羡羽人襟似水，平持旄节步空虚。

卷 626_35 【寄怀华阳道士】

陆龟蒙

华阳门外五芝生，餐罢愁君入杳冥。遥夜独栖还有梦，
昔年相见便忘形。为分科斗亲铅槊，与说蜉蝣坐竹棂。
醺后几时归紫阁，别来终日诵黄庭。闲教辨药僮名甲，
静识窥巢鹤姓丁。绝涧饮羊春水腻，傍林烧石野烟腥。
深沈谷响含疏磬，片段岚光落画屏。休采古书探禹穴，
自刊新历斗尧蓂。珠宫凤合迎萧史，玉籍人谁访蔡经？
架上黑椽长褐稳，案头丹篆小符灵。霓轩入洞齐初月，
羽节升坛拜七星。当路独行冲虎豹，向风孤啸起雷霆。
凝神密室多生白，叙事联编尽杀青。匝地山川皆暗写，
隐天竽籁只闲听。分张火力烧金灶，拂拭苔痕洗酒瓶。
翠壁上吟朝复暮，暖云边卧醉还醒。倚身长短裁筇杖，
倩客高低结草亭。直用森严朝北帝，爱将清浅问东溟。
常思近圃看栽杏，拟借邻峰伴采苓。掩树半扉晴霭霭，
背琴残烛晓荧荧。旧来扈虬知王猛，欲去为龙叹管宁。
蟾魄几应临蕙帐，渔竿犹尚枕枫汀。衔烟细草无端绿，
冒雨闲花作意馨。掠岸惊波沈翡翠，入檐斜照碍蜻蜓。
初征汉栈宜飞檄，待破燕山好勒铭。六轡未收千里马，
一囊空负九秋萤。我悲雌伏真方枘，他骋雄材似建瓴。

· 全唐诗 ·

合在深崖齐散术，自求沧海点流萍。频抛俗物心还爽，
远忆幽期目剩瞑。见买扁舟束真诰，手披仙语任扬舲。

第六百二十七卷

卷 627_1 【人日代客子（是日立春）】

陆龟蒙

人日兼春日，长怀复短怀。遥知双彩胜，并在一金钗。

卷 627_2 【筑城词二首】

陆龟蒙

城上一培土，手中千万杵。筑城畏不坚，坚城在何处。

莫叹将军逼，将军要却敌。城高功亦高，尔命何劳惜。

卷 627_3 【古意】

陆龟蒙

君心莫淡薄，妾意正栖托。愿得双车轮，一夜生四角。

卷 627_4 【春晓】

陆龟蒙

春庭晓景别，清露花迢迢。黄蜂一过慵，夜夜栖香蕊。

卷 627_5 【杂兴】

陆龟蒙

桃李傍檐楹，无人赏春华。时情重不见，却忆菖蒲花。

卷 627_6 【雁】

陆龟蒙

南北路何长，中间万弋张。不知烟雾里，几只到衡阳？

卷 627_7 【寄远】

陆龟蒙

鬓乱羞云卷，眉空羨月生。中原犹将将，何日重卿卿？

卷 627_8 【庭前】

陆龟蒙

合欢能解恚，萱草信忘忧。尽向庭前种，萋萋特地愁。

卷 627_9 【洞房怨】

陆龟蒙

玉钗朝扶鬓，金梯晚下台。春衫将别泪，一夜两难裁。

卷 627_10 【江行】

陆龟蒙

酒旗菰叶外，楼影浪花中。醉帆张数幅，唯待鲤鱼风。

卷 627_11 【巫峡】

陆龟蒙

巫峡七百里，巫山十二重。年年白云雨，环佩竟谁逢？

卷 627_12 【归路】

陆龟蒙

渐入新丰路，衰红映小桥。浑如七年病，初得一丸销。

卷 627_13 【南塘曲】

陆龟蒙

妾住东湖下，郎居南浦边。闲临烟水望，认得采菱船。

卷 627_14 【黄金二首】

陆龟蒙

自古黄金贵，犹沽骏与才。近来簪珥重，无可上高台。

平分从满篋，醉掷任成堆。恰莫持千万，明明买祸胎。

卷 627_15 【夕阳】

陆龟蒙

渡口和帆落，城边带角收。如何茂陵客，江上倚危楼。

卷 627_16 【残雪】

陆龟蒙

桂冷微停素，峰干不遍岚。何谿背林处，犹覆定僧庵。

卷 627_17 【古态】

陆龟蒙

古态日渐薄，新妆心更劳。城中皆一尺，非妾髻鬟高。

卷 627_18 【大堤】

陆龟蒙

大堤春日暮，骢马解镫衢。请君留上客，容妾荐雕胡。

卷 627_19 【金陵道】

陆龟蒙

北雁行行直，东流澹澹春。当时六朝客，还道帝乡人。

卷 627_20 【离骚】

陆龟蒙

天问复招魂，无因彻帝阍。岂知千丽句，不敌一谗言。

卷 627_21 【对酒】

陆龟蒙

后代称欢伯，前贤号圣人。且须谋日富，不要道家贫。

卷 627_22 【寄南岳客乞灵芜香】

陆龟蒙

闻说融峰下，灵香似反魂。春来正堪采，试为劬云根。

卷 627_23 【山阳燕中郊乐录】

陆龟蒙

淮上能无雨，回头总是情。蒲帆浑未织，争得一欢成。

卷 627_24 【偶作】

陆龟蒙

双眉初出茧，两鬓正藏鸦。自有王昌在，何劳近宋家。

卷 627_25 【有示】

陆龟蒙

相对莫辞贫，蓬蒿任塞门。无情是金玉，不报主人恩。

卷 627_26 【秋思三首】

陆龟蒙

桐露珪初落，兰风佩欲衰。不知能赋客，何似枉刀儿。

谁在嫫姚幕，能教霹雳车。至今思秃尾，无以代寒菹。

未得同夔杵，何时减药囊。莫言天帝醉，秦暴不灵长。

卷 627_27 【早春】

陆龟蒙

雨冷唯添暑，烟初不著春。数枝花颣小，愁杀扈芳人。

卷 627_28 【怀仙三首】

陆龟蒙

闻道阳都女，连娟耳细长。自非黄犢客，不得到云房。

但服瓊刚子，兼吟曲素词。须知臣汉客，还见布龙儿。

神烛光华丽，灵祛羽翼生。已传餐玉粒，犹自买云英。

卷 627_29 【芙蓉】

陆龟蒙

闲吟鲍照赋，更起屈平愁。莫引西风动，红衣不耐秋。

卷 627_30 【春思】

陆龟蒙

怨莺新语涩，双蝶斗飞高。作个名春恨，浮生百倍劳。

卷 627_31 【风人诗四首】

陆龟蒙

十万全师出，遥知正忆君。一心如瑞麦，长作两岐分。

破槩供朝爨，须怜是苦辛。晓天窥落宿，谁识独醒人？

旦日思双屐，明时愿早谐。丹青传四读，难写是秋怀。

闻道更新帜，多应发旧旗。征衣无伴捣，独处自然悲。

卷 627_32 【乐府杂咏六首·双吹管】

陆龟蒙

长短裁浮筠，参差作飞凤。高楼微月夜，吹出江南弄。

卷 627_33 【乐府杂咏六首·东飞凫】

陆龟蒙

裁得尺锦书，欲寄东飞凫。胫短翅亦短，雌雄恋菰蒲。

卷 627_34 【乐府杂咏六首·花成子】

陆龟蒙

春风等君意，亦解欺桃李。写得去时真，归来不相似。

卷 627_35 【乐府杂咏六首·月成弦】

陆龟蒙

孤光照还没，转益伤离别。妾若是嫦娥，长圆不教缺。

卷 627_36 【乐府杂咏六首·孤烛怨】

陆龟蒙

前回边使至，闻道交河战。坐想鼓鞞声，寸心攒百箭。

卷 627_37 【乐府杂咏六首·金吾子】

陆龟蒙

嫁得金吾子，常闻轻薄名。君心如不重，妾腰徒自轻。

卷 627_38 【子夜四时歌·春】

陆龟蒙

山连翠羽屏，草接烟华席。望尽南飞燕，佳人断消息。

卷 627_39 【子夜四时歌·夏】

陆龟蒙

兰眼抬路斜，莺唇映花老。金龙倾漏尽，玉井敲冰早。

卷 627_40 【子夜四时歌·秋】

陆龟蒙

凉汉清沅寥，衰林怨风雨。愁听络纬唱，似与羁魂语。

卷 627_41 【子夜四时歌·冬】

陆龟蒙

南云走冷圭，北籁号空木。年年任霜霰，不减篴簞绿。

卷 627_42 【大子夜歌二首】

陆龟蒙

歌谣数百种，子夜最可怜。慷慨吐清音，明转出天然。

丝竹发歌响，假器扬清音。不知歌谣妙，声势出口心。

卷 627_43 【子夜警歌二首】

陆龟蒙

镂碗传绿酒，雕炉薰紫烟。谁知苦寒调，共作白雪弦。

恃爱如欲进，含羞出不前。朱口发艳歌，玉指弄娇弦。

卷 627_44 【子夜变歌三首】

陆龟蒙

人传欢负情，我自未尝见。三更开门去，始知子夜变。

岁月如流迈，春尽秋已至。茱萸条上花，零落何乃驶。

岁月如流迈，行已及素秋。蟋蟀吟堂前，惆怅使依愁。

卷 627_45 【江南曲五首】

陆龟蒙

鱼戏莲叶间，参差隐叶扇。鸂鶒鸂鶒窥，潏潏无因见。

鱼戏莲叶东，初霞射红尾。旁临谢山侧，恰值清风起。

鱼戏莲叶西，盘盘舞波急。潜依曲岸凉，正直斜光入。

鱼戏莲叶南，欹危舞烟叠。光摇越鸟巢，影乱吴娃楫。

鱼戏莲叶北，澄阳动微涟。回看帝子渚，稍背鄂君船。

第六百二十八卷

卷 628_1 【陌上桑】

陆龟蒙

皓齿还如贝色含，长眉亦似烟华贴。
邻娃尽著绣裆襦，独自提筐采蚕叶。

卷 628_2 【自遣诗三十首】

陆龟蒙

五年重别旧山村，树有交柯犊有孙。
更感卞峰颜色好，晓云才散便当门。

雪下孤村淅淅鸣，病魂无睡洒来清。
心摇只待东窗晓，长愧寒鸡第一声。

多情多感自难忘，只有风流共古长。
座上不遗金带枕，陈王词赋为谁伤。

甫里先生未白头，酒旗犹可战高楼。
长鲸好鲙无因得，乞取鲈膾作钓舟。

花濛濛紫气昏，水边山曲更深村。
终须拣取幽栖处，老桧成双便作门。

阴洞曾为采药行，冷云凝绝烛微明。
玉芝敲折琤然堕，合有真人上姓名。

长叹人间发易华，暗将心事许烟霞。
病来前约分明在，药鼎书囊便是家。

酝得秋泉似玉容，比于云液更应浓。
思量北海徐刘辈，枉向人间号酒龙。

羊侃多应自古豪，解盘金槊置纤腰。
纵然此事教双得，不博溪田二顷苗。

偶然携稚看微波，临水春寒一倍多。
便使笔精如逸少，懒能书字换群鹅。

昔闻庄叟逍遥梦，又道韩生冉冉飞。
知有姓名聊寄问，更无言语抱斜晖。

雪侵春事太无端，舞急微还近腊寒。
应是也疑真宰怪，休时犹未遍林峦。

数尺游丝堕碧空，年年长是惹东风。
争知天上无人住，亦有春愁鹤发翁。

谁使寒鸦意绪娇，云情山晚动情寥。
乱和残照纷纷舞，应索阳乌次第饶。

古往天高事渺茫，争知灵媛不凄凉。
月娥如有相思泪，只待方诸寄两行。

本来云外寄闲身，遂与溪云作主人。
一夜逆风愁四散，晓来零落傍衣巾。

渊明不待公田熟，乘兴先秋解印归。
我为余粮春未去，到头谁是复谁非？

云拥根株抱石危，斫来文似瘦蛟螭。
幽人带病慵朝起，只向春山尽日欹。

月淡花闲夜已深，宋家微咏若遗音。
重思万古无人赏，露湿清香独满襟。

南岸春田手自农，往来横截半江风。
有时不耐轻桡兴，暂欲蓬山访洛公。

贤达垂竿小隐中，我来真作捕鱼翁。
前溪一夜春流急，已学严滩下钓筒。

水国君王又姓萧，风情由是冠南朝。
灵和殿下巴江柳，十二旒前舞翠条。

强梳蓬鬓整斜冠，片烛光微夜思阑。
天意最饶惆怅事，单栖分付与春寒。

无多药圃近南荣，合有新苗次第生。
稚子不知名品上，恐随春草斗输赢。

一派溪随箬下流，春来无处不汀洲。
漪澜未碧蒲犹短，不见鸳鸯正自由。

山下花明水上曛，一桡青翰破霞文。
越人但爱风流客，绣被何须属鄂君。

妍华须是占时生，准拟差肩不近情。
佳丽几时腰不细，荆王辛苦致宫名。

姹女精神似月孤，敢将容易入洪炉。
人间纵道铅华少，蝶翅新篁未肯无。

贞白求丹变姓名，主恩潜助亦无成。
侯家竟换梁天子，王整徒劳作外兵。

春雨能膏草木肥，就中林野碧含滋。
唯余病客相逢背，一夜寒声减四肢。

卷 628_3 【别墅怀归】

陆龟蒙

东去沧溟百里余，沿江潮信到吾庐。
就中家在蓬山下，一日堪凭两寄书。

卷 628_4 【野井】

陆龟蒙

朱阁前头露井多，碧梧桐下美人过。
寒泉未必能如此，奈有银瓶素绠何。

卷 628_5 【南征】

陆龟蒙

丞相南征定有无，幕中谁是骋良图。
遥知贼胆纵横破，绕帐生犀一万株。

卷 628_6 【北渡】

陆龟蒙

江客柴门枕浪花，鸣机寒橹任呕哑。
轻舟过去真堪画，惊起鸬鹚一阵斜。

卷 628_7 【夜泊咏栖鸿】

陆龟蒙

可怜霜月暂相依，莫向衡阳趁逐飞。
同是江南寒夜客，羽毛单薄稻粱微。

卷 628_8 【早行】

陆龟蒙

水寒孤棹触天文，直似乘槎去问津。
纵使碧虚无限好，客星名字也愁人。

卷 628_9 【木兰堂（一作李商隐诗）】

陆龟蒙

洞庭波浪渺无津，日日征帆送远人。
几度木兰舟上望，不知元是此花身。

卷 628_10 【和袭美春夕陪崔谏议樱桃园宴】

陆龟蒙

佳人芳树杂春蹊，花外烟濛月渐低。
几度艳歌清欲转，流莺惊起不成栖。

卷 628_11 【和袭美松江早春】

陆龟蒙

柳下江餐待好风，暂时还得狎渔翁。
一生无事烟波足，唯有沙边水勃公。

卷 628_12 【和袭美女坟湖】

陆龟蒙

水平波淡绕回塘，鹤殉人沉万古伤。
应是离魂双不得，至今沙上少鸳鸯。

卷 628_13 【和袭美泰伯庙】

陆龟蒙

故国城荒德未荒，年年椒奠湿中堂。
迩来父子争天下，不信人间有让王。

卷 628_14 【和袭美木兰院次韵】

陆龟蒙

苦吟清漏迢迢极，月过花西尚未眠。
犹忆故山欹警枕，夜来呜咽似流泉。

卷 628_15 【和袭美重题蔷薇】

陆龟蒙

秾华自古不得久，况是倚春春已空。
更被夜来风雨恶，满阶狼藉没多红。

卷 628_16 【和袭美春夕酒醒】

陆龟蒙

几年无事傍江湖，醉倒黄公旧酒垆。
觉后不知明月上，满身花影倩人扶。

卷 628_17 【和袭美木兰后池三咏·重台莲花】

陆龟蒙

水国烟乡足芰荷，就中芳瑞此难过。
风情为与吴王近，红萼常教一倍多。

卷 628_18 【和袭美木兰后池三咏·浮萍】

陆龟蒙

晚来风约半池明，重叠侵沙绿罽成。
不用临池更相笑，最无根蒂是浮名。

卷 628_19 【和袭美木兰后池三咏·白莲】

陆龟蒙

素花多蒙别艳欺，此花真合在瑶池。
还应有恨无人觉，月晓风清欲堕时。

卷 628_20 【和袭美重题后池】

陆龟蒙

晓烟清露暗相和，浴雁浮鸥意绪多。
却是陈王词赋错，枉将心事托微波。

卷 628_21 【和胥（一作青）门闲泛】

陆龟蒙

细桨轻撶下白蘋，故城花谢绿阴新。
岂无今日逃名士，试问南塘著屣人？

卷 628_22 【袭美初植松桂偶题】

陆龟蒙

轩阴冉冉移斜日，寒韵泠泠入晚风。
烟格月姿曾不改，至今犹似在山中。

卷 628_23 【和袭美馆娃宫怀古五绝】

陆龟蒙

三千虽衣水犀珠，半夜夫差国暗屠。
犹有八人皆二八，独教西子占亡吴。

一宫花渚漾涟漪，倏堕鸦鬟出茧眉。
可料座中歌舞袖，便将残节拂降旗。

几多云榭倚青冥，越焰烧来一片平。
此地最应沾恨血，至今春草不匀生。

江色分明练绕台，战帆遥隔绮疏开。
波神自厌荒淫主，勾践楼船稳帖来。

宝袜香褙碎晓尘，乱兵谁惜似花人？
伯劳应是精灵使，犹向残阳泣暮春。

卷 628_24 【和袭美虎丘寺西小溪闲泛三绝】

陆龟蒙

树号相思枝拂地，鸟语提壶声满溪。
云涯一里千万曲，直是渔翁行也迷。

荒柳卧波浑似困，宿云遮坞未全痴。
云情柳意萧萧会，若问诸余总不知。

每逢孤屿一倚楫，便欲狂歌同采薇。
任是烟萝中待月，不妨欹枕扣舷归。

卷 628_25 【和袭美天竺寺八月十五夜桂子】

陆龟蒙

霜实常闻秋半夜，天台天竺堕云岑。

如何两地无人种，却是湘漓是桂林。

卷 628_26 【戏题袭美书印囊】

陆龟蒙

鹄衔龟顾妙无余，不爱封侯爱石渠。
应笑休文过万卷，至今谁道沈家书。

卷 628_27 【和袭美钓侣二章】

陆龟蒙

一艇轻撶看晓涛，接_离抛下漉春醪。
相逢便倚蒹葭泊，更唱菱歌擘蟹螯。

雨后沙虚古岸崩，鱼梁移入乱云层。
归时月堕汀洲暗，认得妻儿结网灯。

卷 628_28 【和袭美寄同年韦校书】

陆龟蒙

万古风烟满故都，清才搜括妙无余。

可中寄与芸香客，便是江南地里书。

卷 628_29 【和袭美初冬偶作】

陆龟蒙

桐下空阶叠绿钱，貂裘初绽拥高眠。
小炉低幌还遮掩，酒滴灰香似去年。

卷 628_30 【袭美醉中寄一壶并一绝，走笔次韵奉酬】

陆龟蒙

酒痕衣上杂莓苔，犹忆红螺一两杯。
正被绕篱荒菊笑，日斜还有白衣来。

卷 628_31 【再和次韵】

陆龟蒙

阶下饥禽啄嫩苔，野人方倒病中杯。
寒蔬卖却还沽吃，可有金貂换得来。

卷 628_32 【和袭美重玄寺双矮桧】

陆龟蒙

可怜烟刺是青螺，如到双林误礼多。
更忆早秋登北固，海门苍翠出晴波。

卷 628_33 【醉中戏赠袭美】

陆龟蒙

南北风流旧不同，伧吴今日若相通。
病来犹伴金杯满，欲得人呼小褚公。

卷 628_34 【润卿遗青餠饭兼之一绝，聊用答谢】

陆龟蒙

旧闻香积金仙食，今见青精玉斧餐。
自笑镜中无骨录，可能飞上紫雲端。

卷 628_35 【文宴招润卿博士辞以道侣将至一绝寄之】

陆龟蒙

仙客何时下鹤翎，方瞳如水脑华清。
不过传达杨君梦，从许人间小兆听。

卷 628_36 【再招】

陆龟蒙

遥知道侣谈玄次，又是文交丽事时。
虽是寒轻云重日，也留花簪待徐摘。

卷 628_37 【玩金鸂鶒戏赠袭美】

陆龟蒙

曾向溪边泊暮云，至今犹忆浪花群。
不知镂羽凝香雾，堪与鸳鸯觉后闻。

卷 628_38 【子规一首】

陆龟蒙

碧竿微露月玲珑，谢豹伤心独叫风。
高处已应闻滴血，山榴一夜几枝红？

卷 628_39 【寄题天台国清寺齐梁体】

陆龟蒙

峰带楼台天外立，明河色近罽毼湿。
松间石上定僧寒，半夜檐溪水声急。

卷 628_40 【奉和谏议酬先辈霜菊】

陆龟蒙

紫茎芳艳照西风，只怕霜华掠断丛。
争奈病夫难强饮，应须速自召车公。

卷 628_41 【和袭美咏皋桥】

陆龟蒙

横截春流架断虹，凭栏犹思五噫风。
今来未必非梁孟，却是无人断伯通。

卷 628_42 【和袭美悼鹤】

陆龟蒙

鄮都香稻字重思，遥想飞魂去未饥。
争奈野鸦无数健，黄昏来占旧栖枝。

卷 628_43 【和醉中袭美先起次韵】

陆龟蒙

莫唱艳歌凝翠黛，已通仙籍在金闺。
他时若寄相思泪，红粉痕应伴紫泥。

卷 628_44 【和袭美酒病偶作次韵】

陆龟蒙

柳疏桐下晚窗明，只有微风为折醒。
唯欠白绡笼解散，洛生闲咏两三声。

卷 628_45 【忆白菊】

陆龟蒙

稚子书传白菊开，西成相滞未容回。
月明阶下窗纱薄，多少清香透入来。

卷 628_46 【和同润卿寒夜访袭美各惜其志次韵】

陆龟蒙

醉韵飘飘不可亲，掉头吟侧华阳巾。
如能跂脚南窗下，便是羲皇世上人。

卷 628_47 【和裴美寒夜文宴润卿有期不至】

陆龟蒙

细雨轻觞玉漏终，上清词句落吟中。
松斋一夜怀贞白，霜外空闻五粒风。

卷 628_48 【移石盆】

陆龟蒙

移得龙泓漱滟寒，月轮初下白云端。
无人尽日澄心坐，倒影新篁一两竿。

卷 628_49 【石竹花咏】

陆龟蒙

曾看南朝画国娃，古萝衣上碎明霞。
而今莫共金钱斗，买却春风是此花。

第六百二十九卷

卷 629_1 【和袭美友人许惠酒以诗征之】

陆龟蒙

冻醪初漉嫩如春，轻蚁漂漂杂蕊尘。
得伴方平同一醉，明朝应作蔡经身。

卷 629_2 【闻圆载上人挟儒书泊释典归日本国，更作一绝以送】

陆龟蒙

九流三藏一时倾，万轴光凌渤海声。
从此遗编东去后，却应荒外有诸生。

卷 629_3 【闲吟】

陆龟蒙

闲吟料得三更尽，始把孤灯背竹窗。

一夜西风高浪起，不教归梦过寒江。

卷 629_4 【秘色越器】

陆龟蒙

九秋风露越窑开，夺得千峰翠色来。
好向中宵盛沆瀣，共嵇中散斗遗杯。

卷 629_5 【景阳宫井】

陆龟蒙

古堞烟埋宫井树，陈主吴姬堕泉处。
舜没苍梧万里云，却不闻将二妃去。

卷 629_6 【江南二首】

陆龟蒙

便风船尾香粳熟，细雨层头赤鲤跳。
待得江餐闲望足，日斜方动木兰桡。

村边紫豆花垂次，岸上红梨叶战初。

莫怪烟中重回首，酒家青绡一行书。

卷 629_7 【溪思雨中】

陆龟蒙

雨映前山万絢丝，橹声冲破似鸣机。
无端织得愁成段，堪作骚人酒病衣。

卷 629_8 【江城夜泊】

陆龟蒙

漏移寒箭丁丁急，月挂虚弓霭霭明。
此夜离魂堪射断，更须江笛两三声。

卷 629_9 【宫人斜】

陆龟蒙

草著愁烟似不春，晚莺哀怨问行人。
须知一种埋香骨，犹胜昭君作虏尘。

卷 629_10 【送棋客】

陆龟蒙

满目山川似势棋，况当秋雁正斜飞。
金门若召羊玄保，赌取江东太守归。

卷 629_11 【汉宫词】

陆龟蒙

招灵阁上霓旌绝，柏梁台中珠翠稠。
一身三十六宫夜，露滴玉盘青桂秋。

卷 629_12 【上清】

陆龟蒙

玉林风露寂寥清，仙妃对月闲吹笙。
新篴冷涩曲未尽，细拂云枝栖凤惊。

卷 629_13 【秋荷】

陆龟蒙

蒲茸承露有佳色，茭叶束烟如效颦。
盈盈一水不得渡，冷翠遗香愁向人。

卷 629_14 【有别二首】

陆龟蒙

且将丝紵系兰舟，醉下烟汀减去愁。
江上有楼君莫上，落花随浪正东流。

池上已看莺舌默，云间应即雁翰开。
唯愁别后当风立，万树将秋入恨来。

卷 629_15 【病中晓思】

陆龟蒙

月堕霜西竹井寒，辘轳丝冻下瓶难。
幽人病久浑成渴，愁见龙书一鼎干。

卷 629_16 【送友人之湖上】

陆龟蒙

故人溪上有渔舟，竿倚风蘋夜不收。
欲寄一函聊问讯，洪乔宁作置书邮。

卷 629_17 【寒日逢僧】

陆龟蒙

瘦胫高褰梵屣轻，野塘风劲锡环鸣。
如何不向深山里，坐拥闲云过一生。

卷 629_18 【冬柳】

陆龟蒙

柳汀斜对野人窗，零落衰条傍晓江。
正是霜风飘断处，寒鸥惊起一双双。

卷 629_19 【寄友人】

陆龟蒙

敬亭寒夜溪声里，同听先生讲太玄。
上得云梯不回首，钓竿犹在五湖边。

卷 629_20 【岛树】

陆龟蒙

波涛漱苦盘根浅，风雨飘多著叶迟。
迥出孤烟残照里，鹭鸶相对立高枝。

卷 629_21 【头陀僧】

陆龟蒙

万峰围绕一峰深，向此长修苦行心。
自扫雪中归鹿迹，天明恐被猎人寻。

卷 629_22 【晚渡】

陆龟蒙

半波风雨半波晴，渔曲飘秋野调清。
各样莲船逗村去，笠檐蓑袂有残声。

卷 629_23 【赠老僧二首】

陆龟蒙

枯貌自同霜里木，余生唯指佛前灯。
少时写得坐禅影，今见问人何处僧。

自有家山供衲线，不离溪曲取庵茅。
旧曾闻说林中鸟，定后长来顶上巢。

卷 629_24 【忆山泉】

陆龟蒙

一夜寒声来梦里，平明著屐到声边。
心期盛夏同过此，脱却荷衣石上眠。

卷 629_25 【白芙蓉】

陆龟蒙

澹然相对却成劳，月染风裁个个高。
似说玉皇亲谪堕，至今犹著水霜袍。

卷 629_26 【严光钓台】

陆龟蒙

片帆竿外揖清风，石立云孤万古中。
不是狂奴为故态，仲华争得黑头公。

卷 629_27 【读陈拾遗集】

陆龟蒙

蓬颗何时与恨平，蜀江衣带蜀山轻。
寻闻骑士枭黄祖，自是无人祭祢衡。

卷 629_28 【吴宫怀古】

陆龟蒙

香径长洲尽棘丛，奢云艳雨只悲风。
吴王事事须亡国，未必西施胜六宫。

卷 629_29 【送琴客之建康】

陆龟蒙

蕙风杉露共泠泠，三峡寒泉漱玉清。
君到南朝访遗事，柳家双锁旧知名。

卷 629_30 【闺怨】

陆龟蒙

白袷行人又远游，日斜空上映花楼。
愁丝堕絮相逢著，绊惹春风卒未休。

卷 629_31 【丁香】

陆龟蒙

江上悠悠人不问，十年云外醉中身。
殷勤解却丁香结，纵放繁枝散诞春。

卷 629_32 【种蒲】

陆龟蒙

杜若溪边手自移，旋抽烟剑碧参差。
何时织得孤帆去，悬向秋风访所思。

卷 629_33 【范蠡】

陆龟蒙

平吴专越祸胎深，岂是功成有去心。
勾践不知嫌鸟喙，归来犹自铸良金。

卷 629_34 【山僧二首】

陆龟蒙

山藓几重生草履，涧泉长自满铜瓶。
时将如意敲眠虎，遣向林间坐听经。

一夏不离苍岛上，秋来频话石城南。
思归瀑布声前坐，却把松枝拂旧庵。

卷 629_35 【上云乐】

陆龟蒙

青丝作笮桂为船，白兔捣药虾蟆丸。
便浮天汉泊星渚，回首笑君承露盘。

卷 629_36 【新秋杂题六首·眠】

陆龟蒙

一簟临窗薜叶秋，小帘风荡半离钩。
魂清雨急梦难到，身在五湖波上头。

卷 629_37 【新秋杂题六首·行】

陆龟蒙

寻人直到月坞北，觅鹤便过云峰西。
只今犹有疏野调，但绕莓苔风雨畦。

卷 629_38 【新秋杂题六首·倚】

陆龟蒙

橘下凝情香染巾，竹边留思露摇身。
背烟垂首尽日立，忆得山中无事人。

卷 629_39 【新秋杂题六首·吟】

陆龟蒙

忆山摇膝石上晚，怀古掉头溪畔凉。
有时得句一声发，惊起鹭鸶和夕阳。

卷 629_40 【新秋杂题六首·食】

陆龟蒙

日午空斋带睡痕，水蔬山药荐盘飧。
林乌信我无机事，长到而今下石盆。

卷 629_41 【新秋杂题六首·坐】

陆龟蒙

偶避蝉声来隙地，忽随鸿影入辽天。
闲僧不会寂寥意，道学西方人坐禅。

卷 629_42 【新沙】

陆龟蒙

渤澥声中涨小堤，官家知后海鸥知。
蓬莱有路教人到，应亦年年税紫芝。

卷 629_43 【邺宫词二首】

陆龟蒙

魏武平生不好香，枫胶蕙炷洁宫房。
可知遗令非前事，却有余薰在绣囊。

花飞蝶骇不愁人，水殿云廊别置春。
晓日靓妆千骑女，白樱桃下紫纶巾。

卷 629_44 【古别离】

陆龟蒙

仙人左手把长箭，欲射日乌乌不栖。
何事离情畏明发，一心唯恨汝南鸡。

卷 629_45 【高道士】

陆龟蒙

峨眉道士风骨峻，手把玉皇书一通。
东游借得琴高鲤，骑入蓬莱清浅中。

卷 629_46 【蔬食】

陆龟蒙

孔融不要留残脍，庾悦无端吝子鹅。
香稻熟来秋菜嫩，伴僧餐了听云和。

卷 629_47 【寄远】

陆龟蒙

缥梨花谢莺口吃，黄犊少年人未归。
画扇红弦相掩映，独看斜月下帘衣。

卷 629_48 【山中僧】

陆龟蒙

手关一室翠微里，日暮白云栖半间。
白云朝出天际去，若比老僧犹未闲。

卷 629_49 【洞宫秋夕】

陆龟蒙

浓霜打叶落地声，南溪石泉细泠泠。
洞宫寂寞人不语，坐见月生云母屏。

卷 629_50 【连昌宫词二首·门】

陆龟蒙

金铺零落兽环空，斜掩双扉细草中。
日暮鸟归宫树绿，不闻鸦轧闭春风。

卷 629_51 【连昌宫词二首·阶】

陆龟蒙

草没苔封叠翠斜，坠红千叶拥残霞。
年年直为秋霖苦，滴陷青珉隐起花。

卷 629_52 【怀宛陵旧游】

陆龟蒙

陵阳佳地昔年游，谢朓青山李白楼。
唯有日斜溪上思，酒旗风影落春流。

卷 629_53 【松石晓景图】

陆龟蒙

霜骨云根惨淡愁，宿烟封著未全收。
将归与说文通后，写得松江岸上秋。

卷 629_54 【钓车】

陆龟蒙

小轮轻线妙无双，曾伴幽人酒一缸。
洛客见诗如有问，辗烟冲雨过桐江。

卷 629_55 【漉酒巾】

陆龟蒙

靖节高风不可攀，此巾犹坠冻醪间。
偏宜雪夜山中戴，认取时情与醉颜。

卷 629_56 【华阳巾】

陆龟蒙

莲花峰下得佳名，云褐相兼上鹤翎。
须是古坛秋霁后，静焚香炷礼寒星。

卷 629_57 【方响】

陆龟蒙

击霜寒玉乱丁丁，花底秋风拂坐生。
王母闲看汉天子，满猗兰殿佩环声。

卷 629_58 【白鹭】

陆龟蒙

雪然飞下立苍苔，应伴江鸥拒我来。
见欲扁舟摇荡去，倩君先作水云媒。

卷 629_59 【溪行】

陆龟蒙

晚天寒雨上滩时，他已扬舲我尚迟。
自是檣低帆幅少，溪风终不两般吹。

卷 629_60 【太湖叟】

陆龟蒙

细桨轻船卖石归，酒痕狼藉遍苔衣。
攻车战舰繁如织，不肯回头问是非。

卷 629_61 【答友人】

陆龟蒙

荆卿雄骨化为尘，燕市应无共饮人。
能脱鹈鹕来换酒，五湖赊与一年春。

卷 629_62 【偶作】

陆龟蒙

酒信巧为谖病绪，花音长作嫁愁媒。
也知愁病堪回避，争奈流莺唤起来。

卷 629_63 【春思二首】

陆龟蒙

竹外麦烟愁漠漠，短翅啼禽飞魄魄。
此时忆著千里人，独坐支颐看花落。

江南酒熟清明天，高高绿旂当风悬。
谁家无事少年子，满面落花犹醉眠。

卷 629_64 【访僧不遇】

陆龟蒙

棹倚东林欲问禅，远公飞锡未应还。
蒙庄弟子相看笑，何事空门亦有关？

卷 629_65 【谢山泉】

陆龟蒙

泱泱春泉出洞霞，石坛封寄野人家。
草堂尽日留僧坐，自向前溪摘茗芽。

卷 629_66 【洞宫夕（一作华阳观）】

陆龟蒙

月午山空桂花落，华阳道士云衣薄。
石坛香散步虚声，杉云清泠滴栖鹤。

卷 629_67 【峡客行】

陆龟蒙

万仞峰排千剑束，孤舟夜系峰头宿。
蛮溪雪坏蜀江倾，滟潏朝来大如屋。

卷 629_68 【江边】

陆龟蒙

江边日晚潮烟上，树里鸦鸦桔槔响。
无因得似灌园翁，十亩春蔬一藜杖。

卷 629_69 【帘】

陆龟蒙

枕映疏容晚向欹，秋烟脉脉雨微微。
逆风障燕寻常事，不学人前当妓衣。

卷 629_70 【开元杂题七首·玉龙子】

陆龟蒙

何代奇工碾玉英，细髯纤角尽雕成。
烟乾雾悄君心苦，风雨长随一掷声。

卷 629_71 【开元杂题七首·照夜白】

陆龟蒙

雪虬轻骏步如飞，一练腾光透月旗。
应笑穆王抛万乘，踏风鞭露向瑶池。

卷 629_72 【开元杂题七首·舞马】

陆龟蒙

月窟龙孙四百蹄，骄骧轻步应金鞿。
曲终似要君王宠，回望红楼不敢嘶。

卷 629_73 【开元杂题七首·杂伎】

陆龟蒙

拜象驯犀角抵豪，星丸霜剑出花高。
六宫争近乘舆望，珠翠三千拥赭袍。

卷 629_74 【开元杂题七首·雪衣女】

陆龟蒙

嫩红钩曲雪花攒，月殿栖时片影残。
自说夜来春梦恶，学持金觥玉栏干。

卷 629_75 【开元杂题七首·绣岭宫】

陆龟蒙

绣岭花残翠倚空，碧窗瑶砌旧行宫。
闲乘小驷浓阴下，时举金鞭半袖风。

卷 629_76 【开元杂题七首·汤泉】

陆龟蒙

暖殿流汤数十间，玉渠香细浪回环。
上皇初解云衣浴，珠棹时敲瑟瑟山。

卷 629_77 【题杜秀才水亭（一本题上有荆溪早景四字）】

陆龟蒙

晓和风露立晴烟，只恐腥魂浣洞天。
云肆有龙君若买，便敲初日铸金钱。

卷 629_78 【翠碧】

陆龟蒙

红襟翠翰两参差，径拂烟华上细枝。
春水渐生鱼易得，莫辞风雨坐多时。

第六百三十卷

卷 630_1 【水国诗（以下杂体诗）】

陆龟蒙

水国不堪旱，斯民生甚微。直至葭苢少，敢言鱼蟹肥。
我到荒村无食啖，对案又非梁谢览。况是干苗结子疏，
归时只得藜羹糝。

卷 630_2 【井上桐】

陆龟蒙

美人伤别离，汲井长待晓。愁因辘轳转，惊起双栖鸟。
独立傍银床，碧桐风袅袅。

卷 630_3 【门前路】

陆龟蒙

门前向城路，一直复一曲。曲去日中还，直行日暮宿。

何必日中还，曲途荆棘间。

卷 630_4 【彼农二章】

陆龟蒙

世路浇险，淳风荡除。彼农家流，犹存厥初。藁焉而席，茨焉而居。首乱如葆，形枯若踰。大耋既鲐，童子未□。以负以载，悉薅悉鋤，我慕圣道，我耽古书。小倦于学，时游汝庐。有饭一盛，莫盐莫蔬。有繻一緼，不襟不祛。所谓饥寒，汝何逌欤。

禹贡厥田，上下各异。善人为邦，民受其赐。去年西成，野有遗穗。今夏南亩，旱气赤地。遭其丰凶，概敛无二。退输弗供，进诉弗视。号于旻天，以血为泪。孟子有言，王无罪岁。诗之穷辞，以嫉悍吏。

卷 630_5 【奉酬袭美苦雨见寄】

陆龟蒙

松篁交加午阴黑，别是江南烟霭国。顽云猛雨更相欺，声似虬号色如墨。茅茨裊烂檐生衣，夜夜化为萤火飞。萤飞渐多屋渐薄，一注愁霖当面落。愁霖愁霖尔何错，灭顶于余奚所作。既不能赋似陈思王，又不能诗似谢康乐。

昔年尝过杜子美，亦得高歌破印纸。惯曾掀搅大笔多，
为我才情也如此。高揖愁霖词未已，披文忽自皮夫子。
哀弦怨柱合为吟，恁我穷栖蓬蒿里。初悲湿翼何由起，
未欲笺天叩天耳。其如玉女正投壶，笑电霏霏作天喜。
我本曾无一棱田，平生啸傲空渔船。有时赤脚弄明月，
踏破五湖光底天。去岁王师东下急，输兵粟尽民相泣。
伊予不战不耕人，敢怨烝黎无糝粒。不然受性圆如规，
千姿万态分毫厘。唾壶虎子尽能执，舐痔折枝无所辞。
有头强方心强直，撑拄颓风不量力。自爱垂名野史中，
宁论抱困荒城侧。唯君浩叹非庸人，分衣辍饮来相亲。
横眠木榻忘华荐，对食露葵轻八珍。欲穷玄，凤未白。
欲怀仙，鲸尚隔。不如驱入醉乡中，只恐醉乡田地窄。

卷 630_6 【夏日闲居作四声诗寄袭美·平声】

陆龟蒙

荒池菰蒲深，闲阶莓苔平。江边松篁多，人家帘栊清。
为书凌遗编，调弦夸新声。求欢虽殊途，探幽聊怡情。

卷 630_7 【夏日闲居作四声诗寄袭美·平上声】

陆龟蒙

朝烟涵楼台，晚雨染岛屿。渔童惊狂歌，艇子喜野语。

山容堪停杯，柳影好隐暑。年华如飞鸿，斗酒幸且举。

卷 630_8 【夏日闲居作四声诗寄袭美·平去声】

陆龟蒙

新开窗犹偏，自种蕙未遍。书签风摇闻，钓榭雾破见。
耕耘闲之资，啸咏性最便。希夷全天真，讷要问贵贱。

卷 630_9 【夏日闲居作四声诗寄袭美·平入声】

陆龟蒙

端居愁无涯，一夕发欲白。因为鸾章吟，忽忆鹤骨客。
手披丹台文，脚著赤玉舄。如蒙清音酬，若渴吸月液。

卷 630_10 【奉酬袭美苦雨四声重寄三十二句·平声】

陆龟蒙

幽栖眠疏窗，豪居凭高楼。浮沲惊跳丸，寒声思重裘。
床前垂文竿，巢边登轻舟。虽无东皋田，还生鱼乎忧。

卷 630_11 【奉酬袭美苦雨四声重寄三十二句·平上声】

陆龟蒙

层云愁天低，久雨倚槛冷。丝禽藏荷香，锦鲤绕岛影。
心将时人乖，道与隐者静。桐阴无深泉，所以逞短绠。

卷 630_12 【奉酬袭美苦雨四声重寄三十二句·平去声】

陆龟蒙

乌蟾俱沈光，昼夜恨暗度。何当乘云螭，面见上帝诉。
臣言阴云欺，诏用利剑付。回车诛群奸，自散万籁怒。

卷 630_13 【奉酬袭美苦雨四声重寄三十二句·平入声】

陆龟蒙

危檐仍空阶，十日滴不歇。青莎看成狂，白菊即欲没。
吴王荒金尊，越妾挟玉瑟。当时虽愁霖，亦若惜落月。

卷 630_14 【晓起即事因成回文寄袭美】

陆龟蒙

平波落月吟闲景，暗幌浮烟思起人。清露晓垂花谢半，
远风微动蕙抽新。城荒上处樵童小，石藓分来宿鹭驯。
晴寺野寻同去好，古碑苔字细书匀。

卷 630_15 【回文】

陆龟蒙

静烟临碧树，残雪背晴楼。冷天侵极戍，寒月对行舟。

卷 630_16 【叠韵山中吟】

陆龟蒙

琼英轻明生，石脉滴沥碧。玄铅仙偏怜，白帟客亦惜。

卷 630_17 【双声溪上思】

陆龟蒙

溪空唯容云，木密不隕雨。迎渔隐映间，安问讴雅櫓。

卷 630_18 【叠韵吴宫词二首】

陆龟蒙

肤愉吴都姝，眷恋便殿宴。逡巡新春人，转面见战箭。

红栊通东风，翠珥醉易坠。平明兵盈城，弃置遂至地。

卷 630_19 【和胥口即事】

陆龟蒙

雨后山容若动，天寒树色如消。目送回汀隐隐，
心随挂鹿摇摇。白蒋知秋露裊，青枫欲暮烟饶。
莫问吴趋行乐，酒旗竿倚河桥。

把钓丝随浪远，采莲衣染香浓。绿倒红飘欲尽，
风斜雨细相逢。断岸沈渔^一各，邻村送客^二龙舟。即
是清霜剖野，乘闲莫厌来重。

卷 630_20 【齐梁怨别】

陆龟蒙

寥寥缺月看将落，檐外霜华染罗幕。

不知兰棹到何山，应倚相思树边泊。

卷 630_21 【闲居杂题五首·鸣蛩早】

陆龟蒙

闲来倚杖柴门口，鸟下深枝啄晚虫。
周步一池销半日，十年听此鬓如蓬。

卷 630_22 【闲居杂题五首·野态真】

陆龟蒙

君如有意耽田里，予亦无机向艺能。
心迹所便唯是直，人间闻道最先憎。

卷 630_23 【闲居杂题五首·松间斟】

陆龟蒙

子山园静怜幽木，公干词清咏萼门。
月上风微萧洒甚，斗醪何惜置盈尊。

卷 630_24 【闲居杂题五首·饮岩泉】

陆龟蒙

已甘茅洞三君食，欠买桐江一朵山。
严子濂高秋浪白，水禽飞尽钓舟还。

卷 630_25 【闲居杂题五首·当轩鹤】

陆龟蒙

自笑与人乖好尚，田家山客共柴车。
干时未似栖庐雀，鸟道闲携相尔书。

卷 630_26 【药名离合夏日即事三首】

陆龟蒙

乘屐著来幽砌滑，石罍煎得远泉甘。
草堂只待新秋景，天色微凉酒半酣。

避暑最须从朴野，葛巾筠席更相当。
归来又好乘凉钓，藤蔓阴阴著雨香。

窗外晓帘还自卷，柏烟兰露思晴空。
青箱有意终须续，断简遗编一半通。

卷 630_27 【和袭美怀锡山药名离合二首】

陆龟蒙

鹤伴前溪栽白杏，人来阴洞写枯松。
萝深境静日欲落，石上未眠闻远钟。

佳句成来谁不伏，神丹偷去亦须防。
风前莫怪携诗藁，本是吴吟荡桨郎。

卷 630_28 【和袭美怀鹿门县名离合二首】

陆龟蒙

云容覆枕无非白，水色侵矶直是蓝。
田种紫芝餐可寿，春来何事恋江南。

竹溪深处猿同宿，松阁秋来客共登。
封径古苔侵石鹿，城中谁解访山僧。

卷 630_29 【寒日古人名】

陆龟蒙

初寒朗咏裴回立，欲谢玄关早晚开。
昨日登楼望江色，鱼梁鸿雁几多来。

卷 630_30 【句】

陆龟蒙

几点社翁雨，一番花信风。
水鸟歌妇女，衣襟便佞舌。

溪山自是清凉国，松竹合封萧洒侯。

山上花明水上曛，一桡青翰破霞文。

白帝霜舆欲御秋。

但说漱流并枕石，不辞蝉腹与龟肠。
头方不会王门事，尘土空缁白苧衣。

秋来懒上向吴亭。

第六百三十一卷

卷 631_1 【旅泊吴门】

张贲

一舸吴江晚，堪忧病广文。鲈鱼谁与伴，鸥鸟自成群。
反照纵横水，斜空断续云。异乡无限思，尽付酒醺醺。

卷 631_2 【贲中间有吴门旅泊之什蒙鲁望垂和更作一章以伸酬谢】

张贲

偶发陶匏响，皆蒙组绣文。清秋将落帽，子夏正离群。
有恨书燕雁，无聊赋郢云。遍看心自醉，不是酒能醺。

卷 631_3 【酬袭美先见寄倒来韵】

张贲

寻疑天意丧斯文，故选茅峰寄白云。酒后只留沧海客，

香前唯见紫阳君。近年已绝诗书癖，今日兼将笔砚焚。
为有此身犹苦患，不知何者是玄纁。

卷 631_4 【奉和袭美醉中即席见赠次韵】

张贲

桂枝新下月中仙，学海词锋誉蔼然。文阵已推忠信甲，
穷波犹认孝廉船。清标称住羊车上，俗韵惭居鹤氅前。
共许逢蒙快弓箭，再穿杨叶在明年。

卷 631_5 【奉和袭美题褚家林亭】

张贲

疏野林亭震泽西，朗吟闲步喜相携。时时风折芦花乱，
处处霜摧稻穗低。百本败荷鱼不动，一枝寒菊蝶空迷。
今朝偶得高阳伴，从放山翁醉似泥。

卷 631_6 【奉和袭美伤开元观顾道士】

张贲

凤麟胶尽夜如何，共叹先生剑解多。几度吊来唯白鹤，

此时乘去必青骡。图中含景随残照，琴里流泉寄逝波。
惆怅真灵又空返，玉书谁授紫微歌。

卷 631_7 【和鲁望白菊】

张贲

雪彩冰姿号女华，寄身多是地仙家。有时南国和霜立，
几处东篱伴月斜。谢客琼枝空贮恨，袁郎金钿不成夸。
自知终古清香在，更出梅妆弄晚霞。

卷 631_8 【奉和袭美先辈悼鹤】

张贲

池塘萧索掩空笼，玉树同嗟一土中。莎径罢鸣唯泣露，
松轩休舞但悲风。丹台旧肇难重缉，紫府新书岂更通。
云减雾消无处问，只留华发与衰翁。

卷 631_9 【偶约道流终乖文会答皮陆】

张贲

仙侣无何访蔡经，两烦韶濩出彤庭。

人间若有登楼望，应怪文星近客星。

卷 631_10 【和袭美寒夜见访】

张贲

云孤鹤独且相亲，仿效从它折角巾。
不用吴江叹留滞，风姿俱是玉清人。

卷 631_11 【和袭美醉中先起次韵】

张贲

何事桃源路忽迷，惟留云雨怨空闺。
仙郎共许多情调，莫遣重歌浊水泥。

卷 631_12 【和皮陆酒病偶作】

张贲

白编椰席镂冰明，应助杨青解宿醒。
难继二贤金玉唱，可怜空作断猿声。

卷 631_13 【送浙东德师侍御罢府西归】

张贲

孤云独鸟本无依，江海重逢故旧稀。
杨柳渐疏芦苇白，可怜斜日送君归。

卷 631_14 【以青飣饭分送袭美鲁望因成一绝】

张贲

谁屑琼瑶事青飣，旧传名品出华阳。
应宜仙子胡麻拌，因送刘郎与阮郎。

卷 631_15 【玩金鸂鶒和陆鲁望】

张贲

翠羽红襟镂彩云，双飞常笑白鸥群。
谁怜化作雕金质，从倩沉檀十里闻。

卷 631_16 【悼鹤和袭美】

张贲

渥顶鲜毛品格驯，莎庭闲暇重难群。
无端日暮东风起，飘散春空一片云。

卷 631_17 【览皮先辈盛制，因作十韵以寄，用伸款仰】

崔璐

河岳挺灵异，星辰精气殊。在人为英杰，为国作祲符。
襄阳得奇士，俊迈真龙驹。勇果鲁仲由，文赋蜀相如。
浑浩江海广，葩华桃李敷。小言入无间，大言塞空虚。
几人游赤水，夫子得玄珠。鬼神争奥秘，天地惜洪炉。
既有曾参行，仍兼君子儒。吾知上帝意，将使居黄枢。
好保千金体，须为万姓谟。

卷 631_18 【浙东罢府西归酬别张广文皮先辈陆秀才】

李穀

岂有头风笔下痊，浪成蛮语向初筵。兰亭旧趾虽曾见，
柯笛遗音更不传。照曜文星吴分野，留连花月晋名贤。

相逢只恨相知晚，一曲骊歌又几年。

卷 631_19 【和皮日休悼鹤】

李穀

才子襟期本上清，陆云家鹤伴闲情。犹怜反顾五六里，
何意忽归十二城。露滴谁闻高叶坠，月沉休藉半阶明。
人间华表堪留语，剩向秋风寄一声。

道林曾放雪翎飞，应悔庭除闭羽衣。
料得王恭披鹤氅，倚吟犹待月中归。

卷 631_20 【醉中袭美先月中归】

李穀

休文虽即逃琼液，阿鹜还须掩玉闺。
月落金鸡一声后，不知谁悔醉如泥。

卷 631_21 【奉酬皮先辈霜菊见赠】

崔璞

菊花开晚过秋风，闻道芳香正满丛。

争奈病夫难强饮，应须速自召车公。

卷 631_22 【蒙恩除替将还京洛偶叙所怀因成六韵呈军事院诸公...
秀才】

崔璞

两载求人瘼，三春受代归。务繁多簿籍，才短乏恩威。
共理乖天奖，分忧值岁饥。遽蒙交郡印，安敢整朝衣？
作牧惭为政，思乡念式微。傥容还故里，高卧掩柴扉。

卷 631_23 【和皮日休悼鹤】

魏朴

直欲裁诗问杳冥，岂教灵化亦浮生。风林月动疑留魄，
沙岛香愁似蕴情。雪骨夜封苍藓冷，练衣寒在碧塘轻。
人间飞去犹堪恨，况是泉台远玉京。

经秋宋玉已悲伤，况报胎禽昨夜亡。
霜晓起来无问处，伴僧弹指绕荷塘。

卷 631_24 【皮裘美见留小宴次韵】

羊昭业

泽国春来少遇晴，有花开日且飞觥。王戎似电休推病，
周顗才醒众却惊。芳景渐浓偏属酒，暖风初畅欲调莺。
知君不肯然官烛，争得华筵彻夜明。

卷 631_25 【送羊振文归覲桂阳】

颜萱

高挂吴帆喜动容，问安归去指湘峰。悬鱼庭内芝兰秀，
驭鹤门前薜荔封。红旆正怜棠影茂，彩衣偏带桂香浓。
临岐独有沾襟恋，南巷当年共化龙。

卷 631_26 【送圆载上人】

颜萱

师来一世恣经行，却泛沧波问去程。心静已能防渴鹿，
颿喧时为骇长鲸。禅林几结金桃重，梵室重修铁瓦轻。
料得还乡无别利，只应先见日华生。

卷 631_27 【过张祜处士丹阳故居】

颜萱

忆昔为儿逐我兄，曾抛竹马拜先生。书斋已换当时主，
诗壁空题故友名。岂是争权留怨敌，可怜当路尽公卿。
柴扉草屋无人问，犹向荒田责地征。

卷 631_28 【和袭美伤顾道士】

郑璧

斜汉银澜一夜东，飘飘何处五云中。空留华表千年约，
才毕丹炉九转功。形蜕远山孤圹月，影寒深院晓松风。
门人不睹飞升去，犹与浮生哭恨同。

卷 631_29 【奉和陆鲁望白菊】

郑璧

白艳轻明带露痕，始知佳色重难群。终朝疑笑梁王雪，
尽日慵飞蜀帝魂。燕雨似翻瑶渚浪，雁风疑卷玉绡纹。
琼妃若会宽裁剪，堪作蟾宫夜舞裙。

卷 631_30 【和袭美索友人酒】

郑璧

乘兴闲来小谢家，便裁诗句乞榴花。
邺原虽不无端醉，也爱临风从鹿车。

卷 631_31 【文燕润卿不至】

郑璧

已知羽驾朝金阙，不用烧兰望玉京。
应是易迁明月好，玉皇留看舞双成。

第六百三十二卷

卷 632_1 【塞上】

司空图

万里隋城在，三边虏气衰。沙填孤障角，烧断故关碑。
马色经寒惨，雕声带晚悲。将军正闲暇，留客换歌辞。

卷 632_2 【寄永嘉崔道融】

司空图

旅寓虽难定，乘闲是胜游。碧云萧寺霁，红树谢村秋。
戍鼓和潮暗，船灯照岛幽。诗家多滞此，风景似相留。

卷 632_3 【下方】

司空图

三十年来往，中间京洛尘。倦行今白首，归卧已清神。

坡暖冬抽笋，松凉夏健人。更惭征诏起，避世迹非真。

卷 632_4 【华下】

司空图

日炙旱云裂，迸为千道血。天地沸一镬，竟自烹妖孽。
尧汤遇灾数，灾数还中辍。何事奸与邪，古来难扑灭。

卷 632_5 【僧舍贻友】

司空图

笑破人间事，吾徒莫自欺。解吟僧亦俗，爱舞鹤终卑。
竹上题幽梦，溪边约敌棋。旧山归有阻，不是故迟迟。

卷 632_6 【下方】

司空图

昏旦松轩下，怡然对一瓢。雨微吟思足，花落梦无聊。
细事当棋遣，衰容喜镜饶。溪僧有深趣，书至又相邀。

卷 632_7 【华下送文浦（一作涓）】

司空图

郊居谢名利，何事最相亲。渐与论诗久，皆知得句新。
川明虹照雨，树密鸟冲人。应念从今去，还来岳下频。

卷 632_8 【自诫】

司空图

我祖铭座右，嘉谋贻厥孙。勤此苟不怠，令名日可存。
媒衒士所耻，慈俭道所尊。松柏岂不茂，桃李亦自繁。
众人皆察察，而我独昏昏。取训于老氏，大辩欲讷言。

卷 632_9 【效陈拾遗子昂感遇二首】

司空图

高燕飞何捷，啄害恣群雏。人岂玩其暴，华轩容尔居。
强欺自天稟，刚吐信吾徒。乃知不平者，矫世道终孤。

阳和含煦润，卉木竞纷华。当为众所悦，私已汝何夸。
北里秘秣艳，东园锁名花。豪夺乃常理，笑君徒咄嗟。

卷 632_10 【效陈拾遗子昂】

司空图

丑妇竞簪花，花多映愈丑。邻女恃其姿，掇之不盈手。
量已苟自私，招损乃谁咎。宠禄既非安，于吾竟何有。

卷 632_11 【感时】

司空图

好鸟无恶声，仁兽肯狂噬。宁教鹦鹉哑，不遣麒麟细。
人人语与默，唯观利与势。爱毁亦自遭，掩谤终失计。

卷 632_12 【秋思】

司空图

身病时亦危，逢秋多恸哭。风波一摇荡，天地几翻覆。
孤萤出荒池，落叶穿破屋。势利长草草，何人访幽独。

卷 632_13 【早春】

司空图

伤怀同客处，病眼却花朝。草嫩侵沙短，冰轻著雨消。
风光知可爱，容发不相饶。早晚丹丘去，飞书肯见招。

卷 632_14 【上陌梯寺怀旧僧二首】

司空图

云根禅客居，皆说旧无庐。松日明金像，山风向木鱼。
依栖应不阻，名利本来疏。纵有人相问，林间懒拆书。

高鸦隔谷见，路转寺西门。塔影荫泉脉，山苗侵烧痕。
钟疏含杳霭，閤迥亘黄昏。更待他僧到，长如前信存。

卷 632_15 【寄怀元秀上人】

司空图

悠悠干禄利，草草废渔樵。身世堪惆怅，风骚顿寂寥。
高秋期步野，积雨放趋朝。得句如相忆，莎斋且见招。

卷 632_16 【次韵和秀上人游南五台】

司空图

中峰曾到处，题记没苍苔。振锡传深谷，翻经想旧台。
危松临砌偃，惊鹿蓦溪来。内殿御诗切，身回心未回。

卷 632_17 【赠圆昉公】

司空图

天阶让紫衣，冷格鹤犹卑。道胜嫌名出，身闲觉老迟。
晓香延宿火，寒磬度高枝。每说长松寺，他年与我期。

卷 632_18 【赠信美寺岑上人】

司空图

巡礼诸方遍，湘南频有缘。焚香老山寺，乞食向江船。
纱碧笼名画，灯寒照净禅。我来能几日，莲漏滴寒泉。

卷 632_19 【江行二首】

司空图

地阔分吴塞，枫高映楚天。曲塘春尽雨，方响夜深船。
行纪添新梦，羁愁甚往年。何时京洛路，马上见人烟。

初程风信好，回望失津楼。日带潮声晚，烟含楚色秋。
戍旗当远客，岛树转惊鸥。此去非名利，孤帆任白头。

卷 632_20 【长安赠王注（一作法）】

司空图

正下搜贤诏，多君独避名。客来当意惬，花发遇歌成。
乐地留高趣，权门让后生。东方御闲驷，园外好同行。

卷 632_21 【赠步寄李员外】

司空图

危桥转溪路，经雨石丛荒。幽瀑下仙果，孤巢悬夕阳。
病辞青琐秘，心在紫芝房。更喜谐招隐，诗家有望郎。

卷 632_22 【寄郑仁规】

司空图

清才郑小戎，标的贵游中。万里云无侣，三山鹤不笼。
香和丹地暖，晚着彩衣风。荣路期经济，唯应在至公。

卷 632_23 【寄考功王员外】

司空图

喜闻三字耗，闲客是陪游。白鸟闲疏索，青山日滞留。
琴如高韵称，诗愧逸才酬。更勉匡君志，论思在献谋。

卷 632_24 【杂言（一作短歌行）】

司空图

乌飞飞，兔蹶蹶，朝来暮去驱时节。女娲只解补青天，
不解煎胶粘日月。

卷 632_25 【陈疾】

司空图

自怜旅舍亦酣歌，世路无机奈尔何。霄汉逼来心不动，
鬓毛白尽兴犹多。残阳暂照乡关近，远鸟因投岳庙过。
闲得此身归未得，磬声深夏隔烟萝。

卷 632_26 【浙上（一作江浙上，是今郢阳府，地在秦楚之交，故有秦云楚雨之句）】

司空图

华下支离已隔河，又来此地避干戈。山田渐广猿时到，
村舍新添燕亦多。丹桂石楠宜并长，秦云楚雨暗相和。
儿童栗熟迷归路，归得仍随牧竖歌。

西北乡关近帝京，烟尘一片正伤情。愁看地色连空色，
静听歌声似哭声。红蓼满村人不在，青山绕槛路难平。
从他烟棹更南去，休向津头问去程。

卷 632_27 【山中】

司空图

全家与我恋孤岑，蹋得苍苔一径深。逃难人多分隙地，

放生麋大出寒林。名应不朽轻仙骨，理到忘机近佛心。
昨夜前溪骤雷雨，晚晴闲步数峰吟。

卷 632_28 【寄赠诗僧秀公】

司空图

灵一心传清塞心，可公吟后础公吟。近来雅道相亲少，
惟仰吾师所得深。好句未停无暇日，旧山归老有东林。
冷曹孤宦甘寥落，多谢携筇数访寻。

卷 632_29 【重阳日访元秀上人】

司空图

红叶黄花秋景宽，醉吟朝夕在樊川。却嫌今日登山俗，
且共高僧对榻眠。别画长怀吴寺壁，宜茶偏赏雪溪泉。
归来童稚争相笑，何事无人与酒船。

卷 632_30 【丁未岁归王官谷】

司空图

家山牢落战尘西，匹马偷归路已迷。冢上卷旗人簇立，

花边移寨鸟惊啼。本来薄俗轻文字，却致中原动鼓鼙。
将取一壶闲日月，长歌深入武陵溪。

卷 632_31 【书怀】

司空图

病来犹强引雏行，力上东原欲试耕。几处马嘶春麦长，
一川人喜雪峰晴。闲知有味心难肯，道贵谋安迹易平。
陶令若能兼不饮，无弦琴亦是沽名。

卷 632_32 【退栖】

司空图

宦游萧索为无能，移住中条最上层。得剑乍如添健仆，
亡书久似失良朋。燕昭不是空怜马，支遁何妨亦爱鹰。
自此致身绳检外，肯教世路日兢兢。

卷 632_33 【五十】

司空图

闲身事少只题诗，五十今来觉陡衰。清秩偶叨非养望，

丹方频试更堪疑。髭须强染三分折，弦管遥听一半悲。
漉酒有巾无黍酿，负他黄菊满东篱。

卷 632_34 【新岁对写真】

司空图

得见明时下寿身，须甘岁酒更移巡。生情暗结千重恨，
寒势常欺一半春。文武轻销丹灶火，市朝偏贵黑头人。
自伤衰飒慵开镜，拟与儿童别写真。

卷 632_35 【华下】

司空图

簪冠新带步池塘，逸韵偏宜夏景长。扶起绿荷承早露，
惊回白鸟入残阳。久无书去干时贵，时有僧来自故乡。
不用名山访真诀，退休便是养生方。

卷 632_36 【重阳山居】

司空图

诗人自古恨难穷，暮节登临且喜同。四望交亲兵乱后，

一川风物笛声中。菊残深处回幽蝶，陂动晴光下早鸿。
明日更期来此醉，不堪寂寞对衰翁。

卷 632_37 【争名】

司空图

争名岂在更搜奇，不朽才消一句诗。穷辱未甘英气阻，
乖疏还有正人知。荷香浥露侵衣润，松影和风傍枕移。
只此共栖尘外境，无妨亦恋好文时。

卷 632_38 【光启四年春戊申（一作归王官次年作）】

司空图

乱后烧残数架书，峰前犹自恋吾庐。忘机渐喜逢人少，
览镜空怜待鹤疏。孤屿池痕春涨满，小阑花韵午晴初。
酣歌自适逃名久，不必门多长者车。

卷 632_39 【丁巳重阳】

司空图

重阳未到已登临，探得黄花且独斟。客舍喜逢连日雨，

家山似响隔河砧。乱来已失耕桑计，病后休论济活心。
自贺逢时能自弃，归鞭唯拍马鞞吟。

卷 632_40 【喜王驾小仪重阳相访】

司空图

白菊初开卧内明，闻君相访病身轻。樽前且拨伤心事，
谿上还随觅句行。幽鹤傍人疑旧识，残蝉向日噪新晴。
拟将寂寞同留住，且劝康时立大名。

卷 632_41 【酬张芬赦后见寄】

司空图

紫凤朝衔五色书，阳春忽布网罗除。已将心变寒灰后，
岂料光生腐草余。建水风烟收客泪，杜陵花烛梦郊居。
芳君故有诗相赠，欲报琼瑶愧不如。

卷 632_42 【上元放二雉】

司空图

婴网虽皆困，羣笼喜共归。无心期尔报，相见莫惊飞。

卷 632_43 【中秋】

司空图

闲吟秋景外，万事觉悠悠。此夜若无月，一年虚过秋。

卷 632_44 【偶题】

司空图

水榭花繁处，春晴日午前。鸟窥临槛镜，马过隔墙鞭。

卷 632_45 【闲步】

司空图

几处白烟断，一川红树时。坏桥侵辙水，残照背村碑。

卷 632_46 【春中】

司空图

伏溜侵阶润，繁花隔竹香。娇莺方晓听，无事过南塘。

卷 632_47 【独望】

司空图

绿树连村暗，黄花出陌稀。远陂春草绿，犹有水禽飞。

卷 632_48 【杂题】

司空图

孤枕闻莺起，幽怀独悄然。地融春力润，花泛晓光鲜。

卷 632_49 【漫题三首】

司空图

乱后他乡节，烧残故国春。自怜垂白首，犹伴踏青人。

齿落伤情久，心惊健忘频。蜗庐经岁客，蚕市异乡人。

率怕人言谨，闲宜酒韵高。山林若无虑，名利不难逃。

卷 632_50 【河上二首】

司空图

惨惨日将暮，驱羸独到庄。沙痕傍墟落，风色入牛羊。

新霁田园处，夕阳禾黍明。沙村平见水，深巷有鸥声。

卷 632_51 【早朝】

司空图

白日新年好，青春上国多。街平双阙近，尘起五云和。

卷 632_52 【即事二首】

司空图

茶爽添诗句，天清莹道心。只留鹤一只，此外是空林。

御礼征奇策，人心注盛时。从来留振滞，只待济临危。

卷 632_53 【永夜】

司空图

永夜疑无日，危时只赖山。旷怀休戚外，孤迹是非间。

卷 632_54 【秦关】

司空图

形胜今虽在，荒凉恨不穷。虎狼秦国破，狐兔汉陵空。

卷 632_55 【渡江】

司空图

秋江共僧渡，乡泪滴船回。一夜吴船梦，家书立马开。

卷 632_56 【退居漫题七首】

司空图

花缺伤难缀，莺喧奈细听。惜春春已晚，珍重草青青。

堤柳自绵绵，幽人无恨牵。只忧诗病发，莫寄校书笺。
燕语曾来客，花催欲别人。莫愁春又过，看著又新春。
身外都无事，山中久避喧。破巢看乳燕，留果待啼猿。
诗家通籍美，工部与司勋。高贾虽难敌，微官偶胜君。
努力省前非，人生上寿稀。青云无直道，暗室有危机。
燕拙营巢苦，鱼贪触网惊。岂缘身外事，亦似我劳形。

卷 632_57 【即事九首】

司空图

宿雨川原霁，凭高景物新。陂痕侵牧马，云影带耕人。
十年深隐地，一雨太平心。匣涩休看剑，窗明复上琴。
明时那弃置，多病自迟留。疏磬和吟断，残灯照卧幽。
衰鬓闲生少，丹梯望觉危。松须依石长，鹤不傍人卑。
落叶频惊鹿，连峰欲映雕。此生诗病苦，此病更萧条。

旅思又惊夏，庭前长小松。远峰生贵气，残月敛衰容。
林鸟频窥静，家人亦笑慵。旧居留稳枕，归卧听秋钟。
华宇知难保，烧来又却修。只应巢燕惜，未必主人留。
幽鸟穿篱去，邻翁采药回。云从潭底出，花向佛前开。

卷 632_58 【松滋渡二首】

司空图

步上短亭久，看回官渡船。江乡宜晚霁，楚老语丰年。
楚岫接乡思，茫茫归路迷。更堪斑竹驿，初听鹧鸪啼。

卷 632_59 【华清宫】

司空图

帝业山河固，离宫宴幸频。岂知驱战马，只是太平人。

卷 632_60 【牛头寺】

司空图

终南最佳处，禅诵出青霄。群木澄幽寂，疏烟泛沆寥。

卷 632_61 【感时上卢相】

司空图

兵待皇威振，人随国步安。万方休望幸，封岳始鸣銮。

卷 632_62 【乱后三首】

司空图

丧乱家难保，艰虞病懒医。空将忧国泪，犹拟洒丹墀。

流芳能几日，惆怅又闻蝉。行在多新贵，幽栖独长年。

世事尝艰险，僧居惯寂寥。美香闻夜合，清景见寅朝。

卷 632_63 【秋景】

司空图

景物皆难驻，伤春复怨秋。旋书红叶落，拟画碧云收。

卷 632_64 【避乱】

司空图

离乱身偶在，窜迹任浮沉。虎暴荒居迥，萤孤黑夜深。

卷 632_65 【长亭】

司空图

梅雨和乡泪，终年共酒衣。殷勤华表鹤，羡尔亦曾归。

卷 632_66 【村西杏花二首】

司空图

薄腻力偏羸，看看怆别时。东风狂不惜，西子病难医。

肌细分红脉，香浓破紫苞。无因留得玩，争忍折来抛。

卷 632_67 【独坐】

司空图

幽径入桑麻，坞西逢一家。编篱薪带茧，补屋草和花。

卷 632_68 【借居】

司空图

借住郊园久，仍逢夏景新。绿苔行屐稳，黄鸟傍窗频。

卷 632_69 【重阳】

司空图

菊开犹阻雨，蝶意切于人。亦应知暮节，不比惜残春。

卷 632_70 【偶书五首】

司空图

衰谢当何忏，惟应悔壮图。磬声花外远，人影塔前孤。

色变莺雏长，竿齐笋箨垂。白头身偶在，清夏景还移。
蜀妓轻成妙，吴娃狎共纤。晚妆留拜月，卷上水精帘。
独步荒郊暮，沉思远墅幽。平生多少事，弹指一时休。
掩谤知迎吠，欺心见强颜。有名人易困，无契债难还。

卷 632_71 【杂题九首】

司空图

病来胜未病，名缚便忘名。今日甘为客，当时注愍征。
暑湿深山雨，荒居破屋灯。此生无忤处，此去作高僧。
不须频怅望，且喜脱喧嚣。亦有终焉意，陂南看稻苗。
楼带猿吟迥，庭容鹤舞宽。日煞书因阅画，封药偶和丹。
宴罢论诗久，亭高拜表频。岸香蕃舶月，洲色海烟春。
驿步堤萦阁，军城鼓振桥。鸥和湖雁下，雪隔岭梅飘。
带雪南山道，和钟北阙明。太平当共贺，开化喝来声。

舴艋猿偷上，蜻蜓燕竞飞。樵香烧桂子，苔湿挂莎衣。
溪涨渔家近，烟收鸟道高。松花飘可惜，睡里洒离骚。

卷 632_25 【古乐府】

司空图

一叶随西风，君行亦向东。知妾飞书意，无劳待早鸿。

卷 632_26 【有感】

司空图

灯影看须黑，墙阴惜草青。岁阑悲物我，同是冒霜萤。

卷 632_27 【休休亭】

司空图

且喜安能保，那堪病更忧。可怜藜杖者，真个种瓜侯。

卷 632_28 【漫书二首】

司空图

剩欲逢花折，判须冒雨频。晴明开渐少，莫怕湿新巾。

小蝶尔何竞，追飞不惮劳。远教群雀见，宁悟祸梯高。

卷 632_29 【岁尽二首】

司空图

明日添一岁，端忧奈尔何。冲寒出洞口，犹校夕阳多。

莫话伤心事，投春满鬓霜。殷勤共尊酒，今岁只残阳。

卷 632_30 【牡丹】

司空图

得地牡丹盛，晓添龙麝香。主人犹自惜，锦幕护春霜。

卷 632_31 【乱后】

司空图

羽书传栈道，风火隔乡关。病眼那堪泣，伤心不到间。

卷 632_32 【春山】

司空图

可是武陵溪，春芳著路迷。花明催曙早，云腻惹空低。

卷 632_33 【乐府】

司空图

宝马踏尘光，双驰照路旁。喧传报戚里，明日幸长杨。

卷 632_34 【乱前上卢相】

司空图

虏黠虽多变，兵骄即易乘。犹须劳斥候，勿遣大河冰。

第六百三十三卷

卷 633_1 【有感】

司空图

国事皆须救未然，汉家高阁漫凌烟。
功臣尽遣词人赞，不省沧洲画鲁连。

卷 633_2 【歌】

司空图

处处亭台只坏墙，军营人学内人妆。
太平故事因君唱，马上曾听隔教坊。

卷 633_3 【偈】

司空图

人若憎时我亦憎，逃名最要是无能。

后生乞汝残风月，自作深林不语僧。

卷 633_4 【鹂】

司空图

不是流莺独占春，林间彩翠四时新。
应知拟上屏风画，偏坐横枝亦向人。

卷 633_5 【白菊杂书四首】

司空图

黄昏寒立更披襟，露浥清香悦道心。
却笑谁家扃绣户，正薰龙麝暖鸳衾。

四面云屏一带天，是非断得自翛然。
此生只是偿诗债，白菊开时最不眠。

狂才不足自英雄，仆妾驱令学贩舂。
侯印几人封万户，侬家只办买孤峰。

黄鹂啭处谁同听，白菊开时且剩过。
漫道南朝足流品，由来叔宝不宜多。

卷 633_6 【漫题（一作歌）】

司空图

经乱年年厌别离，歌声喜似太平时。
词臣更有中兴颂，磨取莲峰便作碑。

卷 633_7 【率题】

司空图

宦路前衔闲不记，醉乡佳境兴方浓。
一林高竹长遮日，四壁寒山更润冬。

卷 633_8 【涧户】

司空图

涧户芳烟接水村，乱来归得道仍存。
数竿新竹当轩上，不羡侯家立戟门。

卷 633_9 【故乡杏花】

司空图

寄花寄酒喜新开，左把花枝右把杯。
欲问花枝与杯酒，故人何得不同来？

卷 633_10 【华（一作花）下二首】

司空图

故国春归未有涯，小栏高槛别人家。
五更惆怅回孤枕，犹自残灯照落花。

关外风昏欲雨天，荠花耕倒枕河壖。
村南寂寞时回望，一只鸳鸯下渡船。

卷 633_11 【梦中】

司空图

几多亲爱在人间，上彻霞梯会却还。
须是蓬瀛长买得，一家同占作家山。

卷 633_12 【榜下】

司空图

三十功名志未伸，初将文字竞通津。
春风漫折一枝桂，烟阁英雄笑杀人。

卷 633_13 【涔阳渡】

司空图

楚田人立带残晖，驿迴村幽客路微。
两岸芦花正萧飒，渚烟深处白牛归。

卷 633_14 【偶作】

司空图

索得身归未保闲，乱来道在辱来顽。
留侯万户虽无分，病骨应消一片山。

卷 633_15 【寓居有感三首】

司空图

亦知世路薄忠贞，不忍残年负圣明。
只待东封沾庆赐，碑阴别刻老臣名。

不放残年却到家，衔杯懒更问生涯。
河堤往往人相送，一曲晴川隔蓼花。

黑须寄在白须生，一度秋风减几茎。
客处不堪频送别，无多情绪更伤情。

卷 633_16 【淮西】

司空图

鳌冠三山安海浪，龙盘九鼎镇皇都。
莫夸十万兵威盛，消个忠良效顺无。

卷 633_17 【河湟有感】

司空图

一自萧关起战尘，河湟隔断异乡春。

汉儿尽作胡儿语，却向城头骂汉人。

卷 633_18 【自郢乡北归】

司空图

巴烟幂幂久萦恨，楚柳绵绵今送归。
回避江边同去雁，莫教惊起错南飞。

卷 633_19 【青龙师安上人】

司空图

灾曜偏临许国人，雨中衰菊病中身。
清香一炷知师意，应为昭陵惜老臣。

卷 633_20 【山中】

司空图

凡鸟爱喧人静处，闲云似妒月明时。
世间万事非吾事，只愧秋来未有诗。

卷 633_21 【有感二首】

司空图

自古经纶足是非，阴谋最忌夺天机。
留侯却粒商翁去，甲第何人意气归。

古来贤俊共悲辛，长是豪家拒要津。
从此当歌唯痛饮，不须经世为闲人。

卷 633_22 【闲夜二首】

司空图

道侣难留为虐棋，邻家闻说厌吟诗。
前峰月照分明见，夜合香中露卧时。

此身闲得易为家，业是吟诗与看花。
若使他生抛笔砚，更应无事老烟霞。

卷 633_23 【雨中】

司空图

维摩居士陶居士，尽说高情未足夸。

檐外莲峰阶下菊，碧莲黄菊是吾家。

卷 633_24 【送道者二首】

司空图

洞天真侣昔曾逢，西岳今居第几峰。
峰顶他时教我认，相招须把碧芙蓉。

殷勤不为学烧金，道侣惟应识此心。
雪里千山访君易，微微鹿迹入深林。

卷 633_25 【重阳阻雨】

司空图

重阳阻雨独衔杯，移得山家菊未开。
犹胜登高闲望断，孤烟残照马嘶回。

卷 633_26 【省试】

司空图

粉闱深锁唱同人，正是终南雪霁春。

闲系长安千匹马，今朝似减六街尘。

卷 633_27 【有赠】

司空图

有诗有酒有高歌，春色年年奈我何。
试问羲和能驻否，不劳频借鲁阳戈。

卷 633_28 【证因亭】

司空图

峰北幽亭愿证因，他生此地却容身。
上方僧在时应到，笑认前衔记写真。

卷 633_29 【顷年陪恩地赴甘棠之召感动留题】

司空图

去时憔悴青衿在，归路凄凉绛帐空。
无限酬恩心未展，又将孤剑别从公。

卷 633_30 【九月八日】

司空图

已是人间寂寞花，解怜寂寞傍贫家。
老来不得登高看，更甚残春惜岁华。

卷 633_31 【敷溪桥院有感】

司空图

昔岁攀游景物同，药炉今在鹤归空。
青山满眼泪堪碧，绛帐无人花自红。

卷 633_32 【寺阁】

司空图

昔岁登临未衰飒，不知何事爱伤情。
今来揽镜翻堪喜，乱后霜须长几茎。

卷 633_33 【武陵路】

司空图

橘岸舟间罾网挂，茶坡日暖鹧鸪啼。
女郎指点行人笑，知向花间路已迷。

卷 633_34 【南北史感遇十首】

司空图

雨淋麟阁名臣画，雪卧龙庭猛将碑。
不用黄金铸侯印，尽输公子买蛾眉。

汉世频封万户侯，云台空峻谢风流。
江南不有名儒相，齿冷中原笑未休。

天风斡海怒长鲸，永固南来百万兵。
若向沧洲犹笑傲，江山虚有石头城。

花迷公子玉楼恩，镜弄佳人红粉春。
不信关山劳远戍，绮罗香外任行尘。

兵围梁殿金瓯破，火发陈宫玉树摧。
奸佞岂能惭误国，空令怀古更徘徊。

行乐最宜连夜景，太平方觉有春风。
千金尽把酬歌舞，犹胜三边赏战功。

桃芳李艳年年发，羌管蛮弦处处多。
海上应无三岛路，人间惟有一声歌。

佳人自折一枝红，把唱新词曲未终。
惟向眼前怜易落，不如抛掷任春风。

景阳楼下花钿镜，玄武湖边锦绣旗。
昔日繁华今日恨，雉媒声晚草芳时。

乱后人间尽不平，秦川花木最伤情。
无穷红艳红尘里，骤马分香散入营。

卷 633_35 【狂题二首】

司空图

草堂旧隐犹招我，烟阁英才不见君。
惆怅故山归未得，酒狂叫断暮天云。

须知世乱身难保，莫喜天晴菊并开。
长短此身长是客，黄花更助白头催。

卷 633_36 【红茶花】

司空图

景物诗人见即夸，岂怜高韵说红茶。
牡丹枉用三春力，开得方知不是花。

卷 633_37 【秋燕】

司空图

从扑香尘拂面飞，怜渠只为解相依。
经冬好近深炉暖，何必千岩万水归？

卷 633_38 【见后雁有感】

司空图

笑尔穷通亦似人，高飞偶滞莫悲辛。
却缘风雪频相阻，只向关中待得春。

卷 633_39 【移桃栽】

司空图

独临官路易伤摧，从遣春风恣意开。
禅客笑移山上看，流莺直到槛前来。

卷 633_40 【忆中条】

司空图

燕辞旅舍人空在，萤出疏篱菊正芳。
堪恨昔年联句地，念经僧扫过重阳。

卷 633_41 【乐府】

司空图

五更窗下簇妆台，已怕堂前阿母催。
满鸭香薰鹦鹉睡，隔帘灯照牡丹开。

卷 633_42 【放龟二首】

司空图

却为多知自不灵，今朝教汝卜长生。
若求深处无深处，只有依人会有情。

世外犹迷不死庭，人间莫恃自无营。
本期沧海堪投迹，却向朱门待放生。

卷 633_43 【灯花三首】

司空图

蜀柳丝丝幂画楼，窗尘满镜不梳头。
几时金雁传归信，剪断香魂一缕愁。

姊姊教人且抱儿，逐他女伴卸头迟。
明朝斗草多应喜，翦得灯花自扫眉。

闰前小雪过经旬，犹自依依向主人。
开尽菊花怜强舞，与教弟子待新春。

卷 633_44 【偶题三首】

司空图

浮世悠悠旋一空，多情偏解挫英雄。
风光只在歌声里，不必楼前万树红。

小池随事有风荷，烧酎倾壶一曲歌。
欲待秋塘擎露看，自怜生意已无多。

辽阳音信近来稀，纵有虚传逼节归。
永日无人新睡觉，小窗晴暖蛸虫飞。

卷 633_45 【华下对菊】

司空图

清香裊露对高斋，泛酒偏能浣旅怀。
不似春风逞红艳，镜前空坠玉人钗。

卷 633_46 【与都统参谋书有感】

司空图

惊鸾迸鹭尽归林，弱羽低垂分独沈。

帶病深山犹草檄，昭陵应识老臣心。

卷 633_47 【漫题】

司空图

无宦无名拘逸兴，有歌有酒任他乡。
看看万里休征戍，莫向新词寄断肠。

卷 633_48 【商山二首】

司空图

清溪一路照羸身，不似云台画像人。
国史数行犹有志，只将谈笑继英尘。

马上搜奇已数篇，籍中犹愧是顽仙。
关头传说开元事，指点多疑孟浩然。

卷 633_49 【与伏牛长老偈二首】

司空图

不算菩提与阐提，惟应执著便生迷。

无端指个清凉地，冻杀胡僧雪岭西。

长绳不见系空虚，半偈传心亦未疏。
推倒我山无一事，莫将文字缚真如。

卷 633_50 【客中重九】

司空图

楚老相逢泪满衣，片名薄宦已知非。
他乡不似人间路，应共东流更不归。

卷 633_51 【柳二首】

司空图

谁家按舞傍池塘，已见繁枝嫩眼黄。
漫说早梅先得意，不知春力暗分张。

似拟凌寒妒早梅，无端弄色傍高台。
折来未有新枝长，莫遣佳人更折来。

卷 633_52 【光启丁未别山】

司空图

草堂琴画已判烧，犹托邻僧护燕巢。
此去不缘名利去，若逢逋客莫相嘲。

卷 633_53 【石楠】

司空图

客处偷闲未是闲，石楠虽好懒频攀。
如何风叶西归路，吹断寒云见故山。

卷 633_54 【力疾马上走笔】

司空图

酿黍长添不尽杯，只忧花尽客空回。
垂杨且为晴遮日，留遇重阳即放开。

卷 633_55 【华阴县楼】

司空图

丹青能有几层梯，懒更扬鞭耸翠蜺。
偶凭危栏且南望，不劳高掌欲相携。

卷 633_56 【南至四首】

司空图

今冬腊后无残日，故国烧来有几家。
却恨早梅添旅思，强偷春力报年华。

花时不是偏愁我，好事应难总取他。
已被诗魔长役思，眼中莫厌早梅多。

年华乱后偏堪惜，世路抛来已自生。
犹有玉真长命缕，樽前时唱缓羁情。

一任喧阗绕四邻，闲忙皆是自由身。
人来客去还须议，莫遣他人作主人。

卷 633_57 【莲峰前轩】

司空图

人间上寿若能添，只向人间也不嫌。
看著四邻花竞发，高楼从此莫垂帘。

卷 633_58 【步虚】

司空图

阿母亲教学步虚，三元长遣下蓬壶。
云韶韵俗停瑶瑟，鸾鹤飞低拂宝炉。

卷 633_59 【剑器】

司空图

楼下公孙昔擅场，空教女子爱军装。
潼关一败吴儿喜，簇马骊山看御汤。

卷 633_60 【乙丑人日】

司空图

自怪扶持七十身，归来又见故乡春。
今朝人日逢人喜，不料偷生作老人。

卷 633_61 【携仙箓九首】

司空图

岳北秋空渭北川，晴云渐薄薄如烟。
坐来还见微风起，吹散残阳一片蝉。

一半晴空一半云，远笼仙掌日初曛。
洞天有路不知处，绝顶异香难更闻。

决事还须更事酬，清谭妙理一时休。
渔翁亦被机心误，眼暗汀边结钓钩。

迹不趋时分不侯，功名身外最悠悠。
听君总画麒麟阁，还我闲眠舴艋舟。

仙凡路阻两难留，烟树人间一片秋。
若道阴功能济活，且将方寸自焚修。

若有阴功救未然，玉皇品籍亦搜贤。
应知谭笑还高谢，别就沧洲赞上仙。

英名何用苦搜奇，不朽才销一句诗。
却赖风波阻三岛，老臣犹得恋明时。

剪取红云剩写诗，年年高会趁花时。
水精楼阁分明见，只欠霞浆别著旗。

此生得作太平人，只向尘中便出尘。
移取碧桃花万树，年年自乐故乡春。

卷 633_62 【浪淘沙】

司空图

不必长漂玉洞花，曲中偏爱浪淘沙。
黄河却胜天河水，万里萦纡入汉家。

卷 633_63 【赠日东鉴禅师】

司空图

故国无心度海潮，老禅方丈倚中条。
夜深雨绝松堂静，一点飞萤照寂寥。

卷 633_64 【暮春对柳二首】

司空图

萦愁惹恨奈杨花，闭户垂帘亦满家。
恼得闲人作酒病，刚须又扑越溪茶。

洞中犹说看桃花，轻絮狂飞自俗家。
正是阶前开远信，小娥旋拂碾新茶。

卷 633_65 【戊午三月晦二首】

司空图

随风逐浪剧蓬萍，圆首何曾解最灵。
笔砚近来多自弃，不关妖气暗文星。

牛夸棋品无勍敌，谢占诗家作上流。
岂似小敷春水涨，年年鸾鹤待仙舟。

卷 633_66 【偶书五首】

司空图

情知了得未如僧，客处高楼莫强登。

莺也解啼花也发，不关心事最堪憎。

自有池荷作扇摇，不关风动爱芭蕉。
只怜直上抽红蕊，似我丹心向本朝。

曾看轻舟渡远津，无风著岸不经旬。
只缘命蹇须知命，却是人争阻得人。

上谷何曾解有情，有情人自惜君行。
证因池上今生愿，的的他生作化生。

新店南原后夜程，黄河风浪信难平。
渡头杨柳知人意，为惹官船莫放行。

卷 633_67 【喜山鹊初归三首】

司空图

翠衿红觜便知机，久避重罗稳处飞。
只为从来偏护惜，窗前十夜主人归。

山中只是惜珍禽，语不分明识尔心。
若使解言天下事，燕台今筑几千金。

阻他罗网到柴扉，不奈偷仓雀转肥。
赖尔林塘添景趣，剩留山果引教归。

卷 633_68 【虞乡北原】

司空图

泽北村贫烟火狞，稚田冬旱倩牛耕。
老人惆怅逢人诉，开尽黄花麦未金。

卷 633_69 【洛中三首】

司空图

秋风团扇未惊心，笑看妆台落叶侵。
绣凤不教金缕暗，青楼何处有寒砧。

不用频嗟世路难，浮生各自系悲欢。
风霜一夜添羁思，罗绮谁家待早寒？

燕巢空后谁相伴，鸳被缝来不忍薰。
薄命敢辞长滴泪，倡家未必肯留君。

卷 633_70 【寓笔】

司空图

年年镊鬓到花飘，依旧花繁鬓易凋。

撩乱一场人更恨，春风谁道胜轻飙。

卷 633_71 【戏题试衫】

司空图

朝班尽说人宜紫，洞府应无鹤着绯。
从此玉皇须破例，染霞裁赐地仙衣。

卷 633_72 【汴柳半枯因悲柳中隐】

司空图

行人莫叹前朝树，已占河堤几百春。
惆怅题诗柳中隐，柳衰犹在自无身。

卷 633_73 【上方】

司空图

花落更同悲木落，莺声相续即蝉声。
荣枯了得无多事，只是闲人漫系情。

卷 633_74 【寄王赞学】

司空图

黄卷不关兼济业，青山自保老闲身。
一行万里纤尘静，可要张仪更入秦。

卷 633_75 【新节】

司空图

转悲新岁重于山，不似轻鸥肯复还。
朱绂纵教金印换，青云未胜白头闲。

卷 633_76 【自河西归山二首】

司空图

一水悠悠一叶危，往来长恨阻归期。
乡关不是无华表，自为多惊独上迟。

水阔风惊去路危，孤舟欲上更迟迟。
鹤群长扰三珠树，不借人间一只骑。

卷 633_77 【王官二首】

司空图

风荷似醉和花舞，沙鸟无情伴客闲。
总是此中皆有恨，更堪微雨半遮山。

荷塘烟罩小斋虚，景物皆宜入画图。
尽日无人只高卧，一双白鸟隔纱厨。

卷 633_78 【贺翰林侍郎二首】

司空图

太白东归鹤背吟，镜湖空在酒船沈。
今朝忽见银台事，早晚重征入翰林。

玉版征书洞里看，沈羲新拜侍郎官。
文星喜气连台曜，圣主方知四海安。

卷 633_79 【寄王十四舍人】

司空图

几年汶上约同游，拟为莲峰别置楼。

今日凤凰池畔客，五千仞雪不回头。

卷 633_80 【纶阁有感】

司空图

风涛曾阻化鳞来，谁料蓬瀛路却开。
欲去迟迟还自笑，狂才应不是仙才。

第六百三十四卷

卷 634_1 【狂题十八首】

司空图

莫恨艰危日日多，时情其奈幸门何。
貔貅睡稳蛟龙渴，犹把烧残朽铁磨。

别鹤凄凉指法存，戴逵能耻近王门。
世间第一风流事，借得王公玉枕痕。

交疏自古戒言深，肝胆徒倾致铄金。
不是史迁书与说，谁知孤负李陵心。

南华落笔似荒唐，若肯经纶亦不狂。
偶作客星侵帝座，却应虚薄是严光。

不劳世路更相猜，忍到须休惜得材。
几度懒乘风水便，拗船折舵恐难回。

由来相爱只诗僧，怪石长松自得朋。
却怕他生还识字，依前日下作孤灯。

老禅乘仗莫过身，远岫孤云见亦频。
应是佛边犹怕闹，信缘须作且闲人。

止竟闲人不爱闲，只偷无事闭柴关。
轰霆搅破蛟龙窟，也被狂风卷出山。

地下修文著作郎，生前饥处倒空墙。
何如神爽骑星去，犹自研几助玉皇。

雨洗芭蕉叶上诗，独来凭槛晚晴时。
故园虽恨风荷腻，新句闲题亦满池。

初时拄杖向邻村，渐到清明亦杜门。
三十年来辞病表，今朝卧病感皇恩。

来时虽恨失青毡，自见芭蕉几十篇。
应是阿刘还宿债，剩拚才思折供钱。

芭蕉丛畔碧婵娟，免更悠悠扰蜀川。
应到去时题不尽，不劳分寄校书笺。

自伤衰病渐难平，永夜禅床雨滴声。
闻道虎疮仍带镞，吼来和痛亦横行。

昨日流莺今日蝉，起来又是夕阳天。
六龙飞辔长相窘，更忍乘危自著鞭。

有是有非还有虑，无心无迹亦无猜。
不平便激风波险，莫向安时稔祸胎。

十年三署让官频，认得无才又索身。
莫道太行同一路，大都安稳属闲人。

曾闻劫火到蓬壶，缩尽鳌头海亦枯。
今日家山同此恨，人归未得鹤归无。

卷 634_2 【游仙二首】

司空图

蛾眉新画觉婵娟，斗走将花阿母边。
仙曲教成慵不理，玉阶相簇打金钱。

刘郎相约事难谐，雨散云飞自此乖。
月姊殷勤留不住，碧空遗下水精钗。

卷 634_3 【漫书五首】

司空图

长拟求闲未得闲，又劳行役出秦关。
逢人渐觉乡音异，却恨莺声似故山。

溪边随事有桑麻，尽日山程十数家。
莫怪行人频怅望，杜鹃不是故乡花。

海上昔闻麋爱鹤，山中今日鹿憎龟。
爱憎止竟须关分，莫把微才望所知。

世路快心无好事，恩门嘉话合书绅。
神藏鬼伏能千变，亦胜忘机避要津。

四翁识势保安闲，须为生灵暂出山。
一种老人能算度，磻溪心迹愧商颜。

卷 634_4 【偶诗五首】

司空图

闲韵虽高不衒才，偶抛猿鸟乍归来。
夕阳照个新红叶，似要题诗落砚台。

芙蓉骚客空留怨，芍药诗家只寄情。
谁似天才李山甫，牡丹属思亦纵横。

贤豪出处尽沉吟，白日高悬只照心。
一掬信陵坟上土，便如碣石累千金。

声貌由来固绝伦，今朝共许占残春。

当歌莫怪频垂泪，得地翻惭早失身。

中宵茶鼎沸时惊，正是寒窗竹雪明。
甘得寂寥能到老，一生心地亦应平。

卷 634_5 【杂题二首】

司空图

先知左袒始同行，须待龙楼羽翼成。
若使只凭三杰力，犹应汉鼎一毫轻。

鱼在枯池鸟在林，四时无奈雪霜侵。
若教激劝由真宰，亦奖青松径寸心。

卷 634_6 【光化踏青有感】

司空图

引得车回莫认恩，却成寂寞与谁论。
到头不是君王意，羞插垂杨更傍门。

卷 634_7 【丑年冬】

司空图

醉日昔闻都下酒，何如今喜折新茶。
不堪病渴仍多虑，好向灊湖便出家。

卷 634_8 【白菊三首】

司空图

人间万恨已难平，栽得垂杨更系情。
犹喜闰前霜未下，菊边依旧舞身轻。

莫惜西风又起来，犹能婀娜傍池台。
不辞暂被霜寒挫，舞袖招香即却回。

为报繁霜且莫催，穷秋须到自低垂。
横拖长袖招人别，只待春风却舞来。

卷 634_9 【扇】

司空图

珍重逢秋莫弃捐，依依只仰故人怜。

有时池上遮残日，承得霜林几个蝉。

卷 634_10 【修史亭三首】

司空图

山前邻叟去纷纷，独强衰羸爱杜门。
渐觉一家看冷落，地炉生火自温存。

甘心七十且酣歌，自算平生幸已多。
不似香山白居易，晚将心地著禅魔。

乌纱巾上是青天，检束酬知四十年。
谁料平生臂鹰手，挑灯自送佛前钱。

卷 634_11 【力疾山下吴村看杏花十九首】

司空图

春来渐觉一川明，马上繁花作阵迎。
掉臂只将诗酒敌，不劳金鼓助横行。

闾阖曾排捧御炉，犹看晓月认金铺。
羸形不画凌烟阁，只为微才激壮图。

镜留雪鬓暖消无，春到梨花日又晡。
移取扶桑阶下种，年年看长碍金乌。

折来未尽不须休，年少争来莫与留。
更愿狂风知我意，一时吹向海西头。

才情百巧斗风光，却笑雕花刻叶忙。
熨帖新巾来与裹，犹看腾踏少年场。

浮世荣枯总不知，且忧花阵被风欺。
侬家自有麒麟阁，第一功名只赏诗。

白衫裁袖本教宽，朱紫由来亦一般。
王老小儿吹笛看，我依试舞尔依看。

单床薄被又羁栖，待到花开亦甚迷。
若道折多还有罪，只应莺啭是金鸡。

近来桃李半烧枯，归卧乡园只老夫。
莫算明年人在否，不知花得更开无？

汉王何事损精神，花满深宫不见春。
秾艳三千临粉镜，独悲掩面李夫人。

能艳能芳自一家，胜鸾胜凤胜烟霞。
客来须共醒醒看，碾尽明昌几角茶。

造化无端欲自神，裁红剪翠为新春。
不如分减闲心力，更助英豪济活人。

徘徊自劝莫沾纓，分付年年谷口莺。
却赖无情容易别，有情早个不胜情。

闲步偏宜舞袖迎，春光何事独无情。
垂杨合是诗家物，只爱敷溪道北生。

亦知王大是昌龄，杜二其如律韵清。
还有酸寒堪笑处，拟夸朱绂更峥嵘。

潘郎爱说是诗家，枉占河阳一县花。
千载几人搜警句，补方金字爱晴霞。

行乐溪边步转迟，出山渐减探花期。
去年四度今三度，恐到凭人折去时。

此身衰病转堪嗟，长忍春寒独惜花。
更恨新诗无纸写，蜀笺堆积是谁家？

昨日黄昏始看回，梦中相约又衔杯。
起来闻道风飘却，犹拟教人扫取来。

卷 634_12 【少仪】

司空图

昨日登班缀柏台，更惭起草属微才。
锦窠不是寻常锦，兼向丘迟夺得来。

卷 634_13 【重阳四首】

司空图

檐前减燕菊添芳，燕尽庭前菊又荒。
老大比他年少少，每逢佳节更悲凉。

雨寒莫待菊花催，须怕晴空暖并开。
开却一枝开却尽，且随幽蝶更徘徊。

青娥懒唱无衣换，黄菊新开乞酒难。
长有长亭惆怅事，隔河更得对凭栏。

白发怕寒梳更懒，黄花晴日照初开。
篱头应是蝶相报，已被邻家携酒来。

卷 634_14 【长命缕】

司空图

他乡处处堪悲事，残照依依惜别天。
此去知名长命缕，殷勤为我唱花前。

卷 634_15 【柏东】

司空图

冥得机心岂在僧，柏东闲步爱腾腾。
免教世路人相忌，逢著村醪亦不憎。

卷 634_16 【歌者十二首】

司空图

追逐翻嫌傍管弦，金钗击节自当筵。
风霜一夜燕鸿断，唱作江南袞袞天。

玉树花飘凤失栖，一声初压管弦低。
清回烦暑成潇洒，艳逐寒云变惨凄。

十斛明珠亦易拚，欲兼人艺古来难。
五云合是新声染，熔作琼浆洒露盘。

不似新声唱亦新，旋调玉管旋生春。
愁肠隔断珠帘外，只为今宵共听人。

十年逃难别云林，暂辍狂歌且听琴。
转觉淡交言有味，此声知是古人心。

五柳先生自识微，无言共笑手空挥。
胸中免被风波挠，肯为螳螂动杀机。

风霜寒水旅人心，几处笙歌绣户深。
分泊一场云散后，未胜初夜便听琴。

自怜眼暗难求药，莫恨花繁便有风。
桃李更开须强看，明年兼恐听歌聋。

白云深处寄生涯，岁暮生情赖此花。
蜂蝶绕来忙绕袖，似知教折送邻家。

重九仍重岁渐阑，强开病眼更登攀。
年年认得酣歌处，犹恐招魂葬故山。

绕壁依稀认写真，更须粉绘饰羸身。
凄凉不道身无寿，九日还无旧会人。

鹤擎花香搭槿篱，枕前蛩进酒醒时。
夕阳似照陶家菊，黄蝶无穷压故枝。

卷 634_17 【题裴晋公华岳庙题名】

司空图

岳前大队赴淮西，从此中原息鼓鼙。
石阙莫教苔藓上，分明认取晋公题。

卷 634_18 【杨柳枝寿杯词十八首】

司空图

乐府翻来占太平，风光无处不含情。
千门万户喧歌吹，富贵人间只此声。

撼晚梳空不自持，与君同折上楼时。
春风还有常情处，系得人心免别离。

灞亭东去彻隋堤，赠别何须醉似泥。
万里往来无一事，便帆轻拂乱莺啼。

台城细仗晓初移，诏赐千官襆饮时。
绿帐远笼清珮响，更曛晴日上龙旗。

桃源仙子不须夸，闻道惟栽一片花。
何似浣纱溪畔住，绿阴相间两三家。

偶然楼上卷珠帘，往往长条拂枕函。
恰值小娥初学舞，拟偷金缕押春衫。

池边影动散鸳鸯，更引微风乱绣床。
直待玉窗尘不起，始应金雁得成行。

稻畦分影向江村，憔悴经霜只半存。
昨日流莺今不见，乱萤飞出照黄昏。

客泪休沾汉水滨，舞腰羞杀汉宫人。
狂风更与回烟帚，扫尽繁花独占春。

游人莫叹易凋衰，长乐荣枯自有期。
看取明年春意动，更于何处最先知。

昔年行乐及芳时，一上丹梯桂一枝。
笑问江头醉公子，饶君满把麴尘丝。

渡头残照一行新，独自依依向北人。
莫恨乡程千里远，眼中从此故乡春。

絮惹轻枝雪未飘，小溪烟束带危桥。
邻家女伴频攀折，不觉回身冒翠翘。

处处萦空百万枝，一枝枝好更题诗。
隔城远岫招行客，便与朱楼当酒旗。

锦城分得映金沟，两岸年年引胜游。
若似松篁须带雪，人间何处认风流。

日暖津头絮已飞，看看还是送君归。
莫言万绪牵愁思，缉取长绳系落晖。

大堤时节近清明，霞衬烟笼绕郡城。
好是梨花相映处，更胜松雪日初晴。

圣主千年乐未央，御沟金翠满垂杨。
年年织作升平字，高映南山献寿觞。

卷 634_19 【山鹊】

司空图

多惊本为好毛衣，只赖人怜始却归。
众鸟自知颜色减，妒他偏向眼前飞。

卷 634_20 【李居士】

司空图

高风只在五峰前，应是精灵降作贤。

万里无云惟一鹤，乡中同看却升天。

卷 634_21 【杏花】

司空图

诗家偏为此伤情，品韵由来莫与争。
解笑亦应兼解语，只应慵语倩莺声。

卷 634_22 【白菊三首】

司空图

不疑陶令是狂生，作赋其如有定情。
犹胜江南隐居士，诗魔终袅负孤名。

自古诗人少显荣，逃名何用更题名。
诗中有虑犹须戒，莫向诗中著不平。

登高可羡少年场，白菊堆边鬓似霜。
益算更希沾上药，今朝第七十重阳。

卷 634_23 【听雨（一作王建诗）】

司空图

半夜思家睡里愁，雨声落落屋檐头。
照泥星出依前黑，淹烂庭花不肯休。

卷 634_24 【杨柳枝二首】

司空图

陶家五柳簇衡门，还有高情爱此君。
何处更添诗境好，新蝉欹枕每先闻。

数枝珍重蘸沧浪，无限尘心暂免忙。
烦暑若和烟露裊，便同佛手洒清凉。

卷 634_25 【修史亭二首】

司空图

少年已惯掷年光，时节催驱独不忙。
今日无疑亦无病，前程无事扰医王。

篱落轻寒整顿新，雪晴步履会诸邻。
自从南至歌风顶，始见人烟外有人。

卷 634_26 【漫书】

司空图

乐退安贫知是分，成家报国亦何惭。
到还僧院心期在，瑟瑟澄鲜百丈潭。

卷 634_27 【杂题二首】

司空图

棋局长携上钓船，杀中棋杀胜丝牵。
洪炉任铸千钧鼎，只在磻溪一缕悬。

晓镜高窗气象深，自怜清格笑尘心。
世间不为蛾眉误，海上方应鹤背吟。

卷 634_28 【题休休亭（一作耐辱居士歌）】

司空图

咄，诺，休休休，莫莫莫，伎两虽多性灵恶，

赖是长教闲处著。休休休，莫莫莫，一局棋，一炉药，
天意时情可料度。白日偏催快活人，黄金难买堪骑鹤。
若曰尔何能，答言耐辱莫。

卷 634_29 【冯燕歌（一作沈下贤诗。据《唐音统签》云：《丽情集》以此歌为沈下贤作，注《文苑英华》者误采之，下贤有其传，未尝作歌也，集可考。）】

司空图

魏中义士有冯燕，游侠幽并最少年。避仇偶作滑台客，
嘶风跃马来翩翩。此时恰遇莺花月，堤上轩车昼不绝。
两面高楼语笑声，指点行人情暗结。掷果潘郎谁不慕，
朱门别见红妆露。故故推门掩不开，似教欧轧传言语。
冯生敲镫袖笼鞭，半拂垂杨半惹烟。树间春鸟知人意，
的的心期暗与传。传道张婴偏嗜酒，从此香闺为我有。
梁间客燕正相欺，屋上鸣鸠空自斗。婴归醉卧非仇汝，
岂知负过人怀惧。燕依户扇欲潜逃，巾在枕傍指令取。
谁言狼戾心能忍，待我情深情不隐。回身本谓取巾难，
倒柄方知授霜刃。凭君抚剑即迟疑，自顾平生心不欺。
尔能负彼必相负，假手他人复在谁？窗间红艳犹可掬，
熟视花钿情不足。唯将大义断胸襟，粉颈初回如切玉。
凤凰钗碎各分飞，怨魄娇魂何处追。凌波如唤游金谷，
羞彼揶揄泪满衣。新人藏匿旧人起，白昼喧呼骇邻里。
诬执张婴不自明，贵免生前遭考捶。官将赴市拥红尘，
掉臂人来擗看人。传声莫遣有冤滥，盗杀婴家即我身。

初闻僚吏翻疑叹，呵叱风狂词不变。縲囚解缚犹自疑，
疑是梦中方脱免。未死劝君莫浪言，临危不顾始知难。
已为不平能割爱，更将身命救深冤。白马贤侯贾相公，
长悬金帛募才雄。拜章请赎冯燕罪，千古三河激义风。
黄河东注无时歇，注尽波澜名不灭。为感词人沈下贤，
长歌更与分明说。此君精爽知犹在，长与人间留炯诫。
铸作金燕香作堆，焚香酬酒听歌来。

卷 634_30 【寄薛起居】

司空图

小域新衔贺圣朝，亦知蹇分巧难抛。
粗才自合无岐路，不破工夫漫解嘲。

卷 634_31 【月下留丹灶（有序）】

司空图

月下留丹灶，坛边树羽衣。异香人不觉，残夜鹤分飞。
朝会初元盛，蓬瀛旧侣稀。瑶函真迹在，妖魅敢扬威。

卷 634_32 【元日】

司空图

甲子今重数，生涯只自怜。殷勤元日日，欹午又明年。

卷 634_33 【洛阳咏古（一作胡曾诗）】

司空图

石勒童年有战机，洛阳长啸倚门时。
晋朝不是王夷甫，大智何由得预知。

卷 634_34 【诗品二十四则（附录）·雄浑】

司空图

大用外腴，真体内充。返虚入浑，积健为雄。
具备万物，横绝太空。荒荒油云，寥寥长风。
超以象外，得其环中。持之匪强，来之无穷。

卷 634_35 【诗品二十四则·冲淡】

司空图

素处以默，妙机其微。饮之太和，独鹤与飞。
犹之惠风，苒苒在衣。阅音修篁，美曰载归。
遇之匪深，即之愈稀。脱有形似，握手已违。

卷 634_36 【诗品二十四则·纤秾】

司空图

采采流水，蓬蓬远春。窈窕深谷，时见美人。
碧桃满树，风日水滨。柳阴路曲，流莺比邻。
乘之愈往，识之愈真。如将不尽，与古为新。

卷 634_37 【诗品二十四则·沈著】

司空图

绿杉野屋，落日气清。脱巾独步，时闻鸟声。
鸿雁不来，之子远行。所思不远，若为平生。
海风碧云，夜渚月明。如有佳语，大河前横。

卷 634_38 【诗品二十四则·高古】

司空图

畸人乘真，手把芙蓉。泛彼浩劫，窅然空纵。
月出东斗，好风相从。太华夜碧，人闻清钟。
虚伫神素，脱然畦封。黄唐在独，落落玄宗。

卷 634_39 【诗品二十四则·典雅】

司空图

玉壶买春，赏雨茆屋。坐中佳士，左右修竹。
白云初晴，幽鸟相逐。眠琴绿阴，上有飞瀑。
落花无言，人淡如菊。书之岁华，其日可读。

卷 634_40 【诗品二十四则·洗炼】

司空图

犹矿出金，如铅出银。超心炼冶，绝爱缁磷。
空潭泻春，古镜照神。体素储洁，乘月返真。
载瞻星辰，载歌幽人。流水今日，明月前身。

卷 634_41 【诗品二十四则·劲健】

司空图

行神如空，行气如虹。巫峡千寻，走云连风。
饮真茹强，蓄素守中。喻彼行健，是谓存雄。
天地与立，神化攸同。期之以实，御之以终。

卷 634_42 【诗品二十四则·绮丽】

司空图

神存富贵，始轻黄金。浓尽必枯，浅者屡深。
露余山青，红杏在林。月明华屋，画桥碧阴。
金尊酒满，共客弹琴。取之自足，良殫美襟。

卷 634_43 【诗品二十四则·自然】

司空图

俯拾即是，不取诸邻。俱道适往，著手成春。
如逢花开，如瞻岁新。真予不夺，强得易贫。
幽人空山，过水采蘋。薄言情晤，悠悠天钧。

卷 634_44 【诗品二十四则·含蓄】

司空图

不著一字，尽得风流。语不涉难，已不堪忧。
是有真宰，与之沈浮。如渌满酒，花时返秋。
悠悠空尘，忽忽海沤。浅深聚散，万取一收。

卷 634_45 【诗品二十四则·豪放】

司空图

观花匪禁，吞吐大荒。由道返气，处得以狂。
天风浪浪，海山苍苍。真力弥满，万象在旁。
前招三辰，后引凤凰。晓策六鳌，濯足扶桑。

卷 634_46 【诗品二十四则·精神】

司空图

欲返不尽，相期与来。明漪绝底，奇花初胎。
青春鹦鹉，杨柳池台。碧山人来，清酒满杯。
生气远出，不著死灰。妙造自然，伊谁与裁？

卷 634_47 【诗品二十四则·缜密】

司空图

是有真迹，如不可知。意象欲生，造化已奇。
水流花开，清露未晞。要路愈远，幽行为迟。
语不欲犯，思不欲痴。犹春于绿，明月雪时。

卷 634_48 【诗品二十四则·疏野】

司空图

惟性所宅，真取弗羁。拾物自富，与率为期。
筑屋松下，脱帽看诗。但知旦暮，不辨何时。
倘然适意，岂必有为。若其天放，如是得之。

卷 634_49 【诗品二十四则·清奇】

司空图

娟娟群松，下有漪流。晴雪满汀，隔溪渔舟。
可人如玉，步履寻幽。载行载止，空碧悠悠。
神出古异，淡不可收。如月之曙，如气之秋。

卷 634_50 【诗品二十四则·委曲】

司空图

登彼太行，翠绕羊肠。杳霭流玉，悠悠花香。
力之于时，声之于羌。似往已回，如幽匪藏。
水理漩洑，鹏风翱翔。道不自器，与之圆方。

卷 634_51 【诗品二十四则·实境】

司空图

取语甚直，计思匪深。忽逢幽人，如见道心。
晴涧之曲，碧松之阴。一客荷樵，一客听琴。
情性所至，妙不自寻。遇之自天，冷然希音。

卷 634_52 【诗品二十四则·悲慨】

司空图

大风卷水，林木为摧。意苦若死，招憩不来。
百岁如流，富贵冷灰。大道日往，若为雄才。
壮士拂剑，浩然弥哀。萧萧落叶，漏雨苍苔。

卷 634_53 【诗品二十四则·形容】

司空图

绝伫灵素，少回清真。如觅水影，如写阳春。
风云变态，花草精神。海之波澜，山之嶙峋。
俱似大道，妙契同尘。离形得似，庶几斯人。

卷 634_54 【诗品二十四则·超诣】

司空图

匪神之灵，匪机之微。如将白云，清风与归。
远引若至，临之已非。少有道契，终与俗违。
乱山高木，碧苔芳晖。诵之思之，其声愈稀。

卷 634_55 【诗品二十四则·飘逸】

司空图

落落欲往，矫矫不群。缑山之鹤，华顶之云。
高人画中，令色絪縕。御风蓬叶，泛彼无垠。
如不可执，如将有闻。识者已领，期之愈分。

卷 634_56 【诗品二十四则·旷达】

司空图

生者百岁，相去几何？欢乐苦短，忧愁实多。
何如尊酒，日往烟萝。花覆茱檐，疏雨相过。
倒酒既尽，杖藜行过。孰不有古，南山峨峨。

卷 634_57 【诗品二十四则·流动】

司空图

若纳水輶，如转丸珠。夫岂可道，假体遗愚。
荒荒坤轴，悠悠天枢。载要其端，载同其符。
超超神明，返返冥无。来往千载，是之谓乎。

卷 634_58 【句】

司空图

忍事敌灾星。

物望倾心久，凶渠破胆频。

鼎饫和方济，台阶润欲平。

夜短猿悲减，风和鹊喜虚。

骅骝思故第，鹦鹉失佳人。

鲸鲵人海涸，魑魅棘林幽。

棋声花院闭，幡影石坛高。

地凉清鹤梦，林静肃僧仪。

晚妆留拜月，春睡更生香。

隔谷见鸡犬，山苗接楚田。人家寒食月，花影午时天。

官路好禽声，轩车驻晚程。南楼山最秀，北路邑偏清。

多病形容五十三，谁怜借笏趁朝参？，

十年太华无知己，只得虚中两首诗。

看师逸迹两师宜，高适歌行李白诗。

第六百三十五卷

卷 635_1 【送边上从事】

周繇

戎装佩镆铎，走马逐轻车。衰草城边路，残阳垄上笳。
黄河穿汉界，青冢出胡沙。提笔男儿事，功名立可夸。

卷 635_2 【送洛阳崔员外】

周繇

塞诏除嵩洛，观图见废兴。城迁周古鼎，地列汉诸陵。
日送归朝客，时招住岳僧。郡斋台阁满，公退即吟登。

卷 635_3 【送人尉黔中】

周繇

盘山行几驿，水路复通巴。峡涨三川雪，园开四季花。

公庭飞白鸟，官俸请丹砂。知尉黔中后，高吟采物华。

卷 635_4 【送宇文虞】

周繇

此别欲何往，未言归故林。行车新岁近，落日乱山深。
野店寒无客，风巢动有禽。潜知经目事，大半是愁吟。

卷 635_5 【题东林寺虎培泉】

周繇

胜致通幽感，灵泉有虎培。爪抬山脉断，掌托石心拗。
竹藹疑相近，松阴盖亦交。转令栖遁者，真境逾难抛。

卷 635_6 【登甘露寺】

周繇

盘江上几层，峭壁半垂藤。殿锁南朝像，龕禅外国僧。
海涛碣砌槛，山雨洒窗灯。日暮疏钟起，声声彻广陵。

卷 635_7 【甘露寺东轩】

周繇

每日怜晴眺，闲吟只自娱。山从平地有，水到远天无。
老树多封楚，轻烟暗染吴。虽居此廊下，入户亦踟蹰。

卷 635_8 【甘露寺北轩】

周繇

晓色宜闲望，山风远益清。白云连晋阁，碧树尽芜城。
少静沙痕出，烟消野火平。最堪佳此境，为我长诗情。

卷 635_9 【咏萤】

周繇

熠熠与娟娟，池塘竹树边。乱飞同曳火，成聚却无烟。
微雨洒不灭，轻风吹欲燃。旧曾书案上，频把作囊悬。

卷 635_10 【望海】

周繇

苍茫空泛日，四顾绝人烟。半浸中华岸，旁通异域船。
岛间应有国，波外恐无天。欲作乘槎客，翻愁去隔年。

卷 635_11 【送杨环校书归广南】

周繇

天南行李半波涛，滩树枝枝拂戏獠。初著蓝衫从远峤，
乍辞云署泊轻艘。山村象踏桄榔叶，海外人收翡翠毛。
名宦两成归旧隐，遍寻亲友兴何饶。

卷 635_12 【经故宅有感】

周繇

身没南荒雨露賒，朱门空锁旧繁华。池塘凿就方通水，
桃杏栽成未见花。异代图书藏几篋，倾城罗绮散谁家。
昔年埏埴生灵地，今日生人为叹嗟。

卷 635_13 【送入蕃使】

周繇

猎猎旗幡过大荒，敕书犹带御烟香。滹沱河冻军回探，
逻娑孤城雁著行。远寨风狂移帐幕，平沙日晚卧牛羊。
早终册礼朝天阙，莫遣虬髯染塞霜。

卷 635_14 【白石潭秋霁作】

周繇

潭心烟雾破斜晖，殷殷雷声隔翠微。崖蹙盘涡翻蜃窟，
滩吹白石上渔矶。陵风舴艋讴哑去，出水鸬鹚薄泊飞。
秋霁更谁同此望，远钟时见一僧归。

卷 635_15 【题金陵栖霞寺赠月公】

周繇

明家不要买山钱，施作清池种白莲。松桧老依云外地，
楼台深锁洞中天。风经绝顶回疏雨，石倚危屏挂落泉。
欲结茅庵伴师住，肯饶多少薜萝烟。

卷 635_16 【嘲段成式（一作广阳公宴）】

周繇

蹙鞫且徒为，宁如目送时。报仇惭选奕，存想恨逶迟。
促坐疑辟咄，衔杯强朵颐。恣情窥窈窕，曾恃好风姿。
色授应难夺，神交愿莫辞。请君看曲谱，不负少年期。

卷 635_17 【送江州薛尚书（一作郎中）】

周繇

匡庐千万峰，影匝郡城中。忽佩虎符去，遥疑鸟道通。
烟霞时满郭，波浪暮连空。树翳楼台月，帆飞鼓角风。
郡斋多岳客，乡户半渔翁。王事行春外，题诗寄远公。

卷 635_18 【津头望白水】

周繇

晴江暗涨岸吹沙，山畔船冲树杪斜。
城郭半淹桥市闹，鹭鸶缭绕入人家。

卷 635_19 【公子行】

周繇

青山薄薄漏春风，日暮鸣鞭柳影中。
回望玉楼人不见，酒旗深处勒花骢。

卷 635_20 【看牡丹赠段成式】

周繇

金蕊霞英叠彩香，初疑少女出兰房。
逡巡又是一年别，寄语集仙呼索郎。

卷 635_21 【以人参遗段成式】

周繇

人形上品传方志，我得真英自紫团。
惭非叔子空持药，更请伯言审细看。

卷 635_22 【和段成式】

周繇

回簪转黛喜猜防，粉署裁诗助酒狂。
若遇仙丹偕羽化，但随萧史亦何伤。

玉树琼筵映彩霞，澄虚楼阁似仙家。
只缘存想归兰室，不向春风看夜花。

第六百三十六卷

卷 636_1 【杂兴】

聂夷中

两叶能蔽目，双豆能塞聪。理身不知道，将为天地聋。
扰扰造化内，茫茫天地中。苟或有所愿，毛发亦不容。

卷 636_2 【杂怨（一作孟郊诗，题云征妇怨）】

聂夷中

生在绮罗下，岂识渔阳道。良人自戍来，夜夜梦中到。
渔阳万里远，近于中门限。中门逾有时，渔阳常在眼。

君泪濡罗巾，妾泪滴路尘。罗巾今在手，日得随妾身。
路尘如因风，得上君车轮。

卷 636_3 【行路难】

聂夷中

莫言行路难，夷狄如中国。谓言骨肉亲，中门如异域。
出处全在人，路亦无通塞。门前两条辙，何处去不得。

卷 636_4 【大垂手】

聂夷中

金刀剪轻云，盘用黄金缕。装束赵飞燕，教来掌上舞。
舞罢飞燕死，片片随风去。

卷 636_5 【空城雀（一作孟郊诗）】

聂夷中

一雀入官仓，所食能损几。所虑往复频，官仓乃害尔。
鱼网不在天，鸟网不在水。饮啄要自然，何必空城里。

卷 636_6 【胡无人行】

聂夷中

男儿徇大义，立节不沽名。腰间悬陆离，大歌胡无行。
不读战国书，不览黄石经。醉卧咸阳楼，梦入受降城。
更愿生羽翼，飞身入青冥。请携天子剑，斫下旄头星。
自然胡无人，虽有无战争。悠哉典属国，驱羊老一生。

卷 636_7 【咏田家（一作伤田家）】

聂夷中

二月卖新丝，五月糴新谷。医得眼前疮，剜却心头肉。
我愿君王心，化作光明烛。不照绮罗筵，只照逃亡屋。

卷 636_8 【燕台二首】

聂夷中

燕台累黄金，上欲招儒雅。贵得贤士来，更下于隗者。
自然乐毅徒，趋风走天下。何必驰凤书，旁求向林野。

燕台高百尺，燕灭台亦平。一种是亡国，犹得礼贤名。

何似章华畔，空余禾黍生。

卷 636_9 【古兴】

聂夷中

片玉一尘轻，粒粟山丘重。唐虞贵民食，只是勤播种。
前圣后圣同，今人古人共。一岁如苦饥，金玉何所用。

卷 636_10 【劝酒二首】

聂夷中

白日无定影，清江无定波。人无百年寿，百年复如何？
堂上陈美酒，堂下列笙歌。与君入醉乡，醉乡乐天和。
岁岁松柏茂，日日丘陵多。君看终南山，万古青峨峨。

灞上送行客，听唱行客歌。适来桥下水，已作渭川波。
人间荣乐少，四海别离多。但恐别离泪，自成苦水河。
劝尔一杯酒，所赠无余多。

卷 636_11 【饮酒乐】

聂夷中

日月似有事，一夜行一周。草木犹须老，人生得无愁。

一饮解百结，再饮破百忧。白发欺贫贱，不入醉人头。
我愿东海水，尽向杯中流。安得阮步兵，同入醉乡游。

卷 636_12 【公子行二首】

聂夷中

汉代多豪族，恩深益骄逸。走马踏杀人，街吏不敢诘。
红楼宴青春，数里望云蔚。金缸焰胜昼，不畏落晖疾。
美人尽如月，南威莫能匹。芙蓉自天来，不向水中出。
飞琼奏云和，碧箫吹凤质。唯恨鲁阳死，无人驻白日。

花树出墙头，花里谁家楼。一行书不读，身封万户侯。
美人楼上歌，不是古凉州。

卷 636_13 【短歌】

聂夷中

八月木阴薄，十叶三堕枝。人生过五十，亦已同此时。
朝出东郭门，嘉树郁参差。暮出西郭门，原草已离披。
南邻好台榭，北邻善歌吹。荣华忽销歇，四顾令人悲。
生死与荣辱，四者乃常期。古人耻其名，没世无人知。
无言鬓似霜，勿谓事如丝。耆年无一善，何殊食乳儿。

卷 636_14 【过比干墓】

聂夷中

殷辛帝天下，厌为天下尊。乾纲既一断，贤愚无二门。
佞是福身本，忠作丧己源。饿虎不食子，人无骨肉恩。
日影不入地，下埋冤死魂。腐骨不为土，应作石木根。
余来过此乡，下马吊此坟。静念君臣间，有道谁敢论。

卷 636_15 【住京寄同志】

聂夷中

有京如在道，日日先鸡起。不离十二街，日行一百里。
役役大块上，周朝复秦市。贵贱与贤愚，古今同一轨。
白兔落天西，赤鸦飞海底。一日复一日，日日无终始。
自嫌性如石，不达荣辱理。试问九十翁，吾今尚如此。

卷 636_16 【赠农（一作孟郊诗）】

聂夷中

劝尔勤耕田，盈尔仓中粟。劝尔无伐桑，减尔身上服。
清霜一委地，万草色不绿。狂风一飘林，万叶不著木。

青春如不耕，何以自拘束。

卷 636_17 【客有追叹后时者作诗勉之】

聂夷中

后达多晚荣，速得多疾倾。君看构大厦，何曾一日成。
在暖须在桑，在饱须在耕。君子贵弘道，道弘无不亨。
太阳垂好光，毛发悉见形。我亦二十年，直似戴盆行。
荆山产美玉，石石皆坚贞。未必尽有玉，玉且间石生。
精卫一微物，犹恐填海平。

卷 636_18 【访嵩阳道士不遇】

聂夷中

先生五岳游，文焰灭金鼎。日下鹤过时，人间空落影。
常言一粒药，不随死生境。何当列御寇，去问仙人请。

卷 636_19 【早发邺北经古城】

聂夷中

微月东南明，双牛耕古城。但耕古城地，不知古城名。

当昔置此城，岂料今日耕。蔓草已离披，狐兔何纵横。
秋云零落散，秋风萧条生。对古良可叹，念今转伤情。
古人已冥冥，今人又营营。不知马蹄下，谁家旧台亭。

卷 636_20 【题贾氏林泉】

聂夷中

市朝束名利，林泉系清通。岂知黄尘内，迥有白云踪。
轻流逗密篠，直干入宽空。高吟五君咏，疑对九华峰。
我知种竹心，欲扇清凉风。我知决泉意，将明济物功。
有琴不张弦，众星列梧桐。须知淡澹听，声在无声中。
地非樵者路，武陵又何逢。只虑迷所归，池上日西东。

卷 636_21 【送友人归江南】

聂夷中

泉州五更鼓，月落西南维。此时有行客，别我孤舟归。
上国身无主，下第诚可悲。

卷 636_22 【秋夕】

聂夷中

日往无复见，秋堂暮仍学。玄发不知白，晓人寒铜觉。

为材未离群，有玉犹在璞。谁把碧桐枝，刻作云门乐。

卷 636_23 【哭刘驾博士】

聂夷中

出门四顾望，此日何徘徊。终南旧山色，夫子安在哉。
君诗如门户，夕闭昼还开。君名如四时，春尽夏复来。
原野多丘陵，累累如高台。君坟须数尺，谁与夫子偕。

卷 636_24 【公子家】

聂夷中

种花满西园，花发青楼道。花下一禾生，去之为恶草。

卷 636_25 【田家二首】

聂夷中

父耕原上田，子劬山下荒。六月禾未秀，官家已修仓。
锄田当日午，汗滴禾下土。谁念盘中餐，粒粒皆辛苦。

卷 636_26 【杂怨】

聂夷中

良人昨日去，明月又不圆。别时各有泪，零落青楼前。

卷 636_27 【乌夜啼】

聂夷中

众鸟各归枝，乌乌尔不栖。还应知妾恨，故向绿窗啼。

卷 636_28 【起夜来】

聂夷中

念远心如烧，不觉中夜起。桃花带露泛，立在月明里。

卷 636_29 【古别离】

聂夷中

欲别牵郎衣，问郎游何处。不恨归日迟，莫向临邛去。

卷 636_30 【长安道】

聂夷中

此地无驻马，夜中犹走轮。所以路傍草，少于衣上尘。

卷 636_31 【游子行（一作吟）】

聂夷中

萱草生堂阶，游子行天涯。慈亲倚门望，不见萱草花。

卷 636_32 【闻人说海北事有感】

聂夷中

故乡归路隔高雷，见说年来事可哀。村落日中眠虎豹，
田园雨后长蒿莱。海隅久已无春色，地底真成有劫灰。
荆棘满山行不得，不知当日是谁栽。

第六百三十七卷

卷 637_1 【华清词】

顾云

祥云皓鹤盘碧空，乔松稍稍韵微风。绛节影来，
朱幡响丁东，相公清斋朝蕊宫。太上符篆龙蛇踪，
散花天女侍香童。隔烟遥望见云水，弹璫吹凤清珑珑。
丹砂黄金世可度，愿启一言告仙翁。道门弟子山中客，
长向山中礼空碧。九色真龙上汉时，愿把霓幢引烟策。

卷 637_2 【天威行】

顾云

蛮岭高，蛮海阔，去舸回艘投此歇。一夜舟人得梦间，
草草相呼一时发。飓风忽起云颠狂，波涛摆掣鱼龙僵。
海神怕急上岸走，山燕股栗入石藏。金蛇飞状霍闪过，
白日倒挂银绳长。轰轰砢砢雷车转，霹雳一声天地战。
风定云开始望看，万里青山分两片。车遥遥，马阗阗，
平如砥，直如弦。云南八国万部落，皆知此路来朝天。

耿恭拜出井底水，广利刺开山上泉。若论终古济物意，
二将之功皆小焉。

卷 637_3 【筑城篇】

顾云

三十六里西川地，围绕城郭峨天横。一家人率一口臂，
版筑才兴城已成。役夫登登无倦色，饫饱觞酣方暂息。
不假神龟出指踪，尽凭心匠为筹画。画阁团团真铁瓮，
堵阔巉岩齐石壁。风吹四面旌旗动，火焰相烧满天赤。
散花楼晚挂残虹，濯锦秋江澄倒碧。西川父老贺子孙，
从兹始是中华人。

卷 637_4 【苏君厅观韩干马障歌】

顾云

杜甫歌诗吟不足，可怜曹霸丹青曲。直言弟子韩干马，
画马无骨但有肉。今日披图见笔迹，始知甫也真凡目。
秦王学士居武功，六印名家声价雄。乃孙屈迹宁百里，
好奇学古有祖风。竹厅斜日弈棋散，延我直入书斋中。
屹然六幅古屏上，欵见胡人牵入天厩之神龙。
麟鬣凤臆真相似，秋竹惨惨披两耳。轻匀杏蕊糝皮毛，
细捻银丝插鬃尾。思量动步应千里，谁见初离渥洼水？

眼前只欠燕雪飞，蹄下如闻朔风起。朱崖谪掾从亡殁，
更有何人鉴奇物。当时若遇燕昭王，肯把千金买枯骨。

卷 637_5 【苔歌】

顾云

槛前溪夺秋空色，百丈潭心数砂砾。松筠条条长碧苔，
苔色碧于溪水碧。波回梳开孔雀尾，根细贴著盘陀石。
拨浪轻拈出少时，一髻浓烟三四尺。山光日华乱相射，
静缕蓝髻匀鬓积。试把临流抖擞看，琉璃珠子泪双滴。
如看玉女洗头处，解破云鬟收未得。即是仙宫欲制六铢衣，
染丝未倩鲛人织。采之不敢盈筐篚，苦怕龙神河伯惜。
琼苏玉盐烂漫煮，咽入丹田续灵液。会待功成插翅飞，
蓬莱顶上寻仙客。

卷 637_6 【池阳醉歌赠匡庐处士姚岩杰】

顾云

九华太守行春罢，高绛红筵压花榭。四面繁英拂槛开，
帖雪团霞坠枝亚。空中焰若烧蓝天，万里滑静无纤烟。
弦索紧快管声脆，急曲碎拍声相连。主人怜才多倾兴，
许客酣歌露真性。春酎香浓枝盏黏，一醉有时三日病。
鼃潭鳞粉解不去，鸦岭蕊花浇不醒。肺枯似著炉鞴煽，

脑热如遭锤凿钉。蒙溪先生梁公孙，忽然示我十轴文。
展开一卷读一首，四顾特地无涯垠。又开一轴读一帙，
酒病豁若风驱云。文锋斡破造化窟，心刃掘出兴亡根。
经疾史恙万片恨，墨炙笔针如有神。呵叱潘陆鄙琐屑，
提挈扬孟归孔门。时时说及开元理，家风飒飒吹人耳。
吴兢纂出升平源，十事分明铺在纸。裔孙才业今如此，
谁人为奏明天子？銮驾何当猎左冯，神鹰一掷望千里。
戏操狂翰沅蛮笺，傍人莫笑我率然。

卷 637_7 【咏柳二首】

顾云

带露含烟处处垂，绽黄摇绿嫩参差。长堤未见风飘絮，
广陌初怜日映丝。斜傍画筵偷舞态，低临妆阁学愁眉。
离亭不放到春暮，折尽拂檐千万枝。

闲花野草总争新，眉皱丝干独不匀。
乞取东风残气力，莫教虚度一年春。

第六百三十八卷

卷 638_1 【宴边将】

张乔

一曲梁州金石清，边风萧飒动江城。
座中有老沙场客，横笛休吹塞上声。

卷 638_2 【郢州即事】

张乔

孤城临远水，千里见寒山。白雪无人唱，沧洲尽日闲。
鸟归残烧外，帆出断云间。此地秋风起，应随计吏还。

卷 638_3 【送宾贡金夷吾（一作鱼）奉使归本国】

张乔

渡海登仙籍，还家备汉仪。孤舟无岸泊，万里有星随。

积水浮魂梦，流年半别离。东风未回日，音信杳难期。

卷 638_4 【华山】

张乔

谁将倚天剑，削出倚天峰。众水背流急，他山相向重。
树黏青霭合，崖夹白云浓。一夜盆倾雨，前湫起毒龙。

卷 638_5 【滕王阁（一本下有写望二字）】

张乔

昔人登览处，遗阁大江隅。叠浪有时有，闲云无日无。
早凉先燕去，返照后帆孤。未得营归计，菱歌满旧湖。

卷 638_6 【寄处士梁烛】

张乔

贤哉君子风，讽与古人同。采药楚云里，移家湘水东。
星霜秋野阔，雨霁夜山空。早晚相招隐，深耕老此中。

卷 638_7 【送许棠下第游蜀】

张乔

天下猿多处，西南是蜀关。马登青壁瘦，人宿翠微闲。
带雨逢残日，因江见断山。行歌风月好，莫老锦城间。

卷 638_8 【题终南山白鹤观】

张乔

上彻炼丹峰，求玄意未穷。古坛青草合，往事白云空。
仙境日月外，帝乡烟雾中。人间足烦暑，欲去恋松风。

卷 638_9 【赠边将】

张乔

将军夸胆气，功在杀人多。对酒擎钟饮，临风拔剑歌。
翻师平碎叶，掠地取交河。应笑孔门客，年年羨四科。

卷 638_10 【吊建州李员外】

张乔

铭旌归故里，猿鸟亦凄然。已葬桐江月，空回建水船。
客传为郡日，僧说读书年。恐有吟魂在，深山古木边。

卷 638_11 【送许棠及第归宣州】

张乔

雅调一生吟，谁为晚达心。傍人贺及第，独自却沾襟。
宴别喧天乐，家归碍日岑。青门许攀送，故里接云林。

卷 638_12 【送庞百篇之任青阳县尉】

张乔

都堂公试日，词翰独超群。品秩台庭与，篇章圣主闻。
乡连三楚树，县封九华云。多少青门客，临岐共羡君。

卷 638_13 【曲江春】

张乔

寻春与送春，多绕曲江滨。一片凫鹥水，千秋鞦韆尘。
岸凉随众木，波影逐游人。自是游人老，年年管吹新。

卷 638_14 【秦原春望】

张乔

无穷名利尘，轩盖逐年新。北阙东堂路，千山万水人。
云离僧榻曙，燕远凤楼春。荏苒文明代，难归钓艇身。

卷 638_15 【游华山云际寺（一作游少华山甘露寺）】

张乔

少华中峰寺，高秋众景归。地连秦塞起，河隔晋山微。
晚木蝉相应，凉天雁并飞。殷勤记岩石，只恐再来稀。

卷 638_16 【送棋待诏朴球归新罗】

张乔

海东谁敌手，归去道应孤。
阙下传新势，船中覆旧图。
穷荒回日月，积水载寰区。
故国多年别，桑田复在无。

卷 638_17 【送郑谷先辈赴汝州辟命】

张乔

看花兴未休，已散曲江游。
载笔离秦甸，从军过洛州。
嵩云将雨去，汝水背城流。
应念依门客，蒿莱满径秋。

卷 638_18 【赠敬亭清越上人】

张乔

海上独随缘，归来二十年。
久闲时得句，渐老不离禅。
砌木欹临水，窗峰直倚天。
犹期向云里，别扫石床眠。

卷 638_19 【题（一作游）灵山寺】

张乔

树凉清岛寺，虚阁敞禅扉。四面闲云入，中流独鸟归。
湖平幽径近，船泊夜灯微。一宿秋风里，烟波隔捣衣。

卷 638_20 【吊栖白上人】

张乔

今古递相送，几时无逝波。篇章名不朽，寂灭理如何。
内殿留真影，闲房落贝多。从兹高塔寺，惆怅懒经过。

卷 638_21 【北山书事】

张乔

黄河一曲山，天半锁重关。圣日雄藩静，秋风老将闲。
车舆穿谷口，市井响云间。大野无飞鸟，元戎校猎还。

卷 638_22 【长安书事】

张乔

出送乡人尽，沧洲未得还。秋风五陵树，晴日六街山。
有景终年住，无机是处闲。何当向云外，免老别离间。

卷 638_23 【送郑侍御赴汴州辟命】

张乔

官从谏署清，暂去佐戎旌。朝客多相恋，吟僧欲伴行。
河冰天际白，岳雪眼前明。即见东风起，梁园听早莺。

卷 638_24 【吊造微上人】

张乔

至人随化往，遗路自堪伤。白塔收真骨，青山闭影堂。
钟残含细韵，烟灭有余香。松上斋乌在，迟迟立夕阳。

卷 638_25 【经隐岩旧居（一作怀旧游）】

张乔

夜久村落静，徘徊杨柳津。青山犹有路，明月已无人。
梦寐空前事，星霜倦此身。尝期结茅处，来往蹑遗尘。

卷 638_26 【再题敬亭清越上人山房】

张乔

重来访惠休，已是十年游。向水千松老，空山一磬秋。
石窗清吹入，河汉夜光流。久别多新作，长吟洗俗愁。

卷 638_27 【浮汴东归】

张乔

日暖泗滨西，无穷岸草齐。薄烟衰草树，微月迥城鸡。
水近沧浪急，山随绿野低。羞将旧名姓，还向旧游题。

卷 638_28 【雨中宿僧院】

张乔

千灯有宿因，长老许相亲。夜永楼台雨，更深江海人。
劳生无了日，妄念起微尘。不是真如理，何门静此身。

卷 638_29 【江行至沙浦】

张乔

烟霞接杳冥，旅泊寄回汀。夜雨雷电歇，春江蛟蜃腥。
城侵潮影白，峤截鸟行青。遍欲探泉石，南须过洞庭。

卷 638_30 【送友人归江南】

张乔

辛勤同失意，迢递独还家。落日江边笛，残春岛上花。
亲安诚可喜，道在亦何嗟。谁伴高吟处，晴天望九华。

卷 638_31 【刘补阙自九华山拜官因以寄献】

张乔

冥鸿久不群，征拜动天文。地主迎过郡，山僧送出云。
登车残月在，宿馆乱流分。若更思林下，还须共致君。

卷 638_32 【岳阳即事】

张乔

远色岳阳楼，湘帆数片愁。竹风山上路，沙月水中洲。
力学桑田废，思归鬓发秋。功名如不立，岂易狎汀鸥。

卷 638_33 【题兴善寺僧道深院】

张乔

江峰峰顶人，受法老西秦。法本无前业，禅非为后身。
院栽他国树，堂展祖师真。甚愿依宗旨，求闲未有因。

卷 638_34 【送龙门令刘沧】

张乔

去宰龙门县，应思变化年。还将鲁儒政，又与晋人传。
峭壁开中古，长河落半天。几乡因劝勉，耕稼满云烟。

卷 638_35 【送友人往（一作归）宜春】

张乔

落花兼柳絮，无处不纷纷。远道空归去，流莺独自闻。
野桥喧碓水，山郭入楼云。故里南陵曲，秋期更送君。

卷 638_36 【书边事】

张乔

调角断清秋，征人倚戍楼。春风对青冢，白日落梁州。
大汉无兵阻，穷边有客游。蕃情似此水，长愿向南流。

卷 638_37 【送僧雅觉归东海（一作海东）】

张乔

山川心地内，一念即千重。老别关中寺，禅归海外峰。
鸟行来有路，帆影去无踪。几夜波涛息，先闻本国钟。

卷 638_38 【和薛监察题兴善寺古松（薛一作崔）】

张乔

种在法王城，前朝古寺名。瘦根盘地远，香吹入云清。
鹤动池台影，僧禅雨雪声。看来人旋老，因此叹浮生。

卷 638_39 【听琴】

张乔

清月转瑶轸，弄中湘水寒。能令坐来客，不语自相看。
静恐鬼神出，急疑风雨残。几时归岭峤，更过洞庭弹。

卷 638_40 【送友人游蜀】

张乔

此心知者稀，欲别倍相依。无食拟同去，有家还未归。
巴山开国远，剑道入天微。必恐临邛客，疑君学赋非。

卷 638_41 【闻仰山禅师往曹溪因赠】

张乔

曹溪松下路，猿鸟重相亲。四海求玄理，千峰绕定身。
异花天上堕，灵草雪中春。自惜经行处，焚香礼旧真。

卷 638_42 【蓝溪夜坐】

张乔

蓝水警尘梦，夜吟开草堂。月临山霭薄，松滴露花香。
诗外真风远，人间静兴长。明朝访禅侣，更上翠微房。

卷 638_43 【题郑侍御蓝田别业】

张乔

秋山清若水，吟客静于僧。小径通商岭，高窗见杜陵。
云霞朝入镜，猿鸟夜窥灯。许作前峰侣，终来寄上层。

卷 638_44 【送友人进士许棠（一本无进士二字）】

张乔

离乡积岁年，归路远依然。夜火山头市，春江树杪船。
干戈愁鬓改，瘴疠喜家全。何处营甘旨，潮涛浸薄田。

卷 638_45 【秘省伴直】

张乔

乔枝聚暝禽，叠阁锁遥岑。待月当秋直，看书废夜吟。
残薪留火细，古井下瓶深。纵欲抄前史，贫难遂此心。

卷 638_46 【宿昭应】

张乔

夜忆开元寺，凄凉里巷间。薄烟通魏阙，明月照骊山。
半壁空宫闭，连天白道闲。清晨更回首，独向灞陵还。

卷 638_47 【送陆处士】

张乔

樽前放浩歌，便起泛烟波。舟楫故人少，江湖明月多。
孤峰经宿上，僻寺共云过。若向仙岩住，还应著薜萝。

卷 638_48 【送韩处士归少室山】

张乔

江外历千岑，还归少室吟。地闲纡岭月，窗迥洛城砧。
石窦垂寒乳，松枝长别琴。他年瀑泉下，亦拟置家林。

卷 638_49 【赠初上人】

张乔

竹色覆禅栖，幽禽绕院啼。空门无去住，行客自东西。
井气春来歇，庭枝雪后低。相看念山水，尽日话曹溪。

卷 638_50 【送新罗僧】

张乔

东来此学禅，多病念佛缘。把锡离岩寺，收经上海船。
落帆敲石火，宿岛汲瓶泉。永向扶桑老，知无再少年。

卷 638_51 【题山僧院】

张乔

谿路曾来日，年多与旧同。地寒松影里，僧老磬声中。
远水清风落，闲云别院通。心源若无碍，何必更论空。

卷 638_52 【书梅福殿壁二首】

张乔

梅真从羽化，万古是须臾。此地名空在，西山云亦孤。
井痕平野水，坛级上春芜。纵有双飞鹤，年多松已枯。

一自白云去，千秋坛月明。我来思往事，谁更得长生。
雅韵磬钟远，真风楼殿清。今来为尉者，天下有仙名。

卷 638_53 【荆楚道中】

张乔

前程曾未到，岐路拟何为。返照行人急，荒郊去鸟迟。
春宵多旅梦，夏闰远秋期。处处牵愁绪，无穷是柳丝。

卷 638_54 【送南陵尉李频】

张乔

重作东南尉，生涯尚似僧。客程淮馆月，乡思海船灯。
晚雾看春戟，晴天见朗陵。不应三考足，先授诏书征。

卷 638_55 【将归江淮书（一作冬归有感）】

张乔

东风摇众木，即有看花期。紫陌频来日，沧洲独去时。
郡因兵役苦，家为海翻移。未老多如此，那堪鬓不衰。

卷 638_56 【沿汉东归】

张乔

北去穷秦塞，南归绕汉川。深山逢古迹，远道见新年。
绝壁云衔寺，空江雪洒船。萦回还此景，多坐夜灯前。

卷 638_57 【送蜀客】

张乔

剑阁缘空去，西南转几州。丹青行客语，明月杜鹃愁。
露带山花落，云随野水流。相如曾醉地，莫滞少年游。

卷 638_58 【塞下（一作塞下曲）】

张乔

勒兵辽水边，风急卷旌旃。绝塞寒无树，平沙势尽天。
雪晴回探骑，月落控鸣弦。永定山河誓，南归改汉年。

卷 638_59 【送友人归袁州】

张乔

袁江猿鸟清，曾向此中行。才子登科去，诸侯扫榻迎。
山藏明月浦，树绕白云城。远想安亲后，秋风梦不惊。

卷 638_60 【赠别李山人】

张乔

分合老西秦，年年梦白蘋。曾为洞庭客，还送洞庭人。
语别惜残夜，思归愁见春。遥知泊舟处，沙月自相亲。

卷 638_61 【思宜春寄友人】

张乔

胜游虽隔年，魂梦亦依然。瀑水喧秋思，孤灯动夜船。
断虹全岭雨，斜月半溪烟。旧日吟诗侣，何人更不眠。

卷 638_62 【江行夜雨】

张乔

江风木落天，游子感流年。万里波连蜀，三更雨到船。
梦残灯影外，愁积苇丛边。不及樵渔客，全家住岛田。

卷 638_63 【赠仰大师】

张乔

仰山因久住，天下仰山名。井邑身虽到，林泉性本清。
野云居处尽，江月定中明。仿佛曾相识，今来隔几生。

卷 638_64 【江南逢洛下友人】

张乔

洛下吟诗侣，南游只有君。波涛归路见，蟋蟀在船闻。
晓月江城出，晴霞岛树分。无穷怀古意，岂独绕湘云。

卷 638_65 【东湖赠僧子兰】

张乔

名利了无时，何人暂访师。道情闲外见，心地语来知。
竹落穿窗叶，松寒荫井枝。匡山许同社，愿卜挂帆期。

卷 638_66 【隐岩陪郑少师夜坐】

张乔

幸喜陪骖驭，频来向此宵。砚磨清涧石，厨爨白云樵。
竹外村烟细，灯中禁漏遥。衣冠与文理，静语对前朝。

卷 638_67 【送三传赴长城尉（一作送前辈读三传任长城尉）】

张乔

登科精鲁史，为尉及良时。高论穷诸国，长才并几司。
地倾流水疾，山叠过云迟。暇日琴书畔，何人对手棋。

卷 638_68 【送李道士归南岳】

张乔

千峰隔湘水，迢递挂帆归。扫月眠苍壁，和云著褐衣。
洞虚悬溜滴，径狭长松围。只恐相寻日，人间旧识稀。

卷 638_69 【延福里秋怀】

张乔

终年九陌行，要路迹皆生。苦学犹难至，甘贫岂有成。
病携秋卷重，闲著暑衣轻。一别林泉久，中宵御水声。

卷 638_70 【题玄哲禅师影堂】

张乔

吾师视化身，一念即遗尘。岩谷藏虚塔，江湖散学人。
云迷禅处石，院掩写来真。寂寞焚香后，闲阶细草生。

卷 638_71 【登慈恩寺塔】

张乔

窗户几层风，清凉碧落中。世人来往别，烟景古今同。
列岫横秦断，长河极塞空。斜阳越乡思，天末见归鸿。

卷 638_72 【送友人东归】

张乔

远涉期秋卷，将行不废吟。故乡芳草路，来往别离心。
挂席春风尽，开斋夏景深。子规谁共听，江月上清岑。

卷 638_73 【送僧鸾归蜀宁亲】

张乔

歌诗精外学，天子是知音。坐夏宫钟近，宁亲剑阁深。
高名彻西国，旧迹寄东林。自此栖禅者，因师满蜀吟。

卷 638_74 【送人归江南】

张乔

贫归无定程，水宿与山行。未有安亲计，难为去国情。
岛烟孤寺磬，江月远船筝。思苦秋回日，多应吟更清。

卷 638_75 【将离江上作】

张乔

白衣归树下，青草恋江边。三楚足深隐，五陵多少年。
寂寥闻蜀魄，清绝怨湘弦。岐路在何处，西行心渺然。

卷 638_76 【别李参军】

张乔

王孙游不遇，况我五湖人。野店难投宿，渔家独问津。
岭分中夜月，江隔两乡春。静想青云路，还应寄此身。

卷 638_77 【送睦州张参军】

张乔

重禄轻身日，清资近故乡。因知送君后，转自惜年芳。
远水分林影，层峰起鸟行。扁舟此中去，溪月有余光。

卷 638_78 【赠棋僧侣】

张乔

机谋时未有，多向弈棋销。已与山僧敌，无令海客饶。
静驱云阵起，疏点雁行遥。夜雨如相忆，松窗更见招。

卷 638_79 【题湖上友人居】

张乔

岂得恋樵渔，全家湖畔居。远无潮客信，闲寄岳僧书。
野白梅繁后，山明雨散初。逍遥向云水，莫与宦情疏。

卷 638_80 【送友人归宣州】

张乔

失计复离愁，君归我独游。乱花藏道发，春水绕乡流。
暝火丛桥市，晴山叠郡楼。无为谢公恋，吟过晓蝉秋。

卷 638_81 【题古观】

张乔

急景递衰老，此经谁养真。松留千载鹤，碑隔六朝人。
洞水流花早，壶天闭雪春。其如为名利，归踏五陵尘。

卷 638_82 【送友人及第归江南】

张乔

岂易及归荣，辛勤致此名。登车思往事，回首勉诸生。
路绕山光晓，帆通海气清。秋期却闲坐，林下听江声。

卷 638_83 【送朴充侍御归海东】

张乔

天涯离二纪，阙下历三朝。涨海虽然阔，归帆不觉遥。
惊波时失侣，举火夜相招。来往寻遗事，秦皇有断桥。

卷 638_84 【吊前水部贾员外】

张乔

笼中江海禽，日夕有归心。魏阙长谣久，吴山独往深。
别时群木落，终处乱猿吟。李白坟前路，溪僧送入林。

卷 638_85 【题小松（一作移）】

张乔

松子落何年，纤枝长水边。斫开深涧雪，移出远林烟。
带月栖幽鸟，兼花灌冷泉。微风动清韵，闲听罢琴眠。

卷 638_86 【寄中岳颢顼先生】

张乔

先生颢顼后，得道自何人。松柏卑于寿，儿孙老却身。
夜窗峰顶曙，寒涧洞中春。恋此逍遥境，云间不可亲。

卷 638_87 【送沈先辈尉昭应】

张乔

余才不废诗，佐邑喜闲司。丹陛终须去，青山未可期。
叶凋温谷晚，云出古宫迟。若草东封疏，君王到有时。

卷 638_88 【送友人游湖南】

张乔

所投非旧知，亦似有前期。路向长江上，帆扬细雨时。
春生南岳早，日转大荒迟。尽采潇湘句，重来会近期。

卷 638_89 【江上送友人南游】

张乔

何处积乡愁，天涯聚乱流。岸长群岫晚，湖阔片帆秋。
买酒过渔舍，分灯与钓舟。潇湘见来雁，应念独边游。

卷 638_90 【江南别友人】

张乔

劳生故白头，头白未应休。阙下难孤立，天涯尚旅游。
听猿吟岛寺，待月上江楼。醉别醒惆怅，云帆满乱流。

卷 638_91 【商山道中】

张乔

春去计秋期，长安在梦思。多逢山好处，少值客行时。
云起争峰势，花交隐涧枝。停骖一惆怅，应只岭猿知。

卷 638_92 【吴江旅次】

张乔

行人愁落日，去鸟倦遥林。旷野鸣流水，空山响暮砧。
旅途归计晚，乡树别年深。寂寞逢村酒，渔家一醉吟。

卷 638_93 【寄南中友人】

张乔

相梦如相见，相思去后频。旧时行处断，华发别来新。
浪动三湘月，烟藏五岭春。又无归北客，书札寄何人。

卷 638_94 【寄绩溪陈明府】

张乔

古邑猿声里，空城只半存。岸移无旧路，沙涨别成村。
鼓角喧京口，江山尽汝滨。六朝兴废地，行子一销魂。

卷 638_95 【试月中桂】

张乔

与月转洪濛，扶疏万古同。根非生下土，叶不坠秋风。
每以圆时足，还随缺处空。影高群木外，香满一轮中。
未种丹青日，应虚玉兔宫。何当因羽化，细得问玄功。

卷 638_96 【游歙州兴唐寺】

张乔

山桥通绝境，到此忆天台。竹里寻幽径，云边上古台。
鸟归残照出，钟断细泉来。为爱澄溪月，因成隔宿回。

卷 638_97 【题诠律师院】

张乔

院凉松雨声，相对有山情。未许谿边老，犹思岳顶行。
纱灯留火细，石井灌瓶清。欲问吾师外，何人得此生。

卷 638_98 【金山寺空上人院】

张乔

已老金山顶，无心上石桥。讲移三楚遍，梵译五天遥。
板阁禅秋月，铜瓶汲夜潮。自惭昏醉客，来坐亦通宵。

卷 638_99 【题广信寺】

张乔

亭北敞灵溪，林梢与槛齐。野云来影远，沙鸟去行低。
晚渡明村火，晴山响郡鼙。思乡值摇落，赖不有猿啼。

第六百三十九卷

卷 639_1 【兴善寺贝多树】

张乔

还应毫末长，始见拂丹霄。得子从西国，成阴见昔朝。
势随双刹直，寒出四墙遥。带月啼春鸟，连空噪暝蜩。
远根穿古井，高顶起凉飙。影动悬灯夜，声繁过雨朝。
静迟松桂老，坚任雪霜凋。永共终南在，应随劫火烧。

卷 639_2 【华山】

张乔

青苍河一隅，气状杳难图。卓杰三峰出，高奇四岳无。
力疑擎上界，势独压中区。众水东西走，群山远近趋。
天回诸宿照，地耸百灵扶。石壁烟霞丽，龙潭雨雹粗。
澄凝临甸服，险固束神都。浅觉川原异，深应日月殊。
鹤归青霭合，仙去白云孤。瀑漏斜飞冻，松长倒挂枯。
每来寻洞穴，不拟返江湖。傥有芝田种，岩间老一夫。

卷 639_3 【送何道士归山】

张乔

身非绝粒本清羸，束挂仙经杖一枝。落叶独寻流水去，
深山长与白云期。树临丹灶寒花疾，坛近清岚夜月迟。
樵客若能随洞里，回归人世始应悲。

卷 639_4 【城东寓居寄知己】

张乔

花木闲门苔藓生，浣川特去得吟情。病来久绝洞庭信，
年长却思庐岳耕。落日独归林下宿，暮云多绕水边行。
干时退出长如此，频愧相忧道姓名。

卷 639_5 【再书边事】

张乔

万里沙西寇已平，犬羊群外筑空城。分营夜火烧云远，
校猎秋雕掠草轻。秦将力随胡马竭，蕃河流入汉家清。
羌戎不识干戈老，须贺当时圣主明。

卷 639_6 【游边感怀二首】

张乔

贫游缭绕困边沙，却被辽阳战士嗟。
不是无家归不得，有家归去似无家。

兄弟江南身塞北，雁飞犹自半年余。
夜来因得思乡梦，重读前秋转海书。

卷 639_7 【无题（一作赠友人）】

张乔

九霄无诏下，何事触清尘。宅带松萝僻，身惟猿鸟亲。
吟看仙掌月，期有洞庭人。莫问烟霞句，悬知见岳神。

卷 639_8 【蝉】

张乔

先秋蝉一悲，长是客行时。曾感去年者，又鸣何处枝。
细听残韵在，回望旧声迟。断续谁家树，凉风送别离。

卷 639_9 【江上逢进士许棠】

张乔

诗人推上第，新榜又无君。鹤发他乡老，渔歌故国闻。
平江流晓月，独鸟伴余云。且了髫年志，沙鸥未可群。

卷 639_10 【送河西从事】

张乔

结束佐戎旃，河西住几年。陇头随日去，碛里寄星眠。
水近沙连帐，程遥马入天。圣朝思上策，重待奏安边。

卷 639_11 【河湟旧卒】

张乔

少年随将讨河湟，头白时清返故乡。
十万汉军零落尽，独吹边曲向残阳。

卷 639_12 【促织】

张乔

念尔无机自有情，迎寒辛苦弄梭声。
椒房金屋何曾识，偏向贫家壁下鸣。

卷 639_13 【猿（一作长安赠猿）】

张乔

挂月栖云向楚林，取来全是为清音。
谁知系在黄金索，翻畏侯家不敢吟。

卷 639_14 【寄荐福寺栖白大师】

张乔

高塔六街无不见，塔边名出只吾师。
尝闻朝客多相□，记得□□数句诗。

卷 639_15 【越中赠别】

张乔

东越相逢几醉眠，满楼明月镜湖边。
别离吟断西陵渡，杨柳秋风两岸蝉。

卷 639_16 【寄清越上人（一作寄山僧）】

张乔

大道本来无所染，白云那得有心期。
远公独刻莲花漏，犹向空山礼六时。

卷 639_17 【宿齐山僧舍】

张乔

一宿经窗卧白波，万重归梦隔烟萝。
若言不得南宗要，长在禅床事更多。

卷 639_18 【春日游曲江】

张乔

日暖鸳鸯拍浪春，蒹葭浦际聚青蘋。
若论来往乡心切，须是烟波岛上人。

卷 639_19 【渔家】

张乔

拥棹思悠悠，更深泛积流。唯将一星火，何处宿芦洲。

卷 639_20 【送人及第归海东】

张乔

东风日边起，草木一时春。自笑中华路，年年送远人。

卷 639_21 【题河中鹳雀楼】

张乔

高楼怀古动悲歌，鹳雀今无野燕过。树隔五陵秋色早，

水连三晋夕阳多。渔人遗火成寒烧，牧笛吹风起夜波。
十载重来值摇落，天涯归计欲如何。

卷 639_22 【宿洛都门】

张乔

山川马上度边禽，一宿都门永夜吟。
客路不归秋又晚，西风吹动洛阳砧。

卷 639_23 【对月二首】

张乔

圆魄上寒空，皆言四海同。安知千里外，不有雨兼风。
盈缺青冥外，东风万古吹。何人种丹桂，不长出轮枝。

卷 639_24 【赠友人】

张乔

自说安贫归未得，竹边门掩小池冰。典琴赊酒吟过寺，
送客思乡上灞陵。待月夜留烟岛客，忆云闲访翠微僧。

几时献了相如赋，共向嵩山采茯苓。

卷 639_25 【笛】

张乔

剪雨裁烟一节秋，落梅杨柳曲中愁。
尊前暂借殷勤看，明日曾闻向陇头。

卷 639_26 【渔者】

张乔

首戴圆荷发不梳，叶舟为宅水为居。
沙头聚看人如市，钓得澄江一丈鱼。

卷 639_27 【宿潺湲亭】

张乔

走月流烟叠树西，听来愁甚听猿啼。
几时御水声边住，却梦潺湲宿此溪。

卷 639_28 【台城】

张乔

宫殿余基长草花，景阳宫树噪村鸦。
云屯雉堞依然在，空绕渔樵四五家。

卷 639_29 【寄山僧】

张乔

闲倚蒲团向日眠，不能归老岳云边。
旧时僧侣无人在，惟有长松见少年。

卷 639_30 【题上元许棠所任王昌龄厅】

张乔

琉璃堂里当时客，久绝吟声继后尘。
百四十年庭树老，如今重得见诗人。

卷 639_31 【自诔】

张乔

每到花时恨道穷，一生光景半成空。
只应抱璞非良玉，岂得年年不至公。

卷 639_32 【赠河南诗友】

张乔

山东令族玉无尘，裁剪烟花笔下春。
不把瑶华借风月，洛阳才子更何人。

卷 639_33 【寄维扬故人】

张乔

离别河边绾柳条，千山万水玉人遥。
月明记得相寻处，城锁东风十五桥。

卷 639_34 【孤云】

张乔

舒卷因风何所之，碧天孤影势迟迟。
莫言长是无心物，还有随龙作雨时。

卷 639_35 【咏棋子赠弈僧】

张乔

黑白谁能用入玄，千回生死体方圆。
空门说得恒沙劫，应笑终年为一先。

卷 639_36 【谷口作】

张乔

巴客青冥过岭尘，雪崖交映一川春。
晴朝采药寻源去，必恐云深见异人。

卷 639_37 【寄弟】

张乔

故里行人战后疏，青崖萍寄白云居。
那堪又是伤春日，把得长安落第书。

卷 639_38 【春日有怀】

张乔

高下寻花春景迟，汾阳台榭白云诗。
看山怀古翻惆怅，未胜遥传不到时。

卷 639_39 【鹭鸶障子】

张乔

剪得机中如雪素，画为江上带丝禽。
闲来相对茅堂下，引出烟波万里心。

卷 639_40 【甘露寺僧房】

张乔

临水登山路，重寻旅思劳。竹阴行处密，僧腊别来高。
远岫明寒火，危楼响夜涛。悲秋不成寐，明月上千舳。

卷 639_41 【宿江叟岛居】

张乔

一家烟岛隈，竹里夜窗开。数派分潮去，千樯聚月来。
石楼云断续，涧渚雁徘徊。了得平生志，还归筑钓台。

卷 639_42 【江村】

张乔

贫游无定踪，乡信转难逢。寒渚暮烟阔，去帆归思重。
潮平低戍火，木落远山钟。况是渔家宿，疏篱响夜舂。

卷 639_43 【赠进士顾云】

张乔

潮槛烟波别钓津，西京同□荻□贫。不知守道归何日，
相对无言尽几春。晴景远山花外暮，云边高盖水边□。
与君愁寂无消处，賒酒青门送楚人。

卷 639_44 【赠头陀僧】

张乔

自说年深别石桥，遍游灵迹熟南朝。已知世路皆虚幻，
不觉空门是寂寥。沧海附船浮浪久，碧山寻塔上云遥。
如今竹院藏衰老，一点寒灯弟子烧。

卷 639_45 【寻阳村舍】

张乔

荒林寄远居，坐卧见樵渔。夜火随船远，寒更出郡疏。
雪迷登岳路，风阻转江书。寂寞高窗下，思乡岁欲除。

卷 639_46 【江楼作】

张乔

凭槛见天涯，非秋亦可悲。晚天帆去疾，春雪燕来迟。
山水分乡县，干戈足别离。南人废耕织，早晚罢王师。

卷 639_47 【回鸾阁写望】

张乔

古阁上空半，寥寥千里心。多年为客路，尽日倚栏吟。
山压秦川重，河来虏塞深。回銮今不见，烟雾杳沉沉。

卷 639_48 【题宣州开元寺】

张乔

谁家烟径长莓苔，金碧虚栏竹上开。流水远分山色断，
清猿时带角声来。六朝明月唯诗在，三楚空山有雁回。
达理始应尽惆怅，僧闲应得话天台。

卷 639_49 【题友人草堂】

张乔

空山卜隐初，生计亦无余。三亩水边竹，一床琴畔书。
深林收晚果，绝顶拾秋蔬。坚话长如此，何年献子虚。

卷 639_50 【七松亭】

张乔

七松亭上望秦川，高鸟闲云满目前。已比子真耕谷口，
岂同陶令卧江边。临崖把卷惊回烧，扫石留僧听远泉。
明月影中宫漏近，珮声应宿使朝天。

卷 639_51 【题友人林斋】

张乔

乔木带凉蝉，来吟暑雨天。不离高枕上，似宿远山边。
簟冷窗中月，茶香竹里泉。吾庐近溪岛，忆别动经年。

卷 639_52 【经宣城元员外山居】

张乔

无人袭仙隐，石室闭空山。避烧猿犹到，随云鹤不还。
涧荒岩影在，桥断树阴闲。但有黄河赋，长留在世间。

卷 639_53 【经九华山费征君故居】

张乔

草堂芜没后，来往问樵翁。断石荒林外，孤坟晚照中。
数溪分大野，九子立寒空。烟壁曾行处，青云路不通。

卷 639_54 【题贾岛吟诗台】

张乔

吟魂不复游，台亦似荒丘。一径草中出，长江天外流。
暝烟寒鸟集，残月夜虫愁。愿得生禾黍，锄平恨即休。

卷 639_55 【游南岳】

张乔

入岩仙境清，行尽复重行。若得闲无事，长来寄此生。
涧松闲易老，笼烛晚生明。一宿泉声里，思乡梦不成。

卷 639_56 【寻桃源】

张乔

武林春草齐，花影隔澄溪。路远无人去，山空有鸟啼。
水垂青霭断，松偃绿萝低。世上迷途客，经兹尽不迷。

卷 639_57 【青鸟泉】

张乔

只此沉仙翼，瑶池似不遥。有声悬翠壁，无势下丹霄。
净濑烟霞古，寒原草木凋。山河几更变，幽咽到唐朝。

卷 639_58 【望巫山】

张乔

溪叠云深转谷迟，暝投孤店草虫悲。愁连远水波涛夜，
梦断空山雨雹时。边海故园荒后卖，入关玄发夜来衰。
东归未必胜羁旅，况是东归未有期。

卷 639_59 【省中偶作】

张乔

二转郎曹自勉旃，莎阶吟步想前贤。不如何逊无佳句，
若比冯唐是壮年。捧制名题黄纸尾，约僧心在白云边。
乳毛松雪春来好，直夜清闲且学禅。

卷 639_60 【秋夕】

张乔

春恨复秋悲，秋悲难到时。每逢明月夜，长起故山思。
巷僻行吟远，蛩多独卧迟。溪僧与樵客，动别十年期。

卷 639_61 【山中冬夜】

张乔

寒叶风摇尽，空林鸟宿稀。涧冰妨鹿饮，山雪阻僧归。
夜坐坐心定，长吟语力微。人间去多事，何处梦柴扉。

卷 639_62 【宿刘温书斋】

张乔

不掩盈窗月，天然格调高。凉风移蟋蟀，落叶在离骚。
回笔挑灯烬，悬图见海涛。因论三国志，空载几英豪。

卷 639_63 【归旧山】

张乔

昔年山下结茅茨，村落重来野径移。樵客相逢悲往事，
林僧闲坐问归期。异藤遍树无空处，幽草缘溪少歇时。
此景一抛吟欲老，可能文字圣朝知。

卷 639_64 【潭上作】

张乔

竹岛残阳映翠微，雪翎禽过碧潭飞。
人间未有关身事，每到渔家不欲归。

卷 639_65 【杨花落】

张乔

北斗南回春物老，红英落尽绿尚早。韶风澹荡无所依，
偏惜垂杨作春好。此时可怜杨柳花，萦盈艳曳满人家。
人家女儿出罗幕，净扫玉除看花落。宝环纤手捧更飞，
翠羽轻裙承不著。历历瑶琴舞袖陈，飞红拂黛怜玉人。
东园桃李芳已歇，犹有杨花娇暮春。

卷 639_66 【九华楼晴望】

张乔

一夜江潭风雨后，九华晴望倚天秋。
重来此地知何日，欲别殷勤更上楼。

卷 639_67 【终南山】

张乔

带雪复衔春，横天占半秦。势奇看不定，景变写难真。
洞远皆通岳，川多更有神。白云幽绝处，自古属樵人。

卷 639_68 【哭陈陶】

张乔

先生抱衰疾，不起茂陵间。夕临诸孤少，荒居吊客还。
遗文禅东岳，留语葬乡山。多雨铭旌故，残灯素帐闲。
乐章谁与集，陇树即堪攀。神理今难问，予将叫帝关。

卷 639_69 【长门怨】

张乔

御泉长绕凤凰楼，自是恩波别处流。
闲揲舞衣归未得，夜来砧杵六宫秋。

第六百四十卷

卷 640_1 【升平词五首（一作薛能诗）】

曹唐

瑞气绕宫楼，皇居上苑游。远冈连圣祚，平地载神州。
会合兼重译，潺湲近八流。中兴岂假问，据此自千秋。

寥泺敞延英，朝班立位横。宣传无草动，拜舞有衣声。
鸳瓦霜消湿，虫丝日照明。辛勤自不到，遥见似前程。

处处是欢心，时康岁已深。不同三尺剑，应似五弦琴。
寿笑山犹尽，明嫌日有阴。何当怜一物，亦遣断愁吟。

日日听歌谣，区中尽祝尧。虫蝗初不害，夷狄近全销。
史笔唯书瑞，天台绝见妖。因令匹夫志，转欲事清朝。

五帝三皇主，萧曹魏邴臣。文章唯返朴，戈甲尽生尘。
谏纸应无用，朝纲自有伦。升平不可记，所见是闲人。

卷 640_2 【洛东兰若归】

曹唐

一衲老禅床，吾生半异乡。管弦愁里老，书剑梦中忙。
鸟急山初暝，蝉稀树正凉。又归何处去，尘路月苍苍。

卷 640_3 【仙都即景】

曹唐

黄帝登真处，青青不记年。孤峰应碍日，一柱自擎天。
石怪长栖鹤，云闲若有仙。鼎湖看不见，零落数枝莲。

卷 640_4 【汉武帝将候西王母下降】

曹唐

昆仑凝想最高峰，王母来乘五色龙。歌听紫鸾犹缥缈，
语来青鸟许从容。风回水落三清月，漏苦霜传五夜钟。
树影悠悠花悄悄，若闻箫管是行踪。

卷 640_5 【汉武帝于宫中宴西王母】

曹唐

鳌岫云低太一坛，武皇斋洁不胜欢。长生碧字期亲署，
延寿丹泉许细看。剑佩有声宫树静，星河无影禁花寒。
秋风袅袅月朗朗，玉女清歌一夜阑。

卷 640_6 【刘晨阮肇游天台】

曹唐

树入天台石路新，云和草静迥无尘。烟霞不省生前事，
水木空疑梦后身。往往鸡鸣岩下月，时时犬吠洞中春。
不知此地归何处，须就桃源问主人。

卷 640_7 【刘阮洞中遇仙子（一作偶仙子）】

曹唐

天和树色霭苍苍，霞重岚深路渺茫。云实满山无鸟雀，
水声沿涧有笙簧。碧沙洞里乾坤别，红树枝前日月长。
愿得花间有人出，免令仙犬吠刘郎。

卷 640_8 【仙子送刘阮出洞】

曹唐

殷勤相送出天台，仙境那能却再来。云液每归须强饮，
玉书无事莫频开。花当洞口应长在，水到人间定不回。
惆怅溪头从此别，碧山明月闭苍苔。

卷 640_9 【仙子洞中有怀刘阮】

曹唐

不将清瑟理霓裳，尘梦那知鹤梦长。洞里有天春寂寂，
人间无路月茫茫。玉沙瑶草连溪碧，流水桃花满涧香。
晓露风灯零落尽，此生无处访刘郎。

卷 640_10 【刘阮再到天台不复见仙子】

曹唐

再到天台访玉真，青苔白石已成尘。笙歌冥寞闲深洞，
云鹤萧条绝旧邻。草树总非前度色，烟霞不似昔年春。
桃花流水依然在，不见当时劝酒人。

卷 640_11 【织女怀牵牛】

曹唐

北斗佳人双泪流，眼穿肠断为牵牛。封题锦字凝新恨，
抛掷金梭织旧愁。桂树三春烟漠漠，银河一水夜悠悠。
欲将心向仙郎说，借问榆花早晚秋。

卷 640_12 【王远宴麻姑蔡经宅】

曹唐

好风吹树杏花香，花下真人道姓王。大篆龙蛇随笔札，
小天星斗满衣裳。闲抛南极归期晚，笑指东溟饮兴长。
要唤麻姑同一醉，使人沽酒向余杭。

卷 640_13 【萼绿华将归九疑留别许真人】

曹唐

九点秋烟黛色空，绿华归思颇无穷。每悲驭鹤身难任，
长恨临霞语未终。河影暗吹云梦月，花声闲落洞庭风。
蓝丝重勒金条脱，留与人间许侍中。

卷 640_14 【穆王宴王母于九光流霞馆】

曹唐

桑叶扶疏闭日华，穆王邀命宴流霞。霓旌著地云初驻，
金奏掀天月欲斜。歌咽细风吹粉蕊，饮余清露湿瑶砂。
不知白马红缰解，偷吃东田碧玉花。

卷 640_15 【紫河张休真】

曹唐

琪树扶疏压瑞烟，玉皇朝客满花前。山川到处成三月，
丝竹经时即万年。树石冥茫初缩地，杯盘狼藉未朝天。
东风小饮人皆醉，从听黄龙枕水眠。

卷 640_16 【张硕重寄杜兰香】

曹唐

碧落香销兰露秋，星河无梦夜悠悠。灵妃不降三清驾，
仙鹤空成万古愁。皓月隔花追款别，瑞烟笼树省淹留。
人间何事堪惆怅，海色西风十二楼。

卷 640_17 【玉女杜兰香下嫁于张硕】

曹唐

天上人间两渺茫，不知谁识杜兰香。来经玉树三山远，
去隔银河一水长。怨入清尘愁锦瑟，酒倾玄露醉瑶觞。
遗情更说何珍重，擘破云鬟金凤凰。

卷 640_18 【萧史携弄玉上升】

曹唐

岂是丹台归路遥，紫鸾烟驾不同飘。一声洛水传幽咽，
万片宫花共寂寥。红粉美人愁未散，清华公子笑相邀。
缑山碧树青楼月，肠断春风为玉箫。

卷 640_19 【皇初平将入金华山】

曹唐

莫道真游烟景赊，潇湘有路入京华。溪头鹤树春常在，
洞口人家日易斜。一水暗鸣闲绕涧，五云长往不还家。
白羊成队难收拾，吃尽溪边巨胜花。

卷 640_20 【汉武帝思李夫人】

曹唐

惆怅冰颜不复归，晚秋黄叶满天飞。迎风细苒传香粉，
隔水残霞见画衣。白玉帐寒鸳梦绝，紫阳宫远雁书稀。
夜深池上兰桡歇，断续歌声彻太微。

卷 640_21 【送羽人王锡归罗浮】

曹唐

风前整顿紫荷巾，常向罗浮保养神。石磴倚天行带月，
铁桥通海入无尘。龙蛇出洞闲邀雨，犀象眠花不避人。
最爱葛洪寻药处，露苗烟蕊满山春。

卷 640_22 【送刘尊师祇诏阙庭三首】

曹唐

海风叶叶驾霓旌，天路悠悠接上清。锦诰凄凉遗去恨，
玉箫哀绝醉离情。五湖夜月幡幢湿，双阙清风剑珮轻。
从此暂辞华表柱，便应千载是归程。

五峰已别隔人间，双阙何年许再还。既扫山川收地脉，
须留日月驻天颜。霞觞共饮身虽在，风驭难陪迹未闲。
从此枕中唯有梦，梦魂何处访三山。

仙老闲眠碧草堂，帝书征入白云乡。龟台欲署长生籍，
鸾殿还论不死方。红露想倾延命酒，素烟思爇降真香。
五千言外无文字，更有何词赠武皇。

卷 640_23 【三年冬大礼五首】

曹唐

皇帝斋心洁素诚，自朝真祖报升平。华山秋草多归马，
沧海寒波绝洗兵。银箭水残河势断，玉炉烟尽日华生。
千官整肃三天夜，剑佩初闻入太清。

海日西飞度禁林，太清宫殿月沉沉。不闻北斗倾尧酒，
空觉南风入舜琴。歌压钧天闲梦尽，诏归秋水道情深。
雪风更起古杉叶，时送步虚清磬音。

太一天坛降紫君，属车龙鹤夜成群。春浮玉藻寒初落，
露拂金茎曙欲分。三代乐回风入律，四溟歌驻水成文。
千官不动旌旗下，日照南山万树云。

山拥飞云海水清，天坛未夕仗先成。千官不起金縢议，
万国空瞻玉藻声。禁火曙然烟焰袅，宫衣寒拂雪花轻。

侧闻左右皆周吕，看取从容致太平。

太和琴暖发南薰，水阔风高得细闻。沧海举歌夔是相，
历山回禅舜为君。翠微呼处生丹障，清净封中起白云。
今日病身惭小隐，欲将泉石勒移文。

卷 640_24 【暮春戏赠吴端公】

曹唐

年少英雄好丈夫，大家望拜执金吾。闲眠晓日听鶗鴂，
笑倚春风仗辘轳。深院吹笙闻汉婢，静街调马任奚奴。
牡丹花下帘钩外，独凭红肌捋虎须。

卷 640_25 【奉送严大夫再领容府二首】

曹唐

海风卷树冻岚消，忧国宁辞岭外遥。自顾勤劳甘百战，
不将功业负三朝。剑澄黑水曾芟虎，箭劈黄云惯射雕。
代北天南尽成事，肯将心许霍嫖姚。

日照双旌射火山，笑迎宾从却南还。风云暗发谈谐外，
感会潜生气概间。蕲竹水翻台榭湿，刺桐花落管弦闲。
无因得覩真珠履，亲从新侯定八蛮。

卷 640_26 【赠南岳冯处士二首】

曹唐

白石溪边自结庐，风泉满院称幽居。鸟啼深树劖灵药，
花落闲窗看道书。烟岚晚过鹿裘湿，水月夜明山舍虚。
支颐冷笑缘名出，终日王门强曳裾。

寂寥深木闭烟霞，洞里相知有几家。笑看潭鱼吹水沫，
醉嗔溪鹿吃蕉花。穿厨历历泉声细，绕屋悠悠树影斜。
夜静著灰封釜灶，自添文武养丹砂。

卷 640_27 【题子侄书院双松】

曹唐

自种双松费几钱，顿令院落似秋天。能藏此地新晴雨，
却惹空山旧烧烟。枝压细风过枕上，影笼残月到窗前。
莫教取次成闲梦，使汝悠悠十八年。

卷 640_28 【羽林贾中丞】

曹唐

四十年前百战身，曾驱虎队扫胡尘。风悲鼓角榆关暮，
日暖旌旗陇草春。铁马惯牵邀上客，金鱼多解乞佳人。
胸中别有安边计，谁睬髭须白似银。

卷 640_29 【送康祭酒赴轮台】

曹唐

灞水桥边酒一杯，送君千里赴轮台。霜粘海眼旗声冻，
风射犀文甲缝开。断碛簇烟山似米，野营轩地鼓如雷。
分明会得将军意，不斩楼兰不拟回。

卷 640_30 【南游】

曹唐

尽兴南游卒未回，水工舟子不须催。政思碧树关心句，
难放红螺蘸甲杯。涨海潮生阴火灭，苍梧风暖瘴云开。
芦花寂寂月如练，何处笛声江上来。

卷 640_31 【哭陷边许兵马使】

曹唐

北风裂地黯边霜，战败桑干日色黄。故国暗回残士卒，

新坟空葬旧衣裳。散牵细马嘶青草，任去佳人吊白杨。
除却阴符与兵法，更无一物在仪床。

卷 640_32 【和周侍御买剑】

曹唐

将军溢价买吴钩，要与中原静寇仇。试挂窗前惊电转，
略抛床下怕泉流。青天露拔云霓泣，黑地潜擎鬼魅愁。
见说夜深星斗畔，等闲期克月支头。

卷 640_33 【病马五首呈郑校书章三吴十五先辈】

曹唐

騄耳何年别渥洼，病来颜色半泥沙。四蹄不凿金砧裂，
双眼慵开玉箸斜。堕月兔毛干觳觫，失云龙骨瘦牙槎。
平原好放无人放，嘶向秋风苜蓿花。

陇上沙葱叶正齐，腾黄犹自踟蹰啼。尾蟠夜雨红丝脆，
头掣秋风白练低。力惫未思金络脑，影寒空望锦障泥。
阶前莫怪垂双泪，不遇孙阳不敢嘶。

不剪焦毛鬣半翻，何人别是古龙孙。霜侵病骨无骄气，
土蚀骀花见卧痕。未喷断云归汉苑，曾追轻练过吴门。

一朝千里心犹在，争肯潜忘秣饲恩。

空被秋风吹病毛，无因濯浪刷洪涛。卧来总怪龙蹄跂，
瘦尽谁惊虎口高。追电有心犹款段，逢人相骨强嘶号。
欲将髻鬣重裁剪，乞借新成利铰刀。

病久无人著意看，玉华衫色欲凋残。饮惊白露泉花冷，
吃怕清秋豆叶寒。长檐敢辞红锦重，旧纆宁畏紫丝蟠。
王良若许相抬策，千里追风也不难。

卷 640_34 【长安客舍叙邵陵旧宴，寄永州萧使君五首】

曹唐

邵陵佳树碧葱茏，河汉西沈宴未终。残漏五更传海月，
清笳三会揭天风。香熏舞席云鬟绿，光射头盘蜡烛红。
今日却怀行乐处，两床丝竹水楼中。

不知何路却飞翻，虚受贤侯郑重恩。五夜清歌敲玉树，
三年洪饮倒金尊。招携永感双鱼在，报答空知一剑存。
狼藉梨花满城月，当时长醉信陵门。

粉堞彤轩画障西，水云红树窄璇题。鹧鸪欲绝歌声定，
鸂鶒初惊舞袖齐。坐对玉山空甸线，细听金石怕低迷。
东风夜月三年饮，不省非时不似泥。

木鱼金钥锁春城，夜上红楼纵酒情。竹叶水繁更漏促，
桐花风软管弦清。百分散打银船溢，十指宽催玉箸轻。
星斗渐稀宾客散，碧云犹恋艳歌声。

三年身逐汉诸侯，宾榻容居最上头。饱听笙歌陪痛饮，
熟寻云水纵闲游。朱门锁闭烟岚暮，铃阁清冷水木秋。
月满前山圆不动，更邀诗客上高楼。

卷 640_35 【勸剑】

曹唐

古物神光雪见羞，未能擎出恐泉流。暗临黑水蛟螭泣，
潜倚空山鬼魅愁。生怕雷霆号涧底，长闻风雨在床头。
垂情不用将闲气，恼乱司空犯斗牛。

卷 640_36 【仙都即景】

曹唐

蟠桃花老华阳东，轩后登真谢六宫。旌节暗迎归碧落，
笙歌遥听隔崆峒。衣冠留葬桥山月，剑履将随浪海风。
看却龙髯攀不得，红霞零落鼎湖空。

卷 640_37 【望九华寄池阳杜员外】

曹唐

戴月早辞三秀馆，迟明初识九华峰。差差玉剑寒铓利，
袅袅青莲翠叶重。奇状却疑人画出，岚光如为客添浓。
行春若到五溪上，此处褰帷正面逢。

第六百四十一卷

卷 641_1 【小游仙诗九十八首】

曹唐

玉箫金瑟发商声，桑叶枯干海水清。
净扫蓬莱山下路，略邀王母话长生。

上元元日豁明堂，五帝望空拜玉皇。
万树琪花千圃药，心知不敢辄形相。

骑龙重过玉溪头，红叶还春碧水流。
省得壶中见天地，壶中天地不曾秋。

真王未许久从容，立在花前别甯封。
手把玉箫头不举，自愁如醉倚黄龙。

金殿无人锁绛烟，玉郎并不赏丹田。
白龙蹀躞难回跋，争下红绡碧玉鞭。

玄洲草木不知黄，甲子初开浩劫长。
无限万年年少女，手攀红树满残阳。

宫阙重重闭玉林，昆仑高辟彩云深。
黄龙掉尾引郎去，使妾月明何处寻。

风满涂山玉蕊稀，赤龙闲卧鹤东飞。
紫梨烂尽无人吃，何事韩君去不归？

武帝徒劳厌暮年，不曾清净不精专。
上元少女绝还往，满灶丹成白玉烟。

百辟朝回闭玉除，露风清宴桂花疏。
西归使者骑金虎，骎鞚垂鞭唱步虚。

南斗阑珊北斗稀，茅君夜著紫霞衣。
朝骑白鹿趁朝去，凤押笙歌逐后飞。

焚香独自上天坛，桂树风吹玉简寒。
长怕嵇康乏仙骨，与将仙籍再寻看。

冰屋朱扉晓未开，谁将金策扣琼台？
碧花红尾小仙犬，闲吠五云嗔客来。

酒醺春浓琼草齐，真公饮散醉如泥。
朱轮轧轧入云去，行到半天闻马嘶。

白石山中自有天，竹花藤叶隔溪烟。
朝来洞口围棋了，赌得青龙直几钱？

海水西飞照柏林，青云斜倚锦云深。
水风暗入古山叶，吹断步虚清磬音。

玉诏新除沈侍郎，便分茅土镇东方。
不知今夕游何处，侍从皆骑白凤凰。

洞里烟霞无歇时，洞中天地足金芝。
月明朗朗溪头树，白发老人相对棋。

饥即餐霞闷即行，一声长啸万山青。
穿花渡水来相访，珍重多才阮步兵。

东妃闲著翠霞裙，自领笙歌出五云。
清思密谈谁第一，不过邀取小茅君。

月影悠悠秋树明，露吹犀簟象床轻。
嫔妃久立帐门外，暗笑夫人推酒声。

九天天路入云长，燕使何由到上方。
玉女暗来花下立，手授裙带问昭王。

玉皇赐妾紫衣裳，教向桃源嫁阮郎。
烂煮琼花劝君吃，恐君毛鬓暗成霜。

花底休倾绿玉卮，云中含笑向安期。
穷阳有数不知数，大似人间年少儿。

玉色雌龙金络头，真妃骑出纵闲游。
昆仑山上桃花底，一曲商歌天地秋。

偷来洞口访刘君，缓步轻抬玉线裙。
细擘桃花逐流水，更无言语倚彤云。

西汉夫人下太虚，九霞裙幅五云舆。
欲将碧字相教示，自解盘囊出素书。

天上鸡鸣海日红，青腰侍女扫朱宫。
洗花蒸叶滤清酒，待与夫人邀五翁。

汗漫真游实可奇，人间天上几人知。
周王不信长生话，空使苕弘碧泪垂。

青锦缝裳绿玉珰，满身新带五云香。
闲依碧海攀鸾驾，笑就苏君觅橘尝。

鹤不西飞龙不行，露干云破洞箫清。
少年仙子说闲事，遥隔彩云闻笑声。

洞里烟深木叶粗，乘风使者降玄都。
隔花相见遥相贺，擎出怀中赤玉符。

芝蕙芸花烂漫春，瑞香烟露湿衣巾。
玉童私地夸书札，偷写云谣暗赠人。

天上邀来不肯来，人间双鹤又空回。
秦皇汉武死何处，海畔红桑花自开。

紫羽麾幢下玉京，却邀真母入三清。
白龙久住浑相恋，斜倚祥云不肯行。

鹤叫风悲竹叶疏，谁来五岭拜云车？
人间肉马无轻步，踏破先生一卷书。

夜降西坛宴已终，花残月榭雾朦胧。
谁游八海门前过，空洞一声风雨中。

忘却教人锁后宫，还丹失尽玉壶空。
嫦娥若不偷灵药，争得长生在月中？

暘谷先生下宴时，月光初冷紫琼枝。
凄清金石揭天地，事在世间人不知。

共爱初平住九霞，焚香不出闭金华。
白羊成队难收拾，吃尽溪头巨胜花。

酒尽香残夜欲分，青童拜问紫阳君。
月光悄悄笙歌远，马影龙声归五云。

海树灵风吹彩烟，丹陵朝客欲升天。
无央公子停鸾辔，笑泥娇妃索玉鞭。

八景风回五凤车，昆仑山上看桃花。
若教使者沽春酒，须觅余杭阿母家。

叔卿遍览九天春，不见人间故旧人。
怪得蓬莱山水下，半成沙土半成尘。

欲饮尊中云母浆，月明花里合笙簧。
更教小奈将龙去，便向金坛取阮郎。

海上桃花千树开，麻姑一去不知来。
辽东老鹤应慵惰，教探桑田便不回。

昨夜相邀宴杏坛，等闲乘醉走青鸾。
红云塞路东风紧，吹破芙蓉碧玉冠。

云鹤冥冥去不分，落花流水恨空存。
不知玉女无期信，道与留门却闭门。

采女平明受事回，暗交丹契锦囊开。
欲书密诏防人见，佯喝青虬使莫来。

太一元君昨夜过，碧云高髻绾婆娑。
手抬玉策红于火，敲断金鸾使唱歌。

碧瓦彤轩月殿开，九天花落瑞风来。
玉皇欲著红龙袂，亲唤金妃下手裁。

长房自贵解飞翻，五色云中独闭门。
看却桑田欲成海，不知还往几人存。

赤龙停步彩云飞，共道真王海上归。
千岁红桃香破鼻，玉盘盛出与金妃。

碧海灵童夜到时，徒劳相唤上琼池。
因循天子能闲事，纵与青龙不解骑。

且欲留君饮桂浆，九天无事莫推忙。
青龙举步行千里，休道蓬莱归路长。

侍女亲擎玉酒卮，满卮倾酒劝安期。
等闲相别三千岁，长忆水边分枣时。

万岁蛾眉不解愁，旋弹清瑟旋闲游。
忽闻下界笙箫曲，斜倚红鸾笑不休。

去住楼台一任风，十三天洞暗相通。
行厨侍女炊何物，满灶无烟玉炭红。

风动闲天清桂阴，水精帘箔冷沉沉。
西妃少女多春思，斜倚彤云尽日吟。

王母相留不放回，偶然沉醉卧瑶台。
凭君与向萧郎道，教著青龙取妾来。

绛节笙歌绕殿飞，紫皇欲到五云归。
细腰侍女瑶花外，争向红房报玉妃。

闻君新领八霞司，此别相逢是几时。
妾有一觥云母酒，请君终宴莫推辞。

方士飞轩驻碧霞，酒寒风冷月初斜。
不知谁唱归春曲，落尽溪头白葛花。

方朔朝来到我家，欲将灵树出丹霞。
三千年后知谁在，拟种红桃待放花。

水满桑田白日沈，冻云干霰湿重阴。
辽东归客闲相过，因话尧年雪更深。

朝回相引看红鸾，不觉风吹鹤氅偏。
好是兴来骑白鹤，文妃为伴上重天。

公子闲吟八景文，花南拜别上阳君。
金鞭遥指玉清路，龙影马嘶归五云。

一百年中是一春，不教日月辄移轮。
金鳌头上蓬莱殿，唯有人间炼骨人。

笑擎云液紫瑶觥，共请云和碧玉笙。
花下偶然吹一曲，人间因识董双成。

东皇长女没多年，从洗金芝到水边。
无事伴他棋一局，等闲输却卖花钱。

红草青林日半斜，闲乘小凤出彤霞。
略寻旧路过西国，因得冰园一尺瓜。

树下星沉月欲高，前溪水影湿龙毛。
洞天云冷玉花发，公子尽披双锦袍。

紫水风吹剑树寒，水边年少下红鸾。
未知百一穷阳数，略请先生止的看。

武皇含笑把金觥，更请霓裳一两声。
护帐宫人最年少，舞腰时挹绣裙轻。

琼树扶疏压瑞烟，玉皇朝客满花前。
东风小饮人皆醉，短尾青龙枕水眠。

彤阁钟鸣碧鹭飞，皇君催熨紫霞衣。
丹房玉女心慵甚，贪看投壶不肯归。

昆仑山上自鸡啼，羽客争升碧玉梯。
因驾五龙看较艺，白鸾功用不如妻。

沙野先生闭玉虚，焚香夜写紫微书。
供承童子闲无事，教判琼花喂白驴。

云陇琼花满地香，碧沙红水遍朱堂。
外人欲压长生籍，拜请飞琼报玉皇。

玉洞长春风景鲜，丈人私宴就芝田。
笙歌暂向花间尽，便是人间一万年。

青童传语便须回，报道麻姑玉蕊开。
沧海成尘等闲事，且乘龙鹤看花来。

绛树彤云户半开，守花童子怪人来。
青牛卧地吃琼草，知道先生朝未回。

石洞沙溪二十年，向明杭日夜朝天。
白矾烟尽水银冷，不觉小龙床下眠。

紫微深锁敞丹轩，太帝亲谈不死门。
从此百寮俱拜后，走龙鞭虎下昆仑。

云衫玉带好威仪，三洞真人入奏时。
频着金鞭打龙角，为嗔西去上天迟。

太子真娥相领行，当天合曲玉箫清。
梨花新折东风软，犹在缑山乐笑声。

洞里月明琼树风，画帘青室影朦胧。
香残酒冷玉妃睡，不觉七真归海中。

青苑红堂压瑞云，月明闲宴九阳君。
不知昨夜谁先醉，书破明霞八幅裙。

东溟两度作尘飞，一万年来会面稀。
千树梨花百壶酒，共君论饮莫论诗。

沧海令抛即未能，且缘鸾鹤立相仍。
蔡家新妇莫嫌少，领取真珠三五升。

溪影沉沙树影清，人家皆踏五音行。
可怜三十六天路，星月满空琼草青。

北斗西风吹白榆，穆公相笑夜投壶。
花前玉女来相问，赌得青龙许赎无。

九天王母皱蛾眉，惆怅无言倚桂枝。
悔不长留穆天子，任将妻妾住瑶池。

暂随鳧伯纵闲游，饮鹿因过翠水头。
宫殿寂寥人不见，碧花菱角满潭秋。

新授金书八素章，玉皇教妾主扶桑。
与君一别三千岁，却厌仙家日月长。

八海风凉水影高，上卿教制赤霜袍。
蛟丝玉线难裁割，须借玉妃金剪刀。

海上风来吹杏枝，昆仑山上看花时。
红龙锦襜黄金勒，不是元君不得骑。

绛阙夫人下北方，细环清佩响丁当。
攀花笑入春风里，偷折红桃寄阮郎。

卷 641_2 【又游仙诗一绝（见《唐诗纪事》）】

曹唐

靖节先生几代孙，青娥曾接玉郎魂。
春风流水还无赖，偷放桃花出洞门。

卷 641_3 【题武陵洞五首】

曹唐

此生终使此身闲，不是春时且要还。
寄语桃花与流水，莫辞相送到人间。

溪口回舟日已昏，却听鸡犬隔前村。
殷勤重与秦人别，莫使桃花闭洞门。

却恐重来路不通，殷勤回首谢春风。
白鸡黄犬不将去，且寄桃花深洞中。

桃花夹岸杳何之，花满春山水去迟。
三宿武陵溪上月，始知人世有秦时。

渡水傍山寻绝壁，白云飞处洞天开。
仙人来往无行迹，石径春风长绿苔。

卷 641_4 【句】

曹唐

斩蛟青海上，射虎黑山头。
箫声欲尽月色苦，依旧汉家宫树秋。

一曲哀歌茂陵道，汉家天子葬秋风。

谁知汉武无仙骨，满灶黄金成白烟。

第六百四十二卷

卷 642_1 【圣政纪颂】

来鹄

三皇不书，五帝不纪。有圣有神，风销日已。何教何师，
生来死止。无典无法，顽肩鼻比。三皇实作，五帝实治。
成天造地，不昏不圯。言得非排，文得圣齿。表表如见者，
莫若乎史。是知朴绳休结，正简斯若。君诰臣箴，
觚编毫络。前书后经，规善鉴恶。国之大章，如何寝略。
呜呼！贞观多吁，永徽多俞。廷日发论，殿日发谟。
牙孽不作，鸟鼠不除。论出不盖，谗行不紆。楹然史臣，
蛇然史裾。瞠瞠而视，透透而窺。翘笔当面，决防纳污。
不梏尔智，不息我愚。执言直注，史文直敷。
故得粲粲朝典，落落廷謨。圣牒既多，尧风不浅。
颂编坦轴，君出臣显。若俨见旒，若俯见冕。无闲殿旷廷，
无尸安素宴。三皇不亡，五帝不翦。太宗得之，史焉斯展。
暨乎后相图身，天子专问。我独以言，史不得近。
丘明见嫌，倚相在摈。秉笔如今，随班不进。班退史归，
惘然畴依。奏问莫睹，嘉谟固稀。取彼诰命，禄为国肥。
炯哉时皇，言必成章。德宣五帝，道舆三皇。如何翌臣，
嚙肉嗜_亡。觜距磨抉，楯衡拘长。控截僚位，占护阳光。

垣私藩已，远史廋唐。俾德音嘉访，默缩暗亡。咽典噤法，
盖圣笼昌。曷以致此，史文不张。后必非笑，将来否臧。
谓乎殿空宸逸，朝懵廷荒。不知奸蔽，文失汪洋。
有贞观业，有永徽纲。亦匿匪见，亦寝匪彰。赖有后臣，
斯言不佞。伊尹真心，太甲须圣。事既可书，史何不命。
乃具前欺，大陈不敬。曰逐史之喻，请以物并。
且十夫树杨，一夫欲竞。栽既未牢，摒岂能盛！帝业似栽，
逐史似摒。穆宗怆然，若疚若茜。昔何臣斯，隐我祖正。
不传亲问，不写密诤。孰示来朝，以光神政。
由是天呼震吸，征奔召急。史题笔来，叱廷而入。
端耳抗目，不搗不挹。獬豸侧头，螭虬摆湿。握管绝怡，
当殿而立。君也尽问，臣也倒诚。磊磊其事，鏦鏦其声。
大何不显，细何不明。语未绝绪，史已录成。谓之何书，
以政纪名。伊纪清芳，可昭典坟。古师官鸟，昔圣官云。
方之我后，录里书分。录有君法，书有君文。君法君文，
在圣政纪云。殿无闲时，廷无旷日。云谏波访，倦编刊笔。
君劬臣劳，上讨下述。惟勤惟明，在圣政纪出。至德何比，
至教焉如？孰窥孰测，外夷内储。谓君有道乎，臣有谏欤？
有道有谏，在圣政纪书。一体列秩，同力翼戴。祈福去邪，
绝防无碍。国章可披，唐文可爱。善咨不偷，嘉论不盖。
不偷不盖，在圣政纪载。谅夫！总斯不朽，可悬魏阙。
愚得是言，非讪非伐。实谓医臣浑沌，开君日月。
妖物雰死，天文光发。惟我之有颂兮，奚斯跃而董狐蹶。

卷 642_2 【宛陵送李明府罢任归江州】

来鹄

菊花村晚雁来天，共把离觞向水边。官满便寻垂钓侣，
家贫已用卖琴钱。浪生湓浦千层雪，云起炉峰一炷烟。
倘见吾乡旧知己，为言憔悴过年年。

卷 642_3 【清明日与友人游玉粒（一本无粒字）塘庄】

来鹄

几宿春山逐陆郎，清明时节好烟光。归穿细荇船头滑，
醉踏残花屐齿香。风急岭云飘迥野，雨余田水落方塘。
不堪吟罢东回首，满耳蛙声正夕阳。

卷 642_4 【寒食山馆书情】

来鹄

独把一杯山馆中，每经时节恨飘蓬。侵阶草色连朝雨，
满地梨花昨夜风。蜀魄啼来春寂寞，楚魂吟后月朦胧。
分明记得还家梦，徐孺宅前湖水东。

卷 642_5 【病起】

来鹄

春初一卧到秋深，不见红芳与绿阴。窗下展书难久读，
池边扶杖欲闲吟。藕穿平地生荷叶，笋过东家作竹林。
在舍浑如远乡客，诗僧酒伴镇相寻。

卷 642_6 【鄂渚除夜书怀】

来鹄

鹦鹉洲头夜泊船，此时形影共凄然。难归故国干戈后，
欲告何人雨雪天。箸拨冷灰书闷字，枕陪寒席带愁眠。
自嗟落魄无成事，明日春风又一年。

卷 642_7 【鄂渚清明日与乡友登头陀山】

来鹄

冷酒一杯相劝频，异乡相遇转相亲。落花风里数声笛，
芳草烟中无限人。都大此时深怅望，岂堪高处更逡巡。
思量费子真仙子，不作头陀山下尘。

卷 642_8 【蚕妇】

来鹄

晓夕采桑多苦辛，好花时节不闲身。
若教解爱繁华事，冻杀黄金屋里人。

卷 642_9 【题庐山双剑峰】

来鹄

倚天双剑古今闲，三尺高于四面山。
若使火云烧得动，始应农器满人间。

卷 642_10 【云】

来鹄

千形万象竟还空，映水藏山片复重。
无限旱苗枯欲尽，悠悠闲处作奇峰。

卷 642_11 【金钱花】

来鹄

也无棱郭也无神，露洗还同铸出新。
青帝若教花里用，牡丹应是得钱人。

卷 642_12 【晓鸡】

来鹄

黯黯严城罢鼓鼙，数声相续出寒栖。
不嫌惊破纱窗梦，却怕为妖半夜啼。

卷 642_13 【山中避难作】

来鹄

山头烽火水边营，鬼哭人悲夜夜声。
唯有碧天无一事，日还西下月还明。

卷 642_14 【早春】

来鹄

新历才将半纸开，小庭犹聚爆竿灰。
偏憎杨柳难钤辖，又惹东风意绪来。

卷 642_15 【鹭鸶】

来鹄

袅丝翘足傍澄澜，消尽年光伫思间。
若使见鱼无羨意，向人姿态更应闲。

卷 642_16 【子规】

来鹄

雨恨花愁同此冤，啼时闻处正春繁。
千声万血谁哀尔，争得如花笑不言。

卷 642_17 【新安官舍闲坐】

来鹄

寂寞空阶草乱生，簟凉风动若为情。
不知独坐闲多少，看得蜘蛛结网成。

卷 642_18 【除夜】

来鹄

事关休戚已成空，万里相思一夜中。
愁到晓鸡声绝后，又将憔悴见春风。

卷 642_19 【游鱼】

来鹄

弄萍隈苒思夷犹，掉尾扬鬐逐慢流。
应怕碧岩岩下水，浮藤如线月如钩。

卷 642_20 【鹦鹉】

来鹄

色白还应及雪衣，嘴红毛绿语仍奇。
年年锁在金笼里，何似陇山闲处飞。

卷 642_21 【偶题二首】

来鹄

近来灵鹊语何疏，独凭栏干恨有殊。
一夜绿荷霜剪破，赚他秋雨不成珠。

水边箕踞静书空，欲解愁肠酒不浓。
可惜青天好雷雹，只能驱趁懒蛟龙。

卷 642_22 【惜花】

来鹄

东风渐急夕阳斜，一树夭桃数日花。
为惜红芳今夜里，不知和月落谁家。

卷 642_23 【洞庭隐】

来鹄

高卧洞庭三十春，芰荷香里独垂纶。
莫嫌无事闲销日，有事始怜无事人。

卷 642_24 【古剑池】

来鹄

秋水莲花三四枝，我来慷慨步迟迟。
不决浮云斩邪佞，直成龙去欲何为。

卷 642_25 【梅花】

来鹄

枝枝倚槛照池冰，粉薄香残恨不胜。
占得早芳何所利，与他霜雪助威棱。

卷 642_26 【闻蝉】

来鹄

绿槐阴里一声新，雾薄风轻力未匀。
莫道闻时总惆怅，有愁人有不愁人。

卷 642_27 【卖花谣】

来鹄

紫艳红苞价不同，匝街罗列起香风。
无言无语呈颜色，知落谁家池馆中。

卷 642_28 【子规】

来鹄

月落空山闻数声，此时孤馆酒初醒。
投人语若似伊泪，口畔血流应始听。

卷 642_29 【句】

来鹄

回眸绿水波初起，合掌白莲花未开。

第六百四十三卷

卷 643_1 【菊】

李山甫

篱下霜前偶得存，忍教迟晚避兰荪。也销造化无多力，
未受阳和一点恩。栽处不容依玉砌，要时还许上金尊。
陶潜殁后谁知己，露滴幽丛见泪痕。

卷 643_2 【风】

李山甫

喜怒寒暄直不匀，终无形状始无因。能将尘土平欺客，
爱把波澜枉陷人。飘乐递香随日在，绽花开柳逐年新。
深知造化由君力，试为吹嘘借与春。

卷 643_3 【月】

李山甫

狡兔顽蟾死复生，度云经汉澹还明。夜长虽耐对君坐，

年少不禁随尔行。玉桂影摇乌鹊动，金波寒注鬼神惊。
人间半被虚抛掷，唯向孤吟客有情。

卷 643_4 【秋】

李山甫

傍雨依风冷渐匀，更凭青女事精神。来时将得几多雁，
到处愁他无限人。能被绿杨深懊恼，谩俚黄菊送殷勤。
邹家不用偏吹律，到底荣枯也自均。

卷 643_5 【松】

李山甫

地耸苍龙势抱云，天教青共众材分。孤标百尺雪中见，
长啸一声风里闻。桃李傍他真是佞，藤萝攀尔亦非群。
平生相爱应相识，谁道修篁胜此君。

卷 643_6 【读汉史】

李山甫

四百年间反覆寻，汉家兴替好沾襟。每逢奸诈须援手，

真遇英雄始醒心。王莽弄来曾半破，曹公将去便平沈。
当时虚受君恩者，谩向青编作鬼林。

卷 643_7 【上元怀古二首】

李山甫

南朝天子爱风流，尽守江山不到头。总是战争收拾得，
却因歌舞破除休。尧行道德终无敌，秦把金汤可自由。
试问繁华何处有，雨苔烟草古城秋。

争帝图王德尽衰，骤兴驰霸亦何为。君臣都是一场笑，
家国共成千载悲。排岸远檣森似槊，落波残照赫如旗。
今朝城上难回首，不见楼船索战时。

卷 643_8 【隋堤柳】

李山甫

曾傍龙舟拂翠华，至今凝恨倚天涯。但经春色还秋色，
不觉杨家是李家。背日古阴从北朽，逐波疏影向南斜。
年年只有晴风便，遥为雷塘送雪花。

卷 643_9 【蒲关西道中作】

李山甫

国东王气凝蒲关，楼台帖出晴空间。紫烟横捧大舜庙，
黄河直打中条山。地锁咽喉千古壮，风传歌吹万家闲。
来来去去身依旧，未及潘年鬓已斑。

卷 643_10 【送李秀才入军】

李山甫

弱柳贞松一地栽，不因霜霰自难媒。书生只是平时物，
男子争无乱世才。铁马已随红旆去，同人犹著白衣来。
到头功业须如此，莫为初心首重回。

卷 643_11 【送蕲州裴员外】

李山甫

正作南宫第一人，暂随霓旆怆离群。晓从阙下辞天子，
春向江头待使君。五马尚迷青琐路，双鱼犹惹翠兰芬。
明朝无路寻归处，禁树参差隔紫云。

卷 643_12 【代孔明哭先主】

李山甫

忆昔南阳顾草庐，便乘雷电捧乘舆。酌量诸夏须平取，
期刻群雄待遍锄。南面未能成帝业，西陵那忍送宫车。
九疑山下频惆怅，曾许微臣水共鱼。

卷 643_13 【送职方王郎中吏部刘员外自太原郑相公幕继奉征书归省署】

李山甫

双凤衔书次第飞，玉皇催促列仙归。云开日月临青琐，
风卷烟霞上紫微。莲影一时空俭府，兰香同处扑尧衣。
此生长扫朱门者，每向人间梦粉闱。

卷 643_14 【寒食二首】

李山甫

柳带东风一向斜，春阴澹澹蔽人家。有时三点两点雨，
到处十枝五枝花。万井楼台疑绣画，九原珠翠似烟霞。
年年今日谁相问，独卧长安泣岁华。

风烟放荡花披猖，秋千女儿飞短墙。绣袍驰马拾遗翠，
锦袖斗鸡喧广场。天地气和融霁色，池台日暖烧春光。
自怜尘土无他事，空脱荷衣泥醉乡。

卷 643_15 【又代孔明哭先主】

李山甫

鲸鬣翻腾四海波，始将天意用干戈。尽驱神鬼随鞭策，
全罩英雄入网罗。提剑尚残吴郡国，垂衣犹欠魏山河。
鼎湖无路追仙驾，空使群臣泣血多。

卷 643_16 【贫女】

李山甫

平生不识绣衣裳，闲把荆钗亦自伤。镜里只应谙素貌，
人间多自信红妆。当年未嫁还忧老，终日求媒即道狂。
两意定知无说处，暗垂珠泪湿蚕筐。

卷 643_17 【寓怀】

李山甫

万古交驰一片尘，思量名利孰如身。长疑好事皆虚事，

却恐闲人是贵人。老逐少来终不放，辱随荣后直须匀。
劝君不用夸头角，梦里输赢总未真。

卷 643_18 【蜀中寓怀】

李山甫

千里烟霞锦水头，五丁开得也风流。春装宝阙重重树，
日照仙州万万楼。蛙似公孙虽不守，龙如诸葛亦须休。
此中无限英雄鬼，应对江山各自羞。

卷 643_19 【下第卧疾卢员外召游曲江】

李山甫

眼前何事不伤神，忍向江头更弄春。桂树既能欺贱子，
杏花争肯采闲人。麻衣未掉浑身雪，皂盖难遮满面尘。
珍重列星相借问，嵇康慵病也天真。

卷 643_20 【司天台】

李山甫

拂云朱槛捧昭回，静对铜浑水镜开。太史只知频奏瑞，

苍生无计可防灾。景公进德星曾退，汉帝推诚日为回。
何事旷官全不语，好天良月锁高台。

卷 643_21 【落花】

李山甫

落拓东风不藉春，吹开吹谢两何因。当时曾见笑筵主，
今日自为行路尘。颜色却还天上女，馨香留与世间人。
明年寒食重相见，零泪无端又满巾。

卷 643_22 【赴举别所知】

李山甫

腰剑囊书出户迟，壮心奇命两相疑。麻衣尽举一双手，
桂树只生三两枝。黄祖不怜鹦鹉客，志公偏赏麒麟儿。
叔牙忧我应相痛，回首天涯寄所思。

卷 643_23 【贺邢州卢员外】

李山甫

紫泥飞诏下金銮，列象分明世仰观。北省谏书藏旧草，

南宫郎署握新兰。春归凤沼恩波暖，晓入鸳行瑞气寒。
偏是此生栖息者，满衣零泪一时干。

卷 643_24 【方干隐居】

李山甫

咬咬嘎嘎水禽声，露洗松阴满院清。溪畔印沙多鹤迹，
槛前题竹有僧名。问人远岫千重意，对客闲云一片情。
早晚尘埃得休去，且将书剑事先生。

卷 643_25 【早春微雨】

李山甫

怪来莺蝶似凝愁，不觉看花暂湿头。疏影未藏千里树，
远阴微翳万家楼。青罗舞袖纷纷转，红脸啼珠旋旋收。
岁旱且须教济物，为霖何事爱风流。

卷 643_26 【谒翰林刘学士不遇】

李山甫

梦绕清华宴地深，洞宫横锁晓沈沈。鹏飞碧海终难见，

鹤入青霄岂易寻。六尺羈魂迷定止，两行愁血谢知音。
平生只耻凌风翼，随得鸣珂上禁林。

卷 643_27 【答刘书记见赠】

李山甫

吟近秋光思不穷，酷探骚雅愧无功。茫然心苦千篇拙，
瞑坐神凝万象空。月上开襟当北户，竹边回首揖西风。
知音频有新诗赠，白雪纷纷落郢中。

卷 643_28 【贺友人及第】

李山甫

得水蛟龙失水鱼，此心相对两何如。敢辞今日须行卷，
犹喜他年待荐书。松桂也应情未改，萍蓬争奈迹还疏。
春风不见寻花伴，遥向青云泥子虚。

卷 643_29 【雨后过华岳庙】

李山甫

华山黑影霄崔嵬，金天□□门未开。雨淋鬼火灭不灭，

风送神香来不来。墙外素钱飘似雪，殿前阴柏吼如雷。
知君暗宰人间事，休把苍生梦里裁。

卷 643_30 【赠弹琴李处士】

李山甫

情知此事少知音，自是先生枉用心。世上几时曾好古，
人前何必更沾襟。致身不似笙竽巧，悦耳宁如郑卫淫。
三尺焦桐七条线，子期师旷两沈沈。

卷 643_31 【刘员外寄移菊】

李山甫

秋来缘树复缘墙，怕共平芜一例荒。颜色不能随地变，
风流唯解逐人香。烟含细叶交加碧，露拆寒英次第黄。
深谢栽培与知赏，但惭终岁待重阳。

卷 643_32 【南山】

李山甫

钝碧顽青几万秋，直无天地始应休。莫嫌尘土佯遮面，

能向楼台强出头。霁色陡添千尺翠，夕阳闲放一堆愁。
假饶不是神仙骨，终抱琴书向此游。

卷 643_33 【山中览刘书记新诗】

李山甫

记室新诗相寄我，蔼然清绝更无过。溪风满袖吹骚雅，
岩瀑无时滴薜萝。云外山高寒色重，雪中松苦夜声多。
静酬嘉唱对幽景，苍鹤羸栖古木柯。

卷 643_34 【早秋山中作】

李山甫

荣枯无路入千峰，肥遁谁谐此志同。司寇亦曾遭鲁黜，
步兵何事哭途穷。桧松瘦健滴秋露，户牖虚明生晚风。
山思更清人影绝，陇云飞入草堂中。

卷 643_35 【赋得寒月寄齐已】

李山甫

松下清风吹我襟，上方钟磬夜沈沈。已知庐岳尘埃绝，

更忆寒山雪月深。高谢万缘消祖意，朗吟千首亦师心。
岂知名出遍诸夏，石上栖禅竹影侵。

卷 643_36 【曲江二首】

李山甫

南山低对紫云楼，翠影红阴瑞气浮。一种是春长富贵，
大都为水也风流。争攀柳带千千手，间插花枝万万头。
独向江边最惆怅，满衣尘土避王侯。

江色沈天万草齐，暖烟晴霭自相迷。蜂怜杏蕊细香落，
莺坠柳条浓翠低。千队国娥轻似雪，一群公子醉如泥。
斜阳怪得长安动，陌上分飞万马蹄。

卷 643_37 【迁居清溪和刘书记见示】

李山甫

担锡归来竹绕溪，过津曾笑鲁儒迷。端居味道尘劳息，
扣寂眠云心境齐。还似村家无宠禄，时将邻叟话幽栖。
山衣毳烂唯添野，石井源清不贮泥。祖意岂从年腊得，
松枝肯为雪霜低。晚天吟望秋光重，雨阵横空蔽断霓。

卷 643_38 【阴地关崇徽公主手迹】

李山甫

一拓纤痕更不收，翠微苍藓几经秋。谁陈帝子和番策，
我是男儿为国羞。寒雨洗来香已尽，澹烟笼著恨长留。
可怜汾水知人意，旁与吞声未忍休。

卷 643_39 【题李员外厅】

李山甫

石砌蛩吟响，草堂人语稀。道孤思绝唱，年长渐知非。
名利终成患，烟霞亦可依。高丘松盖古，闲地药苗肥。
猿鸟啼嘉景，牛羊傍晚晖。幽栖还自得，清啸坐忘机。
爱彼人深处，白云相伴归。

卷 643_40 【山中寄梁判官】

李山甫

归卧东林计偶谐，柴门深向翠微开。更无尘事心头起，
还有诗情象外来。康乐公应频结社，寒山子亦患多才。
星郎雅是道中侣，六艺拘牵在隗台。

卷 643_41 【禅林寺作寄刘书记】

李山甫

坐近松风骨自寒，茅斋直拶白雪边。玄关不闭何人到，
此事谁论在佛先。天竺老师留一句，曹溪行者答全篇。
今朝林下忘言说，强把新诗寄谪仙。

卷 643_42 【山中病后作】

李山甫

卧病厌厌三伏尽，商飙初自水边来。高峰枯槁骨偏峭，
野树扶疏叶未摧。时序追牵从鬓改，蝉声酸急是谁催。
云门不闭全无事，心外沈然一聚灰。

卷 643_43 【寄卫别驾】

李山甫

晓屐归来岳寺深，尝思道侣会东林。昏沈天竺看经眼，
萧索净名老病心。云盖数重横陇首，苔花千点遍松阴。
知君超达悟空旨，三径闲行抱素琴。

卷 643_44 【遣怀】

李山甫

长松埋涧底，郁郁未出原。孤云飞陇首，高洁不可攀。
古道贵拙直，时事不足言。莫饮盗泉水，无为天下先。
智者与愚者，尽归北邙山。唯有东流水，年光不暂闲。

卷 643_45 【酬刘书记一二知己见寄】

李山甫

见说金台客，相逢只论诗。坐来残暑退，吟许野僧知。
自喜幽栖僻，唯惭道义亏。身闲偏好古，句冷不求奇。
晦迹全无累，安贫自得宜。同人终念我，莲社有归期。

卷 643_46 【山中依韵答刘书记见赠】

李山甫

幽居少人事，三径草不开。隐几虚室静，闲云入坐来。
至道非内外，讷言才不才。宝月当秋空，高洁无纤埃。
心灭百虑减，诗成万象回。亦有吾庐在，寂寞旧山隈。
从容未归去，满地生青苔。谢公寄我诗，清奇不可陪。

白雪飞不尽，碧云欲成堆。惊风出地户，飐飐似震雷。
吟哦山岳动，令人心胆摧。思君览章句，还复如望梅。
慷慨追古意，旷望登高台。何当陶渊明，远师劝倾杯。
流年将老来，华发自相催。野寺连屏障，左右相裴回。

卷 643_47 【山中答刘书记寓怀】

李山甫

贵门多冠冕，日与荣辱并。山中有独夫，笑傲出衰盛。
正直任天真，鬼神亦相敬。之子贲丘园，户牖松萝映。
骨将槁木齐，心同止水净。笔头指金波，座上横玉柄。
芙蓉出秋渚，绣段流清咏。高古不称时，沈默岂相竞。
穷搜万籁息，危坐千峰静。林僧继嘉唱，风前亦为幸。

卷 643_48 【项羽庙】

李山甫

为虏为王尽偶然，有何羞见汉江船。
停分天下犹嫌少，可要行人赠纸钱。

卷 643_49 【春日商山道中作】

李山甫

一径春光里，扬鞭入翠微。风来花落帽，云过雨沾衣。
谷鸟衔枝去，巴人负笈归。残阳更惆怅，前路客亭稀。

卷 643_50 【古石砚】

李山甫

追琢他山石，方圆一勺深。抱真唯守墨，求用每虚心。
波浪因文起，尘埃为废侵。凭君更研究，何啻直千金。

卷 643_51 【惜花】

李山甫

未会春风意，开君又落君。一年今烂漫，几日便缤纷。
别艳那堪赏，余香不忍闻。尊前恨无语，应解作朝云。

卷 643_52 【别杨秀才】

李山甫

因乱与君别，相逢悲且惊。开襟魂自慰，拭泪眼空明。
故国已无业，旧交多不生。如何又分袂，难话别离情。

卷 643_53 【自叹拙】

李山甫

自怜心计拙，欲语更悲辛。世乱僮欺主，年衰鬼弄人。
镜中颜欲老，江上业长贫。不是刘公乐，何由变此身。

卷 643_54 【乱后途中】

李山甫

乱离寻故园，朝市不如村。恸哭翻无泪，颠狂觉少魂。
诸侯贪割据，群盗恣并吞。为问登坛者，何年答汉恩。

卷 643_55 【燕】

李山甫

每岁同辛苦，看人似有情。乱飞春得意，幽语夜闻声。
整羽庄姜恨，回身汉后轻。豪家足金弹，不用污雕楹。

卷 643_56 【题慈云寺僧院】

李山甫

帝城深处寺，楼殿压秋江。红叶去寒树，碧峰来晓窗。
烟霞生净土，苔藓上高幢。欲问吾师语，心猿不肯降。

卷 643_57 【闻子规】

李山甫

冤禽名杜宇，此事更难知。昔帝一时恨，后人千古悲。
断肠思故国，啼血溅芳枝。况是天涯客，那堪□□眉。

卷 643_58 【送刘将军入关讨贼】

李山甫

世人多恃武，何者是真雄。欲灭黄巾贼，须凭黑槊公。
指星忧国计，望气识天风。明日凌云上，期君第一功。

卷 643_59 【陪郑先辈华山罗谷访张隐者】

李山甫

白云闲洞口，飞盖入岚光。好鸟共人语，异花迎客香。
谷风闻鼓吹，苔石见文章。不是陪仙侣，无因访阮郎。

卷 643_60 【兵后寻边三首】

李山甫

千里烟沙尽日昏，战余烧罢闭重门。新成剑戟皆农器，
旧著衣裳尽血痕。卷地朔风吹白骨，柱天青气泣幽魂。
自怜长策无人问，羞戴儒冠傍塞垣。

旗头指处见黄埃，万马横驰鹞翅回。剑戟远腥凝血在，
山河先暗阵云来。角声恶杀悲于哭，鼓势争强怒若雷。

日暮却登寒垒望，饱鸱清啸伏尸堆。

风怒边沙迸铁衣，胡儿胡马正骄肥。将军对阵谁教入，
战士辞营不道归。新血溅红黏蔓草，旧骸堆白映寒晖。
胸中纵有销兵术，欲向何门说是非？

卷 643_61 【沧浪峡】

李山甫

走毂飞蹄过此傍，几人留意问沧浪。
烟波莫笑趋名客，为爱朝宗日夜忙。

卷 643_62 【公子家二首】

李山甫

曾是皇家几世侯，入云高第照神州。柳遮门户横金锁，
花拥弦歌咽画楼。锦袖妒姬争巧笑，玉衔骄马索闲游。
麻衣酷献平生业，醉倚春风不点头。

柳底花阴压露尘，醉烟轻罩一团春。鸳鸯占水能嗔客，
鹦鹉嫌笼解骂人。骖褭似龙随日换，轻盈如燕逐年新。
不知买尽长安笑，活得苍生几户贫？

卷 643_63 【山下残夏偶作】

李山甫

等闲三伏后，独卧此高丘。残暑炎于火，林风爽带秋。
声名何要出，吟咏亦堪休。自许红尘外，云溪好漱流。

卷 643_64 【夜吟】

李山甫

除却闲吟外，人间事事慵。更深成一句，月冷上孤峰。
穷理多瞑目，含毫静倚松。终篇浑不寐，危坐到晨钟。

卷 643_65 【代崇徽公主意】

李山甫

金钗坠地鬓堆云，自别朝阳帝岂闻。
遣妾一身安社稷，不知何处用将军？

卷 643_66 【下第献所知三首】

李山甫

偶向江头别钓矶，等闲经岁与心违。虚教六尺受辛苦，
枉把一身忧是非。青桂本来无欠负，碧霄何处有因依。
春风不用相催促，回避花时也解归。

不识人间巧路岐，只将端拙泥神祇。与他名利本无分，
却共水云曾有期。大抵物情应莫料，近来天意也须疑。
自怜心计今如此，凭仗春醪为解颐。

十年磨剑事锋铓，始逐朱旗入战场。四海风云难际会，
一生肝胆易开张。退飞莺谷春零落，倒卓龙门路渺茫。
今日惭知也惭命，笑余歌罢忽凄凉。

卷 643_67 【寄太常王少卿】

李山甫

别后西风起，新蝉坐卧闻。秋天静如水，远岫碧侵云。
雅饮纯和气，清吟冰雪文。想思重回首，梧叶下纷纷。

卷 643_68 【游侠儿】

李山甫

好把雄姿浑世尘，一场闲事莫因循。
荆轲只为闲言语，不与燕丹了得人。

卷 643_69 【下第出春明门】

李山甫

曾和秋雨驱愁入，却向春风领恨回。
深谢灞陵堤畔柳，与人头上拂尘埃。

卷 643_70 【望思台】

李山甫

君父昏蒙死不回，谩将平地筑高台。
九层黄土是何物，销得向前冤恨来。

卷 643_71 【病中答刘书记见赠】

李山甫

病来双树下，云脚上禅袍。频有琼瑶赠，空瞻雪月高。
已知捐俗态，时许话风骚。衰疾未能起，相思徒自劳。

卷 643_72 【早秋山中作】

李山甫

谁到山中语，雨余风气秋。烟岚出涧底，瀑布落床头。
至道亦非远，僻诗须苦求。千峰有嘉景，拄杖独巡游。

卷 643_73 【别墅】

李山甫

此地可求息，开门足野情。窗明雨初歇，日落风更清。
苍藓榭根匝，碧烟水面生。玩奇心自乐，暑月听蝉声。

卷 643_74 【柳十首】

李山甫

灞岸江头腊雪消，东风偷软入纤条。
春来不忍登楼望，万架金丝著地娇。

受尽风霜得到春，一条条是逐年新。
寻常送别无余事，争忍攀将过与人。

长恨阳和也世情，把香和艳与红英。
家家只是栽桃李，独自无根到处生。

只为遮楼又拂桥，被人摧折好枝条。
假饶张绪如今在，须把风流暗里销。

弱带低垂可自由，傍他门户倚他楼。
金风不解相抬举，露压烟欺直到秋。

终日堂前学画眉，几人曾道胜花枝。
试看三月春残后，门外青阴是阿谁。

也曾飞絮谢家庭，从此风流别有名。
不是向人无用处，一枝愁杀别离情。

从来只是爱花人，杨柳何曾占得春。

多向客亭门外立，与他迎送往来尘。

强扶柔态酒难醒，殢著春风别有情。
公子王孙且相伴，与君俱得几时荣。

无赖秋风斗觉寒，万条烟草一时干。
游人若要春消息，直向江头腊后看。

卷 643_75 【酬刘书记见赠】

李山甫

独在西峰末，怜君和气多。劳生同朽索，急景似倾波。
禅者行担锡，樵师语隔坡。旱□生赤藓，古木架青萝。
石涧新蝉脱，茅檐旧燕窠。篇章蒙见许，松月好相过。
思苦通真理，吟清合大和。□□□□□，风起送渔歌。

卷 643_76 【赠徐三十（一本题缺，一本作酬刘书记见赠二首）】

李山甫

春满南宫白日长，夜来新值锦衣郎。朱排六相助神耸，
玉衬一厅侵骨凉。砌竹拂袍争草色，庭花飘艳妒兰香。
从今不羨乘槎客，曾到三星列宿傍。

卷 643_77 【牡丹】

李山甫

邀勒春风不早开，众芳飘后上楼台。数苞仙艳火中出，
一片异香天上来。晓露精神妖欲动，暮烟情态恨成堆。
知君也解相轻薄，斜倚阑干首重回。

卷 643_78 【赠宿将】

李山甫

校猎燕山经几春，雕弓白羽不离身。
年来马上浑无力，望见飞鸿指似人。

第六百四十四卷

卷 644_1 【水仙操】

李咸用

大波相拍流水鸣，蓬山鸟兽多奇形。琴心不喜亦不惊，
安弦缓爪何泠泠？水仙缥缈来相迎，伯牙从此留嘉名。
峯阳散木虚且轻，重华斧下知其声。麋丝相纠成凄清，
调和引得薰风生。指底先王长养情，曲终天下称太平。
后人好事传其曲，有时声足意不足。始峨峨兮复洋洋，
但见山青兼水绿。成连入海移人情，岂是本来无嗜欲！
琴兮琴兮在自然，不在徽金将轸玉。

卷 644_2 【鸡鸣曲】

李咸用

海树相扶乌影翘，戴红拍翠声胶胶。鸳瓦冻危金距趯，
夸雄斗气争相高。漏残雨急风萧萧，患乱忠臣欺宝刀。
霜浓月薄星昭昭，太平才子能歌谣。山翁梦断出衡茅，
谷口雾中饥虎号，离人枕上心忉忉。

卷 644_3 【西门行】

李咸用

劳禽不择枝，饥虎不畏槛。君子当固穷，无为仲由滥。
尔奋空拳彼击剑，水纵长澜火飞焰。汉高偶试神蛇验，
武王龟筮惊人险。四龙或跃犹依泉，小狐勿恃冲波胆。

卷 644_4 【轻薄怨】

李咸用

花骢躞蹀游龙骄，连连宝节挥长鞘。凤雏麟子皆至交，
春风相逐垂杨桥。捻笙软玉开素苞，画楼闪闪红裾摇。
碧蹄偃蹇连金镳，狂情十里飞相烧。西母青禽轻飘飘，
分环破壁来往劳。黄金千镒新一宵，少年心事风中毛。
明朝何处逢娇饶，门前桃树空夭夭。

卷 644_5 【长歌行】

李咸用

要衣须破束，欲炙须解牛。当年不快意，徒为他人留。
百岁之约何悠悠，华发星星稀满头。峨眉螭首聊我仇，

圆红阙白令人愁。何不夕引清奏，朝登翠楼，逢花便折，
闻胜即游？鼓腕腾棍晴雷收，舞腰困褰垂杨柔。
象箸击折歌勿休，玉山未到非风流。眼前有物俱是梦，
莫将身作黄金仇。死生同域不用惧，富贵在天何足忧！

卷 644_6 【巫山高】

李咸用

通蜀连秦山十二，中有妖灵会人意。斗艳传情世不知，
楚王魂梦春风里。雨态云容多似是，色荒见物皆成媚。
露泫烟愁岩上花，至今犹滴相思泪。西眉南脸入中美，
或者皆闻无所利。忍听凭虚巧佞言，不求万寿翻求死。

卷 644_7 【公无渡河】

李咸用

有叟有叟何清狂，行搔短发提壶浆。乱流直涉神洋洋，
妻止不听追沈湘。偕老不偕死，箜篌遗凄凉。
剡松轻稳琅玕长，连呼急榜庸何妨。见溺不援能语狼，
忍听丽玉传悲伤。

卷 644_8 【春雨】

李咸用

大帝闲吹破冻风，青云融液流长空。天人醉引玄酒注，
倾香旋入花根土。湿尘轻舞唐唐春，神娥无迹莓苔新。
老农私与牧童论，纷纷便是仓箱本。

卷 644_9 【石版歌】

李咸用

云根劈裂雷斧痕，龙泉切璞青皮皴。直方挺质贞且真，
当庭卓立凝顽神。春雨流膏成立文，主人性静看长新。
明月夜来回短影，何如照冷太湖滨。

卷 644_10 【春宫词】

李咸用

风和气淑宫殿春，感阳体解思君恩。眼光滴滴心振振，
重瞳不转忧生民。女当为妾男当臣，男力百岁在，
女色片时新。用不用，唯一人。敢放天宠私微身，
六宫万国教谁宾？

卷 644_11 【富贵曲】

李咸用

画藻雕山金碧彩，鸳鸯叠翠眠晴霭。编珠影里醉春庭，
团红片下攒歌黛。革咽丝烦欢不改，缴绂垂缁忽如晦。
活花起舞夜春来，蜡焰煌煌天日在。雪暖瑶杯凤髓融，
红拖象箸猩唇细。空中汉转星移盖，火城拥出随朝会。
车如雷兮马如龙，鬼神辟易不敢害。冠峨剑重锵环珮，
步入天门相真宰。开口长为爵禄筌，回眸便是公卿罪。
珍珠索得龙宫贫，膏腴刮下苍生背。九野干戈指著心，
威福满拳犹未快。我闻周公贵为天子弟，富有半四海，
蔑有骄奢贻后悔。红锦障收，珊瑚树碎，至今笑石崇王恺。

卷 644_12 【独鹄吟】

李咸用

碧玉喙长丹顶圆，亭亭危立风松间。啄萍吞鳞意已阑，
举头咫尺轻重天。黑翎白本排云烟，离群脱侣孤如仙。
披霜唳月惊婵娟，逍遥忘却还青田。鸢寒鸦晚空相喧，
时时侧耳清冷泉。

卷 644_13 【煌煌京洛行】

李咸用

长安近甸巡游遍，洛阳寻有黄龙见。千乘万骑如雷转，
差差清跸祥云卷。百司旧分当玉殿，太平官属无遗彦。
歌钟沸激香尘散，晨旗隐隐罗轩冕。周公旧迹生红藓，
漣涧波光春照晚。但听嵩山万岁声，将军旗鼓何时偃。

卷 644_14 【升天行】

李咸用

堂堂削玉青蝇喧，寒鸦啄鼠愁飞鸾。梳玄洗白逡巡间，
兰言花笑俄衰残。盘金束紫身属官，强仁小德终无端。
不如服取长流丹，潜神却入黄庭闲。志定功成飞九关，
逍遥长揖辞人寰。空中龙驾时回旋，左云右鹤翔翩联。
双童树节当风翻，常娥倚桂开朱颜。河边牛子星郎牵，
三清宫殿浮晴烟。玉皇据案方凝然，仙官立仗森幢幡。
引余再拜归仙班，清声妙色视听安。餐和饮顺中肠宽，
虚无之乐不可言。

卷 644_15 【绯桃花歌】

李咸用

上帝春宫思丽绝，夭桃变态求新悦。便是花中倾国容，
牡丹露泣长门月。野树滴残龙战血，曦车碾下朝霞屑。
惆怅东风未解狂，争教此物芳菲歇。

卷 644_16 【短歌行】

李咸用

一樽绿酒绿于染，拍手高歌天地险。上得青云下不难，
下在黄埃上须渐。少年欢乐须及时，莫学懦夫长泣岐。
白日欲沈犹未沈，片月已来天半垂。坎鼓铿钟杀愁贼，
接碎是非佯不识。长短高卑不可求，莫叹人生头雪色。

卷 644_17 【小松歌】

李咸用

幽人不喜凡草生，秋锄劬得寒青青。庭闲土瘦根脚狞，
风摇雨拂精神醒。短影月斜不满尺，清声细入鸣蛩翼。
天人戏剪苍龙髯，参差簇在瑶阶侧。金精水鬼欺不得，

长与东皇逞颜色。劲节暂因君子移，贞心不为麻中直。

卷 644_18 【大雪歌】

李咸用

同云惨惨如天怒，寒龙振鬣飞乾雨。玉圃花飘朵不匀，
银河风急惊砂度。谢客凭轩吟未住，望中顿失纵横路。
应是羲和倦晓昏，暂反元元归太素。归太素，
不知归得人心否？

卷 644_19 【塘上行】

李咸用

横塘日澹秋云隔，浪织轻飏罗幂幂。红绡撒水荡舟人，
画桡掺掺柔荑白。鲤鱼虚掷无消息，花老莲疏愁未摘。
却把金钗打绿荷，懊恼露珠穿不得。

卷 644_20 【寓意】

李咸用

直道荆棘生，斜径红尘起。苍苍杳无言，麒麟回瑞趾。

东风如未来，飞雪终不已。不知姜子牙，何处钓流水。

卷 644_21 【剑喻】

李咸用

黯黯秋水寒，至刚非可缺。风胡不出来，摄履人相蔑。
纵挺倚天形，谁是躬提挈。愿将百炼身，助我王臣节。

卷 644_22 【苍颉台】

李咸用

先贤忧民诈，观迹成纲纪。自有书契来，争及结绳理。

卷 644_23 【荆山】

李咸用

良工指君疑，真玉却非玉。寄言怀宝人，不须伤手足。

卷 644_24 【自君之出矣】

李咸用

自君之出矣，鸾镜空尘生。思君如明月，明月逐君行。

卷 644_25 【妾薄命】

李咸用

妾命何太薄，不及宫中水。时时对天颜，声声入君耳。

卷 644_26 【君子行】

李咸用

君子慎所履，小人多所疑。尼甫至圣贤，犹为匡所縻。

卷 644_27 【铜雀台】

李咸用

但见西陵惨明月，女妓无因更相悦。

有虞曾不有遗言，滴尽湘妃眼中血。

卷 644_28 【健馿怨】

李咸用

莫恃芙蓉开满面，更有身轻似飞燕。
不得团圆长近君，珪月鉞时泣秋扇。

卷 644_29 【悲哉行】

李咸用

云色阴沈弄秋气，危叶高枝恨深翠。
用却春风力几多，微霜逼迫何容易。

卷 644_30 【携手曲】

李咸用

携手春复春，未尝渐离别。天天风前花，纤纤日中雪。
不敢怨于天，唯惊添岁月。不敢怨于君，只怕芳菲歇。
芳菲若长然，君恩应不绝。

卷 644_31 【空城雀】

李咸用

啾啾空城雀，一啄数跳跃。宁寻覆辙余，岂比巢危幕。
茫茫九万鹏，百雉且为乐。

卷 644_32 【放歌行】

李咸用

蠢蠢荼蓼虫，薨薨避葵荠。悠悠狷者心，寂寂厌清世。
如何不食甘，命合苦其噬。如何不趣时，分合辱其体。
至哉先哲言，于物不凝滞。

卷 644_33 【猛虎行】

李咸用

猛虎不怯敌，烈士无虚言。怯敌辱其班，虚言负其恩。
爪牙欺白刃，果敢无前阵。须知易水歌，至死无悔吝。

卷 644_34 【陇头行（一作吟）】

李咸用

行人何彷徨，陇头水呜咽。寒沙战鬼愁，白骨风霜切。
薄日朦胧秋，怨气阴云结。杀成边将名，名著生灵灭。

卷 644_35 【关山月】

李咸用

离离天际云，皎皎关山月。羌笛一声来，白尽征人发。
嘹唳孤鸿高，萧索悲风发。雪压塞尘清，雕落沙场阔。
何当胡无人，荷戈朝凤阙。

卷 644_36 【览友生古风】

李咸用

伯牙鸣玉琴，幽音随指发。不是钟期听，俗耳安能别。
高山闲巍峨，流水声呜咽。一卷冰雪言，清泠冷心骨。
分明古雅声，讽谕成凄切。皴磝老松根，晃朗骊龙窟。
荆璞且深藏，珉石方如雪。金多丑女妍，木朽良工拙。
奸宄欺雷霆，魑魅嫌日月。蝶迷桃李香，鲋惴江湖阔。

不寐孤灯前，舒卷忘饥渴。

卷 644_37 【题友生丛竹】

李咸用

菊华寒露浓，兰愁晓霜重。指佞不长生，蒲葦今无种。
安如植丛篁，他年待栖凤。大则化龙骑，小可钓璜用。
留烟伴独醒，回阴冷闲梦。何妨积雪凌，但为清风动。
乃知子猷心，不与常人共。

卷 644_38 【石版】

李咸用

高人好自然，移得它山碧。不磨如版平，大巧非因力。
古藓小青钱，尘中看野色。冷倚砌花春，静伴疏篁直。
山僧若转头，如逢旧相识。

卷 644_39 【江南曲】

李咸用

江南四月薰风低，江南女儿芳步齐。晚云接水共渺瀰，

远沙叠草空萋萋。白芷不堪论古意，数花犹可醉前溪。
孤舟有客归未得，乡梦欲成山鸟啼。

卷 644_40 【临川逢陈百年】

李咸用

麻姑山下逢真士，玄肤碧眼方瞳子。自言混沌凿不死，
大笑老彭非久视。强争龙虎是狂人，不保元和虚叩齿。
桃花雨过春光腻，劝我一杯灵液味。教我无为礼乐拘，
利路名场多忌讳。不如含德反婴儿，金玉满堂真可贵。

卷 644_41 【寄修睦上人】

李咸用

衣服田方无内客，一入庐云断消息。应为山中胜概偏，
惠持惠远多踪迹。寻阳有个虚舟子，相忆由来无一事。
江边月色到岩前，此际心情必相似。似不似，寄数字。

卷 644_42 【读修睦上人歌篇】

李咸用

李白亡，李贺死，陈陶赵睦寻相次。须知代不乏骚人，

贯休之后，惟修睦而已矣。睦公睦公真可畏，
开口向人无所忌。才似烟霞生则媚，直如屈轶佞则指。
意下纷纷造化机，笔头滴滴文章髓。明月清风三十年，
被君驱使如奴婢。劝君休，莫容易，世俗由来稀则贵。
珊瑚高架五云毫，小小不须烦藻思。

卷 644_43 【远公亭牡丹】

李咸用

雁门禅客吟春亭，牡丹独逞花中英。双成腻脸偎云屏，
百般姿态因风生。延年不敢歌倾城，朝云暮雨愁娉婷。
蕊繁蚁脚黏不行，甜迷蜂醉飞无声。庐山根脚含精灵，
发妍吐秀丛君庭。湓江太守多闲情，栏朱绕绛留轻盈。
潺潺绿醴当风倾，平头奴子啣银笙。红葩艳艳交童星，
左文右武怜君荣，白铜鞮上惭清明。

卷 644_44 【谢僧寄茶】

李咸用

空门少年初志坚，摘芳为药除睡眠。匡山茗树朝阳偏，
暖萌如爪拏飞鸢。枝枝膏露凝滴圆，参差失向兜罗绵。
倾筐短甌蒸新鲜，白纈眼细匀于研。砖排古砌春苔干，
殷勤寄我清明前。金槽无声飞碧烟，赤兽呵冰急铁喧。

林风夕和真珠泉，半匙青粉搅潺湲。绿云轻绾湘娥鬟，
尝来纵使重支枕，胡蝶寂寥空掩关。

卷 644_45 【送人】

李咸用

少皞开宫行帝业，无刃金风剪红叶。雁别边沙入暖云，
蛩辞败草鸣香阁。有客为儒二十霜，酣歌郢雪时飘扬。
不甘长在诸生下，束书携剑离家乡。利爪鞬上鹰，
雄文雾中豹。可堪长与乌鸢噪，是宜摩碧汉以遐飞，
出南山而远蹈。况今大朝公道，天子文明，
团团月树悬青青。燕中有马如龙行，不换黄金无骏名。
荆山有玉犹在璞，未遇良工虚掷鹄。一壶清酒酌离情，
休向蒿中随雀跃。

卷 644_46 【古意论交】

李咸用

择友如淘金，沙尽不得宝。结交如乾银，产竭不成道。
我生四十年，相识苦草草。多为势利朋，少有岁寒操。
通财能几何，闻善宁相告。茫然同夜行，中路自不保。
常恐管鲍情，参差忽终老。今来既见君，青天无片云。
语直瑟弦急，行高山桂芬。约我为交友，不觉心醺醺。

· 全唐诗 ·

见义必许死，临危当指囷。无令后世士，重广孝标文。

第六百四十五卷

卷 645_1 【春风】

李咸用

青帝使和气，吹嘘万国中。发生宁有异，先后自难同。
辇草不消力，岩花应费功。年年三十骑，飘入玉蟾宫。

卷 645_2 【自愧】

李咸用

多负悬弧礼，危时隐薜萝。有心明俎豆，无力执干戈。
壮士难移节，贞松不改柯。纓尘徒自满，欲濯待清波。

卷 645_3 【夜吟】

李咸用

白兔轮当午，儒家业敢慵。竹轩吟未已，锦帐梦应重。

落笔思成虎，悬梭待化龙。景清神自爽，风递远楼钟。

卷 645_4 【昭君】

李咸用

古帝修文德，蛮夷莫敢侵。不知桃李貌，能转虎狼心。
日暮边风急，程遥碛雪深。千秋青冢骨，留怨在胡琴。

卷 645_5 【秋夕】

李咸用

寥廓秋云薄，空庭月影微。树寒栖鸟密，砌冷夜蛩稀。
晓鼓军容肃，疏钟客梦归。吟余何所忆，圣主尚宵衣。

卷 645_6 【秋日与友生言别】

李咸用

利名心未已，离别恨难休。为个文儒业，致多岐路愁。
数花篱菊晚，片叶井梧秋。又决出门计，一尊期少留。

卷 645_7 【边城听角】

李咸用

戍楼鸣画角，寒露滴金枪。细引云成阵，高催雁著行。
唤回边将梦，吹薄晓蟾光。未遂终军志，何劳思故乡。

卷 645_8 【秋日访同人】

李咸用

忽忆金兰友，携琴去自由。远寻寒涧碧，深入乱山秋。
见后却无语，别来长独愁。幸逢三五夕，露坐对冥搜。

卷 645_9 【寄楚琼上人】

李咸用

遥知无事日，静对五峰秋。鸟隔寒烟语，泉和夕照流。
凭栏疏磬尽，瞑目远云收。几句出人意，风高白雪浮。

卷 645_10 【游寺】

李咸用

无家自身在，时得到莲宫。秋觉暑衣薄，老知尘世空。
幽情怜水石，野性任萍蓬。是处堪闲坐，与僧行止同。

卷 645_11 【春日】

李咸用

浩荡东风里，裴回无所亲。危城三面水，古树一边春。
衰世难修道，花时不称贫。滔滔天下者，何处问通津。

卷 645_12 【论交】

李咸用

行亏何必富，节在不妨贫。易得笑言友，难逢终始人。
松篁贞管鲍，桃李艳张陈。少见岁寒后，免为霜雪尘。

卷 645_13 【秋兴】

李咸用

木叶乱飞尽，故人犹未还。心虽游紫阙，时合在青山。
近寺僧邻静，临池鹤对闲。兵戈如未息，名位莫相关。

卷 645_14 【山居】

李咸用

草堂书一架，苔径竹千竿。难世投谁是，清贫且自安。
邻居皆学稼，客至亦无官。焦尾何人听，凉宵对月弹。

卷 645_15 【遣兴】

李咸用

风细酒初醒，凭栏别有情。蝉稀秋树瘦，雨尽晚云轻。
旅鬓一丝出，乡心寸火生。子牟魂欲断，何日是升平。

卷 645_16 【待旦】

李咸用

檐静燕雏语，窗虚蟾影过。时情因客老，归梦入秋多。
蔽日群山雾，滔天四海波。吾皇思壮士，谁应大风歌。

卷 645_17 【送从兄坤载】

李咸用

忍泪不敢下，恐兄情更伤。别离当乱世，骨肉在他乡。
语尽意不尽，路长愁更长。那堪回首处，残照满衣裳。

卷 645_18 【惜别】

李咸用

细雨妆行色，霏霏入户来。须知相识喜，却是别愁媒。
白刃方盈国，黄金不上台。俱为邹鲁士，何处免尘埃。

卷 645_19 【早秋游山寺】

李咸用

闲卧云岩稳，攀缘笑戏猱。静于诸境静，高却众山高。
至理无言了，浮生一梦劳。清风朝复暮，四海自波涛。

卷 645_20 【秋日疾中寄诸同志】

李咸用

闲居无胜事，公干卧来心。门静秋风晚，人稀古巷深。
花疏篱菊色，叶减井梧阴。赖有斯文在，时时得强寻。

卷 645_21 【赠山僧】

李咸用

荣枯虽在目，名利不关身。高出城隍寺，野为云鹤邻。
松声寒后远，潭色雨余新。岂住空空里，空空亦是尘。

卷 645_22 【宿隐者居】

李咸用

永日连清夜，因君识躁君。竹扉难掩月，岩树易延云。
曙鸟枕前起，寒泉梦里闻。又须随计吏，鸡鹤迥然分。

卷 645_23 【送钱契明尊师归庐山】

李咸用

瘦倚青竹杖，炉峰指欲归。霜黏行日屨，风暖到时衣。
凭槛云还在，攀松鹤不飞。何曾有别恨，杨柳自依依。

卷 645_24 【送进士刘松】

李咸用

滔滔皆鲁客，难得是心知。到寺多同步，游山未失期。
云低春雨后，风细暮钟时。忽别垂杨岸，遥遥望所之。

卷 645_25 【赠任肃】

李咸用

玄发难姑息，青云有路岐。莫言多事日，虚掷少年时。
松色雪中出，人情难后知。圣朝公道在，中鹄勿差池。

卷 645_26 【题陈正字山居】

李咸用

怪来忘禄位，习学近潇湘。见处云山好，吟中岁月长。
花光笼晚雨，树影浸寒塘。几日凭栏望，归心自不忙。

卷 645_27 【赠来进士鹏】

李咸用

语玄人不到，星汉在灵空。若使无良遇，虚言有至公。
月明千峤雪，滩急五更风。此际若吟力，分将造化功。

卷 645_28 【送曹税】

李咸用

掺袂向春风，何时约再逢。若教相见密，肯恨别离重。
芳草渔家路，残阳水寺钟。落帆当此处，吟兴不应慵。

卷 645_29 【赠来鹏】

李咸用

默坐非关闷，凝情只在诗。庭闲花落后，山静月明时。
答客言多简，寻僧步稍迟。既同和氏璧，终有玉人知。

卷 645_30 【途中作】

李咸用

瘦马倦行役，斜阳劝著鞭。野桥寒树亚，山店暮云连。
退鹢风虽急，攀龙志已坚。路人休莫笑，百里有时贤。

卷 645_31 【秋晚】

李咸用

斜阳山雨外，秋色思无穷。柳叶飘干翠，枫枝撼碎红。
鬓毛看似雪，生计尚如蓬。不及樵童乐，蒹葭一笛风。

卷 645_32 【晓望】

李咸用

露惊松上鹤，晓色动扶桑。碧浪催人老，红轮照物忙。
世情随日变，利路与天长。好驾觥船去，陶陶入醉乡。

卷 645_33 【寄友生】

李咸用

交情应不变，何事久离群。圆月思同步，寒泉忆共闻。
雪霜松色在，风雨雁行分。每见人来说，窗前改旧文。

卷 645_34 【江行】

李咸用

潇湘无事后，征棹复呕哑。高岫留斜照，归鸿背落霞。
鱼残沙岸草，蝶寄汙流槎。共说干戈苦，汀洲减钓家。

卷 645_35 【题王氏山居】

李咸用

檐有烟岚色，地多松竹风。自言离乱后，不到鼓鼙中。
径柳拂云绿，山樱带雪红。南边青嶂下，时见采芝翁。

卷 645_36 【送别】

李咸用

别意说难尽，离杯深莫辞。长歌终此席，一笑又何时。
棹入寒潭急，帆当落照迟。远书如不寄，无以慰相思。

卷 645_37 【览文僧卷】

李咸用

虽无先圣耳，异代得闻韶。怪石难为古，奇花不敢妖。
调高非郢雪，思静碍箕瓢。未可重吟过，云山兴转饶。

卷 645_38 【望仰山忆玄泰上人】

李咸用

晴岚凝片碧，知在此中禅。见面定何日，无书已一年。
高秋关静梦，良夜入新篇。仰德心如是，清风不我传。

卷 645_39 【闻泉】

李咸用

淅淅梦初惊，幽窗枕簟清。更无人共听，只有月空明。
急想穿岩曲，低应过石平。欲将琴强写，不是自然声。

卷 645_40 【酬郑进士九江新居见寄】

李咸用

蹑屐扣柴关，因成尽日闲。独听黄鸟语，深似白云间。
萍沼宽于井，莎城绿当山。前期招我作，此景得吟还。

卷 645_41 【九江和人赠陈生】

李咸用

天畏斯文坠，凭君助素风。意深皆可补，句逸不因功。
暮替云愁远，秋惊月占空。寄家当瀑布，时得笑言同。

卷 645_42 【登楼值雨二首】

李咸用

共讶高楼望，匡庐色已空。白云横野阔，遮岳与天同。
数点雨入酒，满襟香在风。远江吟得出，方下郡斋东。

江微多佳景，秋吟兴未穷。送来松槛雨，半是蓼花风。
浪猛惊翘鹭，烟昏叫断鸿。不知今夜客，几处卧鸣篷。

卷 645_43 【送赵舒处士归庐山】

李咸用

归岫香炉碧，行吟步益迟。诸侯师不得，樵客偶相随。
思旧江云断，谈玄岳月移。只应张野辈，异代作心知。

卷 645_44 【僧院蔷薇】

李咸用

客引擎茶看，离披晒锦红。不缘开净域，争忍负春风。
小片当吟落，清香入定空。何人来此植，应固恼休公。

卷 645_45 【友生携修睦上人诗见访】

李咸用

雪中敲竹户，袖出岳僧诗。语尽景皆活，吟阑角独吹。
意如将俗背，业必少人知。共约冰销日，云边访所思。

卷 645_46 【冬夕喜友生至】

李咸用

天涯行欲遍，此夜故人情。乡国别来久，干戈还未平。
灯残偏有焰，雪甚却无声。多少新闻见，应须语到明。

卷 645_47 【牡丹】

李咸用

少见南人识，识来嗟复惊。始知春有色，不信尔无情。
恐是天地媚，暂随云雨生。缘何绝尤物，更可比妍明。

卷 645_48 【送春】

李咸用

四时为第一，一岁一重来。好景应难胜，余花虚自开。
相思九个月，得信数枝梅。不向东门送，还成负酒杯。

卷 645_49 【送边将】

李咸用

天骄频犯塞，铁骑又征西。臣节轻乡土，雄心生鼓鼙。
地寒花不艳，沙远日难低。渐喜秋弓健，雕翻白草齐。

卷 645_50 【春晴】

李咸用

檐滴春膏绝，凭栏晚吹生。良朋在何处，高树忽流莺。
游寺期应定，寻芳步已轻。新诗吟未稳，迟日又西倾。

卷 645_51 【冬夜与修睦上人宿远公亭，寄南岳玄泰禅师】

李咸用

丈室掩孤灯，更深霰霭增。相看云梦客，共忆祝融僧。
语合茶忘味，吟欹卷有棱。楚南山水秀，行止岂无凭。

卷 645_52 【落花】

李咸用

拾得移时看，重思造化功。如何飘丽景，不似遇春风。
满地余香在，繁枝一夜空。只应公子见，先忆坠楼红。

卷 645_53 【寄嵩阳隐者】

李咸用

昔年江上别，初入乱离中。我住匡山北，君之少室东。
信来经险道，诗半忆皇风。何事犹高卧，岩边梦未通。

卷 645_54 【早蝉】

李咸用

门柳不连野，乍闻为早蝉。游人无定处，入耳更应先。
暂默斜阳雨，重吟远岸烟。前年湘竹里，风激绕离筵。

卷 645_55 【酬蕴微】

李咸用

白衣经乱世，相遇一开颜。得句禅思外，论交野步间。
举朝无旧识，入眼只青山。几度斜阳寺，访君还独还。

卷 645_56 【萱草】

李咸用

芳草比君子，诗人情有由。只应怜雅态，未必解忘忧。
积雨莎庭小，微风藓砌幽。莫言开太晚，犹胜菊花秋。

卷 645_57 【访友人不遇】

李咸用

出门无至友，动即到君家。空掩一庭竹，去看何寺花。
短僮应捧杖，稚女学擎茶。吟罢留题处，苔阶日影斜。

卷 645_58 【苔】

李咸用

几年风雨迹，叠在石孱颜。生处景长静，看来情尽闲。
吟亭侵坏壁，药院掩空关。每忆东行径，移筇独自还。

卷 645_59 【红薇】

李咸用

春雨有五色，洒来花旋成。欲留池上景，别染草中英。
画出看还欠，蒹为插未轻。王孙多好事，携酒寄吟倾。

卷 645_60 【别所知】

李咸用

有路有西东，天涯自恨同。却须深酌酒，况不比飘蓬。
帆冒新秋雨，鼓传微浪风。闰牵寒气早，何浦值宾鸿。

卷 645_61 【小雪】

李咸用

散漫阴风里，天涯不可收。压松犹未得，扑石暂能留。
阁静萦吟思，途长拂旅愁。崆峒山北面，早想玉成丘。

卷 645_62 【和修睦上人听猿】

李咸用

禅客闻犹苦，是声应是啼。自然无稳梦，何必到巴溪？
疏雨洒不歇，回风吹暂低。此宵秋欲半，山在二林西。

卷 645_63 【庭竹】

李咸用

嫩绿与老碧，森然庭砌中。坐销三伏景，吟起数竿风。
叶影重还密，梢声远或通。更期春共看，桃映小花红。

卷 645_64 【早行】

李咸用

家国三千里，中宵算去程。困才成蝶梦，行不待鸡鸣。
马首摇残月，鸦群起古城。发来经几堠，村寺远钟声。

卷 645_65 【哭所知】

李咸用

朝作青云士，暮为玄夜人。风灯无定度，露薤亦逡巡。
乘马惊新冢，书帷摆旧尘。只应从此去，何处福生民？

卷 645_66 【分题雪霁望炉峰】

李咸用

雪霁上庭除，炉峰势转孤。略无烟作带，独有影沈湖。
冷触归鸿急，明凝落照俱。□□□□□，□□□□□。

卷 645_67 【雪十二韵】

李咸用

六出凝阴气，同云指上天。结时风乍急，集处霰长先。
草穗翘祥燕，陂桩叶白莲。犬狂南陌上，竹醉小池前。
樵径花黏屐，渔舟玉帖舷。阵经旂谷薄，势想朔方偏。
楼面光摇锡，篙头晓列钱。石苔青鹿卧，殿网素蛾穿。
嘶马应思塞，蹲乌似为燕。童痴为兽捏，僧爱用茶煎。
念物希周穆，含毫愧惠连。吟阑余兴逸，还忆剡溪船。

卷 645_68 【庐山】

李咸用

非岳不言岳，此山通岳言。高人居乱世，几处满前轩。
秀作神仙宅，灵为风雨根。余阴铺楚甸，一柱表吴门。
静得八公侣，雄临九子尊。对犹青熨眼，到必冷凝魂。
势受重湖让，形难七泽吞。黑岩藏昼电，紫雾泛朝暾。
莲堕宁唯华，玉焚堪小昆。倒松微发罅，飞瀑远成痕。
叠见云容衬，棱收雪气昏。裁诗曾困谢，作赋偶无孙。
流碍星光撇，惊冲雁阵翻。峰奇寒倚剑，泉曲旋如盆。
草短分雒雉，林明露獼猿。秋枫红叶散，春石谷雷奔。
月好虎溪路，烟深栗里源。醉吟长易醒，梦去亦销烦。
有觉南方重，无疑厚地掀。轻扬闻旧俗，端用镇元元。

卷 645_69 【和吴处士题村叟壁】

李咸用

因阅乡居景，归心寸火然。吾家依碧嶂，小槛枕清川。
远雨笼孤戍，斜阳隔断烟。沙虚遗虎迹，水洑聚蛟涎。
粳曲芟汀蓼，甘茶挹石泉。霜朝巡栗树，风夜探渔船。
戏日鱼呈腹，翘滩鹭并肩。棋寻盘石净，酒傍野花妍。
器以锄为利，家惟竹直钱。饭香同豆熟，汤暖摘松煎。
睡岛凫藏足，攀藤猿冻拳。浅茅鸣斗雉，曲枿啸寒鸢。
秋果楂梨涩，晨羞笋蕨鲜。衣蓑留冷阁，席草种闲田。
椎髻担铺饷，庞眉识稔年。吓鹰乌戴笠，驱犊筱充鞭。
不重官于社，常尊食作天。谷深青霭蔽，峰迥白云缠。
每忆关魂梦，长夸表爱怜。览君书壁句，诱我率成篇。

卷 645_70 【谢友生遗端溪砚瓦】

李咸用

寻常濡翰次，恨不到端溪。得自新知己，如逢旧解携。
玩余轻照乘，谢欲等悬黎。静对胜凡客，闲窥忆好题。
娲天补剩石，昆剑切来泥。著指痕犹湿，停旬水未低。
呵云润柱础，笔彩饮虹霓。鹄眼工谖谬，羊肝士乍刳。
连澌光比镜，囚墨膩于髻。书信成池黑，吟须到日西。
正夸忧盗窃，将隐怯攀跻。捧受同交印，矜持过秉珪。

草颠终近旭，懒癖必无嵇。用合缘鹦鹉，珍应负会稽。
贞姿还落落，寒韵落凄凄。风月情相半，烟花思岂迷！
宜从方袋挈，枉把短行批。浅小金为斗，泓澄玉作堤。
遇人依我惜，想尔与天齐。□□□□□，行时只独赍。

卷 645_71 【和殷衙推春霖即事】

李咸用

东风吹暖雨，润下不能休。古道云横白，移时客共愁。
绿沈莎似藻，红泛叶为舟。忽起江湖兴，疑邻畎浍流。
此时无胜会，何处滞奇游。阵急如酣战，点粗成乱沔。
竹因添洒落，松得长飕飕。花惨闲庭晚，兰深曲径幽。
丝牵汀鸟足，线挂岳猿头。天地昏同醉，寰区浩欲浮。
柳眉低带泣，蒲剑锐初抽。石燕翻空重，虫罗缀滴稠。
荷倾蛟泪尽，岩拆电鞭收。岂直望尧喜，却怀微禹忧。
树滋堪采菌，矶没懒垂钩。腥觉闻龙气，寒宜拥豹裘。
名膏那作沴，思稔必通侯。蚌鹬徒喧竞，笙歌罢献酬。
山川藏秀媚，草木逞调柔。极目非吾意，行吟独下楼。

第六百四十六卷

卷 646_1 【题陈将军别墅】

李咸用

明王猎士犹疏在，岩谷安居最有才。高虎壮言知鬼伏，
葛龙闲卧待时来。云藏山色晴还媚，风约溪声静又回。
不独春光堪醉客，庭除长见好花开。

卷 646_2 【湘浦有怀】

李咸用

鸿雁哀哀背朔方，余霞倒影画潇湘。长汀细草愁春浪，
古渡寒花倚夕阳。鬼树夜分千炬火，渔舟朝卷一篷霜。
侬家本是持竿者，为爱明时入帝乡。

卷 646_3 【题陈处士山居】

李咸用

莲绕闲亭柳绕池，蝉吟暮色一枝枝。未逢皇泽搜遗逸，
赢得青山避乱离。花圃春风邀客醉，茅檐秋雨对僧棋。
樵童牧竖劳相问，岩穴从来出帝师。

卷 646_4 【和蒋进士秋日】

李咸用

晚雨霏微思杪秋，不堪才子尚羁游。尘随别骑东西急，
波促年华日夜流。凉月云开光自远，古松风在韵难休。
男儿但得功名立，纵是深恩亦易酬。

卷 646_5 【陈正字山居】

李咸用

一叶闲飞斜照里，江南仲蔚在蓬蒿。天衢云险鸳骢蹇，
月桂风和梦想劳。绕枕泉声秋雨细，对门山色古屏高。
此中即是神仙地，引手何妨一钓鳌。

卷 646_6 【与刘三礼陈孝廉言志】

李咸用

真宰无私造化均，年年分散月中春。皆期早蹑青云路，
谁肯长为白社人？宋国高风休敛翼，圣朝公道易酬身。
大须审固穿杨箭，莫遣参差鬓雪新。

卷 646_7 【秋日送严湘侍御归京】

李咸用

蟾影珪圆湖始波，楚人相别恨偏多。知君有路升霄汉，
独我无由出薜萝。虽道危时难进取，到逢清世又如何。
谁听甯戚敲牛角，月落星稀一曲歌。

卷 646_8 【题王处士山居】

李咸用

云木沈沈夏亦寒，此中幽隐几经年。无多别业供王税，
大半生涯在钓船。蜀魄叫回芳草色，鹭鸶飞破夕阳烟。
干戈猬起能高卧，只个逍遥是谪仙。

卷 646_9 【谢所知】

李咸用

狂歌狂舞慰风尘，心下多端亦懒言。早是乱离轻岁月，
谁能愁悴过朝昏？圣朝公道如长在，贱子谋身自有门。
却愧此时叨厚遇，他年何以报深恩？

卷 646_10 【秋望】

李咸用

云阴惨澹柳阴稀，游子天涯一望时。风闪雁行疏又密，
地回江势急还迟。荣枯物理终难测，贵贱人生自不知。
未达谁能多叹息，尘埃争损得男儿。

卷 646_11 【送谭孝廉赴举】

李咸用

鼓鼙声里寻诗礼，戈戟林间入镐京。好事尽从难处得，
少年无向易中轻。也知贵贱皆前定，未见疏慵遂有成。
吾道近来稀后进，善开金口答公卿。

卷 646_12 【途中逢友人】

李咸用

大道将穷阮籍哀，红尘深翳步迟回。皇天有意自寒暑，
白日无情空往来。霄汉何年征赋客，烟花随处作愁媒。
相逢且快眼前事，莫厌狂歌酒百杯。

卷 646_13 【和人湘中作】

李咸用

湘川湘岸两荒凉，孤雁号空动旅肠。一棹寒波思范蠡，
满尊醇酒忆陶唐。年华蒲柳雕衰鬓，身迹萍蓬滞别乡。
不及东流趋广汉，臣心日夜与天长。

卷 646_14 【赠陈望尧】

李咸用

若说精通事艺长，词人争及孝廉郎。秋萤短焰难盈案，
邻烛余光不满行。鹄箭亲疏虽异的，桂花高下一般香。
明时公道还堪信，莫遣锥锋久在囊。

卷 646_15 【宿渔家】

李咸用

促杼声繁萤影多，江边秋兴独难过。云遮月桂几枝恨，
烟罩渔舟一曲歌。难世斯人虽隐遁，明时公道复如何？
陶家壁上精灵物，风雨未来终是梭。

卷 646_16 【旅馆秋夕】

李咸用

牢落生涯在水乡，只思归去泛沧浪。秋风萤影随高柳，
夜雨蛩声上短墙。百岁易为成荏苒，丹青谁肯借梯航？
若教名路无知己，匹马尘中是自忙。

卷 646_17 【悼范摅处士】

李咸用

家在五云溪畔住，身游巫峡作闲人。安车未至柴关外，
片玉已藏坟土新。虽有公卿闻姓字，惜无知己脱风尘。
到头积善成何事，天地茫茫秋又春。

卷 646_18 【送人】

李咸用

一轴烟花满口香，诸侯相见肯相忘。未闻珪璧为人弃，
莫倦江山去路长。盈耳暮蝉催别骑，数杯浮蚁咽离肠。
眼前多少难甘事，自古男儿当自强。

卷 646_19 【春暮途中】

李咸用

细雨如尘散暖空，数峰春色在云中。须知触目皆成恨，
纵道多文争那穷。飞燕有情依旧阁，垂杨无力受东风。
谁能会得乾坤意，九土枯荣自不同。

卷 646_20 【题陈正字林亭】

李咸用

晓烟轻翠拂帘飞，黄叶飘零弄所思。正是低摧吾道日，
不堪惆怅异乡时。家林蛇豕方群起，宫沼龟龙未有期。
赖有平原怜贱子，满亭山色惜吟诗。

卷 646_21 【送从兄入京】

李咸用

柳转春心梅艳香，相看江上恨何长？多情流水引归思，
无赖严风促别觞。大抵男儿须振奋，近来时事懒思量。
云帆高挂一挥手，目送烟霄雁断行。

卷 646_22 【秋夕书怀寄所知】

李咸用

秋萤一点雨中飞，独立黄昏思所知。三岛路遥身汨没，
九天风急羽差池。年华逐浪催霜发，旅恨和云拂桂枝。
不向故人言此事，异乡谁更念栖迟。

卷 646_23 【酬进士秦颙若】

李咸用

莺默平林燕别轩，相逢相笑话生前。低飞旅恨看霜叶，
曲写归情向暮川。在野孤云终捧日，朝宗高浪本蒙泉。
何劳怅望风雷便，且混鱼龙黠武年。

卷 646_24 【山中夜坐寄故里友生】

李咸用

展转檐前睡不成，一床山月竹风清。虫声促促催乡梦，
桂影高高挂旅情。祸福既能知倚伏，行藏争不要分明。
可怜任永真坚白，净洗双眸看太平。

卷 646_25 【物情】

李咸用

谁分万类二仪间，稟性高卑各自然。野鹤不栖葱蒨树，
流莺长喜艳阳天。李斯溷鼠心应动，庄叟泥龟意已坚。
成是败非如赋命，更教何处认愚贤。

卷 646_26 【金谷园】

李咸用

石家旧地聊登望，宠辱从兹信可惊。鸟度野花迷锦障，
蝉吟古树想歌声。虽将玉貌同时死，却羡苍头此日生。
多积黄金买刑戮，千秋成得绿珠名。

卷 646_27 【投所知】

李咸用

手欠东堂桂一枝，家书不敢便言归。挂檐晚雨思山阁，
拂岸烟岚忆钓矶。公道甚平才自薄，丹青好上力犹微。
谁能借与抟扶势，万里飘飘试一飞。

卷 646_28 【赠友弟】

李咸用

萤焰烧心雪眼劳，未逢佳梦见三刀。他时讵有盐梅味，
今日犹疑腹背毛。金埒晓羁千里骏，玉轮寒养一枝高。
谁能终岁摇赆尾，唯唯洋洋向碧涛。

卷 646_29 【春日喜逢乡人刘松】

李咸用

故人不见五春风，异地相逢岳影中。旧业久抛耕钓侣，
新闻多说战争功。生民有恨将谁诉，花木无情只自红。
莫把少年愁过日，一尊须对夕阳空。

卷 646_30 【夏日别余秀才】

李咸用

岳麓云深麦雨秋，满倾杯酒对湘流。沙边细柳牵行色，
水面轻烟画别愁。敢待傅岩成好梦，任从礧石挂纤钩。
镜机冲漠非吾事，自要青云识五侯。

卷 646_31 【庐陵九日】

李咸用

菊花山在碧江东，冷酒清吟兴莫穷。四十三年秋里过，
几多般事乱来空。虽惊故国音书绝，犹喜新知语笑同。
竟日开门无客至，笛声迢递夕阳中。

卷 646_32 【和人游东林】

李咸用

一从张野卧云林，胜概谁人更解寻？黄鸟不能言往事，
白莲虚发至如今。年年上国荣华梦，世世高流水石心。
始欲共君重怅望，紫霄峰外日沈沈。

卷 646_33 【和彭进士秋日游靖居山寺】

李咸用

秋山入望已无尘，况得闲游谢事频。问著尽能言祖祖，
见时应不是真真。添瓶野水遮还急，伴塔幽花落又新。
自笑未曾同逸步，终非宗炳社中人。

卷 646_34 【和彭进士感怀】

李咸用

人生谁肯便甘休，遇酒逢花且共游。若向云衢陪骥尾，
直须天畔落旄头。三编大雅曾关兴，一册南华旋解忧。
四海英雄多独断，不知何者是长筹。

卷 646_35 【寄题从兄坤载村居】

李咸用

邻并无非樵钓者，庄生物论宛然齐。雨中寒树愁鸱立，
江上残阳瘦马嘶。说与众佣同版筑，吕将群叟共磻溪。
覆巢破卵方堪惧，取次梧桐凤且栖。

卷 646_36 【送黄宾于赴举】

李咸用

秋风昨夜满潇湘，衰柳残蝉思客肠。早是乱来无胜事，
更堪江上揖离觞。澄潭跃鲤摇轻浪，落日飞凫趁远樯。
渔父不须探去意，一枝春褭月中央。

卷 646_37 【冬日喜逢吴价】

李咸用

垂杨烟薄井梧空，千里游人驻断蓬。志意不因多事改，
鬓毛难与别时同。莺迁犹待销冰日，鹏起还思动海风。
穷达他年如赋命，且陶真性一杯中。

卷 646_38 【题刘处士居】

李咸用

压破岚光半亩余，竹轩兰砌共清虚。泉经小槛声长急，
月过修篁影旋疏。溪鸟时时窥户牖，山云往往宿庭除。
干戈谩道因天意，渭水高人自钓鱼。

卷 646_39 【送李尊师归临川】

李咸用

蟠桃一别几千春，谪下人间作至人。尘外烟霞吟不尽，
鼎中龙虎伏初驯。除存紫府无他意，终向青冥举此身。
辞我麻姑山畔去，蔡经踪迹必相亲。

卷 646_40 【投知】

李咸用

西望长安路几千，迟回不为别家难。酌量才地心虽动，
点检囊装意又阑。自是远人多蹇滞，近来仙榜半孤寒。
嘶风重诉牵盐耻，伯乐何妨转眼看。

卷 646_41 【吴处士寄香兼劝入道】

李咸用

谢寄精专一捻香，劝予朝礼仕虚皇。须知十极皆臣妾，
岂止遗生奉混茫。空挂黄衣宁续寿，曾闻玄教在知常。
但居平易俟天命，便是长生不死乡。

卷 646_42 【草虫】

李咸用

如绿如织暮幽幽，应节催年使我愁。行客语停孤店月，
高人梦断一床秋。风低藓径疑偏急，雨咽槐亭得暂休。
须付画堂兰烛畔，歌怀醉耳两悠悠。

卷 646_43 【咏柳】

李咸用

日近烟饶还有意，东垣西掖几千株。牵仍别恨知难尽，
夸衒春光恐更无。解引人情长婉约，巧随风势强盘纡。
天应绣出繁华景，处处茸丝惹路衢。

卷 646_44 【寄所知】

李咸用

曾将俎豆为儿戏，争奈干戈阻素心。遁去不同秦客逐，
病来还作越人吟。名流古集典衣买，僻寺奇花貰酒寻。
从道趣时身计拙，如非所好肯开襟。

卷 646_45 【雪】

李咸用

上帝无私意甚微，欲教霖雨更光辉。也知出处花相似，
可到贫家影便稀。云汉风多银浪溅，昆山火后玉灰飞。
高楼四望吟魂敛，却忆明皇月殿归。

卷 646_46 【绯桃花】

李咸用

茫茫天意为谁留，深染夭桃备胜游。未醉已知醒后忆，
欲开先为落时愁。痴蛾乱扑灯难灭，跃鲤傍惊电不收。
何事梨花空似雪，也称春色是悠悠。

卷 646_47 【同友人秋日登庾楼】

李咸用

兰摧菊暗不胜秋，倚著高楼思莫收。六代风光无问处，
九条烟水但凝愁。谁能百岁长闲去，只个孤帆岂自由。
欲学仲宣知是否，臂弓腰剑逐时流。

卷 646_48 【和人咏雪】

李咸用

轻轻玉叠向风加，襟袖谁能认六葩。高岫人迷千尺布，
平林天与一般花。横空络绎云遗屑，扑浪翩联蝶寄槎。
公子樽前流远思，不知何处客程赊？

卷 646_49 【和友人喜相遇十首】

李咸用

为儒自愧已多年，文赋歌诗路不专。肯信披沙难见宝，
只怜苦草易成编。燕昭寤寐常求骏，郭隗寻思未是贤。
且固初心希一试，箭穿正鹄岂无缘。

揣情摩意已无功，只把篇章助国风。宋玉谩夸云雨会，
谢连宁许梦魂通。愁成旅鬓千丝乱，吟得寒缸短焰终。
难世好居郊野地，出门常喜与人同。

惠子休惊学五车，沛公方起斩长蛇。六雄互欲吞诸国，
四海终须作一家。自古经纶成世务，暂时朱绿比朝霞。
人生心口宜相副，莫使尧阶草势斜。

不傍江烟访所思，更应无处展愁眉。数杯竹阁花残酒，

一局松窗日午棋。多病却疑天与便，自愚潜喜众相欺。
非穷非达非高尚，冷笑行藏只独知。

闲吟闲坐道相应，远想南华亦自矜。抛掷家乡轻似梦，
寻常心地冷于僧。和羹使用非胥靡，忆鲙言词小季鹰。
唯仗十篇金玉韵，此中高旨莫阶升。

已向丘门老此躯，可堪空作小人儒。吟中景象千般有，
书外囊装一物无。润屋必能知早散，辉山应是不轻沽。
短衣宁倦重修谒，谁识高阳旧酒徒。

松桂寒多众木分，轻浮如叶自纷纭。韶咸古曲教谁爱，
山水清音喜独闻。上国共知传大宝，旧交宁复在青云。
相逢莫厌杯中酒，同醉同醒只有君。

还淳反朴已难期，依德依仁敢暂违。寡欲自应刚正立，
无私翻觉友朋稀。旄头影莫侵黄道，传说星终近紫微。
年纪少他蘧伯玉，幸因多难早知非。

麻衣未识帝城尘，四十为儒是病身。有恨不关衔国耻，
无愁直为倚家贫。齐轻东海二高士，汉重商山四老人。
一种爱闲闲不得，混时行止却应真。

任说天长海影沈，友朋情比未为深。唯应乐处无虚日，
大半危时得道心。命达天殒同白首，价高砖瓦即黄金。
他年有要玄珠者，赤水萦纡试一寻。

卷 646_50 【依韵修睦上人山居十首】

李咸用

生身便在乱离间，遇柳寻花作麽看。老去转谙无是事，
本来何处有多般。长怜蠛蠓能随暖，独笑梧桐不耐寒。
覆载我徒争会得，大鹏飞尚未知宽。

云泉日日长松寺，丝管年年细柳营。静躁殊途知自识，
荣枯一贯亦何争。道傍病树人从老，溪上新苔我独行。
若见净名居士语，逍遥全不让庄生。

莫言天道终难定，须信人心尽自轻。宣室三千虽有恨，
成周八百岂无情？柏缘执性长时瘦，梅为多知两番生。
不是不同明主意，懒将唇舌与齐烹。

不论轩冕及渔樵，性与情违渐渐遥。季子祸从怜富贵，
颜生道在乐箪瓢。清闲自可齐三寿，忿恨还须戒一朝。
好学尧民俣舜日，短裁孤竹理云韶。

春风春雨一何频，望极空江觉损神。莺有来由重入谷，
柳无情绪强依人。汉庭谒者休言事，鲁国诸生莫问津。
赖是水乡樗栎贱，满炉红焰且相亲。

三十年来要自观，履春冰恐未为难。自于南国同埋剑，
谁向东门便挂冠。早是人情飞絮薄，可堪时令太行寒。

多惭幸住匡山下，偷得秣陵坐卧看。

畹兰未必因香折，湖象多应为齿焚。兼济直饶同巨楫，
自由何似学孤云。秋深栢菌樵来得，木末山鼯梦断闻。
闲凭竹轩游子过，替他愁见日西曛。

何事深山啸复歌，短弓长剑不如他。且图青史垂名稳，
从道前贤自滞多。鸱鸢敢辞栖短棘，凤凰犹解怯高罗。
人生若得逢尧舜，便是巢由亦易过。

太玄太易小窗明，古义寻来醉复醒。西伯纵逢头已白，
步兵如在眼应青。寒猿断后云为槛，宿鸟惊时月满庭。
此景得闲闲去得，人间无事不曾经。

壮气虽同德不同，项王何似王江东。乡歌寂寂荒丘月，
渔艇年年古渡风。难世斯人犹不达，此时吾道岂能通。
吟君十首山中作，方觉多端总是空。

卷 646_51 【同友生春夜闻雨】

李咸用

春雨三更洗物华，乱和丝竹响豪家。滴繁知在长条柳，
点重愁看破朵花。檐静尚疑兼雾细，灯摇应是逐风斜。
此时童叟浑无梦，为喜流膏润谷芽。

卷 646_52 【同友生题僧院杜鹃花】

李咸用

若比众芳应有在，难同上品是中春。牡丹为性疏南国，
朱槿操心不满旬。留得却缘真达者，见来宁作独醒人。
鹤林太盛今空地，莫放枝条出四邻。

卷 646_53 【春日题陈正字林亭】

李咸用

周回胜异似仙乡，稍减愁人日月长。幕绕虚檐高岫色，
镜临危槛小池光。丝垂杨柳当风软，玉折含桃倚径香。
南北近来多少事，数声横笛怨斜阳。

卷 646_54 【送河南韦主簿归京】

李咸用

岩风爱日泪阑干，去住情途各万端。世乱敢言离别易，
时清犹道路行难。舟维晚雨湘川暗，袖拂晴岚岷首寒。
见说满朝亲友在，肯教憔悴出长安。

卷 646_55 【喻道】

李咸用

汉武秦皇漫苦辛，那思俗骨本含真。不知流水潜催老，
未悟三山也是尘。牢落沙丘终古恨，寂寥函谷万年春。
长生客待仙桃饵，月里婵娟笑煞人。

卷 646_56 【山中】

李咸用

一簇烟霞荣辱外，秋山留得傍檐楹。朝钟暮鼓不到耳，
明月孤云长挂情。世上路岐何缭绕，水边蓑笠称平生。
寻思阮籍当时意，岂是途穷泣利名。

卷 646_57 【同玄昶上人观石榴】

李咸用

病随支遁偶行行，正见榴花独满庭。
瘦竹成林人不看，却应著得强青青。

卷 646_58 【别李将军】

李咸用

一拜虬髯便受恩，宫门细柳五摇春。
男儿自古多离别，懒对英雄泪满巾。

卷 646_59 【早鸡】

李咸用

锦翅朱冠惊四邻，稻粱恩重职司晨。
不知下土兵难戢，但报明时向国人。

卷 646_60 【别友】

李咸用

北吹微微动旅情，不堪分手在平明。
寒鸡不待东方曙，唤起征人蹋月行。

第六百四十七卷

卷 647_1 【草檄答南蛮有咏】

胡曾

辞天出塞阵云空，雾卷霞开万里通。亲受虎符安宇宙，
誓将龙剑定英雄。残霜敢冒高悬日，秋叶争禁大段风。
为报南蛮须屏迹，不同蜀将武侯功。

卷 647_2 【寒食都门作】

胡曾

二年寒食住京华，寓目春风万万家。金络马衔原上草，
玉颜人折路傍花。轩车竞出红尘合，冠盖争回白日斜。
谁念都门两行泪，故园寥落在长沙。

卷 647_3 【薄命妾】

胡曾

阿娇初失汉皇恩，旧赐罗衣亦罢薰。倚枕夜悲金屋雨，

卷帘朝泣玉楼云。宫前叶落鸳鸯瓦，架上尘生翡翠裙。
龙骑不巡时渐久，长门空掩绿苔纹。

卷 647_4 【独不见】

胡曾

玉关一自有氛埃，年少从军竟未回。门外尘凝张乐榭，
水边香灭按歌台。窗残夜月人何处，帘卷春风燕复来。
万里寂寥音信绝，寸心争忍不成灰。

卷 647_5 【交河塞下曲】

胡曾

交河冰薄日迟迟，汉将思家感别离。塞北草生苏武泣，
陇西云起李陵悲。晓侵雉堞乌先觉，春入关山雁独知。
何处疲兵心最苦，夕阳楼上笛声时。

卷 647_6 【车遥遥】

胡曾

自从车马出门朝，便入空房守寂寥。玉枕夜残鱼信绝，

金钿秋尽雁书遥。脸边楚雨临风落，头上春云向日销。
芳草又衰还不至，碧天霜冷转无憀。

卷 647_7 【早发潜水驿谒郎中员外】

胡曾

半床秋月一声鸡，万里行人费马蹄。青野雾销凝晋洞，
碧山烟散避秦溪。楼台稍辨乌城外，更漏微闻鹤柱西。
已是大仙怜后进，不应来向武陵迷。

卷 647_8 【赠渔者】

胡曾

不愧人间万户侯，子孙相继老扁舟。往来南越谙鲛室，
生长东吴识蜃楼。自为钓竿能遣闷，不因萱草解销忧。
羡君独得逃名趣，身外无机任白头。

卷 647_9 【自岭下泛鹢到清远峡作】

胡曾

乘船浮鹢下韶水，绝境方知在岭南。薜荔雨余山自黛，

蒹葭烟尽岛如蓝。旦游萧帝新松寺，夜宿嫦娥桂影潭。
不为篋中书未献，便来兹地结茅庵。

卷 647_10 【题周瑜将军庙】

胡曾

共说生前国步难，山川龙战血漫漫。交锋魏帝旌旂退，
委任君王社稷安。庭际雨余春草长，庙前风起晚光残。
功勋碑碣今何在，不得当时一字看。

卷 647_11 【咏史诗·乌江】

胡曾

争帝图王势已倾，八千兵散楚歌声。
乌江不是无船渡，耻向东吴再起兵。

卷 647_12 【咏史诗·章华台】

胡曾

茫茫衰草没章华，因笑灵王昔好奢。
台土未干箫管绝，可怜身死野人家。

卷 647_13 【咏史诗·细腰宫】

胡曾

楚王辛苦战无功，国破城荒霸业空。
唯有青春花上露，至今犹泣细腰宫。

卷 647_14 【咏史诗·沙苑】

胡曾

冯翊南边宿雾开，行人一步一裴回。
谁知此地凋残柳，尽是高欢败后栽。

卷 647_15 【咏史诗·石城】

胡曾

古郢云开白雪楼，汉江还绕石城流。
何人知道寥天月，曾向朱门送莫愁。

卷 647_16 【咏史诗·荆山】

胡曾

抱玉岩前桂叶稠，碧谿寒水至今流。
空山落日猿声叫，疑是荆人哭未休。

卷 647_17 【咏史诗·阳台】

胡曾

楚国城池飒已空，阳台云雨过无踪。
何人更有襄王梦，寂寂巫山十二重。

卷 647_18 【咏史诗·居延】

胡曾

漠漠平沙际碧天，问人云此是居延。
停骖一顾犹魂断，苏武争禁十九年。

卷 647_19 【咏史诗·沛宫】

胡曾

汉高辛苦事干戈，帝业兴隆俊杰多。
犹恨四方无壮士，还乡悲唱大风歌。

卷 647_20 【咏史诗·金谷园】

胡曾

一自佳人坠玉楼，繁华东逐洛河流。
唯余金谷园中树，残日蝉声送客愁。

卷 647_21 【咏史诗·湘川】

胡曾

虞舜南捐万乘君，灵妃挥涕竹成纹。
不知精魄游何处，落日潇湘空白云。

卷 647_22 【咏史诗·夷门】

胡曾

六龙冉冉骤朝昏，魏国贤才杳不存。
唯有侯嬴在时月，夜来空自照夷门。

卷 647_23 【咏史诗·黄金台】

胡曾

北乘羸马到燕然，此地何人复礼贤。
若问昭王无处所，黄金台上草连天。

卷 647_24 【咏史诗·夷陵】

胡曾

夷陵城阙倚朝云，战败秦师纵火焚。
何事三千珠履客，不能西御武安君。

卷 647_25 【咏史诗·汉江】

胡曾

汉江一带碧流长，两岸春风起绿杨。
借问胶船何处没，欲停兰棹祀昭王。

卷 647_26 【咏史诗·苍梧】

胡曾

有虞龙驾不西还，空委箫韶洞壑间。
无计得知陵寝处，愁云长满九疑山。

卷 647_27 【咏史诗·陈宫】

胡曾

陈国机权未可涯，如何后主恣娇奢。
不知即入宫中井，犹自听吹玉树花。

卷 647_28 【咏史诗·南阳】

胡曾

世乱英雄百战余，孔明方此乐耕锄。
蜀王不自垂三顾，争得先生出旧庐？

卷 647_29 【咏史诗·即墨】

胡曾

即墨门开纵火牛，燕师营里血波流。
固存不得田单术，齐国寻成一土丘。

卷 647_30 【咏史诗·渭滨】

胡曾

岸草青青渭水流，子牙曾此独垂钓。
当时未入非熊兆，几向斜阳叹白头！

卷 647_31 【咏史诗·五湖】

胡曾

东上高山望五湖，雪涛烟浪起天隅。
不知范蠡乘舟后，更有功臣继踵无。

卷 647_32 【咏史诗·易水】

胡曾

一旦秦皇马角生，燕丹归北送荆卿。
行人欲识无穷恨，听取东流易水声。

卷 647_33 【咏史诗·长平】

胡曾

长平瓦震武安初，赵卒俄成戏鼎鱼。
四十万人俱下世，元戎何用读兵书。

卷 647_34 【咏史诗·西园】

胡曾

月满西园夜未央，金风不动邺天凉。
高情公子多秋兴，更领诗人入醉乡。

卷 647_35 【咏史诗·长沙】

胡曾

江上南风起白蘋，长沙城郭异咸秦。
故乡犹自嫌卑湿，何况当时赋鵬人。

卷 647_36 【咏史诗·圯桥】

胡曾

庙算张良独有余，少年逃难下邳初。
逡巡不进泥中履，争得先生一卷书。

卷 647_37 【咏史诗·铜雀台】

胡曾

魏武龙舆逐逝波，高台空按望陵歌。
遏云声绝悲风起，翻向樽前泣翠娥。

卷 647_38 【咏史诗·东晋】

胡曾

石头城下浪崔嵬，风起声疑出地雷。
何事苻坚太相小，欲投鞭策过江来。

卷 647_39 【咏史诗·吴江】

胡曾

子胥今日委东流，吴国明朝亦古丘。
大笑夫差诸将相，更无人解守苏州。

卷 647_40 【咏史诗·函谷关】

胡曾

寂寂函关锁未开，田文车马出秦来。
朱门不养三千客，谁为鸡鸣得放回？

卷 647_41 【咏史诗·武关】

胡曾

战国相持竟不休，武关才掩楚王忧。
出门若取灵均语，岂作咸阳一死囚。

卷 647_42 【咏史诗·垓下】

胡曾

拔山力尽霸图隳，倚剑空歌不逝骓。
明月满营天似水，那堪回首别虞姬。

卷 647_43 【咏史诗·郴县】

胡曾

义帝南迁路入郴，国亡身死乱山深。
不知埋恨穷泉后，几度西陵片月沉。

卷 647_44 【咏史诗·东海】

胡曾

东巡玉辇委泉台，徐福楼船尚未回。
自是祖龙先下世，不关无路到蓬莱。

卷 647_45 【咏史诗·故宜城】

胡曾

武安南伐勒秦兵，疏凿功将夏禹并。
谁谓长渠千载后，水流犹入故宜城。

卷 647_46 【咏史诗·成都】

胡曾

杜宇曾为蜀帝王，化禽飞去旧城荒。
年年来叫桃花月，似向春风诉国亡。

卷 647_47 【咏史诗·檀溪】

胡曾

三月襄阳绿草齐，王孙相引到檀溪。
的卢何处理龙骨，流水依前绕大堤。

卷 647_48 【咏史诗·青冢】

胡曾

玉貌元期汉帝招，谁知西嫁怨天骄？
至今青冢愁云起，疑是佳人恨未销。

卷 647_49 【咏史诗·李陵台】

胡曾

北入单于万里疆，五千兵败滞穷荒。
英雄不伏蛮夷死，更筑高台望故乡。

卷 647_50 【咏史诗·河梁】

胡曾

汉家英杰出皇都，携手河梁话入胡。
不是子卿全大节，也应低首拜单于。

卷 647_51 【咏史诗·轺道】

胡曾

汉祖西来秉白旄，子婴宗庙委波涛。
谁怜君有翻身术，解向秦宫杀赵高。

卷 647_52 【咏史诗·汉宫】

胡曾

明妃远嫁泣西风，玉箸双垂出汉宫。
何事将军封万户，却令红粉为和戎。

卷 647_53 【咏史诗·豫让桥】

胡曾

豫让酬恩岁已深，高名不朽到如今。
年年桥上行人过，谁有当时国土心？

卷 647_54 【咏史诗·华亭】

胡曾

陆机西没洛阳城，吴国春风草又青。
惆怅月中千岁鹤，夜来犹为唳华亭。

卷 647_55 【咏史诗·东山】

胡曾

五马南浮一化龙，谢安入相此山空。
不知携妓重来日，几树莺啼谷口风。

卷 647_56 【咏史诗·杀子谷】

胡曾

举国贤良尽泪垂，扶苏屈死树边时。
至今谷口泉呜咽，犹似秦人恨李斯。

卷 647_57 【咏史诗·马陵】

胡曾

坠叶萧萧九月天，驱兵独过马陵前。
路傍古木虫书处，记得将军破敌年。

卷 647_58 【咏史诗·玉门关】

胡曾

西戎不敢过天山，定远功成白马闲。
半夜帐中停烛坐，唯思生入玉门关。

卷 647_59 【咏史诗·滹沱河】

胡曾

光武经营业未兴，王郎兵革正凭陵。
须知后汉功臣力，不及滹沱一片冰。

卷 647_60 【咏史诗·黄河】

胡曾

博望沉埋不复旋，黄河依旧水茫然。
沿流欲共牛郎语，只得灵槎送上天。

卷 647_61 【咏史诗·凤凰台】

胡曾

秦娥一别凤凰台，东入青冥更不回。
空有玉箫千载后，遗声时到世间来。

卷 647_62 【咏史诗·五丈原】

胡曾

蜀相西驱十万来，秋风原下久裴回。
长星不为英雄住，半夜流光落九垓。

卷 647_63 【咏史诗·平城】

胡曾

汉帝西征陷虏尘，一朝围解议和亲。
当时已有吹毛剑，何事无人杀奉春。

卷 647_64 【咏史诗·汴水】

胡曾

千里长河一旦开，亡隋波浪九天来。
锦帆未落干戈起，惆怅龙舟更不回。

卷 647_65 【咏史诗·兰台宫】

胡曾

迟迟春日满长空，亡国离宫蔓草中。
宋玉不忧人事变，从游那赋大王风。

卷 647_66 【咏史诗·金牛驿】

胡曾

山岭千重拥蜀门，成都别是一乾坤。
五丁不凿金牛路，秦惠何由得并吞。

卷 647_67 【咏史诗·望思台】

胡曾

太子衔冤去不回，临皋从筑望思台。
至今汉武销魂处，犹有悲风木上来。

卷 647_68 【咏史诗·邯郸】

胡曾

晓入邯郸十里春，东风吹下玉楼尘。
青娥莫怪频含笑，记得当年失步人。

卷 647_69 【咏史诗·箕山】

胡曾

寂寂箕山春复秋，更无人到此溪头。
弃瓢岩畔中宵月，千古空闻属许由。

卷 647_70 【咏史诗·会稽山】

胡曾

越王兵败已山栖，岂望全生出会稽。
何事夫差无远虑，更开罗网放鲸鲵。

卷 647_71 【咏史诗·不周山】

胡曾

共工争帝力穷秋，因此捐生触不周。
遂使世间多感客，至今哀怨水东流。

卷 647_72 【咏史诗·虞坂】

胡曾

悠悠虞坂路欹斜，迟日和风簇野花。
未省孙阳身没后，几多骐骥困盐车。

卷 647_73 【咏史诗·秦庭】

胡曾

楚国君臣草莽间，吴王戈甲未东还。
包胥不动咸阳哭，争得秦兵出武关。

卷 647_74 【咏史诗·延平津】

胡曾

延平津路水溶溶，峭壁巍岑一万重。
昨夜七星潭底见，分明神剑化为龙。

卷 647_75 【咏史诗·瑶池】

胡曾

阿母瑶池宴穆王，九天仙乐送琼浆。
漫矜八骏行如电，归到人间国已亡。

卷 647_76 【咏史诗·铜柱】

胡曾

一柱高标险塞垣，南蛮不敢犯中原。
功成自合分茅土，何事翻衔薏苡冤。

卷 647_77 【咏史诗·关西】

胡曾

杨震幽魂下北邙，关西踪迹遂荒凉。
四知美誉留人世，应与乾坤共久长。

卷 647_78 【咏史诗·高阳池】

胡曾

古人未遇即衔杯，所贵愁肠得酒开。
何事山公持玉节，等闲深入醉乡来。

卷 647_79 【咏史诗·泸水】

胡曾

五月驱兵入不毛，月明泸水瘴烟高。
誓将雄略酬三顾，岂惮征蛮七纵劳。

卷 647_80 【咏史诗·细柳营】

胡曾

文帝銮舆劳北征，条侯此地整严兵。
辕门不峻将军令，今日争知细柳营。

卷 647_81 【咏史诗·叶县】

胡曾

叶公丘墓已尘埃，云矗崇墉亦半摧。
借问往年龙见日，几多风雨送将来。

卷 647_82 【咏史诗·杜邮】

胡曾

自古功成祸亦侵，武安冤向杜邮深。
五湖烟月无穷水，何事迁延到陆沉。

卷 647_83 【咏史诗·柯亭】

胡曾

一宿柯亭月满天，笛亡人没事空传。
中郎在世无甄别，争得名垂尔许年。

卷 647_84 【咏史诗·葛陂】

胡曾

长房回到葛陂中，人已登真竹化龙。
莫道神仙难顿学，嵇生自是不遭逢。

卷 647_85 【咏史诗·博浪沙】

胡曾

嬴政鲸吞六合秋，削平天下虜诸侯。
山东不是无公子，何事张良独报仇。

卷 647_86 【咏史诗·陇西】

胡曾

乘春来到陇山西，隗氏城荒碧草齐。
好笑王元不量力，函关那受一丸泥。

卷 647_87 【咏史诗·白帝城】

胡曾

蜀江一带向东倾，江上巍峨白帝城。
自古山河归圣主，子阳虚共汉家争。

卷 647_88 【咏史诗·牛渚】

胡曾

温峤南归辍棹晨，燃犀牛渚照通津。
谁知万丈洪流下，更有朱衣跃马人。

卷 647_89 【咏史诗·朝歌】

胡曾

长嗟墨翟少风流，急管繁弦似寇仇。
若解闻韶知肉味，朝歌欲到肯回头。

卷 647_90 【咏史诗·谷口】

胡曾

一旦天真逐水流，虎争龙战为诸侯。
子真独有烟霞趣，谷口耕锄到白头。

卷 647_91 【咏史诗·武陵溪】

胡曾

一溪春水彻云根，流出桃花片片新。
若道长生是虚语，洞中争得有秦人。

卷 647_92 【咏史诗·大泽】

胡曾

白蛇初断路人通，汉祖龙泉血刃红。
不是咸阳将瓦解，素灵那哭月明中。

卷 647_93 【咏史诗·渑池】

胡曾

日照荒城芳草新，相如曾此挫强秦。
能令百二山河主，便作樽前击缶人。

卷 647_94 【咏史诗·岷山】

胡曾

晓日登临感晋臣，古碑零落岷山春。
松间残露频频滴，酷似当时堕泪人。

卷 647_95 【咏史诗·荥阳】

胡曾

汉祖东征屈未伸，荥阳失律纪生焚。
当时天下方龙战，谁为将军作谏文？

卷 647_96 【咏史诗·长城】

胡曾

祖舜宗尧自太平，秦皇何事苦苍生？
不知祸起萧墙内，虚筑防胡万里城。

卷 647_97 【咏史诗·赤壁】

胡曾

烈火西焚魏帝旗，周郎开国虎争时。
交兵不假挥长剑，已挫英雄百万师。

卷 647_98 【咏史诗·田横墓】

胡曾

古墓崔巍约路岐，歌传薤露到今时。
也知不去朝黄屋，只为曾烹酈食其。

卷 647_99 【咏史诗·青门】

胡曾

汉皇提剑灭咸秦，亡国诸侯尽是臣。
唯有东陵守高节，青门甘作种瓜人。

卷 647_100 【咏史诗·姑苏台】

胡曾

吴王恃霸弃雄才，贪向姑苏醉醪醅。
不觉钱塘江上月，一宵西送越兵来。

卷 647_101 【咏史诗·息城】

胡曾

息亡身入楚王家，回首春风一面花。
感旧不言长掩泪，只应翻恨有容华。

卷 647_102 【咏史诗·上蔡】

胡曾

上蔡东门狡兔肥，李斯何事忘南归。
功成不解谋身退，直待云阳血染衣。

卷 647_103 【咏史诗·武昌】

胡曾

王浚戈鋌发上流，武昌鸿业土崩秋。
思量铁锁真儿戏，谁为吴王画此筹？

卷 647_104 【咏史诗·鸿沟】

胡曾

虎倦龙疲白刃秋，两分天下指鸿沟。
项王不觉英雄挫，欲向彭门醉玉楼。

卷 647_105 【咏史诗·褒城】

胡曾

恃宠娇多得自由，骊山举火戏诸侯。
只知一笑倾人国，不觉胡尘满玉楼。

卷 647_106 【咏史诗·金陵】

胡曾

侯景长驱十万人，可怜梁武坐蒙尘。
生前不得空王力，徒向金田自舍身。

卷 647_107 【咏史诗·洛阳】

胡曾

石勒童年有战机，洛阳长啸倚门时。
晋朝不是王夷甫，大智何由得预知。

卷 647_108 【咏史诗·番禺】

胡曾

重冈复岭势崔巍，一卒当关万卒回。
不是大夫多辨说，尉他争肯筑朝台。

卷 647_109 【咏史诗·汨罗】

胡曾

襄王不用直臣筹，放逐南来泽国秋。
自向波间葬鱼腹，楚人徒倚济川舟。

卷 647_110 【咏史诗·彭泽】

胡曾

英杰那堪屈下僚，便栽门柳事萧条。
凤凰不共鸡争食，莫怪先生懒折腰。

卷 647_111 【咏史诗·涿鹿】

胡曾

涿鹿茫茫白草秋，轩辕曾此破蚩尤。
丹霞遥映祠前水，疑是成川血尚流。

卷 647_112 【咏史诗·洞庭】

胡曾

五月扁舟过洞庭，鱼龙吹浪水云腥。
轩辕黄帝今何在，回首巴山芦叶青。

卷 647_113 【咏史诗·嶓冢】

胡曾

夏禹崩来一万秋，水从嶓冢至今流。
当时若诉胼胝苦，更使何人别九州？

卷 647_114 【咏史诗·涂山】

胡曾

大禹涂山御座开，诸侯玉帛走如雷。
防风谩有专车骨，何事兹辰最后来？

卷 647_115 【咏史诗·商郊】

胡曾

莺啭商郊百草新，殷汤遗迹在荒榛。
谁知继桀为天子，便是当初祝网人。

卷 647_116 【咏史诗·傅岩】

胡曾

岩前版筑不求伸，方寸那希据要津。
自是武丁安寝夜，一宵宫里梦贤人。

卷 647_117 【咏史诗·钜桥】

胡曾

积粟成尘竟不开，谁知拒谏剖贤才？
武王兵起无人敌，遂作商郊一聚灰。

卷 647_118 【咏史诗·首阳山】

胡曾

孤竹夷齐耻战争，望尘遮道请休兵。
首阳山倒为平地，应始无人说姓名。

卷 647_119 【咏史诗·孟津】

胡曾

秋风飒飒孟津头，立马沙边看水流。
见说武王东渡日，戎衣曾此叱阳侯。

卷 647_120 【咏史诗·流沙】

胡曾

七雄戈戟乱如麻，四海无人得坐家。
老氏却思天竺住，便将徐甲去流沙。

卷 647_121 【咏史诗·邓城】

胡曾

邓侯城垒汉江干，自谓深根百世安。
不用三甥谋楚计，临危方觉噬脐难。

卷 647_122 【咏史诗·召陵】

胡曾

小白匡周入楚郊，楚王雄霸亦咆哮。
不思管仲为谋主，争取言征缩酒茅。

卷 647_123 【咏史诗·绵山】

胡曾

亲在要君召不来，乱山重叠使空回。
如何坚执尤人意，甘向岩前作死灰。

卷 647_124 【咏史诗·鲁城】

胡曾

鲁公城阙已丘墟，荒草无由认玉除。
因笑臧孙才智少，东门钟鼓祀鸛鷀。

卷 647_125 【咏史诗·骊山】

胡曾

行行西至一荒陂，因笑唐公不见机。
莫惜骊山输令尹，汉东宫阙早时归。

卷 647_126 【咏史诗·夹谷】

胡曾

夹谷莺啼三月天，野花芳草整相鲜。
来时不见侏儒死，空笑齐人失措年。

卷 647_127 【咏史诗·吴宫】

胡曾

草长黄池千里余，归来宗庙已丘墟。
出师不听忠臣谏，徒耻穷泉见子胥。

卷 647_128 【咏史诗·摩笄山】

胡曾

春草绵绵岱日低，山边立马看摩笄。
黄莺也解追前事，来向夫人死处啼。

卷 647_129 【咏史诗·房陵】

胡曾

赵王一旦到房陵，国破家亡百恨增。
魂断丛台归不得，夜来明月为谁明？

卷 647_130 【咏史诗·濮水】

胡曾

青春行役思悠悠，一曲汀蒲濮水流。
正见涂中龟曳尾，令人特地感庄周。

卷 647_131 【咏史诗·柏举】

胡曾

野田极目草茫茫，吴楚交兵此路傍。
谁料伍员入郢后，大开陵寝挹平王。

卷 647_132 【咏史诗·望夫山】

胡曾

一上青山便化身，不知何代怨离人。
古来节妇皆销朽，独尔不为泉下尘。

卷 647_133 【咏史诗·金义岭】

胡曾

凿开山岭引湘波，上去昭回不较多。
无限鹄临桥畔立，适来天道过天河。

卷 647_134 【咏史诗·云云亭】

胡曾

一上高亭日正晡，青山重叠片云无。
万年松树不知数，若个虬枝是大夫。

卷 647_135 【咏史诗·阿房宫】

胡曾

新建阿房壁未干，沛公兵已入长安。
帝王苦竭生灵力，大业沙崩固不难。

卷 647_136 【咏史诗·沙丘】

胡曾

年年游览不曾停，天下山川欲遍经。
堪笑沙丘才过处，銮舆风过鲍鱼腥。

卷 647_137 【咏史诗·咸阳】

胡曾

一朝阎乐统群凶，二世朝廷扫地空。
唯有渭川流不尽，至今犹绕望夷宫。

卷 647_138 【咏史诗·废丘山】

胡曾

此水虽非禹凿开，废丘山下重萦回。
莫言只解东流去，曾使章邯自杀来。

卷 647_139 【咏史诗·广武山】

胡曾

数罪楚师应夺气，底须多论破深艰。
仓皇斗智成何语，遗笑当时广武山。

卷 647_140 【咏史诗·长安】

胡曾

关东新破项王归，赤帜悠扬日月旗。
从此汉家无敌国，争教彭越受诛夷。

卷 647_141 【咏史诗·鸿门】

胡曾

项籍鹰扬六合晨，鸿门开宴贺亡秦。
樽前若取谋臣计，岂作阴陵失路人。

卷 647_142 【咏史诗·汉中】

胡曾

荆棘苍苍汉水湄，将坛烟草覆余基。
适来投石空江上，犹似龙颜纳谏时。

卷 647_143 【咏史诗·泚水】

胡曾

韩信经营按镞铙，临戎叱咤有谁加。
犹疑转战逢勍敌，更向军中问左车。

卷 647_144 【咏史诗·云梦】

胡曾

汉祖听谗不可防，伪游韩信果罹殃。
十处辛苦平天下，何事生擒入帝乡？

卷 647_145 【咏史诗·高阳】

胡曾

路入高阳感酈生，逢时长揖便论兵。
最怜伏轼东游日，下尽齐王七十城。

卷 647_146 【咏史诗·四皓庙】

胡曾

四皓忘机饮碧松，石岩云殿隐高踪。
不知俱出龙楼后，多在商山第几重。

卷 647_147 【咏史诗·霸陵】

胡曾

原头日落雪边云，犹放韩卢逐兔群。
况是四方无事日，霸陵谁识旧将军？

卷 647_148 【咏史诗·昆明池】

胡曾

欲出昆明万里师，汉皇习战此穿池。
如何一面图攻取，不念生灵气力疲。

卷 647_149 【咏史诗·回中】

胡曾

武皇无路及昆丘，青鸟西沈陇树秋。
欲问生前躬祀日，几烦龙驾到泾州。

卷 647_150 【咏史诗·东门】

胡曾

何人知足反田庐，玉管东门饯二疏。
岂是不荣天子禄，后贤那使久闲居。

卷 647_151 【咏史诗·射熊馆】

胡曾

汉帝荒唐不解忧，大夸田猎废农收。
子云徒献长杨赋，肯念高皇沐雨秋。

卷 647_152 【咏史诗·昆阳】

胡曾

师克由来在协和，萧王兵马固无多。
谁知大敌昆阳败，却笑前朝困楚歌。

卷 647_153 【咏史诗·七里滩】

胡曾

七里青滩映碧层，九天星象感严陵。
钓鱼台上无丝竹，不是高人谁解登？

卷 647_154 【咏史诗·颍川】

胡曾

古贤高尚不争名，行止由来动杳冥。
今日浪为千里客，看花惭上德星亭。

卷 647_155 【咏史诗·江夏】

胡曾

黄祖才非长者俦，祢衡珠碎此江头。
今来鹦鹉洲边过，惟有无情碧水流。

卷 647_156 【咏史诗·官渡】

胡曾

本初屈指定中华，官渡相持勒虎牙。
若使许攸财用足，山河争得属曹家。

卷 647_157 【咏史诗·灞岸】

胡曾

长安城外白云秋，萧索悲风灞水流。
因想汉朝离乱日，仲宣从此向荆州。

卷 647_158 【咏史诗·濡须桥】

胡曾

徒向濡须欲受降，英雄才略独无双。
天心不与金陵便，高步何由得渡江。

卷 647_159 【咏史诗·豫州】

胡曾

策马行行到豫州，祖生寂寞水空流。
当时更有三年寿，石勒寻为关下囚。

卷 647_160 【咏史诗·八公山】

胡曾

苻坚举国出西秦，东晋危如累卵晨。
谁料此山诸草木，尽能排难化为人。

卷 647_161 【咏史诗·下第】

胡曾

翰苑何时休嫁女，文昌早晚罢生儿。
上林新桂年年发，不许平人折一枝。

卷 647_162 【咏史诗·赠薛涛】

胡曾

万里桥边女校书，枇杷花下闭门居。
扫眉才子知多少，管领春风总不如。

第六百四十八卷

卷 648_1 【采莲】

方干

采莲女儿避残热，隔夜相期侵早发。指剥春葱腕似雪，
画桡轻拨蒲根月。兰舟尺速有输赢，先到河湾赌何物。
才到河湾分首去，散在花间不知处。

卷 648_2 【寄李频】

方干

众木又摇落，望群还不还。轩车在何处，雨雪满前山。
思苦文星动，乡遥钓渚闲。明年见名姓，唯我独何颜。

卷 648_3 【东溪别业寄吉州段郎中】

方干

前山含远翠，罗列在窗中。尽日人不到，一尊谁与同。

凉随莲叶雨，暑避柳条风。岂分长岑寂，明时有至公。

卷 648_4 【怀州客舍】

方干

误饮覃怀酒，谁知滞去程。朝昏太行色，坐卧沁河声。
白道穿秦甸，严鞞似戍城。邻鸡莫相促，游子自晨征。

卷 648_5 【中路寄喻皀先辈】

方干

求名如未遂，白首亦难归。送我尊前酒，典君身上衣。
寒芜随楚尽，落叶渡淮稀。莫叹干时晚，前心岂便非。

卷 648_6 【送赵明府还北】

方干

故园终不住，剑鹤在扁舟。尽室无余俸，还家得白头。
钟催吴岫晓，月绕渭河流。曾是栖安邑，恩期异日酬。

卷 648_7 【过朱协律故山】

方干

地下无余恨，人间得盛名。残篇续大雅，稚子托诸生。
度日山空暮，缘溪鹤自鸣。难收故交意，寒笛一声声。

卷 648_8 【途中寄刘沆】

方干

登车误相远，谈笑亦何因。路入潇湘树，书随巴蜀人。
敛衣寒犯雪，倾筐病看春。莫负髫年志，清朝作献臣。

卷 648_9 【送班主簿（一作少府）入谒荆南韦常侍】

方干

束书成远去，还计莫经春。倒篋唯求醉，登舟自笑贫。
波移彭蠡月，树没汉陵人。试吏曾趋府，旌幢自可亲。

卷 648_10 【夏日登灵隐寺后峰】

方干

绝顶无烦暑，登临三伏中。深萝难透日，乔木更含风。
山叠云霞际，川倾世界东。那知兹夕兴，不与古人同。

卷 648_11 【听新蝉寄张昼】

方干

细声频断续，审听亦难分。仿佛应移处，从容却不闻。
兰栖朝咽露，树隐暝吟云。莫遣乡愁起，吾怀只是君。

卷 648_12 【送喻坦之下第还江东】

方干

文战偶未胜，无令移壮心。风尘辞帝里，舟楫到家林。
过楚寒方尽，浮淮月正沈。持杯话来日，不听洞庭砧。

卷 648_13 【送姚舒下第游蜀】

方干

蜀路何迢递，怜君独去游。风烟连北虏，山水似东瓠。
九折盘荒坂，重江绕汉州。临邛一壶酒，能遣长卿愁。

卷 648_14 【旅次钱塘】

方干

此地似乡国，堪为朝夕吟。云藏吴相庙，树引越山禽。
潮落海人散，钟迟秋寺深。我来无旧识，谁见寂寥心？

卷 648_15 【别喻鳧】

方干

知心似古人，岁久分弥亲。离别波涛阔，留连槐柳新。
蠓陵寒赏酒，渔浦夜垂纶。自此星居后，音书岂厌频？

卷 648_16 【送相里烛】

方干

相逢未作期，相送定何之。不得长年少，那堪远别离。
泛湖乘月早，践雪过山迟。永望多时立，翻如在梦思。

卷 648_17 【君不来】

方干

闲花未零落，心绪已纷纷。久客无人见，新禽何处闻。
舟随一水远，路出万山分。夜月生愁望，孤光必照君。

卷 648_18 【将谒商州吕郎中，道出楚州，留献章中丞】

方干

江流盘复直，浮棹出家林。商洛路犹远，山阳春已深。
青云应有望，白发未相侵。才小知难荐，终劳许郭心。

卷 648_19 【金州客舍】

方干

卷箔群峰暮，萧条未掩关。江流嶓冢雨，路入汉家山。
落叶欹眠后，孤砧倚望间。此情偏耐醉，难遣酒罍闲。

卷 648_20 【途中逢孙辂因得李频消息】

方干

灞上寒仍在，柔条亦自新。山河虽度腊，雨雪未知春。
正忆同袍者，堪逢共国人。衔杯益无语，与尔转相亲。

卷 648_21 【送从兄郢（一作韦郢，一作途中别孙璐）】

方干

道路本无限，又应何处逢。流年莫虚掷，华发不相容。
野渡波摇月，空城雨翳钟。此心随去马，迢递过千峰。

卷 648_22 【送许温（一作浑）】

方干

壮岁分襟切，少年心正同。当闻千里去，难遣一尊空。
翳烛蒹葭雨，吹帆橘柚风。明年见亲族，尽集在怀中。

卷 648_23 【镜中别业二首（一作镜湖西岛闲居）】

方干

寒山压镜心，此处是家林。梁燕窥春醉，岩猿学夜吟。
云连平地起，月向白波沈。犹自闻钟角，栖身可在深。

世人如不容，吾自纵天慵。落叶凭风扫，香粳倩水舂。
花期连郭雾，雪夜隔湖钟。身外无能事，头宜白此峰。

卷 648_24 【经周处士故居】

方干

愁吟与独行，何事不伤情。久立钓鱼处，唯闻啼鸟声。
山蔬和草嫩，海树入篱生。吾在兹溪上，怀君恨不平。

卷 648_25 【赠喻兕】

方干

所得非众语，众人那得知。才吟五字句，又白几茎髭。
月阁欹眠夜，霜轩正坐时。沈思心更苦，恐作满头丝。

卷 648_26 【早发洞庭】

方干

长天接广泽，二气共含秋。举目无平地，何心恋直钩。
孤钟鸣大岸，片月落中流。却忆鸱夷子，当时此泛舟。

卷 648_27 【贻钱塘县路明府（一作感怀）】

方干

志业不得力，到今犹苦吟。吟成五字句，用破一生心。
世路屈声远，寒溪怨气深。前贤多晚达，莫怕鬓霜侵。

卷 648_28 【湖上言事寄长城喻明府】

方干

吟霜与卧云，此兴亦甘贫。吹箭落翠羽，垂丝牵锦鳞。
满湖风撼月，半日雨藏春。却笑萦簪组，劳心字远人。

卷 648_29 【涵碧亭（洋州于中丞宰东阳日置）】

方干

高低竹杂松，积翠复留风。路极阴溪里，寒生暑气中。
闲云低覆草，片水静涵空。方见洋源牧，心侔造化功。

卷 648_30 【除夜】

方干

永怀难自问，此夕众愁兴。晓韵侵春角，寒光隔岁灯。
心燃一寸火，泪结两行冰。煦育诚非远，阳和又欲升。

卷 648_31 【赠许牋山人】

方干

才子醉更逸，一吟倾一觴。支颐忍有得，摇笔便成章。
王粲实可重，祢衡争不狂。何时应会面，梦里是潇湘。

卷 648_32 【赠功成将】

方干

定难在明略，何曾劳战争。飞书谕强寇，计日下重城。
深雪移军夜，寒笳出塞情。苦心殊易老，新发早年生。

卷 648_33 【白艾原客】

方干

原上桑柘瘦，再来还见贫。沧州几年隐，白发一茎新。
败叶平空堑，残阳满近邻。闲言说知己，半是学禅人。

卷 648_34 【朔管】

方干

寥寥落何处，一夜过胡天。送苦秋风外，吹愁白发边。
望乡皆下泪，久戍尽休眠。寂寞空沙晓，开眸片月悬。

卷 648_35 【忆故山】

方干

旧山长系念，终日卧边亭。道路知己远，梦魂空再经。
秋泉凉好引，乳鹤静宜听。独上高楼望，蓬身且未宁。

卷 648_36 【冬夜泊僧舍】

方干

江东寒近腊，野寺水天昏。无酒能消夜，随僧早闭门。
照墙灯焰细，著瓦雨声繁。漂泊仍千里，清吟欲断魂。

卷 648_37 【新秋独夜寄戴叔伦】

方干

遥夜独不卧，寂寥庭户中。河明五陵上，月满九门东。
万里亲朋散，故园沧海空。归怀正南望，此夕起秋风。

卷 648_38 【送沛县司马丞之任】

方干

举酒一相劝，逢春聊尽欢。羁游故交少，远别后期难。
路上野花发，雨中青草寒。悠悠两都梦，小沛与长安。

卷 648_39 【送卢评事东归（一作戴叔伦诗，题云送友人东归）】

方干

万里杨柳色，出关随故人。轻烟覆流水，落日照行尘。
积梦江湖阔，忆家兄弟贫。裴回灞亭上，不语共伤春。

卷 648_40 【清明日送邓芮还乡（一作戴叔伦诗）】

方干

钟鼓喧离室，车徒促夜装。晓榆新变火，轻柳暗飞霜。
转镜看华发，传杯话故乡。每嫌儿女泪，今日自沾裳。

第六百四十九卷

卷 649_1 【送崔拾遗出使江东】

方干

九门思谏诤，万里采风谣。关外逢秋月，天涯过晚潮。
雁飞云杳杳，木落浦萧萧。空怨他乡别，回舟暮寂寥。

卷 649_2 【重阳日送洛阳李丞之任】

方干

为文通绝境，从宦及良辰。洛下知名早，腰边结绶新。
且倾浮菊酒，聊拂染衣尘。独恨沧州侣，愁来别故人。

卷 649_3 【江州送李侍御归东洛】

方干

独乘骢马去，不并旅人还。中外名卿贵，田园高步闲。

暮春经楚县，新月上淮山。道路空瞻望，轩车不敢攀。

卷 649_4 【送郭太祝归江东】

方干

乡人去欲尽，北雁又南飞。京洛风尘久，江淮音信稀。
旧山知独往，一醉莫相违。未得解羁旅，无劳问是非。

卷 649_5 【送李恬及第后还贝州】

方干

成名年少日，就业圣人书。擢桂谁相比，簪金已不如。
东城送归客，秋日待征车。若到清潭畔，儒风变里闾。

卷 649_6 【收两京后还上都兼访一二亲故】

方干

离堂千里客，归骑五陵人。路转函关晚，烟开上苑新。
天涯将野服，阙下见乡亲。问得存亡事，裁诗寄海滨。

卷 649_7 【送汶上王明府之任】

方干

何时到故乡，归去佩铜章。亲友移家尽，闾阎百战伤。
背关余草木，出塞足风霜。遗老应相贺，知君不下堂。

卷 649_8 【湖南使院遣情送江夏贺侍郎】

方干

云雨一消散，悠悠关复河。俱从泛舟役，遂隔洞庭波。
楚水去不尽，秋风今更过。无由得相见，却恨寄书多。

卷 649_9 【过申州作】

方干

万人曾死战，几户免刀兵。井邑初安堵，儿童未长成。
凉风吹古木，野火烧残营。寥落千余里，山高水复清。

卷 649_10 【汝南过访田评事】

方干

移家近汉阴，不复问华簪。买酒宜城远，烧田梦泽深。
暮山逢鸟入，寒水见鱼沈。与物皆无累，终年惬本心。

卷 649_11 【送道上人游方】

方干

律仪通外学，诗思入玄关。烟景随人别，风姿与物闲。
贯花留静室，咒水度空山。谁识浮云意，悠悠天地间。

卷 649_12 【送饶州王司法之任兼寄朱处士】

方干

莫辞还作吏，且喜速回车。留醉悲残岁，含情寄远书。
共看衰老近，转觉宦名虚。遥想清溪畔，幽人得自如。

卷 649_13 【詹碓山居】

方干

爱此栖心静，风尘路已赊。十余茎野竹，一两树山花。
绕石开泉细，穿罗引径斜。无人会幽意，来往在烟霞。

卷 649_14 【晓角】

方干

画角吹残月，寒声发戍楼。立霜嘶马怨，攒磳泣兵愁。
燕雁鸣云畔，胡风冷草头。罢闻三会后，天迥晓星流。

卷 649_15 【冬日】

方干

烧火掩关坐，穷居客访稀。冻云愁暮色，寒日淡斜晖。
穿牖竹风满，绕庭云叶飞。已嗟周一岁，羁寓尚何依。

卷 649_16 【残秋送友】

方干

早为千里别，况复是秋残。木叶怨先老，江云愁暮寒。
交情如水淡，离酒泛杯宽。料想还家后，休吟行路难。

卷 649_17 【客行】

方干

藕叶缀为衣，东西泣路岐。乡心日落后，身计酒醒时。
触目多添感，凝情足所思。羁愁难尽遣，行坐一低眉。

卷 649_18 【秋夜】

方干

度鸿惊睡醒，欹枕已三更。梦破寂寥思，灯残零落明。
空窗闲月色，幽壁静虫声。况是离乡久，依然无限情。

卷 649_19 【新月】

方干

入夜天西见，蛾眉冷素光。潭鱼惊钓落，云雁怯弓张。
隐隐临珠箔，微微上粉墙。更怜三五夕，仙桂满轮芳。

卷 649_20 【滁上怀周贺】

方干

就枕忽不寐，孤怀兴叹初。南谿收旧历，上苑绝来书。
暝雪细声积，晨钟寒韵疏。侯门昔弹铗，曾共食江鱼。

卷 649_21 【寄石湓清越上人】

方干

寺处唯高僻，云生石枕前。静吟因得句，独夜不妨禅。
窗接停猿树，岩飞浴鹤泉。相思有书札，俱倩猎人传。

卷 649_22 【陈式水墨山水】

方干

造化有功力，平分归笔端。溪如冰后听，山似烧来看。
立意雪髯出，支颐烟汗干。世间从尔后，应觉致名难。

卷 649_23 【陈秀才亭际木兰】

方干

昔见初栽日，今逢成树时。存思心更感，绕看步还迟。
蝶舞摇风蕊，莺啼含露枝。裴回不忍去，应与醉相宜。

卷 649_24 【赠镜公】

方干

幽独度遥夜，夜清神更闲。高风吹越树，细露湿湖山。
月皎微吟后，钟鸣不寐间。如教累簪组，此兴岂相关？

卷 649_25 【登雪窦僧家】

方干

登寺寻盘道，人烟远更微。石窗秋见海，山霭暮侵衣。
众木随僧老，高泉尽日飞。谁能厌轩冕，来此便忘机。

卷 649_26 【途中逢进士许巢】

方干

声望去已远，门人无不知。义行相识处，贫过少年时。
妨寐夜吟苦，爱闲身达迟。难求似君者，我去更逢谁。

卷 649_27 【赠玛瑙山禅者（一作赠玛瑙禅师归京）】

方干

苕草不停兽，因师山更灵。村林朝乞食，风雨夜开扃。
井味兼松粉，云根着净瓶。尘劳如醉梦，对此暂能醒。

卷 649_28 【酬故人陈义都】

方干

远别那无梦，重游自有期。半年乡信到，两地赤心知。
坐久吟移调，更长砚结澌。文人才力薄，终怕阿戎欺。

卷 649_29 【闰春】

方干

幂幂复苍苍，微和傍早阳。前春寒已尽，待闰日犹长。
柳变虽因雨，花迟岂为霜。自兹延圣历，谁不驻年光。

卷 649_30 【方著作画竹】

方干

叠叶与高节，俱从毫末生。流传千古誉，研炼十年情。
向月本无影，临风疑有声。吾家钓台畔，似此两三茎。

卷 649_31 【题友人山花】

方干

平明方发尽，为待好风吹。不见移来日，先愁落去时。
浓香薰叠叶，繁朵压卑枝。坐看皆终夕，游蜂似有期。

卷 649_32 【赠诗僧怀静（一作观）】

方干

几生余习在，时复作微吟。坐夏莓苔合，行禅桧柏深。
入山成白首，学道是初心。心地不移变，徒云寒暑侵。

卷 649_33 【赠许牍秀才】

方干

理论与妙用，皆从人外来。山河澄正气，雪月助宏才。
傲世寄渔艇，藏名归酒杯。升沈在方寸，即恐起风雷。

卷 649_34 【送于丹】

方干

至业是至宝，莫过心自知。时情如甚畅，天道即无私。
入洛霜霰苦，离家兰菊衰。焚舟不回顾，薄暮又何之。

卷 649_35 【送人游（一作之）日本国】

方干

苍茫大荒外，风教即难知。连夜扬帆去，经年到岸迟。
波涛含左界，星斗定东维。或有归风便，当为相见期。

卷 649_36 【东溪言事寄于丹】

方干

日月昼夜转，年光难驻留。轩窗才过雨，枕簟即知秋。
草际鸟行出，溪中虹影收。唯君壮心在，应笑卧沧洲。

卷 649_37 【暮发七里滩夜泊严光台下】

方干

一瞬即七里，箭驰犹是难。
檣边走岚翠，枕底失风湍。
但讶猿鸟定，不知霜月寒。
前贤竟何益，此地误垂竿。

卷 649_38 【处州洞溪】

方干

气象四时清，无人画得成。
众山寒叠翠，两派绿分声。
坐月何曾夜，听松不似晴。
混元融结后，便有此溪名。

卷 649_39 【称心寺中岛】

方干

水木深不极，似将星汉连。
中州唯此地，上界别无天。
雪折停猿树，花藏浴鹤泉。
师为终老意，日日复年年。

卷 649_40 【岁晚苦寒】

方干

地气寒不畅，严风无定时。挑灯青烬少，呵笔尺书迟。
白兔没已久，晨鸡僵未知。伫看开圣历，喧煦立为期。

卷 649_41 【杜鹃花】

方干

未问移栽日，先愁落地时。疏中从间叶，密处莫烧枝。
郢客教谁探，胡蜂是自知。周回两三步，常有醉乡期。

卷 649_42 【山中】

方干

散拙亦自遂，粗将猿鸟同。飞泉高泻月，独树迥含风。
果落盘盂上，云生篋笥中。未甘明圣日，终作钓渔翁。

卷 649_43 【路支使小池】

方干

儿童戏穿凿，咫尺见津涯。藓岸和纤草，松泉溅浅沙。
光含半床月，影入一枝花。到此无醒日，当时有习家。

卷 649_44 【清源标公】

方干

师为众人重，始得众人师。年到白头日，行如新戒时。
瓶添放鱼涧，窗迥袅猿枝。此地堪终老，迷痴自不知。

卷 649_45 【题雪窦禅师壁（一作赠雪窦峰禅师）】

方干

飞泉溅禅石，瓶注亦生苔。海上山不浅，天边人自来。
长年随桧柏，独夜任风雷。猎者闻疏磬，知师入定回。

卷 649_46 【重寄金山寺僧】

方干

风涛匝山寺，磬韵达渔船。此处别师久，远怀无信传。
月华妨静烛，鸟语答幽禅。已见如如理，灰心应不然。

卷 649_47 【哭胡珪】

方干

才高登上第，孝极歿庐茔。一命何无定，片言徒有声。
故园花自发，新冢月初明。寂寞重泉里，岂知春物荣。

卷 649_48 【与清溪赵明府】

方干

清规暂趋府，独立与谁亲。遂性无非酒，求闲却爱贫。
林泉应入梦，印绶莫留人。王事闻多暇，吟来几首新。

卷 649_49 【送剡县陈永秩满归越】

方干

俸禄三年后，程途一月间。舟中非客路，镜里是家山。
密雪沾行袂，离杯变别颜。古人唯贺满，今挈解由还。

卷 649_50 【示乡叟】

方干

暮齿甘衰谢，逢人惜别离。青山前代业，老树此身移。
买药将衣尽，寻方见字迟。如何镊残鬓，览镜变成丝。

卷 649_51 【游竹林寺】

方干

得路到深寺，幽虚曾识名。藓浓阴砌古，烟起暮香生。
曙月落松翠，石泉流梵声。闻僧说真理，烦恼自然轻。

卷 649_52 【陆处士别业】

方干

问道远相访，无人觉路长。夜深回钓楫，月影出书床。
蝉噪蓼花发，禽来山果香。多时欲归去，西望又斜阳。

卷 649_53 【赠中岳僧】

方干

坐来丛木大，谁见入岩年。多病长留药，无忧亦是禅。
支床移片石，舂粟引高泉。但愿求心法，逢谁即拟传。

卷 649_54 【寄普州贾司仓岛】

方干

乱山重复叠，何路访先生。岂料多才者，空垂不世名。
闲曹犹得醉，薄俸亦胜耕。莫问吟诗石，年年芳草平。

卷 649_55 【送镜空上人游江南】

方干

去住如云鹤，飘然不可留。何山逢后夏，一食在孤舟。
细雨莲塘晚，疏蝉橘岸秋。应怀旧溪月，夜过石窗流。

卷 649_56 【新正】

方干

华门惆怅内，时节暗来频。每见新正雪，长思故国春。
云西斜去雁，江上未归人。又一年为客，何媒得到秦。

卷 649_57 【夜听步虚】

方干

寂寂永宫里，天师朝礼声。步虚闻一曲，浑欲到三清。
瑞草秋风起，仙阶夜月明。多年远尘意，此地欲铺平。

卷 649_58 【题碧溪山禅老】

方干

师步有云随，师情唯鹤知。萝迷收朮路，雪隔出溪时。
竹狖窥沙井，岩禽停桧枝。由来傲卿相，卧稳答书迟。

卷 649_59 【寒食宿先天寺无可上人房】

方干

双扉桧下开，寄宿石房苔。幡北灯花动，城西雪霰来。
收棋想云梦，罢茗议天台。同忆前年腊，师初白阁回。

卷 649_60 【中秋月】

方干

凉霄烟霭外，三五玉蟾秋。列野星辰正，当空鬼魅愁。
泉澄寒魄莹，露滴冷光浮。未折青青桂，吟看不忍休。

卷 649_61 【暮冬书怀呈友人（一作喻鳧诗）】

方干

空为梁甫吟，谁竟是知音。风雪生寒夜，乡园来旧心。
沧江孤棹迥，白阁一钟深。君子久忘我，此怀甘自沈。

卷 649_62 【赠江南僧】

方干

忘机室亦空，禅与沃州同。唯有半庭竹，能生竟日风。
思山海月上，出定印香终。继后传衣者，还须立雪中。

卷 649_63 【柳】

方干

摇曳惹风吹，临堤软胜丝。态浓谁为识，力弱自难持。
学舞枝翻袖，呈妆叶展眉。如何一攀折，怀友又题诗。

卷 649_64 【送姚合员外赴金州】

方干

受诏从华省，开旗发帝州。野烟新驿曙，残照古山秋。
树势连巴没，江声入楚流。唯应化行后，吟句上闲楼。

卷 649_65 【送江阴霍明府之任】

方干

遥遥去舸新，浸郭苇兼蘋。树列巢滩鹤，乡多钓浦人。
虹分阳羨雨，浪隔广陵春。知竟三年秩，琴书外是贫。

卷 649_66 【送友及第归浙东（一作送王羽登科后归江东。又见《戴叔伦集》，题作送王翁信及第后归江东归隐）】

方干

南行无俗侣，秋雁与寒云。野趣自多惬，乡名人共闻。
吴山中路断，浙水半江分。此地登临惯，攄情一送君。

卷 649_67 【山中即事】

方干

趋世非身事，山中适性情。野花多异色，幽鸟少凡声。
树影搜凉卧，苔光破碧行。闲寻采药处，仙路渐分明。

卷 649_68 【过黄州作】

方干

弭节齐安郡，孤城百战残。傍村林有虎，带郭县无官。
暮角梅花怨，清江桂影寒。黍离缘底事，撩我起长叹。

第六百五十卷

卷 650_1 【元日】

方干

晨鸡两遍报更阑，刁斗无声晓漏干。暖日映山调正气，
东风入树舞残寒。轩车欲识人间感，献岁须来帝里看。
才酌屠苏定年齿，坐中惟笑鬓毛斑。

卷 650_2 【别从兄郢】

方干

展翅开帆只待风，吹嘘成事古今同。已呼断雁归行里，
全胜枯鳞在辙中。若许死前恩少报，终期言下命潜通。
临岐再拜无余事，愿取文章达圣聪。

卷 650_3 【寄江陵王少府】

方干

分手频曾变寒暑，迢迢远意各何如。波涛一阻两乡梦，

岁月无过双鲤鱼。吟处落花藏笔砚，睡时斜雨湿图书。
此来俗辈皆疏我，唯有故人心不疏。

卷 650_4 【题睦州乌龙山禅居】

方干

曙后月华犹冷湿，自知坐卧逼天宫。晨鸡未暇鸣山底，
早日先来照屋东。人世驱驰方丈内，海波摇动一杯中。
伴师长住应难住，归去仍须入俗笼。

卷 650_5 【寄杭州于郎中】

方干

虽云圣代识贤明，自是山河应数生。大雅篇章无弟子，
高门世业有公卿。入楼早月中秋色，绕郭寒潮半夜声。
白屋青云至悬阔，愚儒肝胆若为倾。

卷 650_6 【寄灵武胡常侍】

方干

青云直上路初通，已在明君倚注中。欲遣为霖安九有，

先令作相赞东宫。自从忠说承天眷，更用文篇续国风。
最是何人感恩德，谢敷星下钓渔翁。

卷 650_7 【上张舍人】

方干

海内芳声谁可并，承家三代相门深。剖符已副东人望，
援笔曾传圣主心。此地清廉惟饮水，四方焦热待为霖。
他年莫学鸱夷子，远泛扁舟用铸金。

卷 650_8 【题慈溪张丞壁】

方干

因君貳邑蓝溪上，遣我维舟红叶时。共向乡中非半面，
俱惊鬓里有新丝。伫看孤洁成三考，应笑愚疏舍一枝。
貌似故人心尚喜，相逢况是旧相知。

卷 650_9 【赠邻居袁明府】

方干

隔竹每呼皆得应，二心亲熟更如何。文章锻炼犹相似，

年齿参差不校多。雨后卷帘看越岭，更深欹枕听湖波。
朝昏幸得同醒醉，遮莫光阴自下坡。

卷 650_10 【孙氏林亭】

方干

池亭才有二三亩，风景胜于千万家。瑟瑟林排全巷竹，
猩猩血染半园花。并床欹枕逢春尽，援笔持杯到日斜。
卅角相知成白首，而今欢笑莫咨嗟。

卷 650_11 【漳州阳亭言事寄于使君】

方干

谢守登城对远峰，金英泛泛满金钟。楼头风景八九月，
床下水云千万重。红旆朝昏虽许近，清才今古定难逢。
鲤鱼纵是凡鳞鬣，得在鹰门合作龙。

卷 650_12 【别胡中丞】

方干

二年朝夜见双旌，心魄知恩梦亦惊。幽贱粗能分菽麦，

从容岂合遇公卿。吹嘘若自毫端出，羽翼应从肉上生。
却恨此身唯一死，空将一死报犹轻。

卷 650_13 【游张公洞寄陶校书】

方干

步步势穿江底去，此中危滑转身难。下蒸阴气松萝湿，
外制温风杖屦寒。数里烟云方觉异，前程世界更应宽。
由来委曲寻仙路，不似先生换骨丹。

卷 650_14 【题睦州郡中千峰榭】

方干

岂知平地似天台，朱户深沈别径开。曳响露蝉穿树去，
斜行沙鸟向池来。窗中早月当琴榻，墙上秋山入酒杯。
何事此中如世外，应缘羊祜是仙才。

卷 650_15 【登新城县楼赠蔡明府】

方干

杨震东来是宦游，政成登此自消忧。草中白道穿村去，

树里清溪照郭流。纵目四山宜永日，开襟五月似高秋。
不知县籍添新户，但见川原桑柘稠。

卷 650_16 【和于中丞登扶风亭】

方干

避石攀萝去不迷，行时举步似丹梯。东轩海日已先照，
下界晨鸡犹未啼。郭里云山全占寺，村前竹树半藏溪。
谢公吟望多来此，此地应将岷首齐。

卷 650_17 【赠信州高员外】

方干

溪势盘回绕郡流，饶阳春色满溪楼。岂唯啼鸟催人醉，
更有繁花笑客愁。蹇拙命中迷直道，仁慈风里驻扁舟。
膺门若感深恩去，终杀微躯未足酬。

卷 650_18 【漳州于使君罢郡如之任漳南去上国二十四州...亲故】

方干

漳南罢郡如之任，二十四州相次迎。泊岸旗幡邮吏拜，

连山风雨探人行。月中倚棹吟渔浦，花底垂鞭醉凤城。
圣主此时思共理，又应何处救苍生？

卷 650_19 【送弟子伍秀才赴举】

方干

天遣相门延积庆，今同太庙荐嘉宾。柳条此日同谁折，
桂树明年为尔春。倚棹寒吟渔浦月，垂鞭醉入凤城尘。
由来不要文章得，要且文章出众人。

卷 650_20 【贻高说】

方干

都缘相府有宗兄，却恐妨君正路行。石上长松自森秀，
雪中孤玉更凝明。西陵晓月中秋色，北固军鼙半夜声。
幸有清才与洪笔，何愁高节不公卿。

卷 650_21 【题长洲陈明府小亭】

方干

坐看孤峭却劳神，还是微吟到日曛。松鹤认名呼得下，

沙蝉飞处听犹闻。夜阑亦似深山月，雨后唯关满屋云。
便此逍遥应不易，朱衣红旆未容君。

卷 650_22 【送朱二十赴涟水】

方干

到县却应嫌水阔，离家终是见山疏。笙歌不驻难辞酒，
舟楫将行负担书。为政必能安楚老，向公犹可钓淮鱼。
鸾凰取便多如此，掠地斜飞上太虚。

卷 650_23 【德政上睦州胡中丞】

方干

上德由来合动天，旌旗到日是丰年。群书已熟无人似，
五字研成举世传。莫道政声同宇宙，须知紫气满山川。
岂唯里巷皆苏息，犹有恩波及钓船。

卷 650_24 【袁明府以家酝寄余余以山梅答赠非唯四韵兼亦双关】

方干

封匏寄酒提携远，织笼盛梅答赠迟。九度搅和谁用法，

四边窥摘自攀枝。樽罍泛蚁堪尝日，童稚驱禽欲熟时。
毕卓醉狂潘氏少，倾来掷去恰相宜。

卷 650_25 【上杭州姚郎中】

方干

能除疾瘼似良医，一郡乡风当日移。身贵久离行药伴，
才高独作后人师。春游下马皆成宴，吏散看山即有诗。
借问公方与文道，而今中夏更传谁？

卷 650_26 【送叶秀才赴举兼呈吕少监】

方干

君辞旧里一年期，艺至心身亦自知。尊尽离人看北斗，
月寒惊鹊绕南枝。书回册市砧应绝，棹出村潭菊未衰。
与尔相逢终不远，昨闻秘监在台墀。

卷 650_27 【自缙云赴郡溪流百里轻棹一发曾不崇朝...段郎中】

方干

激箭溪湍势莫凭，飘然一叶若为乘。仰瞻青壁开天罅，

斗转寒湾避石棱。巢鸟夜惊离岛树，啼猿昼怯下岩藤。
此中明日寻知己，恐似龙门不易登。

卷 650_28 【胡中丞早梅】

方干

不独闲花不共时，一株寒艳尚参差。凌晨未喷含霜朵，
应候先开亚水枝。芬郁合将兰并茂，凝明应与雪相宜。
谢公吟赏愁飘落，可得更拈长笛吹。

卷 650_29 【牡丹】

方干

借问庭芳早晚栽，座中疑展画屏开。花分浅浅胭脂脸，
叶堕殷殷膩粉腮。红砌不须夸芍药，白蘋何用逞重台。
殷勤为报看花客，莫学游蜂日日来。

卷 650_30 【观项信水墨】

方干

险峭虽从笔下成，精能皆自意中生。倚云孤桧知无朽，

挂壁高泉似有声。转扇惊波连岸动，回灯落日向山明。
小年师祖过今祖，异域应传项信名。

卷 650_31 【书桃花坞周处士壁】

方干

醉吟雪月思深苦，思苦神劳华发生。自学古贤修静节，
唯应野鹤识高情。细泉出石飞难尽，孤烛和云湿不明。
何事懒于嵇叔夜，更无书札答公卿。

卷 650_32 【题桐庐谢逸人（一作题庐峰谢山人）江居】

方干

少小高眠无一事，五侯勋盛欲如何。湖边倚杖寒吟苦，
石上横琴夜醉多。鸟自树梢随果落，人从窗外卸帆过。
由来朝市为真隐，可要栖身向薜萝？

卷 650_33 【叙雪寄喻皀】

方干

密片无声急复迟，纷纷犹胜落花时。从容不觉藏苔径，

宛转偏宜傍柳丝。透室虚明非月照，满空回散是风吹。
高人坐卧才方逸，援笔应成六出词。

卷 650_34 【叙雪寄喻皀（一作杜荀鹤）】

方干

密片繁声旋不销，萦风杂霰转飘飘。澄江莫蔽长流色，
衰柳难黏自动条。湿气添寒酤酒夜，素花迎曙卷帘朝。
此时明径无行迹，唯望徽之问寂寥。

卷 650_35 【哭秘书姚少监（一作姚丞）】

方干

寒空此夜落文星，星落文留万古名。入室几人成弟子，
为儒是处哭先生。家无谏草逢明代，国有遗篇续正声。
晓向平原陈葬礼，悲风吹雨湿铭旌。

卷 650_36 【送人宰永泰】

方干

北人虽泛南流水，称意南行莫恨赊。道路先经毛竹岭，

风烟渐近刺桐花。舟停渔浦犹为客，县入樵溪似到家。
下马政声王事少，应容闲吏日高衙。

卷 650_37 【旅次洋（一作扬）州寓居郝氏林亭】

方干

举目纵然非我有，思量似在故山时。鹤盘远势投孤屿，
蝉曳残声过别枝。凉月照窗欹枕倦，澄泉绕石泛觴迟。
青云未得平行去，梦到江南身旅羈。

卷 650_38 【茅山赠洪（一作赠高洪）拾遗】

方干

圣代谏臣停谏舌，求归故里傲云霞。溪头讲树缆渔艇，
篋里朝衣输酒家。但爱身闲辞禄俸，那嫌岁计在桑麻。
我来幸与诸生异，问答时容近绛纱。

卷 650_39 【睦州（一和题陆州）吕郎中郡中（一作内）环溪亭】

方干

为是仙才登望处，风光便似武陵春。闲花半落犹迷蝶，

白鸟双飞不避人。树影兴余侵枕簟，荷香坐久著衣巾。
暂来此地非多日，明主那容借寇恂。

卷 650_40 【赠华阴隐者】

方干

少微夜夜当仙掌，更有何人在此居。花月旧应看浴鹤，
松萝本自伴删书。素琴醉去经宵枕，衰发寒来向日梳。
故国多年归未遂，因逢此地忆吾庐。

卷 650_41 【上杭州杜中丞】

方干

昔用雄才登上第，今将重德合明君。苦心多为安民术，
援笔皆成出世文。寒角细吹孤峤月，秋涛横卷半江云。
掠天逸势应非久，一鹗那栖众鸟群。

卷 650_42 【赠（一作上）处州段郎中】

方干

幸见仙才领郡初，郡城孤峭似仙居。杉萝色里游亭榭，

瀑布声中阅簿书。德重自将天子合，情高元与世人疏。
寒潭是处清连底，宴席何心望食鱼。

卷 650_43 【书法华寺上方禅（一作禅师，一作僧壁）】

方干

砌下松巅有鹤栖，孤猿亦在鹤边啼。卧闻雷雨归岩早，
坐见星辰去地低。一径穿缘应就郭，千花掩映似无溪。
是非生死多烦恼，此日蒙师为破迷。

卷 650_44 【书吴道隐林亭】

方干

藓榭莎亭萝筱阴，依稀气象似山林。橘枝亚路黄苞重，
井脉牵湖碧甃深。稚子遮门留熟客，惊蝉入座避游禽。
四邻不见孤高处，翻笑腾腾只醉吟。

卷 650_45 【陪王大夫泛湖】

方干

去去凌晨回见星，木兰舟稳画桡轻。白波潭上鱼龙气，

红树林中鸡犬声。蜜炬烧残银汉昃，羽觞飞急玉山倾。
此时检点诸名士，却是渔翁无姓名。

卷 650_46 【赠会稽张少府】

方干

高节何曾似任官，药苗香洁备常餐。一分酒户添犹得，
五字诗名隐即难。笑我无媒生鹤发，知君有意忆渔竿。
明年莫便还家去，镜里云山且共看。

卷 650_47 【送郑台处士归绛岩】

方干

荣启先生挟琴去，厌寻灵胜忆岩栖。白猿垂树窗边月，
红鲤惊钩竹外溪。惯采药苗供野馔，曾书蕉叶寄新题。
古贤犹怆河梁别，未可匆匆便解携。

卷 650_48 【因话天台胜异仍送罗道士】

方干

积翠千层一径开，遥盘山腹到琼台。藕花飘落前岩去，

桂子流从别洞来。石上丛林碍星斗，窗边瀑布走风雷。
纵云孤鹤无留滞，定恐烟萝不放回。

卷 650_49 【哭喻皀先辈】

方干

日夜役神多损寿，先生下世未中年。撰碑纵托登龙伴，
营奠应支卖鹤钱。孤垄阴风吹细草，空窗湿气渍残篇。
人间别更无冤事，到此谁能与问天。

卷 650_50 【湖北有茅斋湖西有松岛轻棹往返颇谐素心因成四韵】

方干

湖北湖西往复还，朝昏只处自由间。暑天移榻就深竹，
月夜乘舟归浅山。绕砌紫鳞欹枕钓，垂檐野果隔窗攀。
古贤暮齿方如此，多笑愚儒鬓未斑。

卷 650_51 【鉴湖西岛言事】

方干

慵拙幸便荒僻地，纵听猿鸟亦何愁。偶斟药酒欺梅雨，

却著寒衣过麦秋。岁计有时添橡实，生涯一半在渔舟。
世人若便无知己，应向此溪成白头。

卷 650_52 【山中言事】

方干

欹枕亦吟行亦醉，卧吟行醉更何营。贫来犹有故琴在，
老去不过新发生。山鸟踏枝红果落，家童引钓白鱼惊。
潜夫自有孤云侣，可要王侯知姓名。

卷 650_53 【赠萧山彭少府】

方干

作尉孜孜更寒苦，操心至癖不为清。虽将剑鹤支残债，
犹有歌篇取盛名。尽拟勤求为弟子，皆将疑义问先生。
与君相识因儒术，岁月弥多别有情。

卷 650_54 【赠式上人】

方干

纵居犍角喧阗处，亦共云溪邃僻同。万虑全离方寸内，

一生多在五言中。菱荷叶上难停雨，松桧枝间自有风。
莫笑旅人终日醉，吾将大醉与禅通。

卷 650_55 【赠钱塘湖上唐处士】

方干

我爱君家似洞庭，冲湾泼岸夜波声。蟾蜍影里清吟苦，
舴艋舟中白发生。常共酒杯为伴侣，复闻纱帽见公卿。
莫言举世无知己，自有孤云识此情。